

۱
اصول فقہ

جزء اول

اصول فقہ



تر

دار الفنونہ عثمانی حقوق فاکولتہ سی اصول فقہ معلمی

مجلس اعیان اعضاسندن

محمد سید



استانبول - مطبعہ عامرہ

۱۳۳۳

2

بِسْمِ اللَّهِ الرَّحْمَنِ الرَّحِيمِ
 الْحَمْدُ لِلَّهِ رَبِّ الْعَالَمِينَ وَالصَّلَاةُ وَالسَّلَامُ عَلَى سَيِّدِنَا مُحَمَّدٍ
 وَآلِهِ وَصَحْبِهِ أَجْمَعِينَ

بِسْمِ سُبْحَانَهُ وَنَسَاءَهُ غُفْرَانَهُ

الحمد لولايه والصلاة على نبيه وعلى آله وصحبه

افاده مخصوصه

علم اصول فقه ، عنوانندنده آكلاشيله جنفي اوزره فقهك ، احكام شرعيه نك
 اصللريني و بو اصللر آره سنده تعارض و قوعنده هانكيلرينك ديكر لرينه ترجيح ايديله جكني
 كوسترر بر علمدر . علوم اسلاميه آره سنده عالي و ممتاز بر موقعي واردر . احكام
 شرعيه نك حقايقه حقيله كسب و قوف ايتكم ايسته ين بر ذات ، مطلقا بو علمي اطرافيله
 تحصيل ايتكم مجبور يتنده در . بو علمك وضع ايتديكي اساسلري ، تعيين ايله ديكي
 قاعده لري بيلمين بر عالم ، تفسير و حديث كبي سائر علوم اسلاميه نه مرتبه واقف
 اولور ايسه اولسون ، ينه حقايق شرعيه نك مزاياسني بحق ادراك ايدمه من . مجتهدلر
 اجتهادلرنده بو علمك وضع ايتديكي دستورلره استناد ايدرلر ، فقهلر تخريج احكامده
 بو علمك قاعده لرندن استعانه ايلرلر .

شريعت اسلاميه نك ايكي اصل اصيل وايكي ركن ركني اولان كتاب ايله سنتك
 يعني قرآن كريم ايله احاديث نبويه نك مغالريني بيلمك ايجون علوم اسانيه و قواعد
 ادبيه نه درجه ده احتياج و ارسه آنلوك محتوي اولدقلري احكام شرعيه نك حقايقني
 آكلامق ايجونده علم اصول فقه قواعدينه اونستنده احتياج واردر .

بو علمه يالكز مجتهدلر ، فقهلر دكلر ، زمانم ارباب حقوقكده احتياجي
 واردر چونكه فقه ، حقوق اسلاميه ديمك اولديغندن علم اصول فقهده حقوق
 اسلاميه نك مبتني اولديغي اساسلردن ، حكمت تشريعدن ، مقاصد شارعدن بحث

اولونور . بوندن باشقه خاص وعام ، امر ونهی ، ظاهر ونص ، خفی ومشکل ، حقیقت ومجازکی الفاظک اقسام واحکامنه ، کلامک معنای مقصودی صورافاده سنه ، انواع دلالت واقسام بیانه ، کلامک منطوق ومفهومنه وسائر بومثللو اساسلی وپک شموللی مسائل لسانییه دائر مهم بختلر دخی بوعلمه مخصوص اولان مباحث جمله سندندر . خلاصه ، بو علم قسماً حقوق اسلامیته ک اصول واساسات تشریحیه سندن ، قسماًده مرلسانه شامل وتطبیقی قابل عمومی وغایت متین قواعد اصلیه لسانیه دن باخندر .

بوسبیه مبنی علم حقوقده وبتخصیص حقوق اسلامیته صاحبه اختصاص اولمق آرزوسنده بولونانلر ایچون بو علمی اطرافیه تحصیل ایتک شرط اولدر . بونکله برابر کړک تنظیم قوانین خصوصنده وکړک احکام قانونیه تک حسن تطبیقی امرنده بو علمک قواعدینه اولان احتیاج ، مرآن حس اولونمقده در .

بونک ایچوندرکه مکتب حقوقک بدایت تأسسندنبری اصول فقه درسی ، پروغرامه ادخال ایدلمش وبوآنه قدر تدریس ایدیله کلشدر . یدی سنه دنبری دارالفنون عثمانی حقوق شعبه سنده بومهم درسک شرف تدریسی عاجز لرینه نصیب اولمش وبوندن اول بعض بختلری حاوی فورمه لرده ایکی جزء اوله رق نشر ایدلمشدی . بوکره استفاده عمومیه به خدمت مقصدیه وممکن مرتبه آچیق برافاده ایله بوتون درسلی و اصول فقهک بالجمله مباحثی حاوی اولمق اوزره اشبواثر عاجزی بی تألیف ونشره قرار ویردم .

بو کتاب ، برمدخل ایله اوچ قسم اساسی بی مشتمل اوله جقدر . مدخل ، اوچ فصلی محتویدر . برنجی فصلده اصول فقهک تاریخ وصورت تأسسندن ، ایکنجی فصلده اصول فقهک ماهیتدن ، موضوعندن وغایه سندن واوچنجی فصلده اک اول بیلمسی لازم کلن وزمانمزده پک بوپوک اهمیتی بولونان بعض اساسات شرعیه وفقهیه دن بحث اوله جقدر .

ذکر اولونان اوچ قسمدن برنجی قسم ، ادله شرعییه وتعارضلری حالنده اصول ترجیحیه ، ایکنجی قسم احکامه ، اوچنجی قسم احکامک ادله دن ومضای

مقصودك الفاظ و عباراتدن كيفيت استنباطنه متعلق مباحثي اختوا ايدہ جقدر. و طرف
ماجزانہ مدن من غير حد اجرا ايديلن تدقيقات ، مطالعات عنديہ به حمل ايدلمك
ايچون هر بحثك و هر مسئله نك نهايتده — لزوم كورولديكجه — اولبايدہ كي مأخذلر
ارائه اولونه جقدر. « ومن الله التوفيق وبيده ازمه التحقيق ، عليه توكلت و اليه انيب ، ... »
• ربيع الآخر سنه ۱۳۳۵ و ۵ شباط سنه ۱۳۳۲

دارالفنون عثمانی حقوق شعبہ سی اصول فقہ مملی

مجلس اعیان اعضاسندن

محمد سید

- مدخل -

فصل اول

علم اصول فقہک تاریخ و صورت ظهور و تأسسی حقنہ در

دور رسالت - دور اصحاب - دور تابعین - دور مجتہدین

- ۱ -

دور رسالت

علم اصول فقہدہ بحث اولونان ادلہ شرعیہ نک و بوادلہ یہ متفرع سائر اساسلرک تاریخ و صورت تأسسی ، مختلف ادوار و صفحاتہ تابع اولدیفندن بوصفحاتی حقیلہ و صرہ سیلہ تعقیب ایتمش اولمق ایچون تادور رسالتدن باشلامق ایجاب اییدیور . آنکچون بزده اول امرده دور رسالتده احکام شرعیہ نک و مبتنی اولدینی اصللرک نہ صورتلہ وضع و تأسیس بویورلدیغنی بک مختصر بر صورتده تدقیق ایده جکز . شویله که :

دور رسالتده نفقه ، نده اصول فقہ شمديکی شکلله مدون دکلدی ، اوله مازدی . رسالتناه اقدمز (علیه السلام) شارع ایدی . شارع حقیقی جناب حق طرفندن احکام دینیہ تیبلیفه ، قوانین شرعیہ بی وضع و تشریعه مامور ایدی .

معلومدرکه عهد نبوتده کره ارض اوزرنده بولونان انسانلرک بر قسم قلیلی اهل کتاب ، متباقیسی اهل شرک یعنی الوهیت و معبودیتده جناب حقه باشقلرینی شرک اتخاذ ایدن مشرکلر ایدی . مشرکلر ، اصل معبودلرینک تمثالی اولمق اوزره کندی

اللریبه یا بدقلری اصنامه ، کونش و آی ، زهره و مشتری کبی بعض اجرام سماویه به عبادت و درلودر لو خرافاته اعتقاد ایدییورلردی . اهل کتاب ده کتب سماویه بی تحریف ، احکام دینیہ تبديل ایتشلردی . قوم عرب ده مشرک ایدی . کثیف و مظلم بر جهالت ایچنده بولونیوردی ، دین اسلیلری اولان دین ابراهیمی بوتون بوتون اونوشلردی . امی ایدیلر ، ایچلرنده او قویوب یازانه پک نادر تصادف ایدیلردی .

رسالتیناه افدمز ، اصول دینی و قوانین شریعتی ایشته بویله بر زمانده و اویله بر محیط ایچنده وضع و تاسیس ایده جک ایدی . انسانلره عصرلردنبری پک درین کوکلر صالح اولان اخلاق و عاداتی ، خصوصیه پک معزز و مقدس طانیدقلری اعتقاداتی کلیاً ترک ایتدیرمک نه قدر مشکلدر ، عادتا مستحیلدر .

بونک ایچوندرکه رسول اکرم افدمز ، وظیفه رسالت و تشریحی تدریحی بر صورتده یکریمی اوچ سنده ایفا و اکمال ایله مشدر . احکام شرعیه نك اصل الاصولی اولان قرآن کریم ، دفعة نازل اولماشدی . احوال و حادثاتک اقتضاسنه کوره مختلف زمانلرده آیت آیت نازل اولمشدی . بعضاً بر سوره نك ده دفعة نازل اولدینی واقع اولوردی . بعضاده اولجه بر آیتله نابت اولان بر حکم شرعی ، مؤخرأ حاصل اولان استعداد و اقتضایه کوره دیگر بر حکم شرعی بی متضمن بر آیتله نسخ و تبديل (فسخ) اولونوردی . بر آیت جلیله نازل اولونجه رسالتیناه افدمز ، او آیتک خفی و مجمل اولان معنی و حکمنی قولاً بیان و تفسیر بویوردقلری کی نماز قیلمق ، آبدست آلمق و حج ایتمک مثللو افعال و اشکاله تعاق ایدن جهتلرینده فعلأ تعام و تبیین ایدردی . اصحاب کرام ده تعلیمات سنییه توفیق حرکتله او نصل نماز قیلارسه اونلرده اویله قیلارلر ، نصل آبدست آیرسه اویله آلیرلر ، نصل حج ایدرسه اویله ایدرلردی . حضرت پیغمبر ، واجبات دینییه و افعال و عقود شرعییه بی تعلیم ، احکامی وضع و تبیین ایدر ایکن اویله فقهانک بیاناتی کبی بونک ارکانی درتدر ، شونک شرائطی التیدر ، یاخود بو عقدک شرائط انعقادی شونلردر . شرائط صحتی ده بونلردر صورتنده و نظری بر طرزده ایضا حاتده بولونمازدی . بوتون احکام شرعییه بی عملی بر طرز و شکلده وضع ایدردی . اکزیسنی امر ونهی صورتنده بیان ایلردی و اکثریا امردن وجوبی یاخود ندب و اباحی ؟ نهیدنده حرمت و یا

کراهنمی؟ قصد ایندیکنی بیان ایتزدی . بو جهتی اصحابک فهمنه ترك ایدردی .
دین اسلام ، دیانت و سیاستی جامع بر دین اولدیغندن رسالتیناه اقدمز، امر
حکومت و قضایی ده بالذات ایضا بویورلردی . بر طرفدن قوانین شریعتی
وضع و تأسیس ایدر، دیگر طرفدن او قوانین احکامنی اجرا ، اختلاف و نزاع
وقوعنده مرافعاتی استماع ایله حکملرینی اعطاء ، استفتا و قوعنده ده افتا ایلم
ایدی . بوتون بونلر بر جماعت حضورنده واقع اولوردی . بو صورتله اصحابک
اکثریسی اشبو بیانات ، قضایا و فتاوی نبویه به بالذات ویا بالواسطه کسب اطلاع
ایدردی . بیانات و فتاوی منیفه لرینک اکثریسی ده قضایای سنیه لری کبی جوامع
الکلم ایدی ، یعنی « ضرر و مقابله بالضرر یوقدر » ، « بر شینک نفی ضمان
مقابله سنده در » ، « ظالم کونک ایچون حق اولماز » ، « بینه مدعی و یمین منکر
اوزرینه در » ، مألرنده اولان (لا ضرر ولا ضرار) ، (الخراج بالضمآن)
(لیس لمرق ظالم حق) ، (الینه علی المدعی و الیمین علی من انکر)
حدیث شریفلری کبی قاعده کلبه صورتنده شرفصادر اولور ایدی . فقهک احکام
کلبه واصلیه سی ده ایشته بو وجهله تأسس ایدیوردی .

الحاصل ، ناسک افعال و حرکاتنده ، بربرلیله اولان مناسباتنده ، حیاتک
طیبی احتیاجلرندن متولد بیع و شرا ، ایجار و استیجار کبی عقود و معاملاتده
معروفی امر ، منکری نهی و تفریر و ضرری ، منع ایله عدل و حق ، عرف و عادت ،
راضی طرفین ، صدق و استقامت ، باطل و منکراتدن اولمیان شرط و عهده
رعایت اساسلرینی تثبیت ؛ مناسکات و مفارقاته ، ارث و وصیته عاند رؤس احکامی
تأسیس ؛ انواع حلال و حرامی تدبیر بویوردیلر .

اک زیاده اعتقادیات و اخلاقیاته اعتنا ایتشلردی . و « بن ، آنجق مکارم اخلاقی
آمام ایچون بعث اولوندم ، بویوره شلردی (انما بعثت لاتمم مکارم الاخلاق)
اعتقادیاتی توحید یعنی الوهیتده وحدانیت ، اخلاقیاتی علویت اساسلری اوزرینه
بنا قیلدیلر . حقایق اشیا به مخالف خرافاتی ، فضائل انسانیه به منافی عادیلکاری
شدت و نفرتله رد ایتدیلر .

اعتقاد یانده افکار باطله بی رد و انکار خصوصاً بک زیاده التزام شدت
بویوردقلری حالده ، (يُرِيدُ اللَّهُ بِكُمُ الْيُسْرَ وَلَا يُرِيدُ بِكُمُ الْعُسْرَ) و (ما جعل
کم فی الدین من خرج) آیت کریمه لری ایله (إِنَّ الدِّينَ يُسْرٌ) و (خیر
أيسره) حدیث صحیح لری منطوقنجه معاملاتہ عائد احکام فرعیده
خفیف و تسهیلی سور ، مسامحه جهتی التزام ایدردی . حتی اطراف
ور - یه مأموراً اعزام بویوردقلری اصحاب کرامه ، بوخصوصی یعنی خلقه سهولت
کوسترلسنی ، لزومسزیره اسلامیتدن تنفیری موجب اوله جق شدت لرا استعمال
ایدلمه مننی خاصه تنبیه و توصیه بویورددی . نته کیم اکابر اصحابدن ابو موسی
الاشعری ایله معاذ بن جبلی بمنه کوندر دکلری زمان « قولایلاشدیریکنز
کوجلشدیرمیکنز ، تبشیر و تقریب ایدیکر ، تنفییر ایتیمیکنز » بویورمشاردی
[یَسِّرْ وَلَا تُعَسِّرْ اَبْرًا وَلَا تُشَقِّرْ] [۱]

حکمی مسکوت عنه قالان مسئله لر حقه ده - تشدیددی موجب احکام
ورودندن خوفاً - کندیلرینه سؤال ایراد ایدلمسنی اصلاً سومزلردی . « بن سزی
کندی حالکزه بر اقدقجه سزده بنی کندی حاله بر افکنز ، بویورددی .
[ذرونی ما ترکتمکم] . بر کون ذات رسالت پناهیلری ایراد خطبه اثناسنده
« جناب حق ، اوزریکنزه حجی فرض قیلدی ، حج ایدیکنز ، بویوردرلر .
سامعیندن بر ذات « هر سنه می ، دیه صورار . جناب نبوت مآب اقدمز سکوت
ایدر ، جواب ویرمک ایسته من . سائل سؤالی ایکی دفعه تکرار ایدر . اولوقت
حضرت رسالت پناه جواباً « اوت دیسه یدم هر سنه واجر اولوردی ، سزده اداسنه
مقتدر اوله مازدیکنز . بن سزی کندی حالکزه ترک ایتدکجه سزده بنی کندی

[۱] ذکر اولنان حدیث لک جمله سی اک صحیح واک معروف حدیث لدر . آنکچون
مأخذ لری نقله حاجت کورله مشدر .

حاله براقبکنز . سزدن اول هلاک اولانلر آنجق کثرت سؤالری و پیغمبرلری اوزرینه اختلافلری سببیه هلاک اولمشلوردر . بن نهی امر ایدرسم بقدرالاستطاعه آنی یاپیکنز ، نه دن منع ایلرسم آنی ترک و آندن اجتناب ایدیکنز ، بویوردلر . بو حدیث شریف بک مهم وجوامع الکلم در . امام نووی نک (شرح مسلم) ده دیدیکی کبی افعالده اصل اولان عدم وجوب وعدم مکلفیت اولدیغنه بک باهر بر دلیل شرعی اولدیغی ایچون عیناً و حرفیاً « صحیح مسلم » دن بوجه آنی نقله لزوم کورلمشدر :

[عن ابی هریره رضی الله عنه ، قال خطبنا رسول الله علیه السلام فقال : « ایها الناس قد فرض الله علیکم الحج فحجوا » ، فقال رجل أكل عام یا رسول الله ، فسكت حتى قال ثلاثاً ، فقال رسول الله : « لو قلت نعم لوجبت ولما استطعتم » ثم قال « ذرونی ما ترککم فانما هلك من كان قبلكم بکثرة سؤالهم واختلافهم علی انبیائهم فاذا أمرتکم بشئ فأتوا منه ما استطعتم واذا نهیتکم عن شئ فدعوه » رواه مسلم والبخاری ومالك وغيرهم و متن الحدیث و عبارتہ لمسلم] .

ایشته جناب شارع اکرم ، (صلی الله علیه وسلم) شریعت اسلامیه نک کرک اعتقادیات و اخلاقیاته عائد احکام اصلیه سنی و کرک عبادات ، مناکحات ، معاملات و عقوباته متعلق احکام فرعیه سنی وجه مشروح اوزره عملی بر طرزده ، کلفتسز و هرکسک آکلابه بیله جکی بر صورتده وضع و تبیین ابتدیلر . و نهایت امر حکومته (و شاورهم فی الامر) و (و امرهم شورى بینهم) نظم جلیللری مضمونجه اصول مشورت ، امر مأموریت و قضاءه (ان الله یامرکم ان تؤدوا الامانات إلى اهلها و اذا حکمتم بین الناس ان تحکموا بالعدل)

قول کریمی موجنبه اهلیت و عدالت ، (کلامک راع و کلامک مسئول

عن رعیتہ) حدیث منیفله ده اک بویوک آمردن اک کوچوک چوبانه وارنجبه به

قدر هر فرد حقنده و هر ایش خصوصنده و وظیفه و مسئولیت اساسلرینی تأسیس

بویوردیلر . معاملاتنه متعلق احکام فرعیه به کلنجه بونلرک اکثرینی بیان ایتیموب

علمای امتک اجتهادلرینه ترک ایتدیلر .

بوقاریده بیان اولوندینی اوزره طرف رسالتپناهیدن وضع اولونان احکام

مذکورہ ، اولیه بایدره و فصللره ترتیب و تفریق ایدیلرک بر علم مخصوص صورتنده

ویا بر قانون شکلنده تنظیم و تدوین اولوناماشدی . حتی احکام مذکورہ بی جامع

اولان احادیث شریفه دخی طویلو اوله رق بر کتابده جمع و ضبط ایدلمه مشدی .

قرآن کریم بیله شمدیکی مصحف شکلنده ترتیب ایدلیوب اصحاب کرامک حافظه

لرنده و متفرق صحیفه و قطعه لرده محفوظ و مکتوب بولونیوردی .

اصحاب کرام ، بر حادثه نك حکم شرعیسنی آ کلامق ایستدکلری زمان ،

یا حضرت رسول اکرمدن استفتا ایدرلر و یا خود حافظه لرنده و نزد لرنده محفوظ

و مضبوط اولان آیات و احادیثه مراجعت ایلرلردی . فقط رسالتپناه اقدامزدن

آیری بولوندقلری یرلرده ، مأموراً اغزام قلندقلری محللرده آیات و احادیثه

یوله مدقلری احکامی ، بالضروره رأی و اجتهاد طریقله استخراج ایدرلردی .

قریباً ایضاح اولونه جنی اوزره ذات حضرت رسالتپناهی ده کندیلرینه بوسورتله

حرکتہ یعنی اجتهاده مأذونیت و یرمش ایدی . اجتهاد ، کتاب و سنتک دالالتندن ،

اشارتندن ، عمومندن و مفهومندن استخراج احکام صورتیله اوله بیله جکی کبی قیاس

طریقیله ده اوله بیله جکندن دور رسالته ده احکام شرعیه نك دلیللری ، تعبیر دیکرله

فقهک اصللری اوچ نوع دیمک ایدی : کتاب ، سنت ، قیاس .

دور اصحابده اصول فقه

اصول فقه علمی ، دور اصحابده دخی تدوین اولونماش ایدی . چونکه اصحابك بوكا احتیاجی یوق ایدی . آنلر اهل لسان ایدی ، لسان عربی لسان مادرزادلری ایدی . ایچلرنده غایت بلیغ و بک بو یوک خطیبلر وار ایدی . آیات قرآنییه واحادیث نبویه کندی عرف واستعماللری ، شیوه افاده لری و ذوق ادبیلری اوزره نازل و وارد اولمش ایدی . بوجهته آنلر آیات واحادیثك منطوق و مفهومی دلالات و اشارتی ، ایما و اقتضاسنی ، حقیقت و مجازی ، تمثیل و استعاره سی ، عموم و خصوصنی ملکه و سلیقه لسانیه لریله بیلیرلردی . بو خصوصده قواعد لسانیه و اصولیه تحصیلنه هیچ احتیاجلری یوقدی . بالعکس لسان عربییه متعلق قواعد لسانیه ، ادبیه و اصولیه آنلرک طرز تلفظ ، شیوه افاده و کلماتی صورت استعمال لرندن و معنای مقصود و احکامی ، نصل و نه صورتله آ کلامقده اولدقلرندن تخریج اولونمشدر .

بوندن باشقه مشارالیه ، احکام شرعیه نك بوتون حقایق و اساساتی دوغریدن دوغرییه منبعندن ، حضرت شارعدن اخذ و تعلم ایتمشلر ، عهد نبوتده احکام شرعیه نك وضعنه باعث اولان حادثانك بالذات شاهدی بولونمشلردی . آنکچون حکمت تشریحی ، مقاصد شاره ، کتاب و سنتك ناسخ و منسوخنی ، حدیثلرک صحیح و غیر صحیحنی هر کسدن زیاده بیلیرلردی . حضرت پیغمبرك احکام شرعیه نی تطبیق خصوصنده بالجمله افعال و حرکاتی ده رأی العین مشاهده ایتمشلردی . بوكا بناءً اونلرک نه علم فقه ، نه علم اصول فقه قواعدینه اصلا احتیاجلری یوقدی . بالعکس بو قواعدی و اصول اجتهدی اونلر وضع ایدیورلردی . اصحاب کرام ، بر حادثه نك حکم شرعیسنی استخراج ایچون اولامرده کتابه

ایکنجی درجده سنه مراجعت ایدرلردی . حکم مطلوب حقنه کتاب وسنده صراحت ویا دلالت بولوندقجه رأی و قیاسه اصلا التفات ایتزلردی . ممکن اولدینی قدر آیت ویا حدیثك دلالت وایشارتندن ، ایما واقضاسندن تخریج احکامه چالیشیرلردی . موفق اوله مازلرسه اولوقت بالضروره قیاس طریقه سلوک ایلرلردی . حکمت تشریمه و مقاصد شارع و واقف اولدقلری ایچون شارعك رعایت ایتدیکی حکمت و مصلحتی نظر اعتباره آلهرق اولا احکام منصوصهك علت و مناطی استنباط ایدرلر ، سوکره اشبو علتده متشابه و متشارك اولان احکام غیر منصوصه بی ذکر اولونان احکامه الحاق ایلرلردی . یعنی اشباهی اشباهه و امثالی امثاله قیاس ایدرلردی .

یایله جق باشقه چارهده یوقدی . کتاب ایله سنت یالکمز امهات احکام ورؤس مسائلی جامعدر ، بوتون احکام فرعیه بی محنوی دکادر . حضرت پیغمبر ، بالعموم حادثاتك احکام جزئیه سنی برر برر بیان ایتمه مشدی و لزومده یوقدی . بوکبی احکام فرعیه ، وضع اولونان احکام اصلیه به قیاس ایله تخریج اولونه بیلیر . آنک ایچون اصحاب کرامده بویله حکمی شریتمده مسکوت عنه اولان حادثاتك تحقیقده طریق اجتهاد و قیاسه سلوک ایله حل مشکل ایدرلردی . شارعده کندیلرینه بو خصوصده مآذونیت و یرمش ایدی . نته کیم فقهای اصحابدن معاذ بن جبل حضرت لرینی یمنه قاضی نصب و تعیین ایتدکلرنده اجتهادله حکمه مآذون قیلمشدی . اولوقت حضرت رسول اکرم ، برای امتحان حضرت معاذه شوسؤللری ایراد بو یورورلر :

ر — یا معاذ ، نه ایله حکم ایده جکسک ؟

م — کتاب ایله حکم ایده رم .

ر — یا آنده بوله مازسهك نه ایله حکم ایده جکسک ؟

م — سنت سنیه رسالتپناهیلری ایله .

ر — آندهده بوله ماز ایسهك ؟

آرتق اولوقت رأیم ایله اجتهاد ایده رم .

ذات حضرت رسالتپناهی ، مشار ایله معاذك بو جوابلرندن نمون اولورلر

و « جناب حقه حد ایدہ رم کہ رسولنک رسولنی ، رسولنک راضی اولہ جنی شیئہ موفق بوپور مشدر ، دیرلر .

ایشته اصل ادله شرعیہ ، کتاب ایله سنتدن عبارت اولدینی خالدہ آنلرہ متفرع اولق اوزرہ بروجه معروض قیاسده اوجنجی بر دلیل عد اولوندی . مع هذا آنفاً بیان اولوندینی وجهله قیاس ، آنجق کندیسنه احتیاج حالده مراجعت اولونور بر دلیل اولدیغندن اکابر اصحاب ، مجبوریت کورمدکجه قیاس ایله استخراج حکمه قیام ایتمزلردی . قیاس ، نتیجه اعتباریله رأی وظنندن عبارت و خطادن غیر مصون اولدینی جهتله خطادن احترازاً کندیلرینه صورولان مسئله نك جوابی یکدیگرینه احاله ایدرلر ، شخصاً جواب ویرمک مجبوریتنده بولونمدقجهده جواب ویرمک ایسته مزلردی .

هنوز تحدث ایتمین بر حادته نك حکمندن بحث اولونمسنی ده منع ایدرلردی . اکابر فقهای اصحابدن عبدالله بن عمر حضرت تلی ، بویله تحقق ایتمه مش بر مسئله نك حنی سؤال ایدن ذاته ، « اولیان شینک حکمنی صورمه ، پدرم حضرت عمرک ، هنوز اولیان بر شینک حکمنی صوران ذاته لغت ایتدیکنی ایشیتمشدم ، دیمشدی . اصحابک اک بویوک فقها سندن ابن مسعود حضرت تلی ده ، کندیسندن استفتا ایدیلن و تحدث ایدن بر حادته نك حکمنی کتاب ایله سنتده بوله مدینی ایچون - قیاس ایله فتوی ویرمه مک مقصدینه منی - تام بر آی جواب ویرمه مشدی . حادته واقع ، مستفتی ده استفتاسنده مصر اولدینی جهتله قورتولش اولدیغنی کوردیکندن نهایت « رأی واجتهادمله جواب ویرمکه مجبور اولویورم . اصابت ایدرسم جناب حقه ندر خطا ایدرایسم بدن و شیطان ندر ، دیه رک کرها جواب ویرمشدر [حجة الله البالغة]

اهل حجازک امامی ، نامنه منسوب اولان مذهبک مؤسسسی امام مالک حضر - تلی ده ، هم اصحاب کرامک اثرینه اقتفاء ، هم ده بالا خره رأیندن رجوع ایتمک احتمالی بولونمسنه بناء کندیسندن بر مسئله صورلدقده جواب ویرمزدن اول ، صوران ذاته « حادته تحقق ایتمشیدر ؟ » دیه صورارمش ، « خایر » جوابی آلیرسه افتادن امتناع ایدرمش .

[بعض علما ، از جمله فقهای ظاهریه ، قیاسک دلیل شرعی اولدیغنی انکار ایدیور .

بو مسئله ، علم اصولك اك مهم وناك اساسى مباحثندن اولدينى جهته بونك حقهده آشاغیده
(مسالك فقهیه) بمشده ایضاحات ویریه چکی کی بحث مخصوصندهده تفصیلات اعطایا
اولونه بقدر [

دور اصحابده (فقه) و (فقها) تعبیرلری زبازرد دکلدی . قرآن کریمده واحادیث
نبویهده (تفقه) و (فقه) تعبیرلری مذکور ایسهده بین الناس تعمم ایتمه . شیدی .
علی العموم اصحاب علم و معرفته علما دینیردی . قرآن کریمی تمامیه حفظ ایدن
ووجوه قرآنه واقف اولانلرده (قاره) ک جمعی اولان (قراء) لفظی اطلاق
اولونوردی . ابن خلدونک بیاننه کوره اولوقت (قراء) دیمک (فقها) دیمکدی .
علمای اصحابک جمله سی فقیه دکلدی . بر قسمی اهل حدیث (حافظ الحدیث)
بر قسمی ده فقیه ایدی . ابوهریره حضرتلری کی بعض کبار اصحاب ، اکثر یازرد
پیغمبریدن آیرمازلردی . بالطبع بونلر لسان سعادتدن یک چوق احادیث شریفه
ایشیدوب حفظ ایتمشلردی . لکن اکثریسی ایش کوچ صاحب اولدقلرندن
هر وقت حضور عالی رسالتیناهیده اثبات وجود شرقه نائل اوله مازلردی .
وقتلری مساعد اولدقجه مجلس نبوی به کلوب استفاضه ایدرلردی . بو جهته
اصحابک بهضیسی چوق ، بعضیسی ده آز حدیث روایت ایتمشدر .

آیات قرآنیه ، رسالتیناه افندمز طرفندن صورت مخصوصده براعتنای مخصوص
ایله وحی کاتبیرینه یازدیریلیردی . لکن احادیث نبویهلرینی یازدیرمازلردی . حتی
بالعکس - آیات قرآنیه ایله قارشمنندن خوفاً - قرآن کریمدن ماعدا قم سعادتلرندن
صادر اولان احادیث سنیهنک یازلمسنى منع ایتمشلردی . بوکا بناءً اصحاب کرام ،
ایشیتدکلری حدیثلری یازمازلر ، حافظه لرنده حفظ ایدرلردی . [عن ابی سعید
الحدری از النبی علیه السلام قال : لا تکتبوا عَنِّي شیئاً الا القرآن ومن
کتب عني شیئاً غیر القرآن فلیمحه . اخرجہ مسلم فی صحیحه]

بویله مجرد حافظهده حفظ ایدیلن احادیثی ، آره دن خیلی زمان مرور
ایتدکدن سوکره بر قسمی ویا عباره سنی اولسون اونوتیمه رق عیناً وحرافاً نقل
وروایت ایده بیلمک ، هر حافظه نك کاری دکلدر . آنکچون بعض اکابر اصحاب
روایت حدیث خصوصنده یک زیاده احتیاط ایدردی . حتی حضرت عمر (ر ،

ض) ، سهو و خطا و قوعندن احترازاً هر كسك كثرته حديث روايت ايتمى شديتله منع ايلردى . نته كيم بر چوق حديثلرك الفاظ و عباراتى عيناً خاطرلرده قائمدينى ايجوندركه يالكز معنى و مائلرى نقل و روايت اولونمشدر . مختلف حديث كتابلرنده ، حتى بر كتابده طرق مختلفه ايله باشقه باشقه راويلردن نقل اولونان عين حديثك مختلف الفاظ ايله نقل و روايت ايدلمش اولمسنك سببى بودر .

فقهاى اصحابه كنججه : بونلرك عددى بك چوق دكلدر . محققين علمائى حنبليله دن مشهور ابن قيم ، (اعلام الله قعبن) نام كتابنده فقهاى اصحابك يوز اوتوز بو قدر اولديغنى بيان ايدىيورسده يكرمى يديسندن ماعداسندن آنجوق بر ويا ايكي اوچ فتوى نقل ايدلمش اولديغنى سويله يور . اويله اوچ درت فتوى ويرمش اولان ذواته فقيه و مجتهد دينه ميه جكي دركار اولديغى جهته يته مشارايله ابن قيمك بياننه كوزه فقهاى اصحابك عددى نهايت اوتوزه بالغ اولويور ديمكدر . بونلرك ايجندن ده - اصوليون عنندنه - الك زياده فقه و اجتهاد ايله معروف اولانلرى ، خلفائى راشدين يعنى ابوبكر صديق ، عمر فاروق ، عثمان ذى النورين ، على مرتضى حضرتائى ايله ايله اوچ عبدالله يعنى عبدالله بن مسعود ، عبدالله بن عباس ، عبدالله بن عمر حضرتلرى و زوجه مطهره پيغمبرى ام المؤمنين عايشه ، زيد بن ثابت ، معاذ بن جبل و ابو موسى الاشعري كچي اون ، اون بش ذات محترمدن عبارتدر . واقعا اصحاب كرام ايجنده بك چوق علما و ابى بن كعب ، سالم مولى ابى حذيفه ، مقداد بن اسود كچي غايت مشهور قرا وار ايسه ده بز بوراده علمادن دكل ، فقهادن بحت ايدىيورز . علما باشقه ، فقها باشقه در . هر فقيه عالمدر ، اما هر عالم فقيه دكلدر . آره لرنده عموم و خصوص مطلق واردر .

شو ذكر اولونان مشاهير فقهاى اصحاب ايجنده ده الك چوق فتوى و يرز ، الك زياده اجتهاده بولونانلرى يدي كشيدير : عمر ، على ، عبدالله بن مسعود ، عبدالله بن عباس ، ام المؤمنين عايشه ، زيد بن ثابت ، عبدالله بن عمر (رضى الله عنهم) . بو اوچ (عبدالله) لره صرف فقهاده عبداللهك جمعى اولوق اوزره (عبادله) اطلاق اولونور .

حضرت عمر ، بر حادثه نك حكمنى استخراج خصوصنده استعجال ايتيوب

اوزون اوزادی به دوشونور ، يك زياده تعمیقات اجرا ایدر ، فقهای اصحابی جمع ایله برر بر رأیترینی آیر ، قناعت تامه حاصل ایدنجه به قدر مذاکره و مباحثه ایدر ، آندن سوکره افتسا ویا حکم ایلردی . بونک ایچ-وندركه ویردیکی فتوی و حکمرك اکثریسی وبلکده جمله سی ، اصحاب و اخلاف طرفندن قبول اولونمشدر . مشارالیه حضرتلری اجرا آتنده نه قدر شدید ایدیه بر مسئله علمیه نك حلندهده او نسبتده ملایم ایدی . استشاره سز افتا ویا حکم ایتمز و هر کسك رأینی آلفه تنزل ایلردی .

حضرت عمر ، (مؤلفه قلوب) نامیله معروف اولان اشراف عربیه اموال بیت المالدن ویرلمسی نص قطعی قرآن ایله منصوص و مشروع بولونان عوائد و تخصیصاتی ، مومی الیهه ویرمیوب قطع و اسقاط ، نص قرآنك صراحتنه ظاهراً مخالف اوله رقی تخصیصات مذکوریه بیت المالك مصارف ترتیندن اخراج ایلدی . و بو کیفیت ، بالجمله علمای اصحاب طرفندن بلااعتراض تصویب ایلدی . ایشته مشارالیه بو معامله لریله فقهده يك مهم ایکی اساس وضع ایتمش اولدیله . بری (بر علت غائییه ایم مبتنی اولان حکم ، اول علتك انتقاسیله منتفی اولور) قاعده سی ، دیکری (بر فائده مطلوبه نك استحصالی ایچون مشروع اولان بر حکم ، اجراسی حالنده اول فائده نك ضدینی استلزام ایدر ایسه باطل اولور) اساسیندر . حادثه مذکوره ظاهراً نصه مخالف کوروندیکی و بو سببیه ماهیت فقهیه سی حقنده فقهایي يك چوق دوشوندرمش اولدینی جهتله حدذاتنده يك مهم اولقله برابر بویله ایکی مهم اساسك تأسسنه باعث اولدیغندن بطریق الاستطراد نقل و بیانی مناسب کورلمشدر :

— استطراد —

رسالتیناه افندمنر ، زمان سعادت لرنده ابو سفیان بن الحرث ، صفوان بن امیه ، حرث بن هشام ، سفیان بن حرب ، اقرع بن حابس ، عینیه بن حصن ، مالك بن

عوف و حکیم بن حزام کبی قرآن کریمده (مؤلفه قلوب) تعمیر اولنان بعض صناید قریش ورؤسای عربیه ، اهل اسلام اوزرندن فتنه و فساد لرینی دفع وازاله ، قلب لرینی اسلامیه تقرب و تألیف ، دین اسلامی اعزاز مقصدیه اموال بیت المالدن عائدات مخصوصه تعیین بوورمشله ، آخر عمر لرینه قدرده عائدات مذکورده بی آنلر اعطاده دوام ایتمشلردی . ذاتاً بو کیفیت (اِنَّمَا الصَّدَقَاتُ لِلْفُقَرَاءِ وَالْمَسَاكِينِ وَالْعَامِلِينَ عَلَيْهَا وَالْمُؤَلَّفَةِ قُلُوبِهِمُ الْخ) آیت جلیله سیه منصوص بر حکم شرعی ایدی .

برنجی خلیفه حضرت ابوبکرک ایام خلافتنده ذکر اولنان مؤلفه قلوبک بمضاری ، ذات حضرت خلافتناهی به مراجعتله بر موجب نص جلیل تخصیصات مذکورده لرینک عهد رسالنده اولدینی کبی کندیلرینه اعطاسنی استدعا و طرف خلافتناهیدن بو بایده بر امرنامه استحصال ایتدیلر حضرت عمر ، خلیفه مشارالیهک هم قاضیسی وهمده وزیر اعظمی مثابه سنده اولدیندن بو امرنامه بی حضرت عمره تقدیم ایلدیلر . مشارالیه امرنامه بی بیرندی و « جناب پیغمبر ، او تخصیصاتی سزی اسلامیه تقرب و تألیف ایچون اعطا ایدیوردی . بو کون جناب حق ، دینی اعزاز و شوکت اسلامیه بی اعلا بووردی . آرتق سزه و سزی تألیف کبی شیلره احتیاج قلمامشدر . اسلامیه ثبات ایدرسه کز فبا ، ایتزه کز سزکله آره مزده قیلنجدن باشقه برشی بو قدر ، دیدی ، تخصیصات لرینی ویرمدی .

بونک اوزرینه مومی الیهم برای شکایت حضور خلیفه به کیدوب کیفیتی عرض ایتدیلر و « خلیفه سزمیسکر ، یوقسه عمرمی ؟ ، دیدیلر . خلیفه حضرت ابوبکر صدیق (ر ، ض) ، جناب عمر فاروقه اولان کال صمیمیتنی مشروغایت مسکت بر جواب ویردی : « دیلرسه عمردر ، دیدی ! و مشارالیهک فکر و اجتهادینی قبول ایتدی . علمای اصحابدن هیچ بری ده بوکا اعتراض ایتدی . بو صورتله بوجه معروض نصاً ثابت اولان عائدات مذکورده نک سقوطنده اجماع اصحاب منعقد اولدی .

بعض علما و مفسرین ، ذکر اولونان عائداتک بو وجهله سقوطنه ، نسخ دیمک ایسته یور و اجماع ایله حکم شرعینک جواز نسخته قائل اولویور . حالبوکه (اجماع) ک نص ایله ثابت بر حکم شرعی بی ناسخ اوله بیله جکنی ، ائمه اصولدن و متقدمین مشایخ

حنفیه دن یالکز عیسی بن ابان ایله دیگر بر ایکی علما تجویز ایتمشدر . عامه فقها و علمای اصوله کوره ایسه اجماع نه ناسخ ، نه ده منسوخ اوله ماز . نسخ انجق زمان نبوته و حضرت شارعه مخصوص و منحصر در . بوکبی مسائله فقها دن و یا اصولیون دن معدود اولیان مفسرینک و دیگر علمانک سوزلرینه باقله از . چونکه مسائل فقهیه ده معتمد و معتبر اولان اقوال فقها در ، اقوال مفسرین و محدثین دکدر .

کشف بزدوی و نلویح کبی اک معتمد اصول کتابلرنده ، بدایع و هدایه شرحلری عنایه و فتح القدر کبی اک معتبر فقه کتابلرنده بیان اولوندیغنه کوره بومسئله ، نسخ مسئله سی دکدر . بلکه یوقاریده ذکر اولوندینی وجهله « علتک انتفاسیه معلولک ده منتفی اوله جنی » و « اوزرینه موضوع و مبتنی بولوندینی مقصدک بالآخره تقیضی موجب اولان حکمک اعتباردن سقوط ایده چکی ، اساسلری اوزرینه متفرع بر مسئله در . نته کیم بوجهت ، حضرت عمرک تخصیصات مذکورہ نیچون ویرمدیکنه دائر صراحة بیان ایتدیکی سبب و علت موجبہ دن یک آشکار بر صورتده منقہم اولویور . آرتق بوبایدہ مشارالیهک هر درلو شبه و تردد ایراندن بری و یک صریح اولان بیاناتی براقوبده تأویله و مثلاً « مشارالیه باشقه سنک واقف اولدینی بر نص شرعی به مطلع اولدینی ایچون مؤافه قلبک ذکر اولونان تخصیصاتی قطع واسقاط اتمشدر ، کبی تعلیله قاله شمسق یک کولونج وواهی اولور . . .

مشارالیه جناب فاروقک کرک شوکت اسلامیه نک اعتلاسنه ، و کرک دین اسلامک نشر و استقرارینه دائر سبق ایدین خدمتی یک بویوکدر . حضرت ابو بکر دن صوکره بو دینه و بو دولته مشارالیه قدر خدمتی مسبوق بر ذات دها کلمه مشدر . اجتهاداتی برر برر بوراده نقل ایتک یک اوزون کیده جکندن او تفصیلاتی تاریخ فقه درسنه ترک ایله بزبوراده یالکز زمان خلافتلرنده کندی قاضیلرندن و مشاهیر فقهای اصحابدن اسمی یوقاریده کین (ابو موسی الاشعری) حضرت نرینه ، احکام قضایه دائر تعلیماتنامه مقامنده یازوب کوندر دکلری نامه خلافتپناهیلرینی عیناً و ترجمه نقل و تحریر ایله اکتفا ایده جکز . ائمه حنفیه دن امام محمد حضرتلری اشبو مکتوبه (کتاب السیاسة) تسمیه ایتمش ، بین الفقها ده (سیاست قضا و تدبیر حکم) کتابی عنوانیه کسب اشتهار ایله مشدر . اکابر فقهای حنفیه دن امام شمس الائمة السرخسی ، مکتوب مذکور

(ميسوض) نامنده كى كتاب مشهورينه مشاراليه امام محمدن تقلالاً و عيناً درج و جمله جمله شرح ايشدر . بر صورتى ده محققين خنبليه دن و حفاظ حديثن ابن قيمك (اعلام الموقعين) نده مندرجدر . بو ايكى صورت آره سنده بعض الفاظ و تعبيراتجه فرق وارسهده اساس و معنى اعتباريله هيچ فرق يوقدر . بزايكى صورتى ده نظر اعتباره آلهرق ترجمه ايدجكز . هامشهده (اعلام الموقعين) ده كى اصل و صورتى عيناً درج ايدجكز [۱] .

— كتاب سياسة القضا —

خليفة ثانى جناب عمر فاروقدن ، حضرت ابو موسى الاشعري به

بعد اداء ماوجب علينا

امر قضا فريضة محكمة ، اتباعى واجب طريقت مسنونه در . سكارفع خصوصت ايدلا كده متخاصمينك كلاملرني دقتله ديكله ، مقصدلرني و حقيقتى ايجه آكلا ، زيرا نفوذى اولميان حتى تكلم ، فائده بخش اولماز . جنس و مذهب تفريق ايتمكسزين على العموم خصمين بيننده مجلسكه ادخال و اجلاسده ، نظريكى آنلره توجهده ، كلاملرني استماع ايله حكيمده تماميله مساواته رعایت ايت . تاكه شريف و قوى ظلمكه طمع ايتمين ، ضعيف و بيكسده عدلكدن مأیوس اولماسين .
بينه مدعى ، بين منكر اوزرينه در . بين المسلمين صلح جائز و معتبردر .
آنحجق حرامى حلال و حلالى حرام قيلان صلح معتبر اولماز . مدعى تبين حق و احضار بينه ايجون بر مهل طلب ايدرسه وير . اكر اقامة بينه ايدرسه حقتى

[۱] روى ابن القيم الجوزية فى « اعلام الموقعين » باسانيد مختلفة عن ابى العوام قال كتب عمر الى ابى موسى الاشعري : اما بعد ، فان القضاء فريضة محكمة و سنة متبعة . فانهم اذا ادلى اليك فانه لاينفع تكلم بحق لانفاذله . أس الناس فى مجلسك وفى وجهك و قضائك ، حتى لايطمع شريف فى حيفك ولا يياس ضعيف من عدلك . البينة على المدعى و اليمين على من انكر و الصلح جائز بين المسلمين الا صلحاً احل حراماً او حرم حلالاً . و من ادعى حقاً غائباً او بينة فاضرب له امداً ينهى اليه . فان بينه اعطيته بحق و ان اعجزه ذلك استحللت عليه القضية ، فان ذلك عوا بلغ فى العذر و اجلى للمعى . ولا يمنحك قضاء قضيت فيه اليوم فراجعت فيه و ايك نهديت فيه لرشدك ان تراجع فيه الحق ، فان الحق قديم لا يبطله شىء و مراجعة

آکا ایصال ایدرسک . اظهار عجز ایلرسه علینه حکمه کسب استحقاق ایدرسک .
 بو صورتله حرکت ، شبهه بی ازاله ده ، معذرتکی افاده ده ، دها بلیغدر .
 صاقین بو کون بر حادثه ده اعطا ایدوبده مؤخرأ رشد ورویتکله خطاسنی ادراکه
 مظهر هدایت اولدینک حکم ، یارین سنی احوال نمائله ده حقه مراجعتدن منع ایتمسین ،
 چونکه حق دها قدیمدر ، آنی هیچ بر قوت ابطال ایده منر ، حقه مراجعت البته
 باطلده اصراردن خیرلیدر .

مسلمانار عدول ، یکدیگر لری علینه شهادت لری مقبولدر . آنجق شهادت زوری
 مجرب ویا حد شرعی ایله محدود ، یا خود ولاء ویا قرابت سببیله مظنون و متهم
 اولانلر مستتاددر . جناب حق عبادینک سرائرینی تولى و حدودینی آنلر اوزرینه
 ستر ایتمشدر . سرائر مذکورده قول مجردله دکل ، بینات وایمان ایله کسب و قوف
 ایدیلیر .

حکمی کتاب و سنتده منصوص اولیان بر دعوی وقوعنده هر شیدن اول ،
 مسئله نك حقیقتنی فهم و ادراکه بذل مقدرت ایت . صوکره اموری مقایسه ،
 امثال و اشباهی فرق و تمیز ایله . آندن صوکره رأی و فکر نیجه حقه اک شیه ،
 جناب حقه اک سوکیلی کوردیکک جهتی اختیار ایت .

انهای مرافعه ده حدت و شدتدن اجتناب ایت ، رفق و ملایمتله معامله ایله .
 یوز چویرمه ، اوصانج کتیرمه ، سوز کسمه ، اضطراب و تأذی کو سترمه . صبر
 واعتدالکی محافظه ایت ، مکین و متین اول . بیل که مواقع حقه قضا ، جناب حقک
 اجر جزیل و ذکر جمیل احسان بو یوردینی امور مبجله دندر .

الحق خیر من التمادی فی الباطل و المسلمون عدول بعضهم على بعض الا مجرباً علیه شهادة
 زور او مجلوداً فی حد او ظنیناً فی ولاء او قرابة فان الله تولى من العباد السرائر و ستر عليهم الحدود
 الا بالبینات و الایمان . ثم الفهم فیما ادلی الیک مما ورد علیک مما لیس فی قرآن و لاسنة ، ثم قایس
 الامور عند ذلك و اعرف الامثال و الاشباه ثم اعمد فیما ترمى الی احبها الی الله و اشبهها بالحق ،
 وایک و الغضب و التلق و الضجر و التأذی بالناس و السكر عند الحصومة او الحصوم [شک الراوی] .
 فان النضاء فی مواطن الحق مما یوجب الله به الاجر و یحسن به الذکر . فمن خلعت نیته فی الحق ولو
 علی نفسه کفاه الله ما بینته و بین الناس و من تزین بما لیس فی نفسه شأنه الله فان الله تعالی لا یقبل
 من العباد الا ما کان خالصاً فما ظنک بشواب غیر الله فی عاجل رزقه و خزائن رحمته و السلام علیک
 ورحمة الله . . .

بر کیمسه نك ولو که کندی علیه اولسون حق یولنده نیتی خالص اولور ایسه جناب حق آکا کفایت ، ناسک شر و مضر تندن آنی حمایت ایدر . هر کیم که ساخته خصال ایله سوسله نیر ، ریاکاراق یولنه صاپارسه حضرت ذوالجلال ده آنی خلق آره سنده رذیل و بدنام ایلر . چونکه جناب خداوند مجید ، آنجق صدق نیت و حسن طویته مقرون اولان افعالی قبول ایدر . شو حالده سن ، رزاق کریم اولان اللهک رزق عاجلنه ، خزائن رحمتنه بدل ، انسانلردن کله جک یالانجی مکافاتک نه قیمتی اوله بیلیر ظن ایدرسک ؟ ! والسلام علیک ورحمة الله . . .

امام علی « کرم الله وجهه » حضرت تلمیینه کلنجه : مشارالیه خلفای راشدینک دردنجیسی ورسول اکرم اقدمزک داماد مکرمی ؛ سبطین مکرمین حضرت (حسن) و (حسین) ک پدر معالی پروریدر . اصحاب کرام ایچنده مشارالیه درجه سنده عالم و فیه برذات یوقدر . بوجهتله عموم اصحابک اک بویوک عالمی ، اک بویوک فقیه و مجتهدی مشارالیه حضرت علی مرتضادر . حضرت عمر ، « بر حادثه مشکله حقننده حضرت علیک بولونمدینی مجلس مشاوره ده جناب حقه صیغینیرم » دبمشدر . و مشارالیه حضرت عمرک (اقضانا علی) یعنی « بزم اک بویوک قاضی و فقیهمز علیدره دیدکلری مرویدر .

لکن ابن قیمک دیدیکی کبی مع التأسف غلات شیعه ، کندیسنه کمال ارتباط والوهیت درجه سنه چیقاره جق درجه ده فرط محبتلری سببیه حق عالیرنده درلودر لویالانلر ترتیب ، اعطا ایتدیکی حکم و فتوالرینی تحریف و تغییر ایتدیلر . بوندن دولاییدر که مشارالیهک اکثر فتاواسی ، کندیلرندن ثابت و صادر اولدینی وجهله انتشار ایتمه متس ، خیلی تبدله اوغرامشدر . آنک ایچون حکم و فتوالرینک اکثریسی علما تزدنده مظهر حسن قبول اولمامشدر . یالکمز اولاد و احناد کرامی و یاران صدق اتسامی طرفندن نقل و روایت اولونانلری قبول اولونمشدر . [اعلام الموقعین] .

عبدالله بن مسعود حضرت تلمی، حضرت عمر و علیدن سوکره اصحاب کرامک اک بویوک فقیهیدر . ارتحال پیغمبریدن سوکره (کوفه) ده اختیار اقامت ایله مشدی . (مبسوط سرخسی) ده بیان اولوندینی اوزره حلقه تدریسنده درت بیک طلبة علوم

حاضر بولونهرق کندیسندن تعلم ایدردی . مشارالیه ابن مسعود حضرتلری ، بالجمله علمای عراقك استاذ کلی ، و آشاغیده تفصیل ایدیه چکی اوزره فقهده عراقیون مسلکک تک معلم اولیدر .

عبدالله بن عباس حضرتلری ، فقهای اصحابك الك کنجی واک چوق فتوی ویرنیدر . «اعلام الموقعین» ده ائمه حدیثدن واکابر فقهای ظاهریه دن (ابن حزم) دن تقللاً بیان اولوندیغنه کوره ، مشارالیه ابن عباس حضرتلرینک مؤخرآ جمع و تخریر اولونان فتوالری بکرمی کتاب تشکیل ایله مشدر . مشارالیه بالجمله نفسرینک امامی و مکده یتیشن علما و فقهای تابعینک مقتدی بهیدر . اکثر مجتهداننده اسلافه مخالفت ایتمشدر . حلقه تدریسنده تفض ایدن علمای تابعین ، اکثر مسائلده آنک رأی و اجتهادیه عمل ایتمشدر سه ده اسلافه مخالفتله تفرد ایتمدیکی اجتهاداتنک اکثریسنده جمهور فقها ، مشارالیه اتباع ائمه مشدر [حجة الله البالغه] . .

حضرت عایشه «رضی الله عنها» ، حضرت پیغمبرک رفیقه محترمه لری اولمقده برابر خارق العاده ذکایه ، ویک قوتلی حافظه یه مالک ایدی . بو جهته رسالتپناه اقدمزدن بحق استفاضه ایله مش و بناء علیه حقایق شرعیه نی بک چوق علمای اصحابدن ده ائی آکلامشدر . بونک ایچوندرکه فقهای اصحابك برنجی طبقه سینه داخل اولمشدر . کبار اصحابدن بک چوقلری کندیسنه مراجعتله حل مشکل ایدردی .

زید بن ثابت حضرتلری ، عهد رسالتده وحی کتابی خدمت معجمله سنده بولونان ذوات کرامدن و قرآن کریمی باشدن باشه حفظ ایدن مشاهیر قرادندر . قریباً بیان اولونه جنی و جهله اولو برنجی خلیفه حضرت ابوبکرک امریله بالجمله آیات قرآنیه نی متفرق قطعه لردن منتظم صحیفه لره جمع و تخریر ، سوکرده اوچنجی خلیفه حضرت عثمانک امریله الیوم ید توقیر مزده بولونان مصحف شریفی تنظیم و ترتیب ایدن ذات ستوده صفاتدر . فقهده قدرت کلیه سی اولمقده برابر علم فرائضده مهارت کامله سی واردی . حضرت عمر ، همان دائماً حضرت علی ایله برابر مشارالیهی مجلس مشورتنه دعوت ایدر ، رأینی آلیردی . حتی مشارالیه عبدالله بن عباس حضرتلری ، برای استفاده

مشارایه زید بن ثابت حضرت تدرینه مداومت ایدر . و حیوانه ینه جکی زمان اوزنکیسنی
طوتارمش .

عبدالله بن عمر حضرت تدری ده مشاهیر فقههای اصحابدن و برنجی طبقه به داخل
اولانلردندر . علمای تابعیندن پک چوقلری حلقه تدریس لرنده تفیض ایتشدر .
زهد و تقوی اصحابندندر . دنیا کندیسنه پک زیاده طالب اولدینی و حتی خلیفه بیله
یا بلتی ایستدیکی حالده قبول ایتیوب رد ایتشدر .

ابن قیم جوزیه ، «اعلام الموقمین» ده دیور که دین ، فقه و علم امت اسلامیه ده عبدالله
بن مسعود ، زید بن ثابت ، عبدالله بن عمر و عبدالله بن عباس حضرت اتنک اصحاب
و شاگردانندن انتشار ایتشدر . بوتون امت اسلامک علم و عرفانی ، معلومات دینه
و فقهیه سی ایشته بودرت ذات فضائل صفاتک طلبه سندن مأخوذدر .

اهل مدینه ، زید بن ثابت ایله عبدالله بن عمر حضرت اتنک اصحابندن اخذ علوم
ایتشدر . اهل مکه عبدالله بن عباس حضرت تدرینک شاگردانندن ، اهل عراق ده
عبدالله بن مسعود حضرت تدرینک طلبه علم و عرفانندن اخذ و تعلم ایله مشدر .

جمع قرآن ، ترتیب مصاحف

اصحاب کرامک کرک نشر دین خصوصنده ، و کرک دولت اسلامیه تک تعالیسی
امرنده پک بویوک خدمت لری سبق ایتشدر . اک بویوک خدمت لرندن بری و بلا که ده
برنجیسی قرآن کریمک جمع و ترتیبی کیفیتدر . شویله که :
قرآن کریم آیت نازل اولدنجی رسول اکرم صلی الله علیه و سلم ، حضرت تدری
هر آیتک یرینی یعنی هانکی سوره تک زه سنه یازیله جغنی تعیین ایدر و او ترتیب اوزره
یازلمسنی و حی کاتب لرینه امر ایلردی . آنلرده اولوجهله یازارلردی . دیگر اصحاب
کرامده هب بو ترتیب اوزره قرآن کریمی ضبط و حفظ ایدردی . فقط کیمی
برمقدارینی ، کیمی جمله سنی از بر ایدردی . قرآن کریمک جمله سنی از بر ایدنلره
شمدی (حافظ) دینلدیکی کبی اوزمان (قراء) دینلیردی . و قتیله عرب امت امیه
اولدینندن ایچلرنده او قویوب یازمق بیان پک نادر ایدی و بو کیفیت آنلره پک

ضرب کورونوردی . آنکچون قاره قرآن اولان کبار صحابه به (قراء) دیرلردی .
زمانمزمده قرآن کریمی تجوید تام اوزره او قویان ووجوه قرائی بیان حافظلره
(قراء) اطلاق اولونور .

بعض اصحاب کرام دخی ، وقت سعادتده قرآن کریمی ده ریلر ، تخنلر ، کیکلر
ایجه و بیاض طاشلر و مرمرلر اوزرینه یازارلردی .
ذکر جمیلری یوقاریده سبق ایدن حضرت امام عنی ، عبدالله بن مسعود ،
زید بن ثابت و ابی بن کعب کبی تماماً قرآن کریمی یازوب جمع ایدنلر دخی و ارایدی .
زمان سعادتده بک چوق قراء اولوب سائر ناسه تعلیم قرآن ایدرلردی . فقط
ایچلرندن دردی بک زیاده شهرت بولمشلردی که (عبدالله بن مسعود) ، (سالم مولی
ابی حذیفه) ، (ابی بن کعب) ، (معاذ بن جبل) حضرت ایدر «رضی الله عنهم»
(وفی صحیح البخاری عن النبی علیه السلام انه قال : خُذُوا الْقُرْآنَ مِنْ اَرْبَعَةٍ مِنْ

عبدالله بن مسعود وسالم ومعاذ و ابی بن کعب]

ایشته بووجهله قرآن کریم ، زمان پیغمبریده تمایله حفظ ایدلش و یازلش ایدی .
فقط مجموعی طویل اوله رق بریده جمع اولونماشدی .
حضرت ابوبکر صدیقک ایام خلافتده ساخته پیغمبرک ادعاسیله ظهور ایدوب
بک چوق خلقی اضلال ایدن و بوسورتله اطرافنه کلیتی قوت طویلایان مشهور
مسلمة الکذاب ایله (یمامه) ده وقوع بولان محاربه ده برروایتده یتمش ، دیگر بر
روایتده دهها زیاده قراء اصحاب شهید اولمشدی که آنلردن بری ده سالف الذکر
درت قراء مشهوره دن (سالم) ایدی .

حضرت عمر ، بو حادثه دن اور کدی . هان حضور خلیفه به کتدی و ، «قورقارم که
سائر مواقع حربیده دخی برچوق قراء شهید اولور ، بوسورتله آزوقت ظرفنده
آنلره انقراض کلیر ، بونک نتیجه سنده ده آیات قرآنیه اونودولور . بناء علیه قرآن
کریمک جمعنی امرا یتلیسک ، دیدی . خلیفه ابوبکر حضرتلری ، ابتداترد کوستردی .
و « امر دینده حضرت پیغمبرک یامادینی برشیعی نصل یاپارسک؟ ، دیدی . حضرت
عمرده « جناب حقه قسم ایدرم که بو ، بر امر خیردره ، دیدی و فکرنده اصرار ایلدی .

(۱) خلی تردددن سوکره نهایت حضرت ابو بکر صدیق ، جناب رسالتنا
اقد مزك وحی كاتبی اولان اكابر فقهای اصحابدن وقراء اربعة مشهوره دن سالف الذكر
(زید بن ثابت) حضرت تلرینی چاغیردی وقرآن کریمك جمعنی آكا اراده بو یوردنی
بخاری شرحی (عینی) و (اتقان سیوطی) ده ذكر و بیان اولوندینی اوزره حضرت
عمرده مشارالیه معاونت ایتمینی امر ایتدی .

مشارالیه زید بن ثابت حضرت تلری ، عهد رسالتده وحی كاتبی اولوب قرآن کریمی
كاملاً جمع و حفظ ایدنلردن اولدینی حالدہ ؛ عهد سنه تحمیل اولونان وظیفه نك
فوق العاده اهمیت و تزا كتنه مبنی ؛ بوبابده سوك درجه ده دقت و احتیاطه رعایت
ایله ایفای وظیفه یه باشلادی .

شویله كه : حضرت عمرده حاضر اولدینی حالدہ هر كیمده قرآندن یازلمش
برشی وار ایسه جمله سننی طویلادی . سائر قرایده مراجعت و آنلری استشهاد
ایلدی . بو صورتله آنلر كده شهادت و تصدیق ایتدكلری سور و آیات قرآنیه یی
تمامیله صحیفه صحیفه یازوب جمع ایلدی .

اشبو صحائف مطهره ؛ حضرت صدیقك نزد خلافتنا هیلرندہ حفظ اولوندی .
آنك وفاتندن سوكره خلیفه ثانی حضرت عمرك یاننده طوردی . بعده کریمه سی
ام المؤمنین حضرت حفصه نك (ر ، ض) نزدنده قالدی .

[۱] فی صحیح البخاری ان زید بن ثابت رضی الله عنه قال ارسل الی ابو
بكر مقتل اهل الیمامة فاذا عمر بن الخطاب عنده قال ابو بكر رضی الله عنه :
ان عمر اتانی فقال ان القتل قد استحجر یوم الیمامة بقراء القرآن وانی اخشی ان
یستحجر القتل بالقراء بالمواطن فیذهب كثير من القرآن وانی اری ان تأمر
بجمع القرآن قلت لعمر : کیف تفعل شیئاً لم یفعله رسول الله صلی الله علیه
وسلم ؟ قال عمر هذا والله خیر فلم یزل عمر یراجعنی حتی شرح الله صدری
لذلك ورایت فی ذلك الذی رای عمر قال زید قال ابو بكر انك رجل

بروجه مشروح آیات قرآنیہ ؛ زمان پیغمبریدہ نہوجہلہ ترتیب اولوندیسہ
بوصحف شریفہدہ دخی ہر سورہنک آیتلری او ترتیب اوزرہ یازلمش ایدی .
لیکن سورہلر ، صرہسیلہ ترتیب اولونمیوب ہر سورہ یالکمز باشنہ بر کتاب ایدی .
صوکرہ اوچنہی خلیفہ عثمان ذی النورین « ر ، ض ، ح » حضرت تلمینک عہد خلافتندہ
سورہلر دخی صرہسیلہ یازلدی و (مصحف) دنیلدی .

شویلہ کہ : قرآن کریم ، لسان عربی اوزرہ نازل اولوب عرب ایسہ قبائل
کثیرہ بہ منقسم ولتلمری ، طرز ادا وشیوۃ تلفظلری بعض الفاظ وکلماتہ یکدیگرہ
مخالف ایدی . بولفات ووجوہ ادانک یدیسی ، سائرینہ نسبتلہ فصیح ایدی . لکن
جلہ سنک افصح وارجمی ، حضرت پیغمبرک قیلہسی اولان (قریش) قیلہ سنک
لتقی ایدی . بوجہتلہ قبائل عرب آرہ سندنہ وجوہ فراتجہ فرق واختلاف وارایدی .
بوندن باشقہ ماخذلری دخی مختلف اولوب ہربری ، قراء صحابہ دن برینہ استناد ایلردی .

شَابُّ عَاقِلٌ لَا نَهَمَكَ وَقَدْ كُنْتَ تَكْتَبُ الْوَحْيَ لِرَسُولِ اللَّهِ صَلَّى اللَّهُ
عَلَيْهِ وَسَلَّمَ فَتَتَّبِعِ الْقُرْآنَ فَاجْمَعُهُ . فَوَاللَّهِ لَوْ كَلَّفُونِي نَقْلَ جَبَلٍ مِنَ الْجِبَالِ
مَا كَانَ أَثْقَلَ عَلَيَّ مِمَّا أَمَرَنِي بِهِ مِنْ جَمْعِ الْقُرْآنِ . قُلْتُ كَيْفَ تَفْعَلُونَ شَيْئًا
لَمْ يَفْعَلْهُ رَسُولُ اللَّهِ صَلَّى اللَّهُ عَلَيْهِ وَسَلَّمَ ؟ قَالَ هُوَ وَاللَّهِ خَيْرٌ . فَلَمْ يَزَلْ أَبُو بَكْرٍ
يُرَاجِعُنِي حَتَّى شَرَحَ اللَّهُ صَدْرِي لِلَّذِي شَرَحَ لَهُ صَدْرَ ابْنِ بَكْرٍ وَعَمْرٌ
رَضِيَ اللَّهُ عَنْهُمَا . فَتَدَبَّعْتُ الْقُرْآنَ أَجْمَعُهُ مِنَ الْعُسْبِ وَاللِّخَافِ وَضَدُورِ الرِّجَالِ ،
حَتَّى وَجَدْتُ آخِرَ سُورَةِ التَّوْبَةِ مَعَ ابْنِ خُزَيْمَةَ الْأَنْصَارِيِّ لَمْ أَجِدْهَا مَعَ
أَحَدٍ غَيْرِهِ « لَقَدْ جَاءَكُمْ رَسُولٌ مِنْ أَنْفُسِكُمْ عَزِيزٌ عَلَيْهِ مَا عَنِتُّمْ » حَتَّى خَاتَمَةَ
بِرَاءَةٍ . فَكَانَتْ الصُّحُفُ عِنْدَ ابْنِ بَكْرٍ حَتَّى تَوَفَّاهُ اللَّهُ ، ثُمَّ عِنْدَ عُمَرَ حَيَاتِهِ ،
ثُمَّ عِنْدَ حَفْصَةَ بِنْتِ عُمَرَ رَضِيَ اللَّهُ عَنْهُ ...

چونکہ قرآن کریمی ، کوفہ لیلر (عبدالله بن مسعود) دن ، بصرہ لیلر (ابو موسیٰ الاشعری) دن ، دمشق شام اہالیسی (ابی بن کعب) دن ، حمص اہالیسی (مقداد بن اسوددن) اخذ وتعلم ایلمشدی .

یکرمی بش سنہ ہجریہ سندہ کوفہ اردوسی ، ارمینہ و آذربایجان جہتربنہ سفر ایتدکدہ افاضل اصحابدن (حذیفہ بن الیمان) حضرتلری دخی برابر ایدی . اونلرہ امداد ایچون شامدن دخی بر فرقة عسکریہ کوندرلمش اولدیغندن بوسفرده اهل عراق ایله اهل شام برله شوب برلکدہ غزنا ایتشاردی . لکن هربری اثناء صلاتده کندی قرائتک صحفتی ادعا ایله دیکرینک قرائتی قبول ایتدیکندن بینلرنده منازعه وقوع بولدی . یکدیکرینی تکفیرہ قدر کیدنلر اولدی . آز قالدی ، فتنہ ظهور ایدہ جک و بینلرنده بویوک بر قتال وقوع بولہ جقدی .

حذیفہ حضرتلری ، بو اختلافدن قورقدی . وناسی بر قرائت اوزرہ جمع ایتک افکارینہ دوشدی . و کوفہ یه عودتندہ بوبیخی میدانه قویدی . لکن ابن مسعود حضرتلری آکا مخالفت ایتدی ، اوده مدینہ منورہ یه کتدی و بو اختلافک وخامت طاقتنی حضرت عثمانہ عرض ایلدی .

حضرت عثمان دخی هریرده مرجع و ماخذ اولمق اوزرہ بر مصحف شریف ترتیبی رأی و تنسیب ایدوب حضرت علی بنی و سائر کبار اصحابی جمع ایله بورأیی آنلرہ سویلیدی ، آنلرده تصویب ایلدی .

آنک اوزرینہ حضرت عثمان ، حضرت حفصہ تزدندہ محفوظ اولان آنف الیمان صحف مطهرہ تی جلب ایله آنلردن قریش قرائتی اوزرہ بر مصحف شریف یازمه لرینی سالف الذکر (زید بن ثابت) حضرتلری ایله (عبدالله بن الزبیر) و (سعید بن الماص) و (عبدالرحمان بن الحرت بن هشام) حضراتنه امر ایتدی . هر سمتہ کوندرلمک اوزرہ متعدد مصحفلر یازلمق لازم کلدیکندن مؤخرآ (انس بن مالک) و (عبدالله بن عباس) کبی دیکر بعض اکا بر اصحاب دخی مشارالیمه الحاق اولوندی . قوة الظهر اولمق اوزرہ (ابی بن کعب) دخی بوجعیته ادخال ایدلمش و جمله سنک عددی اون ایکی یه ابلاغ اولونمشدر .

چونکہ : حضرت صدیق زمانندہ کی جمع صحف ، آنجق متفرق اولان قرائتی

بریره جمع و تخریردن عبارت اوله رق صرف کتابته و امر تخریره عاند برایش ایدی .
اما حضرت عثمانك اراده سی اوزره جمعه تثبت اولونان مصحف شریفده لغت
و قرائت قریش اوزره قصر و حصر اولونیور ایدی ، بوا یسه تدقیقه محتاج بر امر
مهم ایدی .

ورده مصحفده سوره لرك صره سیله تخریر و ترتیبی لازم کلوب بوده يك مهم
و يك معنی بر مسئله ایدی . زیرا اصحاب کرامدن بعضاری ، زمان رسالته قرآن
کریمی تمامله جمع ایله مش ، بعضاری ده اکثرینی جمع ایدوب وفات نبویدن سوکره
تماملا مش ایدی . حالبوکه مصحفاری ، بعض سور شریفه نك ترتیبده یكدیگره
موافق دکل ایدی . مثلاً ابن مسعود حضرت تلرینك مصحفده (سوره بقره) دن
سوکره (سوره نسا) آدن سوکره (سوره آل عمران) یازلشدی . حضرت امام
علی ایسه سوره لری ترتیب نزول اوزره جمع و ترتیب ایدره ك مقدم نازل اولانی قدیم ،
مؤخر نازل اولانی تأخیر ایتمش ایدی . بوندن دولایی قرائته قدم و ملکه و مهارت
اصحابندن بعض ذواتك تألیف مصحفه مأمور اولان جمعیتده بولونمسی لازم کلدی .
حالبوکه وقت سعادتده کسب شهرت ایتمش اولان قراء اربعه مذکورده دن
(سالم مولی ابی خذیفه) ، آنفاً بیان اولوندینی اوزره (یمامه) محاربه سنده ، (معاذ
بن جبل) ده حضرت عمرك زمان خلافتنده وفات ایله مش ایدی . بوجهتله بودرت
مشهور قرادن یالکز (عبدالله بن مسعود) ایله (ابی بن کعب) بر حیات بولونیوردی .
ابن مسعود ایسه کوفهده بوجه مشروح خذیفه یه مخالف رأیده بولونمش اولدیغندن
آنك دعوت و احضارندن صرف نظر اولونه رق ابی بن کعب ایله اکتفا اولونمشدر .
اشبو جمعیت امر و اراده خلافتناهی موجبجه بویوک برسی و اقدام ایله
برروایتده بش ، دیگر برروایتده یدی نسخه مصحف شریف وجوده کتیردی
خلیفه حضرت عثمان (ر، ض) بونسخه لردن بردانه سنی مکه مکرمه یه ، شامه ، یمه ،
بحرینه ، بصره یه و کوفه یه کوندردی . بردانه سنی مدینه منوره ده آلیقویدی .
ذکر اولونان صحف شریفه بی ده حضرت حفصه یه اعاده ایلدی .
بخاری شریفده بیان اولوندینی اوزره حضرت عثمان ، صحف مذکورده ایله
اشبو (مصحف عثمانی) دن ماعدا ایدی ناسده نه قدر صحف و مصحف وار ایسه
جمله سنك محو و احراقنی امر و اراده بویوردی .

فقط کوفه به مصحف عثمانی ورود ایندیکنده ابن مسعود حضرت تبری، کندی ترتیبندن و اصول قرائتندن و از کچمدیکنندن برمدت آنک مصحفی کوفه لیلردن آکا تابع اولانلر یدلرنده مرعی و معتبر قالدی. ایکی سنه صکره عبدالله بن مسعود ایله ابی بن کعب و فاب ابتدی و بناء علیہ علم قرائتده ریاست، زید بن ثابت حضرت تارنده استقرار بولدی. آندن صوکره مشارالیه ابن مسعود حضرت تارینک مصحفی، دیگر صحف و مصاحف کبی متروک و منسی اولدی.

مصحف عثمانی ایسه هر یرده و هر زمانده مقبول و تواتر آمنقول اولوب اوزماندن بری ایادی ناسده متداول اولان مصاحف شریفه، هب آندن استنساخ اولونه کلشدر... [بخاری شریفه، اتقان سیوطیده، تاریخ ابن اثیرده، نواریخ خلفاده بویهجه مذکور و محرردر] . .

دور تابعینده اصول فقه

قرن ثانی رجالی یعنی تابعین حضراتی دخی ، قرن اول رجالی کبی اهل لسان اولدقلرندن آنلرده ، نصوص شرعیه نك منطوق و مفهومی ، دلالت و اشارتی ، اقتضا و ایماسنی و بالجملة مزایاسنی سلیقه مادر زادلی ایاه آکلارلردی . بناء علیه آنلرکده اصحاب کزین کبی نه قواعد لسانییه ، نه ده قوانین اصولیه به احتیاجلری یوقدی . فضله اوله رق اصحاب کرامک شا کرد علم و عرفانلری اولدقلری جهته آنلرک بوتون معلوماتلرینی توارث ایتشلردی . صدر اسلامده بولونملری سببیه ده احادیث نبویه نك سندلرنده نظر و تدقیقه محتاج دکلردی . راویلر اصحاب کزین ویا کندیلری کبی کبار تابعین ایدی . آنلرک بوتون تراجم احوالی ایسه کندیلرینه تمامیه معلوم ایدی . بو جهته کندیلرینه نقل و روایت اولونان حدیثلرک صحیحلرینی غیر صحیحندن تمیزده کوچلک چکمز لردی .

آنلرده تخریج احکامده اسنادلری بولونان صحابه کزینک اثرینه اقتفا ایدرلردی . یعنی بر حادته وقوعنده اولا کتابه ، سوکره سننه واک سوکره رأی و اجتهاده مراجعت ایلرلردی . لکن تابعین زماننده قیاسدن باشقه و آنک فوقنده بر دلیل شرعی دها ظهور ایتشدی که اوده (اجماع) در .

شویله که : اصحاب کرام بعضاً بر مسئله نك حکمنده اختلاف ایتدکلری کبی بعضاً ده اتفاق ایدرلردی . بویله اتفاق ایتدکلری مسائله کندیلرینه مخالفت ایدن بولونورسه شدته رد و انکار ایلرلردی . آنلرک بو وجهله اتفاقلری ایسه شبهه منر شرعاً ثابت اولان بر دلیلدن ناشی ایدی . زیرا بویله ارکان دین و ناشر شریعت اولان اعظم امتک بلا دلیل بر حکم شرعیده حجة اتفاق ایتلری متصور دکلدر .

بوندن باشقه بحث مخصوصنده ایضاح اولونه جفی اوزره [لَا تَجْمَعُ أُمَّتِي عَلَى ضَلَالَةٍ] کبی بعض نصوص شرعیه دخی (اجماع) ک خطا و ضلالتدن مصون اولدیفنه دالدر .

بونك ایچون تابعین زماننده دها دوغریسی دور اصحابده (اجماع) دخی بر دلیل شرعی عد اولوندی . همده قیاسك فوقده طوتلدی . بو صورتله ادله شرعیه درده بانغ اولدی : کتاب ، سنت ، اجماع ، قیاس . .

دور تابعینده عالم اسلامك هر طرفنده ، بك چوق علما ، فقها و محدثین یتشدی . اکثریسی ده مجتهد ایدی ، بریرلرینه اصلا تقلید اتمه لردی . اصحاب کرامك اتفاق واجماعیله ثابت مسئلهلری عیناً قبول ایدرلر ، اجماعه مخالفت اتمه مك ایچون اولابده رأی واجتهادده بولونمازلردی .

لکن اصحاب آره سنده اختلافلی اولان مسائله هانکیسنگ رأی و فکری ، دها قوتلی و کندی اجتهادلرینه دها موافق بولورلرسه آنی ترجیح ایلرلردی . ایچلرنده (سعید بن مسیب) ، (علقمه) ، (مسروق) و (ابراهیم نخعی) کبی کبار اصحاب حضورنده بالاجتهاد فتوی ویره جك قدر ارباب علم و اقتدار واردن . اصحاب کزینده آنلرک بو صورتله اجتهاد واقفاده بولونملرینی تجویز ایدرلردی .

یوقاریده ذکر اولونان فقهای اصحابك ارتحاللرندن سوکره دور تابعینده ریاست فقیهه ، مدینه ده اکابر فقهای تابعیندن مشارالیه (سعید بن مسیب) ، مکده (عطاء بن ابی رباح) ، کوفه ده (ابراهیم نخعی) ، بصره ده مشهور (حسن بصری) ، یه ؛ یمنده (طاوس بن کیسان) ، شامده (مکحول) ، خراسانده (عطاء خراسانی) ، یه ، یمامه ده (یحیی بن ابی کثیر) ، انتقال ایتشدر .

مدینه منوره ده سعید بن مسیب زماننده و آنک درجه سنده دها آتی ذات ، فقه ایله کسب شهرت ایتشدی که آنلرده (عروة بن الزبیر) ، (قاسم بن محمد بن ابی بکر) ، (خارجه بن زید بن ثابت) ، (ابو بکر بن عبدالرحمان) ، (سلیمان بن یسار) ، (عیداه بن عبدالله بن عتبه بن مسعود) . .

(سعید بن مسیب) ایله برابر بونلره (فقهای سبعة) اطلاق اولنور . مشارالیهم فقهی فقهای اصحابدن ام المؤمنین عایشه ، زید بن ثابت و عبدالله بن عمر حضراتدن اخذ وتعلم ایتشلردر .

مکده (عطاء بن ابی رباح) دن باشقه (مجاهد) ، (عید بن عمیر) ، (عمرو بن دینار) ، (ابن ابی ملیکه) ، (عکرمه) اشتهار ایله مشدر .

کوفه ده (ابراهیم نخعی) دن اول (علقمه) ، (اسود بن یزید) ، (مسروق) ، مشهور قاضی (شریح) بین العلما فقه ایله تمیز ایتمش ایدی . ریاست فقهیه ده (علقمه) ده ایدی . ابراهیم نخعی به علقمه دن انتقال ایتمشدر . ابراهیم نخعیدن ده (حماد بن ابی سذیان) ، آندن ده اهل عراق امامی ، مذهب حنفینک مؤسس امام اعظم (ابوحنیفه نعمان بن ثابت الکوفی وفاتی : ۱۵۰) حضرت تدرینه انتقال ایله مشدر .

مدینه ده ریاست فقهیه ، مشارالیه سعید بن مسید بن سالم بن عبدالله بن عمره ، آندن ده ربیعۃ الرأی بن ابی عبدالرحمانه ، آندر دن ده اهل مدینه تک امامی ، مذهب مالکینک مؤسس امام الأئمه (مالک بن انس الاصبجی وفاتی : ۱۷۹) حضرت تدرینه انتقال ایتمشدر .

دور مجتهدینده اصول فقه

تابعیندن سو کره حال بوس بوتون دکشدی . دها دور تابعینده ممالک اسلامیه بک زیاده توسع ایتشدی . بونک نتیجه سی اوله رق زراعت ، تجارت و صناعتده بک بویوک وسعت وانکشاف حاصل اولدی . معاملات ناس توسع ایتدی . حقوقی حادثه لر چوغالادی . اختلاف و نزاع آرتدی . عرفلر ، عادتلر تبدیل ایلدی . علما هر کون یکی یکی مسئله لر قارشوسنده ، یکی یکی اجتهادلرده بولونمق مجبوریتده قالدی .

عربک اقوام سائر ايله اختلاطندن ده لسان عربینک صفوتنه خلل کلدی . غلطات و مولدات چوغالمنغه باشلادی . اسکی ملکه و سلیقه لسانیه بوزلمیه یوزطوتدی . لسانک اصلنده مندیج بولونان صرف ونحو قاعده لرینه رعایت ایدلمز اولدی . حتی حضرت امام علی ، دها کندی زماننده اصول اعرابی ضبط ایتک مجبوریتنی حس ایتشدی .

وبرده خلافت غوغالری یوزندن مقدا مشارائیه امام عاینک ایام خلافتنده ظهور ایدن شیعه و خارجییه فرقه لری ، مؤخر امتعدد حزبلره آیرلیدلر . بونلر مقصد خفیلرینی ترویج ایچون دینی آلت اتخاذا ایتدیلر ، شریعتیه مقاصد سیاسییه قارشیدردیلر . درلو درلو یالان حدیثلر ایدردیلر . آیات قرآنییه و احادیث صحیحیه بی ده کندی غرض فاسدلرینه کوره عقل و اذقان ، قواعد لسان خارچنده تأویله قالدیلر . نصوص شرعیه نك الفاظ و عبارده سندن دوغریدن دوغری به منضم اولان معنای ظاهرندن بشقه ، برده معنای باطنی اولدیغنی ، حتی بونک ده ایکنجی و اوچنجی و دها زیاده درجه ده معنای باطنیسی بولوندیغنی ادعا ایتدیلر . خاطره کلیه جک ، الاحق انسانلری کولدیره جک خرافات و ترهاتی آیات و احادیثه اسناد ایلدیلر .

بعضری ده احکام اعتقادیه و مسائل دینیہ تعمیمه قویولدیلر . بونک نتیجه سی اولق اوزرده صدر اسلامده ایشیدلمک یکی یکی فکرلر ، اعتقادلر و مرجئه ، پیبریه ، معتزله و مشبهه کبی بربرینه تماماً ضد اعتقاد فرقه و مذهبلی ظهور ایتدی .

علمای اسلام ، بالطبع بو حاللره قارشلی لاقید قاله مازدی . بو جریانلرک برآن اول اوکی آلمق ایجاب ایدیوردی . عکس تقدیرده دین و شریعت ، بوس بوتون انحلاله اوغرایه جقدی . بوکا محل بر اقامق ایچون اک اول یاییله جق شی ، قواعد لسانیہ یی وضع و تمهید ، احادیث نبویہ یی جمع و تدوین و صحیحنی غیر صحیحندن تفریق و تمیزه مدار اوله جق اساسلی تثبیت ایلک ایدی .

چونکه دین اسلامک اس اساسی اولان قرآن کریم ایله احایث نبویہ ، لسان عربی اوزره نازل و وارد اونش ایدی . لسان عربینک قواعد صرف و نحوی ضبط و تدوین ایدلیه جک اولور ایسه ، آلدینی جریانه کوره لسان عربی بوتون بوتون اصلندن چیقہ جق ، باشقه بر لسان اوله جق ؛ بوده آیات و احادیثک ، معناری آکلاشلماز مبهم الفاظ و کلماتدن عبارت قالسنی انتاج ایده جک ایدی .

احادیث نبویہ ، قرآن کریم کبی اصحاب کرام طرفندن جمع و ترتیب ایدلمه مش ایدی . حدیثلرک آیات قرآنیہه قارشمنی احتمالندن خوفاً اکا بر اصحاب ، احادیث شریفه یی جمع و تحریردن اجتناب ایتمشلردی . حتی رسالتپناه اقدمز ، کندیلرندن قرآن کریمدن باشقه بر شینک یازلمسنی منع ایتمشدی . بونک ایچوندرکه اکا بر اصحاب ، احادیث نبویه نك یازلمسی جائز اولوب اولیه جنی خصوصنده اختلاف ایله مشلردر . عمر فاروق ، عبدالله بن مسعود ، زید بن ثابت ، ابو موسی الاشعری و ابوسعید الخدری کبی بر جوق فقهای اصحاب ، کتابت و تحریر احادیثک کراهتنه قائل اولمشلر . امام علی ، و مخدوم عالیلی حسن محتبی ، انس و عبدالله بن عمرو بن عاص کبی دیگر افاضل اصحابده بلاکراهه جوازینه ذاهب اولمشلر [کذا فی کشف البردوی] .

بوندن دولاییدرکه احادیث نبویہ ، دور تابعینک او اخیرینه قدر جمع و تحریر اولونماشدی . یوقاریده بیان اولندینی وجهله قرآن کریم ، اصحاب کرام طرفندن

جمع و ترتیب آیدلش اولدینی کبی اسلافدن اخلافده تواتراً نقل اولونه کلمش ایدی . آنک بو صورتله مضبوط و تواتراً منقول اولسی ، آیات جلیله آره سنه ساخته و اویدر مه آیتلرک قارشه سنه مانع ایدی . لکن احادیث نبویه بویه دکلدی . آلر جمع و ضبط آیدلمدیکی کبی تواتراً ده منقول دکلدی . اکثریسی خبر واحد ایدی ، یعنی بر ویا بر قاچ کشی طرفدن نقل و روایت اولونمشدی . بو جهتله حدیثلرک آره سنه ساخته ویلان حدیث قارشه دیر مق غایت قولای برشی ایدی . نته کیم او یله اولویوردی . قرآنه و احادیث صحیحیه مخالف بر چوق یلان حدیثلر ، عنعنه سیه و اویدر مه سنداتیله نقل و روایت آیدلمکده باشلامشدی . آرتق احادیث صحیحیه نی طویلامق ، غیر صحیحلرندن تفریق ایلمک لازم کلیوردی .

ایشته بو ملاحظاته مبنی علمای اسلام ، بوباید عهده لرینه ترتب آیدن وظیفه نك آغیرلنی نسبتندده بویوکلمکنی تقدیر آیتدیلر . جمله اختصاصلری دائرندده بک بویوک بر سعی و اهتمام ایله بذل مقدرت آیلدیلر . بر طرفدن علوم لسانییه نی ، دیگر طرفدن علوم شرعییه نی تدوین آیتدیلر .

ارباب لسان ، هم بالعموم الفاظ و لغات عربیه نی جمع و تحریر ، هم ده لسانک صرف ، نحو و ادبیاتنه عائد قواعد لسانییه و ادبییه نی تدوین و تهید آیلدیلر . علمای حدیث ده موجود و مروی حدیثلرک جمله سنی جمع و ضبط آیتدیلر . صحته مقرون اولانلرینی درجه صحترینه کوره (صحیح) ، (حسن) و (ضعیف) ناملریله اوچ قسمه تقسیم ، صحته مقرون اولمایانلرینی ده (موضوع) نامیله اولکی اوچ قسمدن تفریق آیلدیلر . بوندن باشقه حدیثلرک اقسام مذکورهنی تمیزه مدار اوله جق قاعده لر تعیین ، رجال روایتی تنقید و سندات احادیثی یعنی سلسله روایات و عنعنه روایتی تدقیق ایله راویلرک حال و شانلرینی و درجات و ثوق و عدالتلرینی تبیین آیتدیلر . [جعل الله سعیم مشکورا]

ققهاده بوتون همت و اقتدارلرینی صرف آیده رک شرع شریفک کرک اعتقادیات و اخلاقیاته عائد اولان احکام اصلیه و وجدانیهنی ، و کرک عبادات و مناسکات ، معاملات و عقوباته متعلق بولونان احکام عملیه و فرعیهنی تنسیق ، فقهمک مبتنی

اولدینی اصلری و فقهانک استنباط احکامده محتاج بولوندقلری اساسلری وضع
وتأسیس ایلدیلمر . [انارالله براهینم]

یوقاریده بیان اولوندینی وجهله صدر اسلامده (فقه) و (فقها) تعبیملری
زبانزد دکلدی . علی الاطلاق اصحاب علم و معرفته (علما) دنیردی . کرچه بعض
آیات واحادیثده (تفقه) ، (فقه) و (فقیه) کلملری نازل و وارد اولمشدی ،
لکن بین الناس بر اصطلاح مخصوص اولوق اوزره تعمیم ایتمه مشدی . ابن خلدون ،
اولوقت فقههای اصحاب وتابعینه (قراء) اطلاق اولوندیفنی بیان ایدیورسده بک
او قدر دوغری کورونمیور . زیرا صدر اسلامده قرآن کریمی یازوب اوقویان
ووجوه قراشته آشنا اولان بالجمله علمای اصحاب وتابعینه (قراء) دنیردی . حالبوکه
بونلرک جملهسی (فقیه) دکلدی . (رَبِّ حَامِلٌ فَفَقِهَ غَيْرَ فُقَيْهِ) منطوقنیجه برچوق
مسائل فقهیینی بیان نیجه علما واردرکه فقیه دکل ، حافظالمسائلدر . فقیه دیه ،
فقهانک (فقیه النفس) دیدکلری نظر فقهییه مالک اولان مدققین علمابه دنیر .

خلاصه ، دور مجتهدینده امر اجتهاد حد کماله اصل ، عام فقه بر صنعت
مخصوصه و فن مستقل حالی اکتساب ایدنجه بو علمده صاحب اختصاص و امر
اجتهاده قادر اولان علمایه (فقها) ، علم مذکورده (فقه) اطلاق اولوندی .

دور مجتهدین اوائلنده فقه ، زمانمزرده اولدینی کبی یالکز احکام عملیه بمخصوص
ومنحصر دکلدی . احکام اعتقادیه و اخلاقیه دخی (فقه) ک دائرة شمولی داخلنده
ایدی . آنکچوندرکه امام اعظم ابوحنیفه حضرتلری ، احکام اعتقادییه دایرتالیف
ایتمش اولدینی رساله مشهورهسی (فقه اکبر) تسمیه ایتمش ایدی . فقهی ده (انسانک
لهنه وعلینه اولان احکامی بیلمسیدر) مفهومنده و بالجمله احکام دینییه عام و شامل
بر صورتده تعریف ایلمش ایدی .

بالآخره اعتقادیات و اخلاقیات ، دائرة بحثلری توسیع ایدیلمرک آیری آیری
بر عام مستقل حاله وضع ایلدیکنندن متأخرین فقها ، فقهی احکام اعتقادیه
و اخلاقیه دن تجرید ایله یالکز احکام عملیه و قضاییه حصر و تخصیص ایتدیلمر .
فقهک مبتنی اولدیی اساسلره ، ادله شرعیهک احواله ، امر اجتهادک سلامت

جریانی تأمین ایدہ جک قواعد اصولیہ بہ متدائر مسائل و مباحثیہ ، اصل علم فقہدن آیرہ رق بر علم مستقل ارمق اوزرہ تدوین ، فقہ ایله مناسبتی کو سترمک ایچونده (اصول فقہ) توسیم ایلدیلر .

بو دورده یعنی قرن ثالث ورا بعدہ آرتق پک چوق اصحاب فقہ و اجتهاد یتشدی . هر طرفده خصوصاً بویوک شهر لرده و عین زمانده بر چوق مجتهد بولونیوردی بونلرده فقہای تابعین کی مجتهد مطلق و مستقل ایدی . هیچ بری دیگرینک مقلدی دکلدی . افراد ناسده لدی الحاجه دیلدیکندن و یا تصادف ایلدیکندن استفتا ایلردی . افراد زمانزده اولدینی کبی بر مذهب معینہ مربوط دکلدی .

بویله اجتهاد مطلق درجه سنه واصل اولان بویوک مجتهدلردن اک زیاده تبارز ایدن ، و ناملری عالم اسلامک هر طرفه یاییلان اعظم فقہا شونلردر :

امام اهل عراق امام اعظم (ابوحنیفه نعمان بن ثابت) ، (ابن ابی لیلی) ، (ابن شبرمه) ، (قاضی شریک) ، (سفیان ثوری) ، (سفیان بن عیینه) ، امام اهل حجاز (مالک بن انس الاصبیحی المدنی) ، امام اهل شام (عبدالرحمان الاوزاعی) ، امام اهل مصر (لیث بن سعد) ، (عمرو بن الحارث) ، (عبدالله بن ابی جعفر) ..

بونلردن صکرده امام شافعی (محمد بن ادريس القرشی) ، امام المحدثین (احمد بن حنبل) ، (وکیع بن الجراح) ، (حفص بن غیاث) ، (ابو عبید قاسم بن سلام) ، (ابو ثور) .. دها سوکره ظاهریه مذهبک مؤسسای امام (داود بن علی الاصفهانی) ، جریریہ مذهبک مؤسسای رئیس المفسرین و امام المورخین (ابن جریر الطبری) ..

بونلردن باشقه امام اعظمک اصحابندن قاضی القضاة امام (بویوسف) و امام (محمد بن الحسن الشیبانی) و امام (زفر بن الهذیل) و امام (حسن بن زیاد اللؤلؤی) ، امام مالیکک اصحابندن (ابن القاسم) و (ابن وهب) و (یحیی بن یحیی الاندلسی) ، امام شافعیینک اصحابندن (المزنی) و (البویطی) ، سفیان ثورینک اصحابندن (الاشجعی) و (یحیی بن آدم) کبی اجتهاد مطلق درجه سنی احراز ایدہ جک اقتداره مالک دها پک چوق مجتهد ظهور ایتشدر . آنجق بونلر معین و مستقل بر مذهب تأسیس

ایتمیوب کندی استاذ لرینه انتساب لرینی محافظه ایله مشرودر . آنک ایچون بو کبی مجتهد لره (مجتهد منتسب) اطلاق اولنور .

مشارالیهام امام ابویوسف، امام محمد، امام زفر و امام حسن بن زیاد، تاریخاً امام شافعی و امام احمد بن حنبل و امام داود ظاهری و ابن جریر دن و دیگر لر دن مقدم اولدقلری حالده آنلر دن سوکره ذکر ایدلملری، کندیلرینه مخصوص مستقل بر مذهب صاحبی اولیوب امام ابوحنیفه یه انتساب لرینی محافظه ایتدکلر ندندر . یوقسه بونلر، خصوصیه امام ابویوسف ایله امام محمد مجتهد مطلق و مستقل درجه سنده اقتدار فقهی بی حازدر لر . و برده سالف الذکر (وکیع بن الجراح) ک مجتهد مطلق و مستقلر میاننده ذکر اولونمسی، ابن قیم جوزیه کبی بعض علمانک قولنه اتباع آدر . محقق هندی عبدالحی لکنتوینک (فوائد بهیه) سنده تحقیقنه کوره مشارالیه امام اعظمک اصحابن دن و آنک قولیه فتوی ویرنلر ندندر، شو حالده مشارالیه وکیع ده امام ابویوسف کبی مجتهد منتسبلر میاننه داخل اولمق لازم کلیر . مشارالیه یک ذکر لی برذاتدر . و عین زمانده ائمّه حدیث ندندر .

بونلر دن سوکرده مجتهد فی المذهب و مجتهد فی المسئله کلیر . ارتق بونلرک عددی لایحیی در . بعض علما امام ابویوسف و امام محمد کبی مجتهد منتسبلره مجتهد فی المذهب اطلاق ایدیور . لکن محققین بو اطلاق قی خطئه ایله یور . محل مخصوصنده ایضاح اولنه جقدر .

اقتادات مسروده دن آکلاشلدینی اوزره اشبو دور مجتهدین، دور مذاهدر . دور اصحاب و تابعینده احکام فقهیه مضبوط اولیوب داغینق ایدی . بر علم مخصوص حالته وضع ایدلمدی کبی ولوکه متفرق صورتده اولسون بر کتابه ده درج ایدلمه مش ایدی . اصول اجتهاد و مسالک فقهیه ده معین بر صورتده تأسس ایتمه مش ایدی . دور مجتهدینده فقه، ارتق داغینق و متفرق حالدن جیقار یاهرق علمی و فنی بر انسجام آئنده تنظیم و تدوین اولندی . اصول اجتهاد و مسالک فقهیه ده تأسس ایتدی . آشاغیده مسالک فقهیه بختنده ایضاح اولونه جنی اوزره فقه، عادتاً بر درس مخصوص اولهرق تدریس ایدلمکه باشلادی .

بونك نتیجه سی اوله رق فقها، عراقیون و حجازیون ناملریله ایکی قسمه آیرلدی. عراقیونده اهل رأی، حجازیونده اهل حدیث دینلدی. اهل رأیك رئیس و پیشواسی امام اعظم ابوحنیفه، اهل حدیثك رئیس و پیشواسی ده امام مالک ایدی. دورتابعینده ادله شرعیه کتاب، سنت، اجماع و قیاسدن عبارت اولمق اوزره درت نوع ایدی. امام اعظم، بودرت دلیلله (استحسان) نامیله بشنجی بر دلیل دها علاوه ایتدی. بر جوق مسائل فرعیه نك احکام فقهیه سی، انسبو استحسان دلیلی ایله استنباط ایلی. امام اعظم حضرتلری، (استحسان) نامیله اورتیه قویدقلری اساسی هرکسك آکلایه بیله چکی وجهله تعریف اتمه مش اوله جوق که معاصرلری مقصدینی آکلایه مامشله، و بوندن دولایی علمیه قیامت قویارمشله.

حالبوکه امام مالک حضرتلری ده استحسان ایله عمل ایدیوردی. شوقدرکه او، بو استحسان دیمیوردی. (مصاححت مرسله) نامی ویریوردی. حقیقتده ایسه ایکیسی ده برتیدن عبارتدر. تعبیرلر باشقه باشقه، لکن مقصد متحد. کرچه اصولیونك بیاننه کوره (استحسان)، (مصاححت مرسله) دن اعم اولمق لازم کلیبور، فقط فقهای حنفیه نك تعریفلرینه نظر بونلر آره سنده نتیجه اعتباریله فرق بوقدر. بونلرک ماهیت فقهیه لری وهرایکینک ده نتیجه سی بر اولوب آره ده کی اختلاف و نزاعك نزاع الفظیدن عبارت بولوندینی فعلی نائده مذاهب و مسالک فقهیه بختنده ایضاح اوله جقددر. بوراده یالکنز اصول فقه اساسلرینك تاریخ ظهوری تدقیق و تعقیب ایدلدیکی جهتله بونلرک ایضاح ماهیتلرندن صرف نظر اولونمشدر.

امام مالک حضرتلری، (سذذرائع) نامیله دیگر بر اساس دها وضع ایتشدی. ذکر اولونان مسالک فقهیه بختنده ایضاح اولونه جنی اوزره سذذرائعدن مقصد، ممنوعات شرعییه وسیله تشکیل ایدن افعال مباحه نك ده ممنوع اولمسندن عبارتدر. امام ابوحنیفه حضرتلری بونی قسماً قبول ایدیورسه ده صورت مطلقه ده بر اساس اولمق اوزره قبول ایتبور.

امام مالک، امور شرعییه ده اهل مدینه نك اتفاقینی ده اجماعدن باشقه، آیری

و مستقل بر دلیل شرعی اولیٰ اوزره قبول ایدیوردی. مشارالیه بونی، رسالتپناه
افدمزك افعال سنیهلرینی مشاهده ایدن اصحابدن اعتباراً سلفدن خلفه انتقال
ایتمش رطریقت مسنونہ وسنت شایعه تالی ایدیوردی.

لکن امام ابوحنیفه، امام مالکک بوتلقیسنی قبول ایتیور و بناءً علیه (اتفاق
اهل مدینه) این بر دلیل شرعی، بر اساس فقہی عد و اعتبار ایله میوردی. مشارالیه
حضرتلری، اهل مدینه نك اتفاقیه مثلا مکہ و یا کوفه اهلینک اتفاق ارسنده
بر فرق بولیور.

امام ابوحنیفه ایله امام مالک و امام مالکدن سوکره حجازیون مسلکندہ ریاستی
احراز ایدن امام شافعی، استصحاب و برائت اصلیه کبی بالاده ذکر ارلوانان
اساسلردن باشقه بدظام اساسلر دها وضع ایتشلر، وینلرنده آرزوق اختلاف
ایلہ مشلردر. بونلر صرہ سیه آشاغیده برربرر ایضاح اولونه چغندن بوراده تفصیلندن
صرف نظر اولونمشدر.

ایشته بوضورتله دور مجتهدینده علم اصوله عائد برچوق مهم اساسلر وضع
ایدلمش، آنلره متفرع دیگر قاعدهلرده سوکره دن کلن فقہا طرفندن تأسیس
واکال اولونمش، هر اساسک ارکان و شرائطی و هر قاعده نك اصطلاحات لازمه سی
تعیین قیلنمش، بووجهله اصول فقه تکمل ایدرک بر علم مستقل اولمشدر.

اک اول احکام فقہیہینی کتابلره، کتابلری بابلره، بابلری فصللره ترتیب و تفریق
ایدرک فقہی بر علم مخصوص حاله وضع ایدن امام اعظم ابوحنیفه (رضی اللہ عنہ)
حضرتلریدر. عقائد اهل سنته دائر اک اول کتاب تالیفی شرفه مظهر اولانده
مشارالیهدر. بو بایده (فقه اکبر) نامیلہ تالیف ایتدکلری رساله مشهوره لری،
الیوم متداول و مطبوعدر. کتاب (العالم و المتعلم) نامیلہ معروف دیگر بر اثرلری
دها واردرکه اوده مطبوعدر. لکن مشارالیه حضرتلری، علم فقہه دائر بر کتاب
تالیف ایتمه مشدر. تقریرات عالیہلرینی طلبه سی نوط صورتیه ضبط ایتشلردر.
اصول فقه حقیقدهد بر اثر نشر ایتدکلری کبی قواعد اصولیہینی شفاهاً دخی
طلبه سنه تفصیل ایتمه مشدر.

امام مالك حضرت تلمی، (الموطأ) نامیله احادیث نبویه بی جامع بر کتاب مستطاب
تألیف ایشدرکه بک مشهور و بک معتبردر . زماننده بوکتابی کندیلرندن قرائت
واستساخ ایچون عالم اسلامک هر طرفندن و حتی الک اوزاق یرلردن بیسکارجه
طلبة علوم، مدینه منورهیه قدر شدرجل ایدرلردی . امام شافعی حضرت تلمی،
مشارالیهدن تعلم و تدریس ایتدکلری کبی ائمه حنفیهدن اسمی یوقاریده کچن امام محمد
حضرت تلمی ده، کتاب مذکورى بالذات مشارالیهدن قرائت و استساخ مقصدیله
بغداددن مدینه منورهیه کیده رک اوچ سنه اقامت و امام مالک ملازمت ایله مشدر .

امام ابو حنیفه حضرت تلمندن سوکره، تأسیس ایتدکلری مسلک فقهیده ریاست،
اک کزیده طلبه سندن اولان و فقهیده بک چوق مجتهد مطاقلرک فوقنده اقتداره
مالك بولونان، خلفای عباسیهدن اوچ خلیفه تک یعنی مهدی، هادی و هارون
رشیدک قاضی القضااتی امام ابو یوسف حضرت تلمینه انتقال ایشدر (وفاتی: ۱۸۲).
ایشته مسلک عراقیون یعنی مذهب حنفی اوزره اصول، فقه قواعدینی، اک اول
تمهید و تأسیس ایدن، مشارالیه امام ابو یوسفدر. لکن مشارالیه اصول فقهه دائر
کتاب تألیف ائمه مشدر . احکام فقهیه بی تدریس ائناسنده قواعد اصولیه بی ده
طلبه سنه تقریر ایله مشدر .

مشارالیهک علم فقهه دائر (امالی) و (نوادر) ناملریله ایکی اثری وارددر .
ظن اولونورکه علم فقه حنفیه اک اول وجوده کتیربان کتابلر بونلردر . امام
ابو یوسفک بو ایکی کتابدن باشقه، هارون رشید ایچون قلمه آلدینی کتاب
(الخراج) ی بک مشهور و زمانمزده موجود و مطبوعدر . حقیقه مجتهدانه یازلمش
بر شاه اردر، حجمی کوچک اولدینی خالد مؤلفنک علوقدرینه و جلالت اقتدارینه
برهان قاطعدر .

اصول فقه حنفیه اک اول نشر اثر شرفی، نام عالیبرینه منسوب اولان مذهبهک
مؤسس امام شافعی حضرت تلمینه میسر اولمشدر. مشارالیهک بو علمه دائر تألیف
ایتدکلری رساله مشهوره لری، اجمال و بیان، امر و نهی، عام و خاص، ناسخ و منسوخ،
سنت و اجماع، قیاس و استیحسان مسائلندن باحثدر .

امام ابویوسفدن سوکره مسلک عراقیونده ریاست فقیهه، ینه امام ابوحنیفه نك خواص شاگردانندن امام محمد بن حسن شیبانی حضرت تلمینه انتقال ایتمشدر (وفاتی : ۱۸۹). امام اعظم ابوحنیفه حضرت تلمری، امام زفر، امام حسن بن زیاد، کندی مخدومی امام حماد، کبار اولیاءالله بن داود طائی، ائمه حدیثدن عبدا بن المبارک و وکیع بن الجراح، قاضی عافیه، نوح الجامع بن ابی مریم، امام حفص بن غیاث نخعی، ابومطیع بلخی، اسد بن عمرو ابومنذر بلخی، یوسف بن خالد، یحیی بن ذکریا بن ابی زائده کبی - امام طحاوی نك بیاننه نظراً - هربری بر مجتهد مستقل درجه سنده اقتدار کلی به مالک قرق قدر بویوک عالم و مجتهد یتشدر مشدر. لکن تأسیس ایتدیکی مذهب فقهی بی، کرك تدریس و کرك تألیف صورتیله اک زیاده نشر و تعمیم ایدن بو ایکی بویوک امام هام، امام ابو یوسف ایله بالخاصه امام محمددر.

مشارالیه امام محمد حضرت تلمری، علم فقهه متعلق بک چوق کزیده و فیاض اثرلر تألیف و نشرینه موفق اولمشدر. فقه حنفی اک زیاده مشارالیهک آثارندن انتشار ایتمشدر. امام شافعی ایله مذهب حنبلی مؤسس امام احمد بن حنبلده مشارالیهک آثار فقیهه سندن بک چوق استفاده ایتشلردر که بونی کندیلری ده معترفدرلر. فقه حنفی ایله مشارالیه امام محمدک آثار حنفیه، آشاغیده مذاهب فقیهه بمختنده ایضاحات کافی اعطا اولونه جقدر. اصول فقهک تاریخ و صورت ظهوری حنفیه کی سلسله افادآتمزی اخلال ایتمهک ایچون بوراده فضله ایضاحات اعطا سندن صرف نظر اولونمشدر.

امام ابویوسف ایله امام محمددن سوکره، آنلرک حلقه تدریس لرنده یتیشن اعظم علمادن ابو عصمه عصام بن یوسف بلخی و برادری ابراهیم بلخی، ابن سماعه، ابن رستم، هشام، هلال بن یحیی الرأی، ابوسلیمان جوزجانی، ابوحفص کبیر بخاری، قاضی عیسی بن ابان کبی اکابر سادات حنفیه، اصول فقه قواعدینی برقات دها تدقیق و توسیع ایتدیلر. مشارالیه عیسی بن ابان، قوعد مذکورده بی جامع اولمق اوزره (الحجج) نامیله بر کتاب تألیف ایتمشدر که اصول حنفیه به دأر اک اول تألیف اولونان کتاب، بو اولسه کر کدر [مشارالیهک وفاتی : ۲۲۱ ده در] .

بونلردن صوكره فقه حنفیه ریاست ، خوارزم و خراسان جهتلرنده (ابوبكر جوزجانی) یه ، تركستانده ابوحفص كبرك مخدومی (ابو حفص صغیر بخاری) یه ، عراقده (ابوخازم بغدادی) ایله (ابوسعید بردعی) یه ، مصرده (ابوجعفر احمد بن ابی عمران) ه انتقال ایتدی . بونلردن ده بغدادده (ابولحسن کرخی) یه ، مصرده (ابوجعفر طحاوی) یه ، دیگر یرلرده بونلرك امثاله انتقال ایلدی .

بونلر آرتق اصول فقه مباحثی تعمیقه قویولدیله ، يك چوق مسائل تخریر و تفریع ایتدیله . بونلرك ایچدن مشارالیم (عیسی بن ابان) ، (ابوسعید بردعی) و (ابوالحسن کرخی) علم اصولده بك زیاده اشتهار ایلدیله . بونلر علم اصولده مستقل رأی و اختیار صاحیدرله . ناملری و اختیار ایتدکلی مسلكلری ، فخر الاسلام بزدوینك اصولده بك چوق ذکر اولونور . کرخی جمله سندن زیاده اکتساب شهرت ایتمشدر [وفاتی : ۳۴۰] .

سالف الذکر ابوخازمك طلبه سندن امام (ابو طاهر دباس) ده ، اصول فقه قواعدینی تدقیق و تخریج ایدن اعظم اصولیوندندر . مشارالیه ، کرخی عیارنده و آنك اثرانندن ، قواعد کلیه فقهیه یی الك اول تخریج و تأسیس ایدن مدققین فقهاندندر . متأخرین فقهادن ابن نجیمك (اشباه) ده بیانه نظراً مشارالیه ، بالجه قواعد فقهی اون یدی قاعده کلیه ارجاع ایله مشدر .

آنف الییان ابولحسن کرخینك الك کزیده شاکردانندن (حصاص) دیمکله معروف امام ابوبكر رازی ده ، اصول فقهك تکملنه خدمت ایدن اسانده فقهاندندر . اصول فقهه دائرغایت مفید برکتاب تألیف ایتمشدر . (احکام القرآن) نامیله تألیف ایتدیکی اثر عالیلری ایسه غایت فیاض و بك محققانه یازلمش بر اثر جلیلدر .

بو قدر افاحم فقها ، علم اصولك تکملنه صرف مقدرت ایلدکلی حلاله ، بینه علم مذکور حدکاله واصل اولمامشدی . ازجه قیاس بحتی هنوز نقصان ایدی . نهایت تركستان (ماوراءالنهر) علماسندن مشهور قاضی ابوزید دبو سی کلهرك بو نقصانی اكمال و بناء علیه علم اصولی حدکاله ایصال ایتدی . مشارالیه کندینه خاص بر نفوذ نظرله اصول فقه مسائلی یکی باشدن برر برر تشریح و تحلیل ، احکام

واحوال قیاسی تدقیق ایله شرائط لازمه سنی تکمیل ایلدی، وعلما ی اصول عندنه
پک زیاده مشهور و معتبر اولان (الاسرار)، (تقویم الادله) و (الامداد قصی) ناملریله
اوج کزیده کتاب قلمه آلدی .

مشارالیه، دهات فقهادندر . حارق المعاده ذکاسی و اقتدار علمیی، کعبه ،
یتیشیله میه جک درجه ده یوکسکدر . انفاذ نظرده و الزام خصمه تام عالیسی ،
السنة علماده دائر مثل سائر حکمی احراز ایتشدرد . وقتیه تحصیله پک زیاده رغبت
ایدیلن و فقهانک اختلافاتندن و اختلافات مذکوره نك راجع و مبتنی اولدینی اساسلردن
باحث اولان (علم خلاف) ک واضح و موجودی ده مشارالیه ابوزید دبوسیدر .
بو علمه دائر (التعلیقه) نامیله نشر ایتدیکی اثر مشهوری ، مؤخرأ بو علمده تألیف
اولونان آثاره نمونه و مأخذ اولمشدر . ینه بو علم خلاف حقنده (تأسیس النظر) عنوانیله
قلمه آلدینی مختصر بر کتاب الیوم مطبوعدر . مشارالیه ترکدر ، سمرقند کویلدردن
تدن (دبوسی) ده تولد و (٤٣٠) سنه هجریه سنده وفات ایتشدرد . عصرینک
یوتون علماسنه تفوق ایتمش ، بالجمله مباحثات علمیه ده خصم لرینه غلبه ایله مشدر .
یر کون فقهادن بر ذات ایله بعض مباحثات فقهیه ده بولونمش . خصمی ملزم
اولدجه یوزی قیزاره جنی یرده بالعکس فقهیه ایله کولرمش . قوجه دبوسی ،
خصمنک بر حسزلکنی کورنجه دایانامه مش ، ارتجالاً قطعه آیه بی انشاد
ایله مشدر :

مَالِي إِذَا أَلْزَمْتَهُ حُجَّةً قَابَلَنِي بِالصَّحِيحِ وَالْقَهْقَهه

إِنْ كَانَ ضِحْكَ الْمَرْءِ مِنْ فَهْمِهِ فَالذَّبُّ فِي الصَّخْرَاءِ مَا أَفْقَهه

ابوزید دبوسی دن صوکره بری ترکستان ، دیکری خراسان علماسندن فخر-
الاسلام بزودی و شمس الأئمة سرخسی عنوان مفخر تریله مشهر ایکی بویوک
ذات دها کله رک اصول حنفیه بی بوتون بوتون تکمل ایتدیر مشلردرد . بونلر
مشارالیه ابوزید دبوسی نك ذکر اولونان کتاب لرینه مفصل شرحلر یازه رق مسائل
اصولیه بی پک واسع و نافذ بر نظره استکناه و دلائلی استقصا ایتشلر ، هر قاعده

اصولیه به فقهیدن يك چوق شواهد ايراد ایدمرك تطبیقات فقیهه جهتی توسیع و تکمیل ایله مشلردر. صوکرده اوشر حلك و اوتحقیقات واسعه نك خلاصه سی اولوق اوزره غایت کوزل و يك معتبر منلر یازمشلردر .

ایشته بو اوچ بویوک ذات ، مذهب حنفیده اصول فقهك اوچ رکن رکینی دره ، و کندیلرندن صوکره کلان عموم علمای اصولک متبوع و پیشواسیدر . بونلره اصولیون حنفیه عننده ائمه ثلاثه ، فخرالاسلام ایله شمس الائمه یده (شیخین) اطلاق اولونور .

فخرالاسلام بزدوی ، ترکردر، مسقط رأسی ترکستانده (نسف) جوارنده (بزده) دنیلن برقلعه در . سمرقنده نشأت ایتمش و (۴۸۲) ده وفات ایله مشدر . مشارالیه امام ابوزید دبوسی ، علم اصولده امام الائمه و استاذ کلدر . فخرالاسلامده امام ثانیدر . مذهب حنفیده امام ابویوسفک امام اعظمه نسبتی نه درجده ایسه ، اصول فقهده فخرالاسلامک ابوزید دبوسی به نسبتی ده اودرجه ده در . یعنی بوده اونک قدر مقتدر و علم اصوله خدمتی اونک درجه سنه قریبدر . امام ابوزید دبوسی آندن اول کلش اولماسه یدی فخرالاسلام ، آنک علم اصوله ایفا ابتدکی خدمت اکالی ایفا ایدم بیلیردی .

مشار الیه فخرالاسلام بزدوی ، یالکنز اصول فقهده دکل ، فروع فقهده دخی استاذ کل و امام الفقهادر . زماننده یوتون اقرانه تفوقی مشر اولوق اوزره کتب تراجمده (امام الدنيا) وصف افتخاریله توصیف اولومشدر . علم فقهه دار هربری اون ، اون بر بویوک جلددن مرکب متعدد کتابلر تألیف ایتمشدر . امام محمدک (جامع الصغیر) و (جامع الکبیر) ناملرنده کی کتابلرینی شرح ایتمش ، و قرآن کریم اوزرینه هربری مصحف شریف مجمنده یوزیکرمی جلدی حاوی برتفسیر کبیر یازمشدر . خلاصه مشارالیه (فخرالاسلام) عنوان ، فخرتی بحق احراز ایدن اعظم فقهای حنفیه دندر . اصول فقهه دائر قلمه آلدینی متن مشهوری ، شرحی (کشف الاسرار) ایله برلکده مطبوعدر . مع التأسف دیگر اثرلری نه مطبوعدر ، نه ده بوراده موجوددر .

شمس الأئمة سرخسی به کلنجہ: مشارالیه خراسانک بلاد قدیمہ سندن (سرخس) شہرندہ تولد ایشدر . تاریخ وفاتی مضبوط دکدر . بروایتہ (۴۹۰) ، دیگر بروایتہ (۵۰۰) ، اوچی بروایتہ دہ (۴۸۳) تاریخندہ ارتحال ایلمشدر . مشارالیہ علم اصولہ امام نائدر . بونکہ مشارالہما فخرالاسلام ایلم ابو زید دبوسی بہ نسبتی ، فقہ حنفیہ امام محمدک امام ابو یوسف ایلم امام اعظمہ نسبتی کیدر .

بوجہتہ مشارالیہ امام سرخسی دہ باشلی باشنہ علم اصولی ایجاد واکال ایلمہ جک درجہ دہ اقتدارہ مالکدر . فخرالاسلامدن کری قالیر هیچ برجہتی یوقدر . اونک کبی اصول و فروعہ متأخرین فقہانک امامیدر ورتبہ اجتهادی احراز ایلم اساتذہ حنفیہ دندر . اقتدار فوق العادہ سنہ و حافظہ سندنہ کی خارقیہ بہ حیران اولماق قابل دکدر .

مشارالیہ ، خوارزم امیرینہ مظالم واقعہ سندن دولایی بعض نصایحہ بولونمق ایستہ مش ، براز سر تجمہ سویلہ مش اولملی کہ در حال توقیف واوزون مدت حبس ایلمش . تشدید مجازات مقصدیلہ دہ یانندہ بر لغت کتابی بیلہ بولونمسنہ مساعده اولونماش . یالکز بعض اکابرک شفاعتیلہ پنجرہ خارچندہ دورہ جق اولان طلبہ سنہ داخلدن شفاہاً وازبرہ درس تقریرینہ مساعده اولونمش .

مشارالیہ کی قدرت علمیہ بہ و حافظہ سندنہ کی وسعت وقوتہ باق کہ بو مساعده اوزرینہ ، ہر کون حبس خانہ پنجرہ سی خارچندہ دوران طلبہ سنہ ، هیچ بر کتابہ مراجعت ایشکسزین صرف ازبرہ اولہرق حافظہ سندن ہربری ددریوز صحیفہ لی اون بش بویوک جلددن متشکل (مبسوط) نامندہ کی کتاب مشہورینی ، شفاہاً تقریر ایلمش یازدرمشدر . بو مبجل کتاب ، اولہ دلائلندن تجرید ایلمش ، علی العادہ مسائل فقہیہ دن عبارت دکدر . ہر مسئلہ نک آری آری آیت ، حدیث و اجماع کبی بوتون دلائلی ، تدقیقات و تعلیلات فقہیہ سی ، کرک ائمہ حنفیہ نک و کرک سائر مذاہب فقہیہ مؤسسہ لرینک اقوال و افکار مختلفہ سنی دہ جامعہ دہ . اصل موجب حیرت اولان جہتی دہ بودر . اگر کتاب مذکورک متعدد

یرلرنده مؤلف مشارالیه طرفندن گاه متین و متوکل ، گاه حزین و متأثر بر لسانه بو کیفیت صراحة ذکر ایدلش اولماسه یدی ، بوتون مورخلرک بالاتفاق واقع اولان افادانه رغماً بوکا بر درلو اینانیه مازدی .

مشارالیه اشبو (مبسوط) دن باشقه اصول فقهه دائر نشرایتدیگی اثر مشهورینی ، و برده ائمه حنفیه دن امام محمدک مشهور (سیرکیر) شرحی ده ، ینه مدت محبوسیتی ائنده بوجه معروض تقریر و املا صورتیه وجوده کتیرمشدر . سو قدرکه سیرکیر شرحی اجمال ایتمدن اطلاق اولوندینی جهته ترکستانده واقع (فرغانه) امیرینک دعوتی اوزرینه اورایه کیدرک مظهر اعزاز اولور و شرح مذکوری اوراده اجمال ایدر .

الحاصل ذکر اولونان شو اوچ بویوک ذات محترم (رحمهم الله) ، کندیلرندن سوکره کلن علمای اصولک سرآمدانیدر لر . اصول فقه حنفیه ریاست و امامت ، بونلرده نهایت بولمشدر . آرتق بوتون متأخرین از باب اصول ، بونلرک آثارینی کندیلرینه مرجع و مأخذ اتخاذ ایله مشر ، تألیف ایتدکاری اثرلرنده مسائل اصولیه بی اختصار ایتمکدن و بعض مباحثک یرلرینی دکشدرمکدن باشقه برشی یایمامشدر لر .

واقعا مشارالیه فخر الاسلام بز دوینک برادری صدر الاسلام ابوالیسر بز دوی کبی آنلر زماننده و مفتی الثقلین امام نجم الدین عمر نسفی ، برهان الدین کیر ابن مازه ، و مخدومی صدر الشهد ابن مازه ، مشهور کتاب (المیزان) مؤلفی علاء الدین سمرقندی کبی آنلرک زمانتی ولی ایدن عصرده مشار الیهه قریب و بعضلری آنلر درجه سنده اقتداره مالک ، یک بویوک وغایت محقق برجوق علمای اصول دها کلشدر . لکن بونلرک بعضلری یالکز علم اصولی تدریس ایله اکتفا ایدوب کتاب تألیفنه لزوم کورمه مش بعضلرینک اثرلری ده هر نصلسه مشار الیهه آثاری قدر انتشار و اشهار ایدمه مشدر . مع هذا بونلر ، بویوک بر اقتداره مالک اولمقاه برابر ، آرتق مشار الیهه بسط و تمهید ایتدکاری قواعد اصوله علاوه ایدمک برشی ده بوله مامشدر لر . آنکچون هیچ بری مشار الیهه ابوزید دبوسی ، فخر الاسلام

بزدوی و شمس الأئمة سرخسینک یرینی طوته مامشدر . .
 بر آرق اصول حقیقه اندراس بولقی اوزره ایکن یدنجی عصر هجریده ینه
 ترکستان علماسندن مشهور (شمس الأئمة الکردری ، وفاتی : ۶۴۲) کلهزک یکیدن
 احیا ایله مشدر . مشارالیه عصرینک فریدی ، زماننک ابوزید دبوسیسی در . مشارالیهک
 تلمیذ خاصی امام ابوالبرکات حافظالدين نسفی ده ، استاذی قدر علم اصوله خدمت
 ایتمشدر . (المنار) نامیه تألیف ایله یکی متن مشهوری اوزرینه غایت کوزل بر
 شرح یازمشدر .

علم اصولک ، خصوصیه بعض مسائل اصولیه نک علم کلاه (علم اعتقاد) ایله
 مناسبتی بولوندیغندن متکلمین (علم اعتقاد علماسی) ده ، اصول فقهیه یک زیاده
 رغبت واعتنا ایدرک بویوک کوچک متعدد کتابلر رجوده کتیر مشلردر . لکن
 بونلر ، مسائل اصولیه نک تدقیقنده استدالات عقلیه جهته زیاده جه میل ایدوب تطبیقات
 فقهیه جهته اعتنا ایتمه مشلردر . بونک نتیجه سی اوله رق قواعد و مسائل اصولیه نک
 تنظیم و تدویننده ایکی مسلك حصوله کلمشدر : مسلك فقها ، مسلك متکلمین .

مسلك فقها ، فقهه امس و اوفقدر . چونکه فقها ، قواعد اصولیه نی نکت
 فقهیه اوزرینه بنا ایتمشدر . مسلك فقها اوزره یازیلان امهات کتب اصوله ،
 هر قاعده اصولیه ایچون بر جوق امثله و شواهد فقهیه ایراد اولونمشدر . فقها
 ماهر بردالغیج کبی فقهک اعماق روحنه دالارق متنوع ابواب فقهیه یه عائد مسائل
 مختلفه نی تحلیل و تدقیق ایله بر اشکلری اساسلری بولوب چیقاریر ، قاعده اصلیه
 اولق اوزره وضع ایدر . او مسائل مختلفه نک ده بوقاعده اوزرینه جهت تطبیقی
 برر برر کویستر . فیخر الاسلام بزدوینک اصولی مطالعه اولونورسه افاده منرک
 صدقی تبین ایدر .

متکلمینه کلنجه : بونلر فقهای حقیقه قدر فقهده مهارت و نفوذ نظره مالک
 اولدقلرندن دائماً قواعد اصولیه نک اوزرنده کز لر ، آنفأ بیان اولوندیغی وجهله تحقیقاتلرنده
 استدالات عقلیه جهته میل ایدر لر . مسائل اصولیه نی شواهد فقهیه دن تجرید ایله

تفريعات و تطبیقاته التفات ایتزلر . شافعی، مالکی و حنبلی فقهاسی، مسلك متكلمین
التزام ایدرك مؤلفات اصولیه لرینی اویولده یازمشلردر .

مسلك متكلمین اوزره اك چوق كتاب یازان علمای شافعیه اولدینی ایچون
مسلك متكلمینه اصول شافعیه، مسلك فقهاییده اصول حنفیه اطلاق اولونور .
مسلك متكلمین، فقها مسلكندن دها قولای، دها صیقیتیسز اولدینندن متكلمین
مسلكی، فقهای حنفیه مسلكندن زیاده مظهر رغبت اولمش، اكثر كتب اصولیه
بومسلك اوزره تألیف ایدلمشدر . ایشته بوسیه مینیدر که برکیمسه مسلك متكلمین
اوزره یازیلان مؤلفات اصولیه نك کافه سنی اوقوموش اولسه دخی، فقها مسلكی
اوزره تألیف اولونان برکنابی ومثلامام فخرالاسلام بزدوی نك اصولنی اوقومدجه
اصول فتهك مزایاسنی، احكام فقهیه نك حقایقنی آکلامش اولماز . فقط امهات
اصول حنفیه نی حقیله آکلامق و ذوقه وارمق ایچوزده اول امرده اولدجه احكام
فقهیه آشنا اولمق شرطدر .

— مؤلفات اصولیه —

مسلك متكلمین اوزره تألیف اولونان آثار مشهوره

برهان، مستصفی، عُمَد، معتمد

محصول، احكام

مسلك متكلمین اوزره یازیلان آثار اصولیه نك اك مشهورلری، بالاده
کوستریلن آلتی کتابدر . (برهان) امام الحرمین دیمکله معروف اولان ابوالمعالی-

الجوينی نك ، (مستصفي) مشهور امام غزالی نك اثریدر . اما الحرمین ، امام غزالی نك استاذیدر . هرايكیسی ده علم كلام و اهل سنت امام لرندن و مذهب شافعی فقها سندندر . علوم عقليه و نقلیه ده بك واسع معلومات و اقتداره مالكدردر . شهرت شایعه لری تعریف و توصیفدن مغنیدر . هله امام غزالی آورو پاچه ده معروفدر . علم اصوله ، عام فقهه ، علم كلام و اخلاقه دائر بك چوق کتابلری وارددر . جمله سی ده بك معتبردر . ذكر اولونان (مستصفي) سی مطبوعدر ، نایت محققانه یازلمش فیاض بر اثر جلیبدر . امام الحرمین (۴۸۷) ده و امام غزالی (۵۰۵) ده ارتحال ایله مشدر .

(عمد) معتزله امام لرندن عبدالجبار كدر . (معمد) آنك شرحیدر . وكذا معتزله امام لرندن ابوالحسین بصری نك اثریدر . مشارالیه فقهده شافعیدر . عبدالجبارك وفاتی (۴۱۵) ده ، ابوالحسینك وفاتی (۴۶۳) ددر . بودرت كتاب ، علمای اصول عندنده اصول متكلمینك ارکان اربعه سی عد اولونمشدر .

مؤخرأ بودرت كتابی ، ینه عام كلام امام لرندن ایکی بویوك ذات تلخیص ایله مشدر . بری مشهور تفسیر کبیر صاحبی امام فخرالدین رازی [وفاتی : ۶۰۶] ، دیگرى سیف الدین آمیدر [وفاتی : ۶۳۱] . فخرالدین رازی بالاده محرر (محصول) ی ، سیف الدین آمدی ده (احكام) ی تألیف ایتمشدر . هرايكیسی ده ذكر اولونان درت كتابك بالجمله مباحثی ، اشبو کتابلرینه درج ایله مشلدردر . رازی تكثیر دلائل جهتنه ، آمدی تحقیق مذاهب و تفریع مسائل جهتنه اعتنا ایتمشدر . بوايکی امام هامده مشارالیهما امام الحرمین و امام غزالی درجه سنده احاطه کلیه مالک مشاهیر علمای اهل سنتدن و فقهای شافعیه دندر . هرايكیسنك ده زمانلرنده موجود اولان بوتون علوم عقليه و شرعیه ده دائر تألیفات معتدده لری وارددر .

بالآخره ذكر اولونان (محصول) ی ، مشارالیه امام رازینك یتشددردكرندن قاضی سراج الدین ارموی تلخیص ایدرك (تحصیل) ی ، تاج الدین ارموی ده

(حاصل) ی تألیف ایشددر. محققین فقهای مالکیهدن امام قرافیده ، مشارالیهما کبی (محصول) ی اختصاراً (تنقیحافصول) نامندهکی متن رجیزی تألیف ، صوکردهده شرح ایشددرکه مطبوع وهریرده موجوددر . مشهور قاضی بیناویده ینده بووجهله (منهاج) نام متن مختصرنی قلمه آیشددر . بوسوکه ایکی اثریک مختصر اولدینی ایچون مصرده مبتدیلر ، بونلره رغبت ایش و بوندن دولایی اوزرلرینه یک چوق شرحلر یازلمشدر .

سیفالدین آمینک مذکور کتاب (اسکاء) نیده ائمه مالکیهدن مشهور ابن حاجب ، تخیص ایدرک (منهی الوصول) نام کتاب مختصرنی تألیف ایش ، صوکردهده کویا بومفصلمش کبی بونیده بالاختصار (مختصر منهی) نی تصنیف ایلدیشدر . اشبو (مختصر منهی) یک زیاده رغبت عمومییه مظهر اولدیغندن ارتق اوزرینه یک چوق فحولعلما ، ازجهله علامه شیرازی وقاضی عضدکبی متبحرین طرفندن شرحلر ، ویشرحلر اوزرینه حاشیلر یازلدی . عالم اسلامک هر طرفنده بونلرک تدریس و تدرسنه شاب ایلدی . ایلدی اما ، نتیجهسنده نوج ، عالم اصولده سوندی کتدی . زیرا بوشرحلری یازانلرک همان اکثریمی ، داعیه تفوقله یازمش اولدینی ایچون دائماً یکدیگریک خطاسنی آرامله مشغول اولمشلر ، برینک ولوکه لفظه عائد اولسون اوفاق برخطاسنی بولونجه صانکه بوبوک برحقیقت کشف ایشلر کبی اونی اوزون اوزادییه موضوع بحث ایشلر وبوصورتله بربرلرینه اعتراض وجواب ویرمکه اوغراشهرق اصل مقصدی اونوشلر .

براز ذکاسنه ، اقتدارینه کورودن نهقدر اصحاب تحصیل وارسه جملهسیده ، بونیسود مناقشات لفظیه وجدلیه ایچنده حیاتلرینی افنا ایتدکلرندن ، یوقاریده ذکر اولونان آثار مبعله اسلاف اوقونماز اولمش وکیدرک آثار مذکوردهنی بحق اوقوده بیله جک ارباب اختصاصده قلمامشدر . برکون آثار اسلافدن (مستصنی) و (اصول بزدوی) کبی ایچق بر ایکی دانسی مطبوع اولوب دیکرلری ، یا بوس بوتون محو اولمش ، یاخورد کتبخانه رافلرنده چورومکده بولونمشدر .

بر علمه ، برفقه دائر سوكرمدن كتاب يازمه جق اولانلرك انك برنجي وظيفه سي
آثار اسلافى اطرافيله تدقيق وتتبع ايدرك آنلردن قالان بوشاقلرى طولدرمق ،
نقصانلرى اكمال ايلك ، سوكرمده او علمى ، اوفنى منتهاي كالمه ايصال ايجون
نه يايىق لازم كلييورسه آنلرى اجرا ايتمكدر . متأخرين علماء مع التأسف بووظيفه
اصليلريني كلياً اونوتمشلر ، ايشي نرومسنز وفائده سزلفظى وجدلى مناقشاتو دو كمشلر ،
نتيجه سنده اسلافدن قالان نقصانلرك اكمالى شويبه دورسون ، اسلاف كرامك بونجه
امكلراه وجوده كتيردكلرى اوفياض ، اومبجل آثارك اورتهدن قائمه سنه و بئاه
عليه علم فقه كبي علم اصولك ده انقراضنه سبب اولمشلردر . .

مسلك فقها اوزره نشر اولونان آثار مشهوره

اسرار ، اصول بزدوى ، اصول سرخسى ، اصول ابواليسر

ميزان

مسلك فقها اوزره اصوليون حننيه طرفندن مفصل ومختصر بك چوق آثار
نشر اولونمشدر . آثار اسلاف مياننده انك زياده كسب اشتهار ايدنلرى ، بالاده
ذكر اولونان شوبش كتابدرد .

(اسرار) يوقاريدده بيان اولوندينى وجهله قاضى امام ابوزيد دبوسى نك اثريدر .
علمى اصول عننده بك معتبرر كتاب جلييدر . مع التأسف هيچ طبع اولونما مشدر .
يازمه سنده تصادف ودسترس اولونه يور . مشارالهمك (تقويم الادله) سى ده بك
مشهوردر امام فخرالاسلام طرفندن وديكر بر چوق اعظم فحول علما طرفندن
شرح ايدلمشدر . هيچ برينك مطبوعى يوقدر .

(اصول بزدوى) ، امام فخرالاسلام بزدوى نك كتاييدر . مسلك فقها اوزره
يازيلان كتابلرايچنده انك زياده شهرت واعتبار قازانان كتاب ، اشبو اثر بر كزيده در .

يك محققانه و مجتهدانه يازلمش برآردر. يك چوقا كا بر علمای اصول طرفندن شرح ايدلمشدر. الك مشهور شرحی ، محقق كير عبدالعزیز بخارينك (كشف الاسرار) ناميله يازديني شرح كيردر. تشكر اولنور كه نسله شرح مذكور متيله برابر درسمادنده طبع اولونمشدر. مشاراليه عبدالعزیز بخاري ، (منتخب حسامي) ناميله معروف اولان كتاب لطيف دخی شرح ايتش و (غاية التحقيق) تسميه ايله مشدر. بوده غایت نفيس برآردر. هندستانك لكته شهرنده طبع اولونمشدر .

ذكر اولونان (كشف الاسرار) ، عباره سی واضح وافاده سی طائی ، غایت كوزل و يك مفید برآر كزیده در . متأخرين اصوليونك ده مأخذ و مرجعیدر . علامه قفنازانی بيله (تلويح) ناميله شهرت شعاع اولان كتابنده اكثر تحقيقاتی اشبو (كشف) دن اخذ ايدر . تلويحك اكثر افاداتی ، حتی يرينه كوره يارم صحيفه دن زياده عباراتی عيناً (كشف) دن مأخوذدر .

(اصول سرخسی) ، آنفاً ذكر جميلی سبق ايدن امام شمس الائمة السرخسی نك اريددر ، و اصول بزدوی كبی كنديسندن سوكره پازيلان آثار اصوليه نك اساسيدر . مع التأسف طبع اولونما مشدر . احتمال كه استانبول كتبخانه لرنده ده نسخی موجود دكلدر .

(اصول ابواليسر) ، مشاراليه فخر الاسلام كبرادری صدر الاسلام ابواليسر بزدوی نك آثار قلميه سندنره بوده امهات كتب اصولندره . مؤلفی صدر الاسلام ده امام الائمة در ، و تركستانك مابه الافتخاری اولان اعظم اصوليوندندر و برادری درجه سنده صاحب اقتداردر . حلقه تدریسنده مفتی الثقلين امام نجم الدين عمر نسفی كبی برچوقا كابر فحول علما يتشمشدر .

(ميزان) ، «ميزان الاصول في نتایج العقول» ناميله موسوم اولان بو اثر جليل ، امام ابوبكر علاء الدين سمرقندی نك تأليف بهينيدر . ذكر اولونان (كشف) ده اسمی چوقا بكر . صاحب كشف ، الك مغلق مسائلك تحقيقنده اكثر يتله بو كتابدن استعانه ايدر . مؤلفی علاء الدين سمرقندی ، مشاراليه صدر الاسلام شاكردی

و مشهور (بدائع) صاحبی ابوبکر بن مسعود کاشانی نك استاذی و قاین پدری .
کریمه سی (فاطمه) ده کنندیسی و زوجی کبی بویوک فقیه ایمش ، امضاسی التنده
فتوی ویرر ایمش . کاشانی ، صاحب (میزان) نك فقهدن (تحفة الفقها) نامنده کی
کتابی شرح و توضیح ضمننده (بدائع) ی تألیف و صاحب میزانه تقدیم ایدر .
بدائع ، حقیقه اسمی مساسنه مطابق ، غایت لطیف بر کتاب اولدیغندن مشارالیه
پك زیاده ممنون اولور و مكافات اولوق اوزره حسن و آن ، علم و اقتدار ایله معروف
اولان کریمه سی مشارالیهانی کاشانی به تزویج ایلر . بوندن دولانی زمانك بعض
ظرفاسی طرفندن کاشانی حقهده (شرح تحفته و تزوج ابنته) دینلمشدر .

مشارالیهندن صوکره کلن بعض فقهاده ، ذکر اولونان امهات اصولیه یی
تلخیصاً مختصر کتابلر تألیف ایتشلردر . یونلرکده اک مشهورلری (منتخب حسامی) ،
(مغنی) ، (منار) نام کتابلردر . منتخب حسامی ، آنفاً بیان اولونان (کشف)
صاحبی عبدالعزیز بخاری طرفندن غایت مفید بر صورتده شرح ایدلمشدر . (مغنی)
مشارالیهك شاگرد خاصی ، جلال الدین خبازی نك اثر کزینیدر . قآنی ، محقق
کبیر سراج الدین هندی و اورخان غازی حضر تلرینك عهد سلطنتلرنده (قره خواجه)
دیمکله معروف علامه الدین اسود کبی پك بویوک محقق و علامه لر طرفندن شرح
اولونمشدر .

(منار) ، زمانمزدهده پك مشهور و متداول اولان مؤلفات معتبره ندر .
مؤلفی ، فقهدن مشهور (کنز) صاحبی امام حافظ الدین نسفی در . مشارالیه اشبو
(منار) ی متن اوله رق یازدقدن صوکره اوزرینه بری مفصل ، دیکری مختصر
ایکی شرح یازمشدر . بالآخره پك چوق علما طرفندن شرح ایدلمشدر . اک مشهور
شرحی ، زمانمزده مدارس اسلامیهده تدریس ایدلمکده اولان ابن ملکک شرحیدر [۱] .

[۱] مشارالیه ابن ملک ، جدا کبر عاجزیدر . عن اصل ترکستانلیدر . بویوک پدری ،
آیدین اوغلارینك دعوت مخصوصه سی اوزرینه ترکستاندن آیدین سنجاغنه کلمشدر . مشارالیه
ابن ملک ، ایوم از میر سنجاغنه مضاف تیره قصبه سنده مدفوندر . فقهدن (جمع البحرین) ،
حدیثدن (مشارق) نام کتابلر اوزرینهده غایت کوزل و مفید شرحلری واردر . مشارق شرحی
مطبوعدر . مخدومیده کنندیسی کبی متبحریندندر . وفاتی ، ۸۸۵ هدر .

بعض متأخرین حنفیه ده مسالك متكلمین ایله مسالك فقهانی ، تعبیر دیگرله اصول شافعیه ایله اصول حنفیه بی جامع اثرلر تألیف ایشلردره . بونلرک المشهورلری (بدیع) ، (تنقیح) ، (فصول البدایع) و (تحریر) در .

(بدیع) ، ابن الساعاتی دیمکله معروف امام مظفرالدین بغدادی نك اثریدر . مشارالیه بو کتابنده فخرالاسلام بزددوینک اصولی ایله سیف الدین آمدینک کتاب « احکام » نده موجود مباحثی تلخیصاً جمع ایشمش ، وهر بحثک نهایتنده خلاقیاته متعلق مسائلی ده درج ایله مشدر . بدیع ، جداً اسمی مساسنه مطابق بر اثر لطیف اولدینی ایچون برچوق افاضل علما طرفندن شرح ایدلمشدر . خصوصیه محقق کبیر سراج الدین هندی ، وخاتمته مجتهدین ابن هام کبی ایکی بویوک تحریر طرفندن مفصل وپک مکمل شرحلر یازلمش اولمشی ، اثرک بوتون بوتون قیمتی آرتیرمشدر . بونلر مع التأسف مطبوع دکدر . بویله کزیده و فیاض اثرلر موجود اولدینی حالده ، بونلر گوشه نسیانه آتیلهرق مدارس علمیه ده (مرآت) تدریس اولونمسنه نه قدر تأسف اولونسه آذر .

مشارالیه ابن الساعاتی ، علوم شرعیه ده عصرینک امامی ، قون ادبیه ده زماننک فریدی ایدی . حتی یوقاریده اسمی کچن (محمول) شارحی شمس الدین اصفهانی ، مشارالیهی (مختصر متهی) صاحبی مشهور ابن حاجبه تقدیم و تفضیل ایدرمش . فقهدن مشهور (مجمع البحرین) نام کتاب معتبرک مؤلفی ده مشارالیه ابن ساعاتی در [وفاتی : ۶۹۴] .

(تنقیح) ، مشهور صدرالشریعه نکدر . حقیقه منقح و متین بر اثردر . مشارالیه بونی ، اصول بزددوی ، محمول رازی و مختصر ابن حاجبی تلخیص و اختصار صورتیه تألیف ایله مشدر . بعده اوزرینه (توضیح) نامیه غایت کوزل بر شرح یازمشدر . توضیح ، پک محققانه یازلمش جلیل القدر بر تألیف مفیددر . محتوی اولدینی تحقیقات ، مؤلفنک محمول دهاسیدر . حسن وقبحه و اراده جزئییه دائر (مقدمات اربعه) نامیه معروف اولان بحث مخصوصی حقنده برچوق فحول

علما طرفندن آریجه شرحلر یازمیشدر . مشارالیه صدرالشریعه بک مدقق و بک درین نفوذ نظره مالک ، فقیه النفس برذات جلیل الصفاتدر . علوم شرعیه و عقلیه ده عصرینک امامی ، علم اصول و علم کلام ، منطق ، فلسفه و تصوف کبی علوم بمجمله ده زماننک استاذ کلیدر . فقهدن (نقابه) نامیه کوزل بر کتابی وارددر . بویوک پدری تاج الشریعه نک (وقابه) اسمنده کی کتابی ده بک کوزل و بک مفید بر صورتده شرح ایشمیشدر . علم منطق ، علم کلام ، علم اخلاق ، فلسفه و تصوف و علم هیئت کبی مختلف و متنوع علومی جامع ، نولوق اوزره (تعديل العلوم) نامیه تألیف ایتدیکی اثر جایی ، وقتیه بین العلما بک زیاده شهرت و رغبت مظهر اولمشدی . مطبوعی بوقدر ، فقط یازمه سی موجوددر .

مشارالیه صدرالشریعه ترکدر و بخارالیدر . عائله سی علم و فضیلت اوجاغیدر . کرک پدری و کرک والد سی جهتمدن افر با و اجدادی آره سنده تاج الشریعه ، برهان لدین ، صدرالشریعه اکبر و مشهور امام جمال الدین محبوبی کبی بویوک عالم و مجتهدلر وارددر . (درر) و (مرأت) صاحبی مشاهیر علمای عثمانیه دن منلا خسرو مرحوم ، دررده و مرآتده مشارالیه صدرالشریعه ایله بک چوق اوغراشیر و بر چوق اعتراضلر سرد ایدرسده بزم منلا ، اولسه اولسه اونک ای بر تامیندی اوله بیلیر .

مشهور تیمورلنک بک زیاده حرمت و اعزاز ایتدیکی محقق شهر علامه تفتازانی ده اشبو توضیح اوزرینه (تلویح) نامیه موسوم کوزل بر حاشیه یازمیشدر . صدرالشریعه حنفی و ماتریدی اولدینی جهته تدقیقاتی علمای شافعیه و اشعریه عاینه یورودر و دائماً آنلرک افکار و نظریاتی جرح و ابطال ایدر . علامه تفتازانی ده اشعری اولدیغندن آنلری مدافعه و صدرالشریعه یه مقاله ایلر . ایکسی ده بویوک مدقق و بک مقتدر اولدقلری ایچون مشارالیه مادن سوکره کن علما ، بویکی کتابی بویوک بر مرآتله مطالعه و تدقیقه قویولمشلر ، و اوزرلرینه متعدد حاشیه لر یازه رق طرفینک مدعیات و مدافعاتی محاکمه یه قیام ایشلر . بونک نتیجه سی اوله رق آرتق مذکور (توضیح) ایله (تلویح) ک شهرتی بوتون جهان اسلامه یایلش ، بوکونه کلنجه یه قدر هر طرفده

بو ایکی کتابک تدریس و تدرسنه رغبت عمومی حاصل اولمشدر . مشارالیه تفتازانی (۷۹۲) ده سمرقنده وفات ایتمشدر .

(فصول البدائع) ، منلا فناری دیمکله معروف اولان علامه شمس الدین فناری نك اثر بدیعیدر ایکی بویوجت جلدن مرکبدر ویک چوق مسائلی جامعدر . مشارالیه ، منطقدن (ایساغوجی) نامیله مشهور اولان رسالہی موسم شتاتک اک قیصه برکوننده طلوعدن غروبہ قدر کچن سکنز طقوز ساعتک برمدت قایلده تماماً شرح ابتدیکی حالده (فصول البدائع) ی ، تام اوتوز سنهده تألیف ایتمشدر .

مشارالیه علمای عثمانیه نك اک بویوکیدر . علوم عقلیه و نقلیهده وحیدالزمان ایدی . دوات علیده ایلک دفعه شیخ الاسلام اولان ذات فضائل سمندر . (وفاتی ۸۳۴) ده در . مخدومی محمد شاه فناری ده اکا بر علمای عثمانیه دندر .

(تحریر) ، کلنجه : بوده اصول حنفیه ایله اصول شافیه بی جامع ویک ذکرلی برکتبدر . ویک درین تحقیقاتی محتویدر . مؤلفی مشهور (هدایه) شرحی (فتح القدر) صاحبی امام کمال الدین ابن هامدر . اسکندریه ایدر ، (۸۶۱) تاریخنده وفات ایتمشدر . مشارالیه اصول و فروعده امام ، علم و تفسیر و حدیثده وبالجمله علوم شرعیه و ادبییهده مرجع انام ایدی . مذهب حنفیهده خاتمه مجتهدین در . زماناً یک کریده کلدیکی حالده علماً یک ایلری به کچمش ، برچوق علماتک اعتراف و شهادتلی وجهله رتبه اجتهادی احراز ایلمشدر . ذکر اولونان (تحریر) ایله (فتح القدر) ی و برده علم کلامه متعلق تألیف کرده سی اولان (مسیره) نام کتابی جداً مجتهدانه یازلمش آثار مخلده دندر . لکن (تحریر) ، یک قیصه جمله لر ایله ، باشلی او جلری کسک عبارات ایله یازلمش اولدیغندن بر علم کتابی اولمقدن چیقمش ، عادتا لغز و معنی حالی اکتسا ایلمشدر . اگر بو کتاب ، آثار اسلاف کی بسیط و آجیق برافاده ایله یازلمش اولسه ایتمش ، آثار اسلافی آراندیرمه جق ایتمش . سانکه مشارالیه ابن هام ، بو کتابی استفادہ عمومیه ایچون دکل ، لغز ترینده اقتدارینی

تجربه ایچون یازمش . تشکر اولونور که مؤخرآ کندی تلمیذ متمتازی فحول
علمادن ابن امیر حاج حلبی ، مباحث عنه (تحریر) ی کله بکلمه ، جمله بجمله شرح
ایتمش ده بوضورتله آ کلاشیله بیایر برحاله قویمش .

زده نمرده انک زیاده متداول اولان اصول کتابی ، یوقاریده بیان اولونان کبار
علمای عثمانیه دن منلاخسرو مرحومک (مرأت) نامنده کی اثر مشهوریدره اولدجه
محققانه یازلمشدر . لیکن بک مختصر اولوب برچوق مباحث مهمه بی جامع دکلدره
اصحاب تحصیلده اسکی همت قالدیفندن کتابک مختصر اولمقله برابر برارده تحقیقاتی
محتوی اولمسی رغبت عمومیه بی جلب ایتمشدر . مشارالیه ، سلطان فاتح حضر تلیرنک
بک زیاده مظهر اعزازی اولان اعظامدندر وبک دعوالی بر ذاتدر . کندیسنی
اسملری یوقاریده کچن صدانشریه و علامه تفتازانی ایله مساوی طوتاره ، وبواترنده
دائما اونلرله اوغراشیر . لیکن حد ذاتنده اونلر عبارنده اولدینی ایچون اکثریا
سقوط ایدر . علم فقیهه دائر تألیف ایتمش اولدینی (درر) ی بک مشهوردره والیوم
مکتب قضائده تدریس اولونمقدمدر . (هدایه) و آنک شرحی اولان (فتح القدر)
کی حقیقه فقیهانه یازلمش فیاض ومبجل آثار فقیهیه موجود ومطبوع اولدینی حالده
(درر) ک تدریسنده کی حکمتی آ کلامی قابل اوله میور . مشارالیه منلاخسروک
تاریخ وفاتی ، (۸۸۵) سنه هجریه سیدر .

مشاهیر علمای عثمانیه دن ابن کمال مرحومده ، علم اصوله دائر (تغییرالتقیح)
نامیه بر اثر قلمه آلمش ایسهده ، (تقیح) کی جداً دکرلی بر کتابی موقع اعتباردن
اسقاط مقصدیه یازلمش وبناء علیه خلوص نیته غیر مقرون بولونمش اولدیفندن
آثار سائره سی کی بوده رغبت عمومیه به مظهر اوله مامشدر .
دها سوکر دلی اصول فقیهه متعلق برچوق آثار دها نشر اولونمش ایسهده
هیچ بری شوذکر اولونان تألیفات اصولیه درجه سنده بر موقع طوته مامشدر .
بزتلرک انک کوزلی ومدققانه یازیلائی هندستان علماسندن (۱۱۱۹) تاریخنده وفات
ایدن محب الله بن عبدالشکورک (مسلم الثبوت) نام کتابیدر . شرحیه برابر مطبوعدر .
یونکده بودرجهده کوزل اولمسی ، سالف الذکر (تحریر) ک نسخه ثانیه سی مثابه سنده
بولونمشدندر سانکه مؤلف ، (تحریر) ی عباراتنده کی اکسک ، محذوف ومقدر

اولان کلمہ لری علاوہ ایدہ رک استنساخ ایہ مشدر۔ تحریرہ او قدر بکنزہ پور۔ بونک ایچوندر کہ (مسلم الثبوت) ی او قومق دیک ، (تحریر) ی، او قومق دیمکدر . ینہ بونک ایچوندر کہ تحریرک حائر اولدینی قیمت علمیه، مسلم الثبوتہ دخی موجوددر۔ شو قدر کہ فضل تقدم (تحریر) کدر۔

بیانہ حاجت یو قدر کہ بورایہ قدرذ کر اولونان کتابلرک جملہ سی، شرق علماسنک آناریدر۔ تونس، فاس واندلس کبی ممالک غریبہ دخی پک چوق ویک بویوک عالم، ابن رشد کبی هم فقیہ وهم حکیم نحریرلر کلوب کیمش ایسہ دہ بونلرک اصول فقہہ متدائر تالیف ایتدکاری . وفات، بزہ واصل اولدیغدن اسماری معلومز دکلدر۔ یالکز انداس علماسندن (۷۸۰) تاریخندہ ارتحال ایدن ابواسحاق ابراہیم شاطی نک تالیف و (موافقات) تسمیہ ایتدیکی ایکی بویوک جلدی مشتمل کتاب مستطابی، تونسده طبع ایدلمشدر کہ برنسخہ سی نزد عاجزیدہ موجوددر .

بو کتاب مجددانہ یازلمش غایت کوزل وبالادہ محرر اصول کتابلرینک محتوی اولدینی، زمانمز ایچون پک مهم مباحثی مشتملدر . مشارایہ بواثریہ اصول فقہ علمندہ اصل تحقیق ایدلسی لازم کان مسائلک نہ کبی مسئلهلر اولدقلرینی کوسترمک ایستہ مش، و علم اصولجہ تعقیبی مقتضی اولان غایہی تعقیب ایہ مشدر۔ لکن یوقاریدہ دہ سویلدیکم کبی مع التأسف بزم شرق علماسنک صو کرہ دن کلنلری، مشارایہ ابراہیم شاطینک طوتدینی یولی تعقیب ایتمہ مش، بالعکس ایسی لفظ وجدل غوغاسنہ دوکش اولدقلرندن مشارالہک آجدینی چیغری شامراہ ایدہ جک کیسہ ظہور ایتمہ مشدر۔ وقتیلہ اندلسک احراز ایتدیکی موقع بالاترین مدینتہ نظراً اورالردہ « موافقات » طرزندہ وبلکہ دہا مکمل آثار برکزیدہ وجودہ کتیرلمش اولسی قویاً ملحوظدر .

فقط اخیراً انداسک اسپانیالیر طرفدن استیلاسنده آیین مخصوص اجرامی صورتیہ بانعموم آثار اسلامیه احراق ایدلہ کندن ہان ہیچ بری شرقہ واصل اولامشدر۔ نصل کہ شرقدہ دخی جنکیز و ہلاکو اور دولری طرفدن بالجملہ آثار اسلاف، محو واقنا و دجلہ یہ آتیلہ رق ائتلاف ایدلدیکی جہتلہ بو کون آثار مذکورہ دن ہیچ برینہ دسترس اولونہ میور . . .

فصل ثانی

اصول فقہک تعریفی — موضوعی — غایہ سی — قواعدی و علوم سائرہ دن استعانہ سی

اصول فقہک تعریفی

اصول فقہ تعبیری ، فی الاصل مرکب اضافیدر . فقہک اصلری دیمکدر . بالآخرہ بو علمک اسمی اولمشدر و اعلام منقولہ دندر . بوجہتہ تعبیر مذکورہ ، لفظ اعتباریہ مرکب ایسہدہ عام اولق اعتباریہدہ مفرددر . بمضاً بوکا بردہ (علم) لفظی علاوہ اولنہرق (علم اصول فقہ) دنیر و بونٹکہ علمیتہ اشارت ایدیلیر . بمضادہ (فقہ) لفظی حذف ایدیلوب سادہجہ (علم اصول) اطلاق اولونور .

آشاغیدہ بحث مخصوصندہ ایضاح اولونہجفی وجہاہ اسم علمر ، مرتجل و منقول نامریہ ایکی بہ آریلیر . بر لفظ بر شیتہ علم یا پلدینی وقت ، اول لفظک معنای اصالیسی ایہ معنای علمیسی آرہ سندہ بر مناسبت و وجہ تسمیہ ملاحظہ اولونماش ایسہ ول لفظہ « علم مرتجل » ، اولونماش ایسہ « علم منقول » تسمیہ اولونور .

مدحی و یا ذمی مشعر اولان اسم علملر دہ « لقب » دنیر . « اصول فقہ » تعبیری دہ بو علمک اسمی اولمقہ برابر لقییدر . چونکہ تعبیر مذکورہ فقہ کبی مهم بر علمک آنک مسہاسی اولان علم اوزرینہ مبتنی اولدینی کوسترمکدہ درکہ شہہ سز مدحی مشعردر .

« اصول فقہ » تعبیری ، بروجہ مشروح علمیتہ نقل ایدیلوبدہ مرکب اضافی

حالنده ابقا ایدیله جک اولسه اولوقت معناسی ، فقهک اصلری ودایللری دیمک اوله جغندن یالکیز ادله شرعییه متعلق قواعد منحصراً قایلر ، احکامه متعلق اساسلره شامل اولماز . حالبوکه بو علمده احکام شرعییه دن ده بحث اولونور . بوملاحظه یه مبنی (اصول فقه) تعبیری ترکیب اضافی حالندن چیقاریله رقی علمیه نقل ایدلمش و آرتق مفرد اولمشدر لفظی اعتباریه اللهم قولى دیمک اولان (عبدالله) اسمی کبی که فی الاصل مرکب اضافی ایکن مؤخرأ برشخصه علم قلنمش و بناءً علیه مفرد حکمنده بولونمشدر .

اکثر مؤلفین ، « اصول فقه » ی برکزه مرکب اضافی اولق اعتباریه ، برکرده اسم علم اولق اعتباریه تعریف و ایضاح ایدرلر . بواصوله رعایتده بو علمک ماهیتی ده ازیاده توضیح و تنویر ایدلمش اوله جغندن بزده آنلرک ائزینه اقتفا ایدله چکیز تعبیر مذکورده مرکبیت ، علمیتدن مقدم اولدینی ایچون اول امرده تعریف ایضافی بی ، صوکرده اصل تعریف علمی بی بیان و ایضاح ایلله چکیز :

بر مرکب ایضاح ، آتی ترکیب ایدن مفرداتی ایضاحله حاصل اوله جغندن « اصول فقه » مرکب اضافی ایضاح ایچون اولاً مضاف اولان « اصول » کله سنی ، ثانیاً « فقه » لفظی بیان ایتک اقتضا ایدیور .

اصول ، (اصل) ک جمعیدر . اصل ، لغتده کندیسی اوزرینه غیرسی مبتنی اولان شی دیمکدر . ابتنا بوراده ابتناء حسی ایله ابتناء عقیدن اعمدر . بناءً علیه بنانک تمه ایتناسی کبی ابتناء حسی یه ، مدلولک دیسه و معلولک علتله ایتنالی کبی ابتناء عقلی یه شاملدر . بوجهتله بنایه نسبتله تمه ، سقنه نسبتله دیوار اصل اولدینی کبی مدلوله نسبتله دلیل ، معلوله نسبتله علت دخی اصلدر . شو ایضاحدن آکلا شیلیر که فقه اصوله مبتنیدر ، آنک اوزرینه ابتنا ایدیور ، « اصول » ده مبنی علیه و مستدالیه اولویور .

(اصل) لفظی ، عرف و اصطلاحده راجح ، قاعده و دلیل معنالیینه نقل اولونمشدر . فقط ابتنا ، بوجه مشروح ابتناء حسی ایله ابتناء عقیدن اعم اولونجه

« اصل » ی دلیل معناسنه نفاه حاجت قالماز . (برائت ذمت اصلدر) ، (کلامده اصل اولان حقیقتدر) قاعده فقهیه لرنده کی اصل لفظی راجح معناسنه در . « بوبابده اصل اولان بودر » دیرکه قاعده بودر دیمکدر . « بومسئلهده اصل اولان کتابدر » سوزی ده ، بومسئله نك دلیل کتابدر دیمک اولور . بوراده (دلیل) معناسی مقسوددر . شوخالده « اصول فقه » تعیری ، فقهک دلیللری دیمکدر .

« فقه » ک تعریفه کلنجه : فقه لغتده آکلامق دیمکدر . بعض علمانک بیاننه کوره شوپله جه آکلامق دکل ، امان و فطانتله آکلامقدر که برشیک روخنه ، ایچ یوزینه و بوتون اینجه لکلرینه واقف اولمق دیمک اولور . بو ، فقهک معنای انویسیدر . معنای اصطلاحیسنه کلنجه : ایکی درلو تعریف اولونمشدر . بری اصولیون حنفیه نك ، دیکری اصولیون شافیه نك تعریفدر .

علمای حنفیه نك تعریفه کوره [فقه ، انسانک من جهة العمل لهنه و علمیه اولان احکام شرعیه بیلمسیدر .] اصولیون شافیه نك تعریفه کوره [فقه ، احکام شرعیه عملیه بی ادله تفصیلیه سندن بیلمکدر] .

بو ایکی تعریف ، لفظاً متغایر ایسه ده نتیجه متجددر لر . چونکه برنجی تعریفده کی (بیلمک) دن مقصد ، ملکه ایله بیلمکدر . بو مقامده ملکه دن مقصوده ، احکام شرعیه بی ادله سیله برلکده مکرراً تدقیق و تتبع ، امان وادرا کدن حصوله کلن کیفیت راسخه وقوه استنباطیه در .

دیمک اولویور که فقه ، انسانک لهنده و علمینده اولان احکام شرعیه عملیه بی ادله تفصیلیه یعنی ادله مخصوصه سفی کراراً تدقیق و تتبع نتیجه سفی اوله رق حصوله کلن ملکه ایله بیلمسیدر . ایشته احکام شرعیه بی ادله مخصوصه و مفصله سندن استخراج ایله بیلن ، تعیر دیکرله ذکر اولونان ملکه استنباطه مالک اولان علمایه (فقیه) اطلاق اولونور که « مجتهد » دیمکدر . ملکه استنباطه مالک اولمان برذاته ، نه قدر چوق مسائل فقهیه بی تحصیل و حفظ ایتمش اولور ایسه اولسون ینه (فقیه)

ديگر . اوبله لرینه دينسه دينسه عالم ديزر . عالم باشقه ، فقيه باشقه در . آره لرنده عموم و خصوص مطابق واردر . يعنى هر فقيه عالمدر ، اما هر عالم فقيه دكلدر . فقيه اولمق ايجون مسائل شرعيه يي حفظ ايتمك ، دلائلندن مجرد اوله رق بسيط بر صورتده اوكرنمك كافي دكلدر . استنباط و تخريج احكام خصوصنده ملكه راسخيه مالك اولمق لازمدر .

بويه بر ملكه وفدت استنباطه مالك اولان بر فقيهك ، بوتون احكام فقيهه يي بيامسي شرط دكلدر . زيرا بعض مسائل بيامه مك ، بو ملكه نك وجودينه ، نافي دكلدر . نته كيم فقيه و مجتهد مطلق اولديغنده كيمسه نك شبهه يي بولونميان ، نامنه منسوب قوجه بر مذهبك مؤسسي بولونان امام مالك حضرت تلي ، كنديسنه صورولان قرق مسئله دن يالكيز دردينه جواب ويرمش ، اوتوز آلتيسي حقنده (لادري) بيلميورم ديمشدر .

بويه دفعه صورولان مسئله لره در حال جواب ويره مه مك ، بر فقيه ايجون نقيصه تشكيل ايتمز . مشاراليه كبي بر مجتهدك در حال جواب ويره ميشي ، عدم اقتدارندن دكلدر . بلكه او مسائل حقنده كي دلائل شرعيه نك ظاهر آمارضندن و اولجه دوشونلمه مش اولسندندر . بعض مسائل بولونور كه فقيه ، اونلرك احكامني استخراجده اوزون اوزادى يه تدقيق و تأمله ختاج اولور . ايسته بو كبي مسائل ، اولجه آنلري هيچ دوشونلمه مش اولان بر فقيه صوروله جق اولورسه طبيعي دفعه حكملريني استخراج ايده مز . لكن كنديسنه تدقيق و تأمل ايجون مهلت ويره بلكه اولور ايسه استخراج ايده بيلير . حالبوكه حدذائنده فقيه النفس اولديغني حالده تقليد طريقه بيكارجه ، يوز بيكارجه مسائل اوكرنمش و حافظه سنده بير كدير مش نيجه علما واردر كه آنلره او كبي مسائل ايجون سنه لره مساعده ايدلسه ينه حكملريني استخراج ايده مز لر . [رَبِّ حَاجِلِ فِقْمِهِ غَيْرِ فِقِيهِ] . ايسته فقيه ايله عالم آره سنده كي فرق بو كبي يرلده كنديني كوسترر . مع هذا هر فقيه ، هر مسئله يي بيله مز . يتر كه آنفا بيان اولونديغني وجهه قوه استنباطه مانك اولسون .

خلاصه ، برنجی تعریفده کی (بیلیمک) ، ملکه استنباط معناسنه ، ایکنجی تعریفده کی (بیلیمک) ده ادله تفصیلیه دن استخراج صورتیه بیلیمک معناسنه اولدینی ایچون بو قیدرله ، درجه اجتهاده واصل اولیان علمای مقلدینک علمی تعریفلردن خارج قالمشدر . چونکه اونلرک علمی ، متبوعلری اولان مجتهدلره تقلیداً حاصل اولمشدر . ملکه وادله شرعیه دن استدلال طریقله حاصل اولمامشدر . بونک ایچوندرکه (ادله مقلدین ، اقوال مجتهدین در) دنی .

برنجی تعریفده کی (من جهة العمل) قیدی ده قید احترازیدر . بو قیده علم اعتقادله علم اخلاق تعریفدن خارج قالیور . یوقاریده فصل اولده بیان اولونمشدی که صدر اسلامده واول دور مجتهدینه اعتقادیات ایله اخلاقیات دخی ، فقهک دائرة بحث و تدقیقی داخلنده ایدر . آنک ایچون (فقه) ی اک اول تعریف ایدن امام اعظم ابو حنیفه حضرتلری [معرفة النفس مالها وما علیها] دیه تعریف ایش و « عملا ، قیدی ذکر ائمه مشدر . یعنی مشارالیه ، فقهی اعتقادیات و اخلاقیات دخی شامل اوله جق صورتده [نفس انسانینک لهنه وعلیهنه اولان احکام شرعیه بی بیلیمکدر] دیه تعریف ایدوب « من جهة العمل » قیدی اتیان ایله مه مشدر . نته کم اعتقادیاتنه دائر قلمه آلدینی رساله مشهوره سنی (فقه اکبر) نسمیه ایتدیکی یوقاریده بیان ایدلمشدی .

مؤخرأ اعتقادیات و اخلاقیاتنه متعلق اولان مباحث ، پک زیاده توسع و تکمیل ایدرک آیری آیری برر علم مستقل اولدقلرندن متأخرین علما ، آنلری علم فقهک دائرة بجئی خارجنده برافشلر و بو جهتله آنلری فقهک تعریفدن اخراج ایچون حضرت امامک ذکر اولونان تعریفنه (عملا) یعنی من جهة العمل قیدی علاوه ایشلردر . ایکنجی تعریفه کورده بونلر (عملیه) قیدیله تعریفدن خارج قالیر . فقهک بو صورتله تعریفی ، اصولیونه و متقدمین فقهایه کورده در . آنلرک اصطلاحنده ملکه استنباطه مالک اولیان علمایه (فقیه) اطلاق اولونماز . اطلاق تقدیرنده مجازاً اطلاق ایدلمش اولور . لکن صوکره لری ولوتقلید طریقله اولسون

برجوق مسائل فقهیه بی ذهننده جمع و حفظ ایدن علمایه دخی (فقیه) اطلاقی پک زیاده زبازرد اولدیغندن وزمانک فقیه یتشدیر مکده کی اسکی سماحنی قالمدیغندن متأخرین فقهایه کوره اشبو اطلاق، آرتقی حقیقت عرفیه حالنی اکتساب ایله مشدر. آنکچون بوندر فقهی [مسائل شرعیه عملیه بی حفظ ایتمکدر] دیه تعریف ایدیورلر.

شو تعریفه کوره آزچوق مسائل شرعیه بی بیان ذواته (فقیه) اطلاقی صحیح اولور. بونک ایچوندرکه بر کیسه (فلان مملکتده ویا محلهده کی فقهایه شو قدر غروش وصیت ایتدم، ویرلسون) دیسه بو وصیت انفاذاوانور. بناءً علیه او مملکتده ویا محلهده موجود علمانک جمله سی بو وصیتده داخل اولور.

بورابه قدر اولان ایضاحات، (اصول فقه) تعبیرینک مرکب اضافی اولوق اعتباریله تعریفه متدائر ایدی. شمیدی ده علمیت اعتباریله تعریف وایضاح ایدهلم:

علم اصول فقه، « احکام شرعیه عملیه بی ادله تفصیلیه سنندن استنباطه کندیلریله توصل اولونان قاعده لری بیلدیرن علمدر. »

ایشته اصل علم اصول فقهک تعریفی بودر. تعریفده کی قیدلر، قیود احترازیله اولدیغندن تعریف حقیله آکلاشلق ایچون هربری بروجه آتی ایضاح اولونور:

(احکام) حکمک جمعیدر. حکم مختلف معنارده استعمال اولونور،

فی الاصل منع معناسنه در. لغه فصل خصومت و اجرای حکومت ایتمک کی دیگر معنارده دخی قوللانیلیر ایسه ده بو معنارده استعمالی، منع معناسنی تضمن ایتدکلر ننددر.

لسان عرفده حکم، بر شیئی دیگرینه ایجاباً ویا سلباً اسناد ونسبت ایتمکدر. بوکا حکم عرفی دنیر. حکم، عرفده برشی اوزرینه ترتب ایدن اثر معناسنده دخی قوللانیلیر. مثلاً « بیعک حکمی ملکیتدر، دنیلیرکه « عقد بیع اوزرینه ترتب ایدن اثر، ملکیتدر، دیمکدر. برشی اوزرینه ترتب ایدن اثر، اول شیئه ایجاباً نسبت اولونه بیله جکندن حکم لفظنک شو ایکی معنای عرفیسی نتیجه اعتباریله بردر.

منطق علماسی نسبت مذکورہ یہ یعنی بر شیئی دیکرینہ اسناد ونسبتہ نسبت
خبر یہ دیر لر . بو نسبت خبر یہ بی علی وجه الاذعان ادراک کیفیتہ دہ حکم وتصدیق
دیر لر کہ منطق اصطلاحندہ حکم ایله تصدیق ، بر شیدن عبارتدر وتصور مفاہیدر .
بورادہ بونلرک هیچ بری مقصود دکلدرد . بورادہ (حکم) دن مقصد ، حکم
شرعیدر . آنک ایچون تعریفده « احکام » لفظی ، « شرعیہ » قیدیلہ توصیف وتقیید
اولومشدر . بوتقیید سبیلہ در کہ احکام شرعیہ دن ماعدا بالجمله احکام عقایہ ، حسیہ ،
فیه واصطلاحیہ تعریفدن خارج قالشدر .

حکم شرعی ، افعال عبادہ متعلق خطاب شارع ایله ثابت اولان شیدر . یعنی
خطاب شارع اوزرینہ ترتب ایدن اثردر . [ما ثَبَّتَ بِخُطَابِ الشَّارِعِ الْمُتَعَلِّقِ
بِأَفْعَالِ الْعِبَادِ]

بو تعریفہ نظرأ حکم شرعی ، نفس خطاب شارع دکلدرد . بلکہ خطاب شارعک
اثریدر ووجوب وحرمت کی افعال مکلفینک صفتیدر . بوتعریف فقہایہ کورہ در .
متکلمین عنندنہ حکم شرعی ، نفس خطایدرد . بونلر حکم شرعی بی اقتضا ویا
تخییر صورتیلہ افعال مکلفینہ تعلق ایدن خطاب شارعدر ، دیہ تعریف اییدیورلر [۱]
بوتعریفہ « مقصد » بین الفقہا مصطلاح اولان حکمی تعریفدر . فقہایہ کورہ حکم ایسه
وجوب ، حرمت کی خطاب شارع ایله ثابت اولان اثردر وافعال مکلفینک صفتیدر .
شارعک صفتی اولان نفس خطاب دکلدرد . بوجهتہ بو تعریف فقہانک اصطلاحنہ
توافق ایتمیور ، دیہ اعتراض ایدلمشدر .

بو اعتراضہ بر قاچ درلو جواب ویرلمش ایسه ده اک دوغریسی بعض علماء
شافعیہ طرفدن بروجہ آتی ویریلن جوابدر :
« حکم شرعی ، حقیقتہ ایجاب وتحریم وامثالیدر کہ خطاب شارعدن عبارتدر .

[۱] الحكم خطاب الله تعالى المتعلق بأفعال المكلفين بالانتضاء او التخيير وبعضهم زاد
في التعريف قيد (اوالوضع) فادرج الخطاب الوضعي في الحكم وبعضهم جعل الانتضاء اعم من الصريح
والضمني فادرجه بهذا الاعتبار في الحكم (المرأة وشرح مختصر المنتهى) .

وجوب و حرمت کبی صفات افعاله (حکم اطلاقى مجازدر ، مساعده به مبتدیر . خلق مجازاً مخلوق معناسنده قوللانلانی کبی حکم لفظی ده بمضاً محکوم معناسنده استعمال اولونور و بو صورتده خطاب شارعك اثری اولان وجوب و حرمت کبی اوصاف مراد ایدیلیر .)

لکن حکم افظلك وجوب و حرمت کبی معالرده استعمالی شایع اولدیغندن آرتق بومعناده حقیقت شرعیه اولمشدر . افادات سالفه دن اکلایشیلور که حکم لفظی ، اصطلاحده ایکی معناده قوللانیلور . بری ایجاب و تحریم کبی دوغریدن دوغری به خطاب شارع ، دیکری وجوب و حرمت کبی خطاب شارعك اثریدر .

ورده ذکر اولونان تعریفلك هر ایکسندن ده منفهم اولدیغی وجهه حکم شرعی افعال مکلفینه تعلق ایدر ، اعیان و اشیا به تعلق ایتمز . بناء علیه بو فعل واجبدر ، شو ایش حرامدر دئیر . اعیانه یعنی ماده لره اشارتله بو شی واجبدر ، شو شی حرامدر دئیمز . مکرکه مجاز طریقله دینمش اولسون . (حرمت علیهم المیتة) کبی بعض آیات قرآنیه واحادیث نبویه ده حل و حرمتك دوغریدن دوغری به بعض اعیانه نسبت اولونمسی بوجه معروض مجاز طریقله در ، علی وجه الحقیقه دکلدرد . مع هذا ائمة اصولن فخر الاسلام بزدوی کبی بعض اطلم اصولیون ، بو نسبتك حقیقت اولدیغنه قائل اوله رق بو بابده باشقه بر طریقه سلوک ایتشلردر . نته کیم قریباً ایضاح اولونه جقدر .

خطاب شارع ایکی نوعدر : بری خطاب تکلیفی ، دیکری خطاب وضعیدر . خطاب تکلیفی ، اقتضا و یا تخیر صورتیه افعال مکلفینه تعلق ایدن خطابدر . اقتضا ، بوراده طلب معناسنده در . یعنی مکلفدن بر فعلك اجرا و یا عدم اجراسنی طلبدر . اگر بو طلب جازم و قطعی ایسه ایجاب و یا تحریمدر . غیر جازم ایسه ندب و یا کراهتدر . تخیر ، بر فعلك اجرا و یا عدم اجراسنده مکلفنی بخیر قیلدقدر که اباحه دیمکدر .

خطاب وضعی ، بو شونك رکنی و یا سببی و یا شرطیدر طرزنده واقع اولان

خطابدر. مثلاً طهارتک شرائط صلاتدن بر شرط اولدیغنه دائر وارد اولان خطاب شارع، خطاب وضعی نوعندندر. بالاده علم اصولک تعریفده « احکام » ، « شرعیه » قیدیله تعقید ایدلدیکی کبی « عملیه » قیدیله ده تعقید ایدیله رک [احکام شرعیة عملیه نی] دینلمشدر. بو قیدلر قید احترازیدر. « شرعیه » قیدیله احکام عقلیه ، حسییه وفقیه دن احتراز اولوندینی کبی « عملیه » قیدیله ده احکام شرعیه نك اعتقاد و وجدانه تعلق ایدن احکام غیر عملیه دن احتراز اولونمشدر. بناء علیه شرعیه قیدیله عقل و حسه ، علوم و فنون سائره یه تعلق ایدن احکام ، تعریفدن خارج قالدینی کبی (عملیه) قیدیله ده علم کلام و علم اخلاق خارج قالمشدر .

تعریفده [ادله تفصیلیه سندن] دینیور . ادله ، دلیلک جمعیدر . دلیل ، اصطلاحده « کندیسنه نظر صحیح ایله نظر اولوندقده بر مطلوب خبری یه ایصال ایلین شیدر » دیه تعریف اولونور. (مایمکن التوصل بصحیح النظر فیله الی مطلوب خبری) . نظردن مقصد فکردر. فکر ، بر مجهولی استحصال ایچون امور معلومه نی ترتیب ایله مک دیمکدر . بیلنمیسی مطلوب اولان او مجهوله ده (مطلوب خبری) اطلاق اولونور . بونلر علم منطق وجدل اصطلاحاتندندر .

شو تعریف ایله معروف اولان دلیل ، مرکب و مفرد ؛ لوق اوزره ایکی یه آریلیر . دلیل مرکب ، صغری و کبری ناملری ویریلان ایکی مقدمه دن ترکیب ایدن دلیلدرکه قیاس منطقیدن عبارتدر. مثلاً (عالم حادثدر) مطلوب خبریسنی اثبات ایتمک ایسته یوروز. بونک ایچون [عالم متغیردر ، و هر متغیر حادثدر .] قیاس منطقیسنی ترتیب ایدرز . بو بر دلیلدرکه ایکی مقدمه معلومه دن ترکیب ایتمشدر . برنجیسنه صغری ، ایکنجیسنه کبری دیر . ایسته بودلیلی نظر صحیح و فکر تام ایله تدقیق ایتدی کمزده بزی (عالم حادثدر) مطلوب خبریسنه ایصال ایدرکه قیاسک نتیجه سیدر .

دلیل مفرد ، بویله ایکی مقدمه دن ترکیب ایتمز . او بر شی درکه آنک احوال و اوصافه امان نظر اولوندقده آنکله باشقه بر شیئه یعنی مطلوب خبری یه توصل

اولونور. مثلاً شوکائیات، صانع عالم اولان جناب حقک وجودینه دلیلدر. زیرا عتلا ره حیرت و یرن شو بدایع مکونانی امعان واذمان ایله تدقیق ایتدی کمزده مبدأ فیاض اولان قدرت فاطره نك وجودینه قائل اولوروز. بومثاله اولیله ایکی مقدمه دن ترکیب ایتمش برقیاس منطقی یوقدر. یالکیز برشی واردر که اوده عالم دن، کائاتک هیئت مجموعه سندن عبارتدر. ایشه بو وامثالی دلیلله دلیل مفرد دیر .

تعریفده کی [ادله] دن متصود اولان ده بودر یعنی دلیل مفردلردر. چونکه اصول فقیده موضوع بحث اولان ادله شرعیه کتاب، سنت، اجماع ایله قیاس فقهیدن عبارتدر که جمله سی ده مفرددر. زیرا بحث مخصوصنده بیان اولونه جنی اوزره مثلا (کتاب)، معنایه دال اولان نظم جلیدر. بر کله وحتى حروف معانیدن بر حرف دخی اوله بیلیر. قیاس فقهی ده مفرددر. قیاس منطقی کی ایکی مقدمه دن مرکب دکلدر.

[ادله تفصیاییه] دن مقصوده، ادله معینه و مشخصه در. بو قید، احکام شرعیه دن هر برینک کندیسنه مخصوص اولان معین و مشخص بر دلیلدن استنباط اولونه جنی کوستر. مثلاً صلاتک و حوبی « اقموا الصلاة » امر مخصوص و معیندن استخراج اولوندنی کی زکاتک، صومک و سائر واجبات شرعیه نك کافه سنک وجوبلری دخی کندیلرینه مخصوص و معین اوامر الهیه دن استنباط اولونمشدر .

[قاعده] قاعده، جزئیاتی اوزرینه منطبق اولان بر قضیه کلیه در که آنکله او جزئیاتک احکامی استخراج اولونور .

ایشته علم اصول فقہک ماهیتی حقنده بالاده ذکر اولونان تعریفک ایضاح قیودی بوندن عبارتدر. شو تعریف و ایضاح دن آکلاپورز که اصول فقه علمی، بزه بر طاقم قاعده لر بیلدیره جک، بزده حین حاجتده بر مسئله و بر حادثه حقنده آکلامق ایسته دیکمز حکم شرعی پی او قاعده لر واسطه سیله دلیل مخصوصندن استخراج ایده بیله جکز .

مثلاً بن ، نمازك شرعاً واجب اولوب اولديغنى بيلميوروم ، بونى اوكرنمك ايسته بوروم . بو ، بنم اچون بر مطلوب خبريدر . ادله شرعيه دن كتابه يعنى قرآن كريمه مراجعت ايتدم ، (اقيموا الصلاة) امر جليلنى توردم . اصول فقه قاعده لرى آرسندمه « صيغه امرك » وجوب افاده ايتديكنى و بناء عليه ، اهور شارعك واجب اولديغنى اوكرنمشم . سو حالده بن ، آلامق ايسته ديكم نمازك وجوبى مسئله سنى ، بو قاعده اصوليه وساطتيله وبر قياس منطقي ترتيبيله ذكر اولونان دليل مخصوص شرعي دن يعنى « اقيموا الصلاة » امر جليلدن استنباط واستنتاج ايلرم . ديرم كه :

مطلوب خبرى — نماز واجبدر .

صغرى — چونكه نماز ، « اقيموا » امر جليلي ايله مأمور شارعدر .

كبرى — وهر مأمور شارع واجبدر .

نتيجه — او حالده نمازده واجبدر .

ايسته تعريفده كي [كنديلرييله توصل اولونان] سوزندن مقصد ، بو صورته اولان استدلالدر كه بوكا « طريق توصل » اطلاق اولونور . ايسته بورايه قدر اولان ايضاحات ايله اصول فقهك كرك اضافت وكرك علميت اعتباريله تعريفنى توضيح وتشریح ايتدك . شمديده اصول فقهك موضوعنى بيان ايدم .

— علم اصول فقہک موضوعی —

معلومدرکہ برعلمک دیگر علملردن تمیزی، موضوعی اعتباریلهدر. هرعلمک کندینه مخصوص برموضوعی اولدینی کبی علم اصول فقہک موضوعی ده، ادله واحکام شرعیهدر. اصول فقہک موضوعنده علمای اصول اختلاف ایتشلردر. بعضلری اصول فقہک موضوعی یالکز ادلهدر، بعضلری یالکز احکامدر، بعضلری ده ادله واحکامک مجموعیدر دیبور. بو اوجنچی فکر، «موضوع» تعیرینک ماهیت و تعریفنه دها موافق اولدینی جهتله بزده بوفکری ترجیح ایتدک. برعلمک موضوعی، او علمده کندیسنک احوال و اعراض ذاتیهسندن بحث اولونان شیدر. برعلمده هانکی شیئک احوالندن بحث اولونیور ایسه ایشته او علمک موضوعی اوشی تشکیل ایدیور دیمکدر. اصول فقه علمنده ده ادله ایله احکامک احوال و اعراضندن بحث اولوندینی جهتله ادله ایله احکام، بو علمک موضوعی تشکیل ایتش اولوبور.

وبرده برعلمده کندی موضوعنک ذاتندن، ماهیت و حقیقتندن بحث اولونماز. بوجهت او علمده مسلم عد اولونور. اوندن، بشقه برعلمده بحث اولونور. بوکا بناء درکہ اصول فقہده ادله شرعیه نک اساسی اولان قرآن کریمک ذاتندن بحث اولونماز. مثلا قرآن کتاب سماویمیدر، حقایق آموزام افندمن حضرتلرینک بر معجزه باهره سیمیدر؟ کبی مباحث، اصول فقہک دائره بحثی خارجندهدر. بوکبی مسائل، اصول فقه علمنده مسلمانندن عد اولونور. قرآن کریمک ذاته عائد مباحث مذکورهنک یری علم کلامدر. بونلردن اوراده بحث اولونور. علم اصولده ایسه قرآنک اثبات احکامه راجع اولان اعراض و احوالندن مثلاً عامیدر،

خاصیدر، حقیقتیدر، مجازیدر، بونلرک حکملری ندر؟ بونلر تعارض ایدرسه نه یا بلق لازمدر؟ کبی احکام شرعی بی اثباته مدار اولان احوالندن بحث اولونور.

(موضوع) تعیرینک منطق اصطلاحاتندن اولق اوزره ایکنجی برمعناسی دها واردر. بومر نه قدر صددن خارج ایسه ده بونکله اولکی معنای اصطلاحی آره سنده التباس بولوندیغندن بوالتباسی رفع ایچون (موضوع)ک بوایکنجی معناسی ده جملاً بیان ایتمک ایجاب ایدیور. شویله که :

علم منطقدہ صدقہ ، کذبہ احتمالی اولان سوزہ ، یعنی « فلان کلدی » ، « شو شویله اولدی » ، « بوشودر » کبی کلام اخباریلره « قضیه » نامی ویریلیر . ایشته بوقضیه نک جزء اولنه موضوع ، جزء ثانیه سنده محمول اطلاق ایدیلیر . مثلاً « فضیلت علمیه ، ثروت معنویه در » سوزی بر قضیه در . بونک جزء اولی اولان « فضیلت علمیه » تعیری موضوع ، جزء ثانیه سی اولان « ثروت معنویه » ترکیب توصیفی سی ده محمولدر . « در » اداتی ده ادات رابطه در .

(موضوع بحث) ، (موضوع مسئله) کبی محاوراتده مستعمل اولان تعیرات آره سنده کچن « موضوع » کله سی هپ بومعنایه در . بونکله یوقاریده تعریف ایدیلم « موضوع علم » ی ایشته بوضورتله تفریق وتمیز ایتملیدر .

یوقاریده بر عامک موضوعی نه دیمک اولدیغنی تعریف ایدر ایکن (اعراض ذاتیه سندن بحث اولونان) دیمشدک . « اعراض » عرضک جمعیدر . عرض لغتده بر شینه لاحق و عارض اولان حال وصفت دیمکدر . اصطلاحده ایسه بر شیتک ماهیتندن خارج فقط آکا محمول اولان شینه اطلاق اولونور . مثلاً انسانه نسبتله ضاحکیت بر عرضدر . چونکه ضاحکیت ، انسان ماهیتندن خارجدر . بونکله برابر دائماً انسانه محمول اولور . بونک ایچوندر که بر قضیه ده انسانی موضوع ، ضاحک لفظنی محمول یا برق « انسان ، ضاحکدر » دیلیر سه بوقضیه دوغری و واقعه مطابق اولور .

«ذاتیه» قبلی، اعراض غریبه‌دن احترام ایچوندر زیرا هیچ بر علمده
اعراض غریبه‌دن بحث اولونماز، اعراض ذاتیه، بر شیک ذاتیاتندن نشأت ایدن
اعراض واحوالدر. اعراض غریبه ایسه بر شیک ذاتیاتندن نشأت اینیوب باشقه
اسباتدن ناشی اول شیئه عارض اولان احوالدر.

«بحث» لفظنه کلنجه: بحث لفظه تفتیش و تفحص معناسه در. اصطلاحده
بر شیک دیکرینه حمل و اثبات دیمکدر. بوراده بومعنا ای اصطلاحیسی مقصوددر که
اعراض واحوال ذاتیه‌یی، موضوع علم اوزرینه حمل اتمک دیمک اولور.
بولندن آکلاشیلیر که بر علمک موضوعی، او علمده ذکر اولونان مسائلكده
موضوعی اولور. اعراض ذاتیه‌ده مسائل مذکورنک محمولارینی تشکیل ایدر.
نته کیم اصول فقه مسائلنده دلیل شرعی موضوع، آنک اعراض واحوال ذاتیه‌سندن
بری ده محمول اولور. مثلاً (کتاب حکم شرعی بی مثبتدر) مسئله اصولیه‌سنده
موضوع علم اولان «کتاب» بوقضیه‌نک موضوعی، «مثبت» ده کتابک عرض
ذاتیسی و قضیه‌نک محمولیدر کذاک (امر، وجوب افاده ایدر) قضیه‌سی ده بر مسئله
اصولیه‌در. موضوعی دلیل شرعیک بر نوعی اولان «امر» محمولی ده اعراض
ذاتیه‌دن بولونان «وجوب افاده ایدر» سوزیدر.

ایشته مسائل و قواعد علمیه‌نک ترتیب علمی و قیسی بومنوال اوزره اولور.
بعضاً مسئله‌نک ظاهر المناظره نظراً بو ترتیبک تبدل ایتمش اولدینی ظن اولونورسه ده
بو حال، اصطلاحات علمیه‌نک محمولاتندن متولد بر تبدل ظاهریدر. تبدل حقیقی
دکدر. مثلاً (خاص، حکم قطعی ایجاب ایدر) مسئله اصولیه‌سنده ظاهره نظراً
دلیلک اعراض ذاتیه‌سندن اولان «خاص» موضوع مسئله واقع اولمش ظن اولونور.
حقیقت حالده ایسه اویله دکدر. بومسئله‌نک موضوعی، ادله شرعیه‌دن اولان
«نظم» در، یعنی کتاب وسنته شامل اولان «نص» در. زیرا خاص دیمک،
نظم خاص و یا نص خاص؛ یا خود دلیل خاص دیمکدر. اختصار کلام ایچون
موصوف عبارتده دن حذف اولومش، صفتی اولان لفظ خاص آنک مقامنه اقامه
ایدلمشدر...

ادله شرعيه

یوقاریده علم اصولک موضوعی؛ ادله واحکام شرعيه در دینلمشدی آشاغیده ادله بمختنده بر تفصیل ایضاح اولونه جنی اوزرد ادله شرعيه، در تدر: کتاب، سنت، اجماع، قیاس. کتاب ایله سنت، شریعت اسلامیه نك ایکی رکن رکینی، ایکی اساس متیندر لر. هرایکسی ده من کل الوجوه وبلاستقلال دلیل مثبتدر لر. یعنی هربری هرجهتله رأساً ومستقلاً احکام شرعيه بی مثبتدر.

اجماع ده جمهور علمای اسلامه کوره رأساً اثبات احکامده دلیل مستقل و حجت شرعيه در. لکن معتزله علماسندن نظام ایله شیعه دن امامیه فرقه سی و بعض علمای خارجیه، اجماعک دلیل شرعی اولدیغنی انکار ایدیور لر. دیگر بعض علماده اجماعک فعلاً و ماده ثبوتنه امکان بولونمديغنه، بعضری ده اجماع نفس الامرده واقع و ثابت اولسه بیله آنک ثبوتنه وقوف و اطلاعک مستحیل اولدیغنه قائل اولمشدر لر.

قیاسه کانه: بوده جمهور علمایه کوره بر دلیل شرعیدر. لکن دلیل مستقل دکدر. یعنی رأساً ومستقلاً حکم شرعی بی اثباته کافی دکدر. تعبیر دیگرله قیاس، من کل الوجوه بر دلیل مثبت دکدر. حکمک کنديسنه مبتنی اولسی اعتباریله من وجه اصل و دلیل ایسه ده، کنديسی ده کتاب، سنت و یا اجماع دن مأخوذ اولان علتیه مستند بولونمسی اعتباریله من وجه فرعدر. بونک ایچوندر که قیاس ایله ثابت اولان حکم، حقیقته ادله ثلاثه مذکورده دن برینه مستدر. ینه بونک ایچوندر که قیاس دلیل مظهردر، مثبت دکدر. یعنی قیاس، ذکر اولونان ادله ثلاثه دن بریله مقیس علیده ثابت اولان حکمی، ینه او دلیلدن مستتب اولان علت مشترک یه استناداً مقیسده اظهار ایدر. یوقسه ادله ثلاثه کبی کنديسنه مخصوص یکی بر حکم اثبات ایدر. قیاسک اشبو ماهیت و حکمی، آنفاً بیان اولوندیغنی وجهله جمهور علمایه کوره در. اهل سنتدن فقهای ظاهریه ایله بعض علمای معتزله، قیاسک حجتینی یعنی دلیل شرعی اولمسی قبول ایتمه مشدر لر.

بودرت دلیل شرعیدن باشقه شرایع سالفه ، استصحاب ، استصلاح یعنی مصلحت
مرسله ، عرف و عادت ، مذهب صحابی ، عموم بلوی ، سدذرایع و بزائت اصلیه کبی
فقها عنندنه مابه الاحتجاج اولان بر طاقم دلیلر دها وارسده بونلر باشلی باشنه
مستقل برر دلیل اولیوب هربری ، ذکر اولونان ادله اربعه دن برینه راجعدر .
محلرنده آری آری تفصیل وایضاح اولونه جقدر .

احکام شرعیه

احکام تکلیفیه ، احکام وضعیه

یوقاریده حکم شرعیك تعریف وایضاحی صدندنه خطاب شاری ، خطاب
تکلیفی وخطاب وضعی ناملریله ایکی نوعه تفریق ایتشایدک . بونک نتیجه طبیعی سی
اولوق اوزره حکم شرعی ده ، حکم تکلیفی و حکم وضعی اوله رق ایکی به تفریق اولونور .
حکم تکلیفی وجوب ، ندب ، اباحه ، حرمت ، کراهت ، انعقاد ، بطلان ،
صحت ، فساد ، نفاذ ، عدم نفاذ ، لزوم ، عدم لزوم کبی حکملردر . حکم وضعی ده
رکنیت ، علیت ، سببیت ، شرطیت کبی حکملردر . حکم تکلیفینک بش اولکیلرینه
احکام اخرویه ، دیکرلرینه احکام دنیویه اطلاق اولونور . بونلر ، ایلروده احکام
بخشنده برربرر تشریح و توضیح اولونه جقدر نان صدندن بالکلیه آیرلامق ایچون
بوراده تفصیل وایضاحلرندن صرف نظر اولونمشدر . آنجق مباحث آتیه نک
اکتریسنده سالف الذکر احکام خمسۀ اخرویه نک و بتخصیص وجوب ، حرمت
واباحه نک اسملری بک چوق مرور و تکرر ایده جکندن بوراده آنلرک بروجه
آتی توضیح ماهیتلری مناسب کورلمشدر :

احکام خمسۀ اخرویه

وجوب ، ندب ، اباحه ، حرمت ، کراهت

آنفاً بیان اولوندینی اوزره وجوب ، ندب ، اباحه ، حرمت وکراهتدن

عبارت اولان احکام اخرویه ، بین العلماء احکام خمسہ تامیلہ معروفدر . بونلرک مشتقاتی ده واجب ، مندوب ، مباح ، حرام و مکروهدر .

بر فعل مکلفک ایشله نوب ایشلمه سی نظر شارعده یا مساویدر و یا دکلدر . مساوی ایسه اول فعل مباحدر . مساوی دکل ایسه شو حالده یا ایشلمسی راجح و مطلوبدر ، یا خود ترکی راجح و مطلوبدر . ایشلمسی مطلوب اولدینی صورتده . اگر طلب جازم ایله مطلوب و بناءً علیه ترکی ممنوع ایسه او فعل واجبدر . یوق اگر طلب غیر جازم ایله مطلوب اولوب ترکی ممنوع دکل ایسه مندوب دیمکدر . ترکی راجح و مطلوب اولدینی تقدیرده اگر ایشلمسی منع اولونمش ایسه بوفعل حرامدر ، منع اولونماش ایسه مکروهدر .

شوقسیمدن مستبان اولویورکه « واجب » نظر شارعده ایشلمسی طلب جازم ایله مطلوب و ترکی ممنوع اولان فعلدر . « مندوب » ایشلمسی راجح و فقط ترکی غیر ممنوع اولان فعلدر . « مباح » ایشله نوب ایشلمه سی مساوی اولان فعلدر . « حرام » ترکی طلب جازم ایله مطلوب و ایشلمسی ممنوع اولان فعلدر . « مکروه » ترکی راجح و فقط ایشلمسی غیر ممنوع اولان فعلدر .

فقهای حنفیه عندنده واجب ایکی قسمدر . بری دلیل قطعی ایله ، دیگرى دلیل ظنی ایله ثابت اولان واجبدر . اولکیسنه فرض ، ایکنجیسنه ساده جه واجب اطلاق ایدرلر . « فرض » ده هم عمل ، هم ده حقیقی اعتقاد لازمدر . « واجب » ده ایسه یالکز عمل لازم اولوب حق اولدینی اعتقاد لازم دکلدر . بوندن آکلاشیلیرکه واجب تعیرینک ایکی معناسی وارددر . بری معنای اعمی ، دیگرى معنای اخصیدر . اصولیون عندنده عند الاطلاق معنای اعمی قصد اولونور . نته کیم احکام مذکورہ نک بوجه بالا بشه تقسیم و حصر نده ده « واجب » تعیرندن معنای اعمی مراد اولونمشدر . واجب معنای اعمندن مقصوده ایستر دلیل قطعی ایله اولسون ، ایستر دلیل ظنی ایله اولسون ، علی الاطلاق ایشلمسی مطلوب و ترکی ممنوع اولان فعل دیمکدر . مندوبده سنت ایله نفل (نافله) دن اعمدر . سنت ، دینده طریقت مسلوکه

اولان فعلدر . وایکی نوعدر : سنت هدی ، سنت زانده . مکروهده هم کراحت
تحریمی ايله همده کراحت تنزیهه ايله مکروهه شاملدر .

وجوب ، ایجاب و امر شارعک ، حرمت تحریم و نهی شارعک موجب و اثریدر .
بناءً علیه واجب مأموریه ، حرام منهی عنهدر . واجبی ترک ، ایجاب و امر شارعه ،
حرامی ارتکاب تحریم و نهی شارعه عدم اطاعت دیمک اولدیغندن جناب حقه
قارشی معصیت و بوسیدله مستوجب عقوبتدر .

ندب و کراحت ، ایجاب و تحریم دیمک اولمیوب آنلرک دوننده بولوندقلرندن
معنای اصطلاحیجه مندوب مأموریه ، مکروه منهی عنه دکلدر . بوتون فقها
و اصولیونک اتفایله مندوبی ترک و تنزیهاً مکروهی ارتکاب ، معصیت تشکیل ایتمز
و بوجهتله مستلزم عقوبت اولماز .

شوحالده واجبک فاعلی مظهر ثواب ، تارکی مستحق عقاب اولور . حرامک
فاعلی مستحق عقاب ، تارکی مثاب اولور . مندوبک فاعلی مثاب اولورسهده تارکی
مستحق عقاب اولماز . شوقدر وارکه مندوب ، اگر اوقات خمسهده قیلینان سنن
مؤکده و روایب کبی سنت هدی نوعندن ایسه تارکی اساتکارولوم و تکدیره دوچار
اولور . برده اذان و اقامت ، جماعتله صلات کبی شعار اسلامدن معدود اولان سنت
هدالر واجب منزله سندهدر . حتی برتریه اهالیسی بونلری ترکده اصرار ایدرلرسه
سیاسةً قوه جبرییه و استعمال سلاح ايله ایفایه سوق اولونورلر .

تحریماً مکروه ، حرامه قریبدر . لکن حرام دکلدر ، فاعلی مستحق مجازات
اولماز . لوم و معاتبهیه کسب استحقاق ایتمش اولور . فقط ائمه حنفیهدن امام محمد
کوره تحریماً مکروه حرام حکمندهدر . تنزیهاً مکروه ایسه حلاله اقریدر .
هرایکینسکده تارکی مظهر مکافات اولور . مباحه کلنجه : اونک نه فاعلی و نه تارکی
نه ثوابه نهده عقابه مستحق اولماز ، طرفینی نزد شارعده مساویدر [اصول بزروی
و شرحی کشف کبیر ، توضیح و تلویح کبی عموم معتبرات اصولیهده بوصورتله
مصرحدر] .

واجبک شرعاً فاعلی مدح، تاریکی ذم اولونور. حرامک فاعلی ذم، تاریکی مدح اولونور. حرامه، محظور و محرم دخی دتیر. مندوبک فاعلی مدح اولونور سه ده تاریکی ذم اولونماز. مکروهده امر بر عسکدر. یعنی کراحت تنزیه ایله مکروه اولان فملاک تاریکی مدح اولونور، لکن فاعلی ذم اولونماز. مباحک نه فعلنده، نه ده ترکنده مدح و ذم جاری اولماز. مباحه، حلال و جائز دخی دتیر (کذا فی ارشاد الفحول).

شو ذکر اولونان احکام خمسة نك احکام تکلیفیه دن عد اولونمسی، مسامحه یه مستند و تغلیب طریقیه در. فی الحقیقه و جوب ایله حرمت احکام تکلیفیه دن ایسه ده اباحه حکم تکلیفی دکدر. زیرا اباحه ده تکلیف یوقدر. تکلیف، کلفت و مشقتلی برایشی الزامدر. اباحه ایسه تخیردر، الزام دکدر. حتی جمهور اصولیونه کوره ندب و کراحت دخی احکام تکلیفیه دن معدود دکدر. زیرا بونلرده الزام یوقدر. و اتعا ندب ایله کراحتده طلب و ارایسه ده اشبو طلب، جازم و قطعی اولمدیغندن معنای الزامی متضمن دکدر. بناءً علیه حقیقته اباحه ایله ندب و کراحتده مکلفیت شرعیه یوقدر. بوجهته مباح، مندوب و مکروه تکلیف شرعیه دن خار. جدرلر [ارشاد الفحول، فصول البدایع].

اباحه شرعیه، اباحه اصلیه

اشیاده اصل اولان اباحه در

اباحه ایکی نوعدر: اباحه شرعیه، اباحه اصلیه. . اباحه شرعیه، خطاب شارع ایله ثابت اولان اباحه در که تخیر معاسنه در. اباحه اصلیه، شرعک ورودندن اول ثابت اولان اباحه در. بو اباحه، عدم مؤاخذه معاسنه در. قبل الشرع اشیاده اصل اولان اباحه میدر، حرمتیدر؟ بو مسئله ده علما اختلاف ایتملدر. جمهوره کوره اشیاده اصل اولان اباحه در. بعضلری حرمت

و ممنوعیتک اصلتہ قائل اولمش ، بعضری دہ توقف ایتشدرد . بواختلاف ، فخرالاولان اسلام بزودینک دبدیکی کبی شریعت اسلامیهنک ورودندن اولکی زمان فترت و جاہلیتہ ٹاندر .

لکن شرع شریفک ورودندن سوکرہ آرتق اشیاہ اصل اولان اباحہدر ، قضیہ فقہیہ سندہ فقہا اتفاق ایتشلردرد . اصول بزودی شرحی (کشف الاسرار) دہ و (تخریر) شرحی (تقریر) دہ امام صدالاسلام ابوالیسر بزودی یہ عطفاً بومستله حقنہ اجماع منعقد اولدینی بیان ایدیلیور . بواباحہ ، آرتق آنفاً بیان اولونان اباحہ اصلیه نوعندن دکل ، بلکه اباحہ شرعیہ نوعندندر . چونکہ (خُلِقَ لَكُمْ مَا فِي الْأَرْضِ جَمِيعاً) خطاب عامی ایله ثابتدر . بو آیت کریمہ ، نصوص مخصوصہ معینہ ایله صراحۃً و یا دلالةً حرمتی ثابت اولان ممنوعات شرعیہ دن ماعدا کافہ اشیاک شرعاً مباح اولدینقی صراحۃً افادہ ایدیور .

[قُلْ مَنْ حَرَّمَ زِينَةَ اللَّهِ الَّتِي أَخْرَجَ لِعِبَادِهِ وَالطَّيِّبَاتِ مِنَ الرِّزْقِ] و [قُلْ لَأَجِدُ فِيمَا أُوحِيَ إِلَيَّ مُحَرَّمًا عَلَى طَاعِمٍ يَطْعَمُهُ إِلَّا أَنْ يَكُونَ مَيْتَةً] کبی آیات قرآنیہ و صحیح بخاری و مسلمندہ موجود اولان [إِنَّ أَعْظَمَ الْمُسْلِمِينَ فِي الْمُسْلِمِينَ جُرْمًا مَنْ سَأَلَ عَنْ شَيْءٍ لَمْ يَحْرِمِ فَحَرَّمَ عَلَى النَّاسِ مِنْ أَجْلِ مَسْئَلَتِهِ] حدیث شریفی ایله امام ترمذی و ابن ماجہنک تخریج ایلدکری [الْحَلَالُ مَا أَحَلَّهُ اللَّهُ فِي كِتَابِهِ وَالْحَرَامُ مَا حَرَّمَهُ اللَّهُ فِي كِتَابِهِ وَمَا سَكَتَ عَنْهُ فَهُوَ مِمَّا عَفَا عَنْهُ] حدیث منینی کبی احادیث نبویہ دخی بونی مؤیددر .

ایشته شو آیات جلیله و احادیث نبویہ دن آکلاشیلورکه عقلاً اولدینی کبی شرعاً اشیاہ اصل اولان اباحہدر . حرمت ، طاری اولوب نبوتی دلیل مخصوص و معینہ متوقفدر . ائمه مالکیہ دن (موافقات) صاحبی امام شاطبی کبی بعض علما ، اشبو اباحہ اصلیه « مرتبہ عفو » اطلاق ایدیور و ذکر اولونان

احکام خمسه دن خارج بر قسم مخصوص عد ايله يور . بومسئله ، شریعتده مسکوت اولان مسائلک حکم شرعیلری اولوب اولمدینی مسئله سیدرکه آشاغیده آریجه ایضاح اولونه جقدر .

حرام لعینه ، حرام لغیره

حرام ایکی نوعدر : حرام لعینه ، حرام لغیره . حرام لعینه ، عینی وذاتی حرام اولان شیر . لاشه ، قان کبی . حرام لغیره ، ذاتی حرام اولیوب حرمتی ماهیتدن خارج باشقه برشیدن نشأت ایدن شیر . غیرک مالنی اکل ایتمک کبی . برنجیسنده منشأ حرمت ، اول شیئک ذاتی و ماهیتدر . مثلاً لاشه نیک منشأ حرمتی ، کندی ماهیتدر . ایکنجیسنده منشأ حرمت ، کندی ماهیتدن خارج باشقه بر شیر . مثلاً باشقه سنک اکنکنی بلا اذن اکل ایتمک حرامدر . لکن بونک حرام اولسی ، اکمکک ماهیتدن متولد دکلدر . باشقه سنک مالی اولماسندن و بناءً علیه غیرک حق تعلق ایتمسندن دولایبدر . اکمکک کندیسی ایسه ماهیته نظراً حرام دکلدر . بونک ایچون صاحبه حلالدر . حالبوکه برنجی نوع حرام یعنی حرام لعینه ، صاحبده حرامدر . هیچ برکیمسه ایچون حلال اولماز . مکرکه ضرورت تحقق ایده . مواقع ضرورت قواعد عمومیه دن مستنادر .

یوقاریده تعریف و ایضاح اولوندینی وجهله حکم شرعی ، افعال مکلفینه متعلق خطاب شارعک اثری اولدینی ایچون حل و حرمت کبی احکام شرعیه ، افعاله تعلق ایدر . اعیانه تعلق ایتمز . بوجهتله احکام شرعیه افعالک صفتدر ، اعیانک صفتی دکلدر . بونک ایچوندرکه شوفعل واجبدر ، بوفعل حرامدر ، اوفعلده مباحدر دیر . شوخالده لاشه ، قان کبی شیرده دخی حرمت ، آنلردن مقصود اولان فعله نسبت اولونمق و لاشه نی ییمک حرامدر ، قانی ایچمک حرامدر دیمک لازم کلبرکبی کورونور . حالبوکه اکثریا حرمت کندیلبینه نسبت اولونورده لاشه حرامدر ،

قان حرامدر دئیر . نته کیم (حرمت علیکم المیتة) و (حرمت علیکم امها تکم)
کبی بر چوق نصوص شرعیده دخی حل و حرمت ، اشیاک عنبرینه نسبت
اولونمشدر .

بونک سببی شودر که شارع ، بعض شیلری کندیلرندن مقصود اولان افعاله
محل اولمقدن چیقارمش ، آنلری اوافعالی قبوله غیر صالح قیلمشدر . آرتق اوکبی
شیلر کندیلرندن مقصود اولان افعاله قابلیت و صلاحیتی قالممشدر . مثلاً لاشه ،
ماده و انبیا اکلہ صالح اولدینی کبی شرعاً صالح دکلدرد . شراب [شرب]
ماده شربه صالح ایسهده شرعاً صالح دکلدرد . شرع شریف ، آنک بو صلاحیتی
آنی فعل شربه محل اولمقدن چیقارمشدر . او آرتق نظر شریعتده یوق اولمشدر .
ماده موجود اولسهده شرعاً یوق دیمکدر . برفمالک محلی موجود اولینیجه اوفعلده
موجود اوله میه جفتدن بالضروره بوکبی شیلردن مقصود اولان افعال دخی نظر
شارعده غیر موجود دیمک اولور .

دیمک که بوکبی شیلردن مقصود اولان افعالك حرمت و ممنوعیتده محل فعل
اصل ، فعل آکا تابعدر . اول محل فعل یوق ایدلمش یعنی منع اولونمش ، صوکره
اوکا تبعاً آندن مقصود اولان فعلده منع ایدلمشدر . بو ، طبقی صوبی یره دوکمک
صورتیه دیکرینی اونی ایچمکدن منع ایتکه بکزر . بوراده دوغریدن دوغری به
منع ایدیلن صودر ، اونی ایچمک ایستهین کیسه دکلدرد . فقط صو یره دوکولمکه
آرتق اونی ایچمک ایستهین شخصده ایچمکدن منع ایدلمش اولور .

ایسته بوسورتله ممنوع و حرام اولان شیلره حرام لعینه اطلاق اولونور .
بونکته به اشارت ایچونده حرمت ، کندیلرینه نسبت ایدیلیر . بناء علیه لاشه
حرامدر ، شراب حرامدر دئیر .

حرام لغیره به کلنجه : بونده حرمت ، دوغریدن دوغری به فعله نسبت اولونور .
محل فعل ، اول فعلی قبوله صالحدر . شارع آنی فعله محل اولمقدن چیقارمامشدر .
باشقه سنک اکمکنی اکل ایتک کبی که بومثاله ، دخی فعل اکل حرامدر . بونکله

برابر محل اکل اولان اكمك ، شرعاً فعل اكلی قبوله صالحدر . چونكه بوراده فعل اكلك حرمتی ، اكمكك ذاتندن وماهیتندن تولد ایتمه مشدر . بلکه باشقه سنك ملكی اولسندن نشأت ایتمشدر . بونك ایچوندرکه صاحبك اذن و رضاسی لاحق اولور ایسه اكلی حلال اولور . بوکئی شیرك منع و تحریمی ده ، صو ایچمك ایسته یین کیمسه بی ، اوکنه حائل اوله رق ایچمکدن منع ایتمک . بکنزر . بوراده صو دورویور ، دوکوله مشدر . اول کیمسه مك او صویی ایچه مه مسی ، صویك یاننه تقریدن منع ایدلمش اولسندندر .

بوندن آکلاشیلیرکه حرام لغیره ده محل فعل ، حرمت و ممنوعیتده اصل دکدر . بالعکس او منع اولونماش و فعله محل اولمقدن چیقالمشدر . اونك فعله اولان قابلیت و صلاحیتی شرعاً موجود و باقیدر . منع اولونان یالکنز فعلدر . بوده باشقه بر سبب خارجین نشأت ایتمشدر .

الحاصل شارع ، حرام لعینه ده فعلك محل و متعلق اولان شیئی ، یره صویی دوکمک قیاندن اوله رق فعله محل اولمقدن چیقارمش و بو صورتله اونی ساحه شریعتده معدوم قیلمشدر . بونك نتیجه سی اولمق اوزره فعلده ممنوع اولمشدر . حرام لغیره ده ایسه دوغریدن دوغری یه فعلی منع ایتمشدر . اول فعله محل اولان شیئی منع ایتماش و آنی بوق حکمنده قیلمامشدر . اوینه شرعاً موجوددر .

شو حالده حرام لغیره ده حرمت ، فعلك محل و متعلق اولان شیئه نسبت اولونهرق « نلانیك شوا کمکی حرامدر » دنیه جك اولسه ذکر محل و اراده حال قیلندن مجاز اولور . یعنی بطریق المجاز « اكمك » ذکر ایدیلوب آندن مقصود اولان « یمك » فعلی مراد ایدلمش اولور . اوجالده « اكمکی حرامدر ، دیمك ، « اكمکی یمك حرامدر ، دیمك اولور . لکن حرام لعینه ده مثلا « لاشه حرامدر ، دنیلدکده او وجهله مجاز اولماز .

واقعا بر جوق علمای اصول ، بونكده بوجه مشروح مجاز اولدیغنه قائل اولمشلردر . فقط فعخرالاسلام یزدوی ، شمس الأئمة السرخسی و صاحب میزان علاء الدین سمرقندی کئی ائمه اصول ، بو فکری ردایله حقیقت اولدیغنه ذاهب اولویورلر .

محقق شهر صدر الشریعه نك (توضیح) نامیه معروف اولان کتابنده تحقیقنه
کوره بونلرک ایکیسندهده یعنی «شواکمک حرامدر» سوزیه «لاشه حرامدر»
سوزندهده مجاز وارددر. لکن شو فرق ایله که برنجیسنده مجاز، مسند الیهده یعنی
(اکمک) کلهسندهدر. ایکنجیسنده ایسه مجاز، مسندهده یعنی (حرام) افظندهدر.
برنجیسنک معناسی «شواکمکی بیک حرامدر» دیمکدر. ایکنجیسنک معناسی ده
«لاشه، منشأ حرمتدر» دیمکدر. [کذا فی اصول الپزدوی والتوضیح والتاویح]
بو بحث، حد ذاتنده بک مهم وبک دقیق بر بحث اولقله برابر بر چوق
یرلرده، از جمله نسخ مسائلهده بیلمسی لازم کان بر بحثدر. (حسن وقبح)
بحثندهده شدت تعلق وارتباطی وارددر. بحث مذکورده ونهی بحثندهده ده-ا زیاده
توضیح و تنویر ایدیه جکدر.

- اصول فقہک غایہ سی -

علم اصول فقہک مقصد و غایہ سی ، احکام شرعیہ نک ادلہ مخصوصہ سندن نہ صورتہ استنباط ایدیلہ جگنی بیلدیرمکدر احکام شرعیہ نک حقیقتلرینہ بوتون شرائطیلہ کسب و قوف ایدہ بیلیمک ، آنجق بو علم سایہ سنده میسر اولور . علم اصولک وضع ایتدیکی قاعدہ لری بیلیمین برذات ، تفسیر و حدیث بیلیمکله حقایق شرعیہ نک مزایاسنی ادراک ایدہ من . آیات قرآنیہ و احادیث نبویہ نک تضمن ایتدیکی احکامی حقیلہ آکلامق ایچون علوم لسانیہ نی بیلیمک کافی دکدر ، بو علمده صاحب اختصاص اولق لابدر .

مجتهدلر اجتهادلرندہ ، فقہلر تخریج احکامده بو علمک قاعدہ لرندن ، اساسلرندن استعانه ایدرلر . بو علمه اتسابی اولیانلرک قرآن ایله حدیثدن استخراج احکام خصوصندہ فاحش خطالره دوشمکده اولدقلری هر وقت کورلمکده در . مجتهدلر طرفندن نہ صورتہ استنباط احکام ایدلمش اولدینی ، هانکیسنگ رأی و اجتهادی دیکرلرینککنه راجح بولوندینی ده آنجق بو علم ایله بیلینه بیلیر .

کتاب فقہیہ ده مندرج احکامی و فقہانک تعلیلات فقہیہ سنی حقیلہ آکلامق صاحب شریعتک وضع ایتدیکی اصل احکام شرعیہ ایله فقہانک استخراج ایلدیکی احکام فقہیہ نی تفریق و تمیز ایتک ایچونده بو علمه احتیاج شدید واردر . شارعک مقاصدی و حکمت تشریحیہ سی ده بو علم معرفیلہ ادراک اولونور .

زمانمزدہ علم حقوقده و بتخصیص حقوق اسلامیہ ده اختصاص تام صاحبی اولق ایسته ینلر ایچونده ، بو علمی اطرافیلہ تحصیل ایتک شرطدر . بو علمک قواعد و اساسانی بیلیمین برذات ، یالکز احکام فقہیہ نی تحصیل ایتکله حقوق اسلامیہ ده اختصاص تام صاحبی اوله ماز .

— لاحقہ —

برفعل اوزرینہ ترتب ایدن حکمت ومصاحت ، درت درلو تسمیہ اولونور :
غایہ ، فائدہ ، غرض ، علت غائیہ .. بودرت شی بالذات متحد اولدقلری حالده
بالاعتبار مختلفدرلر . شویله که :

برفعل اوزرینہ ترتب ایدن حکمت ومصاحت ، اوفعلک نہایتندہ واقع اولمق
اعتباریله غایہ ، فعلک نتیجہ وثمرسی اولمق اعتباریله فائدہ ، فاعل ایچون اوفعلدن
مطلوب بولونمق اعتباریله غرض ، فاعلی او فعل اوزرینہ ، قدامہ باعث اولمق
اعتباریله ده علت غائیہ تسمیہ اولونور . بوندن دولاییدرکه بونلر ذاتاً متحد ،
اعتباراً مختلفدرلر ...

— اصول فقہک قواعدی و علوم ساثرہ دن استعانه سی —

کتاب ، سنت ، اجماع و قیاسدن عبارت اولان ادله اربعہ یہ متعلق مسائل اصلیه ، علم اصول قواعدندن اولدینی کبی بودلیلر آره سنده تعارض وقوعده هانکیسنگ دیکرینه ترجیح ایدیله جکنه دائر اولان مسائل دخی بو علمک قواعد مهمه سندندر . استحسان ، استصحاب ، صلحت ، عرف و عادت ، سد ذرائع ، حکمت تشریح ، مقاصد شارع کبی فقہک و حقوق اسلامیه نک اک مهم واک مفید اساسلری دخی بو علمک مسائلی جمله سندندر . حسن و قبح ، اراده بشریه ، حکمت التمیہ کبی علم کلامه عائد مباحث اصلیه ده علم اصولک دائره مباحثی داخنده در . وجوب و حرمت ، صحت و فساد ، رکنیت و علیت کبی احکامه ؛ ذمت ، اهلیت و عوارض اهلیت کبی مکلفینه متعلق مسائل فقہیه ایسه علم اصولک احکام بختنی تشکیل ایدر .

بونلردن باشقه ، خاص ، عام ، مشترک ، مؤول ، امر ، نہی ، ظاہر ، نص ، مفسر ، محکم ، خفی ، مشکل ، مجمل ، متشابہ ، حقیقت ، مجاز ، صریح ، کنایہ کبی الفاظک اقسام و احکامنه ؛ عبارہ ، اشارہ ، دلالت ، اقتضا کبی دلالت انواعنه ؛ بیان تفسیر ، بیان تقریر ، بیان تغییر ، بیان ضرورت کبی اقسام بیانہ ؛ مفهوم موافق و مفهوم مخالف کبی انواع مفهومه متدائر مباحث لفظیه و قواعد لسانیہ دخی علم اصول فقہک قواعد مخصوصه سندندر .

افادات مسروده دن آکلاشیلیورکه علم اصول فقہ ، قسماً حقوق اسلامیه نک اصول و حکمت تشریحیه سی ، قسماً آده هر لسانه شامل و تطبیقی قابل قواعد اساسیہ لسانیہ تی تدقیق ایدر . تدقیقات واقعہ سنده لغات عربیه و قواعد لسانیہ دن ؛ منطق ، کلام و فقہ علملرندن استعانه ایلر .

قواعد اصولیه و اساسات فقهیه نك صورت استخراجی

علم اصول فقه ، خاص و عام ، امر و نهی ، حقیقت و مجاز ، دلالت و بیان ، منطوق و مفهوم کبی الفاظ و عباراته راجع قاعده لری لغات عربیه و قواعد لسانیه بی تدقیق و تتبع ایده رك تخریج ابتدیی کبی مقاصد شارعیه ، حکمت تشریحیه ، استحسان و مصلحت ، عرف و عادت کبی اساسات فقهیه به متعلق قواعد اصلیه بی دخی ، بالجمله نصوص شرعیه بی و موارد احکامی برر برر تتبع و استقرا ایله استخراج ایدر .

اجماع ، قیاس ، استحسان ، استصحاب ، استدلال مرسل یعنی مصلحت مرسله مثللو اساسات شرعیه بوجه معروض استقرا طریقله تخریج و تأسیس اولونمشدر . كذلك ،

« برایشدن مقصد نه ایسه حکم آکا کوره در » ،

« مشقت تیسیری جلب ایدر » ،

« ضرر ازاله اولونور » ،

« ضرورتلر ممنوع اولان شیرلی مباح قیلار » ،

« عادت محکمدر » ،

کبی قواعد اصلیه فقهیه دخی هپ بصورتله استخراج ایدلشددر . واقعا بوقیل کلیات فقهیه نك بمضاری دوغریدن دوغری به یالکز بر دلیل معیندن مأخوذدر ، لکن اکثریسی بوجه مشروح استقرا محصولیدر .

اعاظم اصولیون مالکیه دن امام شاطبی نك (الموافقات) نامنده کی کتاب مستطابنده دیدیکی کبی بویه استقرا طریقله ثابت اولان قواعد اصولیه ، معین بر دلیل شرعیدن مأخوذ قاعده لردن دها قطعیدر . چونکه یکدیگری تأیید ایدن بدلائلک هیئت مجموعه سنك معنای مقصوده دلالتی ، معین بر دلیلک علی الانفراد

دلالتندن دها قوتلیدر . بر دلیل معینک شارعدن ثبوتی ، متواتر اولمق حسیله
قطعی اولسه بیله معنای مطلوبه دلالتی ظنی و بناءً علیه شبهه و مناقشه‌بی داعی
اوله بیلیر .

حالبوکه بر چوق دلیلک مقصد واحده دلالتلرنده یکدیگری تأیید ایتلمی
آرتق شبهه و تردده محل بر امتاز ، تأویل و تخصیص احتماللرینی قطع ایدر و هر نوع
باب مناقشه‌بی سد ایلر . نصل که اینجه بر اییک مقاومتی آز و فقط متعدد اینجه
ایلدن متشکل قالین اییک مقاومتی جوق اولور . ایلرک عددی نه قدر چو غایر سه
مجموعنک مقاومتی ده او نسبتده آرتار ، بر درجه‌یه کلیر که آرتق اونی قوپارمق
امکان خارجه چیقار . مادیاتده بویله اولدینی کی معنویات و معقولاتده دخی بویله دره .
بوکا بناءً در که تواتر بینه‌سی ، بینه عادیه دن یعنی شهادتدن اقوادره . بینه عادیه ظنیدر ،
ظن افاده ایدر . حالبوکه ینه او بینه عادیه لردن ترکب ایدن تواتر قطعیدر ، علم
یقین افاده ایلر .

مثلاً : (لا حرج فی الدین) = (دینده حرج یوقدر) ، تعیردیکرله (مشقت
تیسیری جلب ایدر) قاعده اصلیه‌سی ، یالکز [ماجعل علیکم فی الدین من حرج] آیت
جایله سندن استخراج اولونمشدر دنیله جک اولسه قطعیتده تردد حاصل اوله بیلیر .
کرچه بونص جلیل ، قرآن اولدینی ایچون ثبوتی قطعی اولمقله برابر قاعده مذکوریه
دلالتی ده ظاهر در . فقط هر خصوصه شامل اوله جق وجهله عمومیتده نظر
و مناقشه‌یه احتمالی ده یوق دکدر .

بوجهته فقها ، قاعده مذکورنک تخریج و تأسیسنده یالکز آیت مشارالیه‌یه
استناد ایله اکتفا ایتمه مشلدر . آنکله برابر [یُرید الله بِکُم الیُسْرَ و لایرید
بِکُم العُسْرَ] قول کریمی و (انّ الدین یُسْر) و (خیر دینکم الیسره) و (بُعِثْتُ
بِالْحَنِيفَةِ السَّمِيَّةِ) حدیث شریفلری کی بویابده وارد اولان نه قدر نصوص
شرعیه وار ایسه جمله‌سنی و شارعک جمیع ابواب شریعتده وضع ایتدیکی اساسلری

تدقیق و تتبع ایتشملر ؛ نتیجه تبعلرنده شارعك — كرك عباداتده اولسون وكرك معاملاتده اولسون — دائما تسهیل و تخفیف جهتی ، مكلفین اوزرندن حرج و مشقتك ممكن اولدینی قدر رفع و تبعیدینی التزام ایتدیكنی كورمشلر ؛ بونك اوزرینه آرتق قاعده مبحوث عنهانك صحت شرعیهنده ترده محل اولدیغنه قناعت حاصل ایدرك آنی فقهك ثابت و قطعی براساسی اولق اوزره وضع ایله مشلردر . دیگر قواعد اساسیهده بووجهله استخراج اولومشدر . كذلك صلات و زكاتك فرضیتلری كبی ضروریات دینهدن اولان احكام قطعی شرعییه دنخی وجه مشروح اوزره بطریق الاستقرا ثابت و بناء علیه حقلرنده عام قطعی حاصل اولمشدر . حتی بونك ایچوندرکه بوکبی ضروریات دینه و احكام قطعییه حقلده اجماع عام منعقددر .

الحاصل نصوص شرعیهنك آحاد و افرادنده هرزوع شك و شبهه نی ، بالجمله احتمالانی رفع و ازاله ایده جك درجده قطعیته بولونه ماز ، بولونه ده پك نادردر . زیرا نصوص شرعیهنك افرادی خبر واحد ایسه ، بحث مخصوصنده توضیح اولونه دنخی اوزره خبر واحد دلیل ظنیدر ، قطعیته افاده ایتمز . متواتر ایسه بونك ذكر اولونان قطعیته افاده ایتمی ، محتوی اولدینی الفاظده اشتراك و یا مجاز بولونماسی ، نقل شرعی و یا عرفینك وجود و یا عدمی ، تخصیص و یا تعینك فقدانی ، ناسخك و یا تقدیم و تأخیرك و یا خود بر معارض عقلینك عدم و جودی كبی برطاقم مقدماته متوقف و مبتنیدر . مقدمات مذکورهنك جمله سی و یا اکثریسی ایسه ظنیدر . بر امر ظنی اوزرینه مبتنی اولان شینكده دائره ظنی تجاوز ایدمه چکی دركادر .

فقهك اساسلرینی تشکیل ایده جك اولان قواعد اصولیهنك هر درلو شائبه دن مصون و قطعی اولسی ، لازمه دن بولوندیغی جهتله قواعد مذکورهنك تخریج و تثبیتده معتبر اولان دلیل ، دلیل استقرائیدر . یعنی بالاستقرا ثابت اولان عموم ادله و قرائن شرعیهنك هیئت مجموعه سیدر . ادله مذکورهنك افرادی ، ظنی اولسنده بأس یوقدر . چونکه بونلرك معنای مقصوده دلالتده مشارك و هر برینك بو خصوصده دیگرینی مؤید بولونملری ، آنلردن تشکیل ایدن (كل) ده و هیئت

مجموعه ده اويله بر قوت و قطبيت حصوله كتيبر كه آرتق هر نوع شك و شبهه مندفع ، هر درلو احتمال مرتفع اولور . زيرا بوقاریده بيان اولونان (ايب) مشالندن ده منفهم اولديني وجهله افتراق وانفرادده موجود اوليان قوت ، اشتراك واجتماعده حصول بولور . تعبير ديكرله فردلرك حائر اولمديني قوتی ، كللر و مجموعلر حائر اولور .

بوندن دولاييدر كه تواتر ، قطع و يقين افاده ايدر . بوده اونك يعنى تواتر ك بر نوع ديكريدر ، تواتر معنوی قيباندندر . شو حالده بر مسئله اصوليه به متدائر ادله و امارات موجوده يي استقرارن ، علم قطعي يي مفيد بر مجموع تحصيل ايدرايسه او مسئله نك مطلوب اولان دليلني ، ايسته او مجموع تشكيل ايدر . حضرت امام علي نك شجاعتي ، حاتم طائي نك جود و سخاسي حقنده نقل و روايت اولونان وقايع و حادثاتك هيئت مجموعه سي كبي كه اولبابده علم قطعي يي مفيد ادله نقليه دن و تواتر معنوی نوغندندر .

شو مناسبته مختصراً عرض ايديم كه تواتر ، تواتر لفظي و تواتر معنوی ناملريله ايكي به آيريلير . تواتر لفظي ، كذب اوزرينه اتفاقلري عادة ممتنع اولان بر جم غفيرك يعنى جماعت كتيبره نك خبريدر . تواتر معنوی ، بر جوق راويلرك مختلف و فقط بينلرنده مشترك بر معانده متفق قضيه و حادثه لري نقل ايتميدر . بهض راويلرك سالف الذكر حاتم طائيدن مثلاً بر كيمسه به يوز آتون ويرديكني ، بعضلرينك برذاته برآت اعطا ايتديكني ، باشقه لرينك ده بر شخصه يوز قويون احسان ايلديكني ، ديكر لرينك دنخي اشخاص سائر به ديكر شيلري هديه ايتديكني نقل و روايت ايله لري كبي . شو مختلف حادثه لرك هر بری احتمال كه بر ويا بر قاچ راوی طرفندن نقل اولنور و بوجهتله هيچ برنده تواتر بولونماز . لکن بونلرك جمه سي بر معنای كلیده - مثالزده كيفيت اعطا واحسانده - متشارك و متفق اولدقلرندن او معنای كلیده تواتر وار ديمك اولور . او معنای كاي به (قدر مشترك) اطلاق اولور . ايسته بو قدر مشترك - كه مثال مذكوره كيفيت اعطادر - مومي اليه حاتمك مشهور اولان جود و كرمه بر دليل قطعي تشكيل ايدر و آرتق قطع و يقيني مفيد اولور .

ایشته کرک علم کلامده و کر علم اصولده مابه الاحتجاج اولان دلائل اکثریسی بوقیلنددر . یعنی ادله شرعیه نك هیئت مجموعه سیدر ، تعیر دیگرله آنلرک اشتراک و اتفاق ایتدکری قدر مشترکدر .

شوراسنی ده علاوه ایدیم که برقاعده اصولیه نك تثبیتده معین بر دلیل شرعی نك بخصوصه آکا صراحة دلالت و شهادت ایتیمی شرط دکدر . ادله و امارات شرعیه نك هیئت مجموعه سندن مستفاد اولسی کافیدر . مثلاً فقها « شریعت ، ضرو ریات خمس اطلاق اولونان دین ، نفس ، نسل ، مال و عقلک محافظه سی ایچون وضع اولونمشدر ، دییور . بوبابده عامه فقهای اسلام متفقدر و بوکا علمک لحوقی ، عندالامة قطعی و ضروریدر . حالبوکه بومسئله ، بر دلیل معینک صورت خصوصیه و صریحه شهادتیه ثابت دکدر . بو قضیه اصولیه نك شریعتیه و مقصد شارعه موافقی ، اویله بر دلیل معینک صراحتیه دکل ، بلکه بطریق الاستقرا مجموع ادله شرعیه نك دلالتیه ثابتدر . بر نص معین و خصوصیه صراحة مذکور دکلسده شرع شریفک روخنده مندمجدر . اگر بومسئله حقنده بر نص مخصوص بولونسیدی علمانک آنی نقل ایتیمی و اهل اجماعک آکا مراجعت ایلسی واجب اولوردی . حالبوکه بوخصوصده اویله بر نص شرعی نقل ایدلیور .

امام شاطبی ، مطالعات سابقه یی سردویبان ایتدکن صوکره نتیجه اوله رق شوه :
[مهرانکی برقاعده اصلیه که اوکا بر نص معین شهادت ایتمه مکله برابر شارعک تصرفاته ملایم و معناسی آنک دلیل و اساسلرندن مأخوذ اولور ایسه اوقاعده اصلیه ، صحیح و فقهه مرجع اولور]

اسانی وضع ایدیور و «زیرا قاعده مذکوره مستد اولدینی دلائل و اساسات شرعیه نك هیئت مجموعه سندن مستبان اولدینی ایچون قطعی اولور . چونکه بو دلائلن برینک علی الافراد اوقاعده یه صورت قطعیه ده دلالت ایتیمی لازم دکدر ، هیئت مجموعه نك دلالتی کافیدر . ایشه (استدلال مرسل) یعنی مصلحت مرسله ایله عمل و (استحسان) قاعده لری ، ذکر اولونان اساس اوزرینه مبتیدر ، دییور

بو بحث اصوليونك قواعد اصوليه يي ، فقهانك اساسات فقهيه يي نه صورتله استخراج ايتدكلريني كوسترر غايت مهم بر بچدر . مشاراليه شاطينك (موافقات) نده بو بچنه دائر دها زياده تفصيلات واردر . آرزو ايدنلر وسوزمزه اعتماد ايتمزلر اورايه مراجعت ايتسونلر . . .

خاتمه

بچنه ختام ويرمزدن اول شو جهتي ده بيان ايديم كه علم اصول ، براهين عقليه دن دخي استعانه ايدر . لکن زيرده (حسن و قبح) بچنده تفصيل اولونه جنی اوزره عقل ، عدل واحسان ، ظلم وعدوان کبی بعض افعالک حسن و قبحنی ادراکده وبرقسم علمای حنفیه عنندنه معرفت الهیهنک وجوبنده مستقل بر دایل کافی ايسده احکام شرعیهنک ديگر افعاله تعلقنی اثباتده علی العموم علمای اهل سنه کوره مستقل وكافی بر دایل دکادر .

اصول فقه مسائلنده دلائل عقليه ، ادله شرعیه به مظاهرت و آنلرک مناطنی یعنی علل واسبابنی تحقيق وتبين ایچون ایراد اولونور . یوقسه رأساً ومستقلاً بر قاعده اصلیه وبر مسئله فقهیهنک تخریج واثباتی ایچون ایراد واستعمال اولونماز . چونکه اصول فقهده موضوع بحث اولان امور شرعیه در . عقل ايسه شارع دکادر . بناء علیه علم اصولده عمده ، ادله شرعیه در . . .

فصل ثالث

بعض مباحث مهمه و اساسات متقدمه

دين و شريعت - فرق اسلاميه - مسالك فقيه - حسن قبح -
حکمت تشريع و مقاصد شارع - قبل الشرع احکامك افعله عدم
تعلق - تکليف مالا يطاق - قدرت - افعله اصل اولان عدم تکليف در

دين و شريعت

شرع منزل، شرع مؤول و شرع مبدل - شريعتده نيابت جاري
اولاز - خلافت - اجتهاد و تقليد - بر مدهيدن ديكرينه انتقال

زمانزده بر حادثه حقوقيه حقهده كتب فقيهيه حقيهده موجود هر هانكي
بر مسئله اجتهاديهيه منافي بر مطالعه درميان ايديله جك اولسه و يا دولتجه بر ماده
قانونيه تنظيمنه تشبث ايديله ، ولو كه او مطالعه و بوتشبت سائر مذاهب فقيهيهيه
موافق اولسون ، حقايق شرعيه دن غافل بعض ذوات طرفندن در حال (شرعاً
جائز دكلدر) حكمي ويري ليور .

هيچ دوشونليور كه شريعت باشقه ، فقهانك راي و اجتهادندن متول مسائل
فقيهيه ينه باشقه در . و مذهب حنفي ايله سائر مذاهب فقيهيه ييننده شرع شريفه
نظراً هيچ بر فرق يوقدر . بو حال ياللكز مذهب حنفي سالكارينه مخصوص
و منحصر دكلدر ، ديكر مذاهب فقيهيه منتسبلري دخی بو خصوصده آنرله همحالدر .
مسئله نك زمانزده يك بويوك اهميت و تزاكتي بولونديغندن هر شيدن اول

بویا کلهش ذهانی تصحیح و حقیقت شریعتی توضیح اتمک اقتضا ای دیور. بونک ایچون بویا بونجی مباحث سائره به تقدیم ایلدک. افادات واقعه، مطالعات عندی به حمل ایلدک ایچون هر بونجه اولدینی کبی بوراده ده اک معتبر مأخذلر ارانه واعظم علمانک اقول معتبره سینه استشهد اوونجه قدر.

دین و شریعت

(دین) فی الاصل جزا و طاعت، آیین و عبادت کی مختلف معناله کلیر. معنای لغوی و عرفیسی اعتباریله حقه ده، باطله ده اطلاق اولونور و بناءً علیه دین حق، دین باطل دنیر. لسان شرعه ایسه دین، طرف الهیدن وضع اولونان طریقت مخصوصه معناسنه نقل ایلدش، آرتق بومعناده حقیقت شرعیه اولمشدر. علمای اصول، دینی (اصحاب عقولی حسن اختیارلری ایله کندلری ایچون بالذات خیره سوق ایدن وضع آله بدر) دیه تعریف ای دیورلر. [وضع آلهی سائق لذوی العقول باخیارهم المحمود الی الخیر بالذات]. اصول یزدوی شرحی کشفده وتلویح تفتازانی ده بویله جه مذکوردر.

بوتعریفه کوره دین، اصول و فروعه یعنی احکام اعتقادیه و عملیه به شاملدر. احکام اعتقادیه به احکام اصلیه و یا ساده جه اصول، احکام عملیه به یعنی عبادات و معاملات کبی کیفیت عملیه تعاق ایدن احکامه ده احکام فرعیه و یا یالکنز فروع اطلاق اولونور. ایشته دین لفظی، عندالاطلاق بواحکامک جمله سنه شامل اولور. فقط بعضاً، بلکه ده اکثریا مجاز طریقیه یالکنز احکام اصلیه ده استعمال ای دیلیر. یالکنز احکام فرعیه به اطلاق اولوندی بی ده واردر. [کذا فی کلیات ابی البقا].

(شریعت)، لغتده انسانلرک و حیواناتک ایچمک ایچون ورود ایتدکری صو یوانه دنیر. شامراه مستقیم معناسنه کلیر. بویاکی معناده موجود وجه و مناسبته اصطلاح شرعه ده دین معناسنه نقل وتعیین اولونمشدر. سالف الذکر

(کشف زردوی) ایله (تلویح) ده بیان اولوندیغی وجهله اصولیون شریعتی (جناب حقك قوللری ایچون وضع و تشریح ابتدکی احکام دینه در) دیه تعریف ایدیورلر. (ماشرع الله لِعِبَادِهِ مِنَ الدِّينِ)

بو تعریفدن آ کلاشیلیور که شریعت ، دین دیمکدر . ایکیسی ده برشیدن عبارتدر . شریعت لفظی ده دین لفظی کبی احکام اصلیه و فرعییه شاملدر . لکن اکثریا یالکنز احکام فرعییه ده استعمال اولونور . « شرایع » دیه جمعه نیر . نته کیم ائمه اصولدن امام فخرالاسلام زردوی ، اصول کتابنک مقدمه سنده (العلم نوعان علم التوحید والصفات و علم الشرایع والاحکام) عباره سنده « شرایع » لفظی احکام فرعییه معناسنه استعمال ایله مشدر .

شوايضاحات کوستریور که دین و شریعت ، مفهوماً متغایر ایسه لرده ماهیه متحددر لرایکیسی ده بریفمبر واسطه سیله وضع اولونان قوانین آلهی دن عبارتدر . بوجهته اکثریا یکدیگری مقامنده استعمال اولنورلر . آرهلرنده که فرق ، یالکنز مفهوم ووجه تسمیه اعتباریله در . مفهوم لری بیان اولوندی . وجه تسمیه لرینه کئنجه : دینه « دین » دینمی ، کندیسیله جناب حقه طاعت و عبادت ، یاخود دین سییله جناب حق طرفدن مکافات و مجازات اولوندیغنددر . « شریعت » تسمیه سی ده کندیسندن اقتباس احکام اولونمق ، یاخود سلوک ایدیله جک صراط مستقیم اولمق مناسبیله در . واجب التسلیم اولمق اعتباریله ده « اسلام » تسمیه اولونمشدر . (انّ الدین عند الله الاسلام) .

شرع منزل ، شرع مؤول ، شرع مبدل

(شرع) ، فی الاصل اظهار و بیان معناسنه در . بالآخره شریعت وضع ایتمک معناسنه نقل اولونمشدر . مصدر اولدینی ایچون یرینه کوره بعضاً (شارع) ، بعضاده (مشروع) معناسنه استعمال اولونور . زیرا لسان عربیده مصدر لولک اسم فاعل

واسم مفعول معنارنده استعمالی جائز و شایعدر. « شرع شریف ، تعبیرنده اولدینی کبی شریعت مناسنده قوللانلدینی زمان ، « مشروع ، معناسی قصد ایدلمش دیمک اولور . شارع ، واضع شریعت دیمکدر حقیقتده شارع ، جناب حقدرد . انبیای عظام حضراتی ، احکام شرعییه تبلیغه مأمور اولدقلری ایچون آنلرده (شارع) اطلاق اولونور .

ائمه خبلیه دن وفحول محققیندن مشهور ابن تیمیه ، (الفرقان) نامنده که اکتابنده « برچوق ذوات ، شریعت لفظنی شرع منزل ایله حکم حاکی تفریق ایتمکسزین استعمال ایدیور . حالبوکه حاکم بعضاً مخطی و بعضاً مصیب اولور . « دیدکدن و بوبابده بعض ایضاحات و بردکدن سوکره (شرع) ی ، شرع منزل و شرع مؤول ، اوچنجی بر قسم اولوق اوزره برده شرع مبدل ناملریله اوچ نوعه تقسیم ایدیور . کتاب وسنت ایله ثابت اولان احکام احکام شرعییه (شرع منزل) ، رأی و اجتهاددن متولد اقوال فقهایه (شرع مؤول) تسمیه ایدیور و شرع منزله اتباع هر کس اوزرینه واجدرد . شرع مؤوله اتباع ایسه هیچ برکیمسه اوزرینه واجب دکلدر دیور .

برطاقم ایدرمه ، یالان حدیثلری شارع اسناد ایتمک ویا نصوص شرعییه فاسد و صرف عندی بر صورتده مراد شارع خلافه تأویل ایلمک کبی بر طریق باطل ایله حقایق شرعییه تعریفدن متحصل خرافاتهده (شرع مبدل) نامنی ویریور . آرتق بو اوچنجی قسمه نه مجاز ، نه ده ، تأویل طریقله شرع و شریعت اطلاق اصلاً صحیح اولیه جنی جای تردد دکلدر . اونک ایچوندر که مشارالیه بو اوچنجی قسمه شر مبدل تسمیه ایتمشدر .

شو ایضاحاتدن مستبان اوله جنی وجهله دین ، شریعت و شرع تعبیرلرینک مدلوللری احکام موضوعه در . ، شارع طرفدن وضع اولونان قوانین آلهیه در . بوده بالضروره آنجق شارعک کندی نصوصیله ثابت اولان احکامدن عبارتدر . شارعک نصوصی ایسه کتاب ایله سنندر . بونلرک بر اوچنجیسی یوقدر .

فقهانک رأی و اجتهادلریله حصوله کلن احکام فقهییه کلنجه : بونلر شارعک

وضع ایتدیکی احکام آلهیه دکلدرد. صرف مجتهدلرک کندی آکلایشنرندن عبارتدر. بوجهتله بونلره دین ، شریعت و شرع تعیرلرینک اطلاق صحیح اولماز . شو قدر وارکه ذکر اولونان احکام اجتهادیه ، شرعک وضع ایتدیکی اساسلره مستند اولدینی ایچون شریعتله ملحق ومنسوبدر. بواعتبارایله ونسبت صیغه سیله احکام مذکورده یه ده (احکام شرعیه) اطلاق اولونه بیلیر .

لکن بو اطلاقدن مسائل اجتهادیه نك حقیقه شریمت اولسی لازم کلز . شریعت باشقه ، شریعتله منسوب وملحق اولوق ینه باشقه در. بو جهتله مسائل اجتهادیه یه بطریق الحقیقه شریعت و شرع اطلاق اولونه ماز . مکرکه مجاز وتاویل صورتیله اطلاق ایدنش اولسون . نته کم آفاً بیان اولوندینی اوزره ابن تیمیه ، بونلره « شرع مؤول » اطلاق ایدیور .

بو مقامده « نصوص شرعیه » ایله « ادله شرعیه » تعیرلریخده بربرندن تفریق وتمیز ایتمک لازمدر. آره لرنده عموم و خصوص مطلق وارددر. نصوص شرعیه اخص ادله شرعیه اعمدر . اجماع ایله قیاس ادله شرعیه دندر، لکن نصوص شرعیه دن دکلدرد. اجماعک برسنده مستند اولسی لازمدر. اوسنده یانصدرد، یاخود رأیدرد. نص ایسه او حالده اجماع ایله ثابت اولان حکم ، نص شارع ایله ثابت دیمکدر . وعین شریعتدر. رأی ایسه قیاس ایله ثابت دیمک اولور شو حالده رأیه مستند اجماع ایله ثابت اولان حکم ، نص شارع ایله ثابت اولمادیغندن عین شریعت اولماز . شو قدر وارکه وقتیه منعقد اولان اجماعک نصه می ، رأیه می مستند اولدینی تفریق پک مشکل اوله جفتندن علما ، علی الاطلاق اجماع ایله ثابت اولان حکمی نص ایله ثابت حکم قوتنده طوتمشدر و بناء علیه اجماعه مخالفتی تجویز ایتمه مشلدردر . بحث مخصوصنده تفصیلات اعطا اولونه جقدر . بو مطالعه یه مبنی بزم یوقاریده « احکام فقهیه » و « مسائل اجتهادیه » دیدیکمز احکامده اجماع ایله ثابت اولان احکام داخل دکلدرد . احکام فقهیه ویا اجتهادیه ، فقهانک صرف قیاس و اجتهاد ذاتی سیله نبوت بولان احکامدرکه احکام اجماعیه یه شامل دکلدرد .

کرچه اکثریا « فقه » و « احکام فقهیه » تعیرلری ، بونلرک جمله سنه شامل

اوله رق اطلاق اولونور، لکن بو اطلاق لفته و ماهیتلرینه نظراً بطریق الحقیقه دکل، تغلیب طریقیله در. بونک ده سببی شودر که دور مجتهدیندن اعتباراً فقه، آرتق بر علم اولمش و کربک نص و یا اجماع و کربک رأی و قیاس ایله ثابت احکامک جمله سنه شامل بولونمشدر. بونک ایچون فقه-ا، آرتق احکام مذکورہ یی تفریق ایتیه رک و بالعکس جمله سنی بر خلیطه حالده مزج ایدہ رک کتب فقہیہ به درج و تحریر ایتشلردر. حتی اکثر کتب فقہیہ ده احکام فقہیہ دلائلندن تجربیدایدیلہ رک یازلمش اولدیغندن فقهده اختصاص تامی بولنمیانلرایچون اوکی کتابلرک مطالعه سنده احکام مذکورہ دن هانکیلرینک نص و یا اجماع ایله، هانکیلرینک رأی و قیاسه ثابت اولدقلرینی تفریق و تمیز قابل اوله ماز.

خلاصه؛ کتب فقہیہ ده محرر اولان احکام اوج نوعدر: احکام منصوصه، احکام اجماعیہ، احکام اجتہادیہ. احکام منصوصه، صراحتاً و یا دلالتاً نصوص شرعیہ ایله ثابت اولان احکامدر. احکام اجماعیہ، اجماع ایله ثابت اولان احکامدر. احکام اجتہادیہ، قیاس و اجتہاد ایله ثبوت بولان احکامدر. «فقه» تعیری، آنفاً بیان اولدینی و جهله لفته نظراً مجاز و تغلیب طریقیله، اصطلاحه نظراً حقیقت اصطلاحیہ اولق اوزره احکام مذکورہ نک جمله سنه شامل اولور.

ایشته اصل شریعت، احکام منصوصه دن عبارتدر. نصه مستند احکام اجماعیہ، احکام منصوصه جمله سندن و بناءً علیہ شریعتده داخلدر. رأیه مستند احکام اجماعیہ، حقیقت شریعتده داخل دکلسده آکا ملحق و حکمده او قوتده در.

احکام اجتہادیہ، احکام منصوصه یه قیاس ایله ثابت و آنلرک مبتنی بولندقلری اساسات شرعیہ یه مستند اولدیغندن شریعته منسوبدر. فقط حقیقتده شریعت دکلدر. مع هذا یوقاریده ده سویلدی کمز و جهله بونلرک جمله سنه مجاز و تاویل طریقیله و نسبت صیغه سیله «احکام شرعیہ» اطلاقی جائز اولور. مسئله، حقیله تنور ایتمش اولق ایچون ایضاحات آتییه لزوم کورلمشدر.

شریعت اسلامیه ده نیابت جاری اولماز

یوقاریده بیان ایتشدک که شارع و واضع شریعت ، حقیقته جناب حقدور . فقط جناب حق ، ادیان و شرایی پیغمبرلر واسطه لریله وضع و تشریح بیوردیغندن پیغمبران عظام حضراتنه دخی شارع اطلاق اولنور . بعض ادیان و شرایعهده بویوک کوچوک متعدد پیغمبر و شارع واردور . بزم دینمزده ریپیغمبر و بر شارع واردور که اوده آنجق رسول اکرم حضرت محمد علیه السلامدر . بناء علیه شریعت اسلامیهده رسالتپناه اقدمزدن بشقه شارع یوقدر . بوندن بشقه دین اسلامده ، قاتولک مذهبنده اولدینی کبی تشریح احکامده یعنی وضع شریعتده نیابت اصولی جاری دکلدر . بنابرین اسلامیتده روحانیت یوقدر . بو مقدمات ، بعض غلات روافض مستثنا اولوق اوزره عموم علمای اسلام عنندنه بدیهیات درجه سننده مسلمات دینه دن معدوددر .

بو جهتله مجتهدلر ، مذهب مؤسسای اماملر شارع اولدقلری کبی وضع شریعتده شارع طرفندن وکالت مخصوصه یی ده حائز دکلدرلر . هیچ برینک دیکرلری اوزرلرینه دینی رجحانی یوقدر . (اِنَّ اَکْرَمَكُمْ عِنْدَ اللّٰهِ اَتْقٰیكُمْ) آیت جلیله سی منظوقجه اسلامیتده نزد السیده اک زیاده مکرم اولان ذات ، جناب حقدن اک چوق قورقان و خصال تقوی ایله متصف اولاندر . اوت ، علما ورثه انیدادر . علوم دینی یی انیدادن توارث ایتشلردور . محترمدرلر ، اللری اوپولور ، کنسدیلرینه هر وقت و هر برده حرمت و تعظم اولونور . لکن هیچ بری افراد اوزرنده ولایت دینه یی حائز دکلدر . آنلره حرمت ، علم و فضیله حرمتدندر ، یوقسه ولایت دینه یی حائز اولدقلرندن دولایی دکلدر . دین اسلامده ، نه مرتبه عالم اولورسه اولسون ، ولوکه اعظم اصحابدن ویا اولاد رسولدن بولونسون هیچ بر عالم ، شیخ ، مرشد ، مجتهد و امامک اویله

روحانیت یعنی دینی نیابت و ولایت اعتباری به افراد امتدن فرقی یوقدر. جمله سیده. افراد کبی شریعت تابع و آنکله عاملدر. بونک ایچوندرکه شریعت اسلامیه ده. اهتدا و نکاح کبی کیفیتلر، هیچ بر مراسم مخصوصه دینه یه تابع دکلدر.

بر کیمسه الوهیت و وحدانیت الهیه یی، سائر ضروریات دینه یی قلباً تصدیق و لساناً اقرار ایدرسه مسلمان اولمش اولور. و آرتق حقنده اسلام قادین تزوج ایتک، بینلرنده توارث جریان ایله مک، اسلام قبرستانه دفن اولونمق کبی احکام اسلامیه اجرا اولور. بویا بده هیچ بر مراسم دینه یه لزوم شرعی یوقدر. نکاح ده بویله در، ایجاب و قبول ایله منعقد اولان عقود و مقاولات سائر دن فرقی دکلدر. یالکز شو فرق واردرکه نکاح ده ایکی شاهدک حضور یی شرطدر. بوده تهمت زنادن، زوج ایله زوجیه یی فحشه نسبتدن وارسته بولوندرمق ایچوندر. بوجهتله شرع شریفده نکاح، زوج و زوجه نك بالتراضی ایجاب و قبولی و ایکی شاهدک حضور یی ایله منعقد و صحیح اولور. باشقه مراسم لزوم یوقدر. هیچ بر ذات و مقام، کرک کیفیت اهتدایه و عقد نکاحه و کرک چوجغه اسم طابق کبی خصوصات سائر یه مداخله یه صلاحیت دینه یی حائر دکلدر. نکاح ده محله امامنک حضور یی، محکمه شرعیه دن اذنتنامه اخذی کبی معاملات، حادثاتک ضبطی و بر وثیقه رسمیه یه ربطی کبی مقاصده بناءً احداث ایدلمش اصول اداریه دن در. دینه تعلق یوقدر.

مجتهدک، اماملق دینک توجیه ایتدیکی بر مقام روحانی دکلدر، علم و اقتدارک بخش ایتدیکی صلاحیت علمیه دن عبارتدر. مجتهد وفقیه دینک، علم شریعتده و حقوق اسلامیه ده متخصص دینکدر. مجتهدی مجتهد یاپان کندی قدرت علمیه سیدر. ذکی اولوق شرطیله هر فرد سعی و غیرتی نتیجه سنده مجتهد اوله بیلیر. بوکا هیچ بر مانع شرعی یوقدر. اجتهاد شرعاً تحت انحصار آلمش دکلدر. اونک بر شرطی واردرکه اوده علم و اقتداردر. (باب اجتهاد، مسدوددر) سوزی دوغری دکلدر. آچیدر، هر وقت ایچون آچیدر. حتی بر قسم فقههای اهل سنت، زمانک مجتهد دن خالی اولسنی تجویز ایتبورلر. اوسوز، زمانزده مجتهد درجه سنده اصحاب اقتدار یقشم دینکنی اشعار ایچون سویلنمش بر سوزدر.

مجتهد، امام کبی تمیر لر صکره دن ظهور ایدن تعیرات عرفیه واصطلاحیه دندر .
(امام) فی الاصل اوکه کچن دیمکدر . بو مناسبتله هر هانکی بر علمده ، بر مسلکده
پیشوا و متمدی به اولان زانه « امام » اطلاق اولونور . مجتهدلره ، بیوک عالملره
حتی محله و جامع اماملرینه امام دینمی بوندن ناشیدر . خلیفه یه ده (امام المسلمین)
دنیبر .

(مفتیک) ، (شیخ الاسلامق) ده برر مقام دیانی و روحانی دکادر . هر عالم
مفتی اوله بیایر . دولتجه توجیهه حاجت یوقدر . چونکه « افتا » بر مسئله نک
حکم شرعیسنی بیاندن عبارتدر که هر عالمک وظیفه اصلیه سیدر . حتی کندیسنندن
بر مسئله نک حکم شرعیسی استفسار اولونان بر عالم ، حکم مذکور ی بیلدیکی
و جواب و بر دجک باشقه بر عالمده بولونمیدیغی حالدده جوابدن امتناع ایدرسه
آتم اولور . بو بابدده شدیدالمال حدیث صحیحلر واردر .

« شیخ الاسلامق » ، دولت علیه ده ، همده بالآخره کورولن لزوم سیاسی یه
بناءً احداث اولنمش بر مقام رسمیدر . دولت علیه یه کلنجه یه قدر هیچ بر حکومت
اسلامیه ده بو شکلده بر مقام مشیخت ، تشکیل اولونما مشدی . کرچه وقتیه
بعض مالک اسلامیه ده ، از جمله خراسان و ترکستان جهتلرنده (شیخ الاسلام) ،
(فخر الاسلام) ، (صدر الاسلام) ، و (حجة السلام) کبی عنوانلر وار ایدی .
لکن او وقت بو عنوانلر ، دولت تشکیلات اساسیه سنده داخل و مستمر بر مقام
رسمینک عنوانلری دکلدی . بلکه اکثریسی و بایکده جمله سی ، زماننده بالجمله
اقران و امثالنه تفوق ایدده حک درجه ده بیوک بر اقتداره مالک اولان اعظم فقهایه ،
ینه علما طرفدن توجیه اولنان عنوان احتشام و نشانه اقتدار ایدی .

اوائل اسلامده بو کبی عنوانلر اصلا ایشیدلمه مشدی . هر شیده اولدیغی کبی
اسلمرده ، لیلرده دخی بر ساددک واردی . اکابر علمای اصحاب و تابعینک ،
حتی بو امتک اک بیوک واک محترم رجالی اولان خلفای راشدینک یعنی ابوبکر ،
عمر ، عثمان و علی (رضی الله عنهم) حضر اتنک بیله بویله مدبدب عنوانلری یوقدی .

جمله‌سی ساده‌جه کندی کنیه واسملری ایله یاد اولنورلردی . نته کیم مشارالیه
حضراتی بوکونده او صورتله ذکر اولنمقدردرلر .

خلاصه ؛ زمانزده دخی شیخ‌الاسلام حضرتلری ، مفتی دیمکدر . رسماً
ورتهٔ دیگر مفتیلردن بیوک ایسه‌ده شرعاً آنلردن هیچ فرقی یوقدر .
مقام مشیختدن اصدار اولنان (فتوی) ، رسمی و غیر رسمی دیگر مفتی و عالملر
طرفدن ویریلن فتوالر اوزرینه شرعاً حاکم رجحان دکدر . «فتوی» کیمک طرفدن
وبرلر اولورسه اولسون ، حتی ولوکه بر مجتهد اعظم طرفدن ویرلش بولونسون ، اکر
نصوص شرعیه ایله ثابت بر حکم شرعی بی مین ایسه آنکله عمل واجب اولور .
یوق اکر بر مجتهدک رأی و قیاسدن متولد بر حکم فقهی بی محتوی ایسه قناعت
بخش اولدجه آنکله عمل واجب اولماز . مکرکه مستقی ، تدقیق و تأمل خاصهٔ
انسانیه‌سندن محروم اولان عوام ناسدن بولنمش اولسون . بو صورتده آنکله عمل ،
او مستقی اوزرینه واجب ولور . چونکه عوامک دلیلی مفتینک فتواسیدر .

لکن اولدجه تحصیل کورمش ، ادراک واذعان صاحبی برذات ، آلدینی فتوی
ایله قناعت حاصل ایتمز ایسه ایکنجی بر مفتی به مراجعت ایدر . بونک فتواسی ده
قناعت بخش اولماز ایسه بر اوچنجی به قناعت حاصل ایدنجه به قدر دردنجه
وبشنجی به مراجعت ایلر . هانکیسینک فتواسی قناعت بخش اولور ایسه آنکله
عمل ایدر . بو تدقیق و تأمل ، اونک حقیدر . دها طوغروسی وظیفه‌سیدر .
یترکه کندینده - جن نیت بولونسون . افتناء بیلمینک بیلمدیکنی بیلندن صوروب
اوکر نفسی مسئله‌سیدر . مقصود اولان بیلمین بر حکمک اوکره نلسیدر . بونک
ایچون مین بر مفتی به مراجعت مجبوریت شرعیه‌سی یوقدر . هر هانکی بر بیلندن
صورولوب اوکره نیلیرسه مقصود حاصل اولور . بو مسئله آشاغیده (اجتهاد)
و تقلید بحثنده آریجه توضیح اولنه جفتدن بوراده بوقدرله اکتفا مناسب کورلشدر .
بو مقامده (افتا) ایله (قضا) بی بربرینه قاریشدیر ماملیدر . بونلر بشقه
بشقه شیلردر . کرجه (مبسوط سرخسی) ده بیان اولندینی وجه‌له ایکیسی ده

بر حادثه نك حكم شرعیسی بیاندن عبارت اولمق اعتباریله بر جندندر لر . لکن ماهیت نوعیله اعتباریله آرملرنده بیوک بر فرق واردر . شویله که :

« افتا » ولایت نوعندن دکلدرد . مفتینک افراد اوزرنده حق ولایتی یوقدرد .
« قضا » ایسه ولایت نوعندنرد . چونکه قاضینک افراد اوزرنده حق ولایتی واردر .
(ولایت) ، « ایسترقبول ایتمسین ، ایسترقبول ایتمسین غیر اوزرینه جبراً سوزچر مک »
دیمکدر .

قاضی ، اشبو ولایت حقی حائرردر و دوغریدن دوغری به خلیفه دن اخذایله مشدر .
مفتی به ، طرف خلافتناهیدن بویله بر ولایت بخش اولونمینی ایچون او ، بو حقی
حائر دکلدرد . بوندن دو لاییدر که قضا حکم شرعی بی الزامدر . افتا بلا الزام بیاندر .
بوندن شو نتیجه حاصل اولور که قضایه رضا مجبوریدر ، فتوایی قبول مجبوری
دکلدرد . مکرکه فتوی ، بر نص شرعی به مستد اوله . بونده مطاوعت نصدر ،
فتوانک کندیسته دکلدرد .

امر قضا ، ولایت عامه بی حائر اولان خلیفه نك توجیه ایله یکی بر منصبدر .
بو اساساً خلیفه به عائد بر وظیفه در ، قاضیلر آنک نامنه و آکا و کالة اعطای حکم
ایدر لر . بو جهته خلیفه طرفندن کندیسنه تقلید و تفویض قضا اولونمیان بر ذات
— ولوکه اک بو یوک فقیه و مجتهد اولسون — کندیلکنندن قاضی اوله رق اعطای
حکم ایده جک اولسه حکمی نافذ اولماز . مکرکه طرفین متخاصمین آنی تحکیم
یعنی کندیلرینه حکم تعیین ایتمس اوله لر . افتا ، بویله دکلدرد . افتا ، علم و اقتدارک
بخش ابتدییکی بر صلاحیت علمیه در . بو سببیه حق افتا ، رسمی مفتیله مخصوص
و منحصر اولیوب کفایت علمیه سی بولونان هر عالم حق افتایی حائرردر .

حق افتانک صلاحیت علمیه جمله سندن اولسنه ، امر قضانک ده ولایت نوعندن
بولونمسنه بناء در که اصولیون بر مجتهد ایچون کندی رأی و اجتهادی خلافت اوله رق
دیگر بر مجتهددن صادر اولان فتوی ایله عمل ایتمک جائز اولمینی بیان ابتدکلی
حاله ، اول مجتهدک علینه و رأی و اجتهادی خلافت واقع اولان حکم قاضی به اتباع
ایتمسی واجبدر دیور لر . چونکه قریباً ایضاح اولونه جنی اوزره قاضی (اولوالامر) دندر .

اولوالامرہ اطاعت ایسے نصوص شرعیہ ایلہ واجبدر . قاضی اولمیان مجتہد ایسے اولوالامرہ اولمدینی جہتہ آنک رأی وقولہ اطاعت واجب دکدر .

افادات سابقہ بی خلاصۃ الخلاصہ اولہرق تلخیص ایتک ایستہ نیرسہ دیرزکہ علی العموم مفتیلر ، شیخلر ، مرشدلر ، شیخ الاسلاملر ، فقیہلر ومجتہدلر ، حضرت شارعک لایحظی وکیللری دکدرلر . فقہ واجتہاد اکلایش مسئلہ سیدر . ہر آکلایشدہ اصابت بولونہ ماز . فقیہ و مجتہد ، معصوم و خطادن مصون اولمدیندن اجتہادندہ بعضاً اصابت ، بعضاًدہ خطا ایدر . نہ قدر بویوک عالم وفقیہ اولور ایسہ اولسون حسب البشریہ خطادن سالم اولہ ماز . بو سبیلہ مسائل اجتہادیہدہ ہیچ بر مفتی ومجتہدک فتوی واجتہادی ، نص شارع قوتی حائر حجت ملزمہ دکدر .

شریعت اسلامیہدہ سوزی نافذوملزم ، امر ونہی واجب الاتباع یالکمز بر مقام واردرکہ اودہ مقام خلافتدر . بوتک حقندہدہ بر طساقم یاکلش فکرلر موجود اولدیندن بوبایدہ کی یاکلشلقلری تصحیح ایچون مقام مشارالہک حقیقت شرعیہ سنی تبیین ایتک وجیبہ صرہ سنہ کچمشدر .

— خلافت —

خلافتك تعريفى — خلافتك صورت اکتسابى وعقد وکالت نوعندن اولدينى —
ولايت عامه نك ماهيتى — خليفه يه اطاعتك وجوبى — وضع قوانينده
درجه صلاحيتى .

— ۱ —

خلافتك تعريفى

زمانمزده مقام خلافت حقنده برى افراط، ديكرى تفريط اولمق اوزره بكديكريه
ضد ايكي فكر متخالف جارى اولدينى كورلمكده در . بر قسم خلق ، مقام خلافت
بر نوع قدسيت وروحانيت اسناد ايده رك غلو درجه سنه واريبور . بر قسمي ده
امور عامه يي تمشيت خصوصنده مقام مشارالهي بوس بوتون تقييد ايليه رك مذاهب
معروفه فقيهه خارجنده ، حتى مذهب حنفي خلافتده وضع قوانينه صلاحيتدار
اولمديغنه قائل اولويور . بو ايكي فكرك ايكي سي ده ياكلش اولمقله برابر مسئله نك
زمانمزده بك بويوك اهميت و تراكتي بولونديغندن بو بابده براز اوزون ايضاحات
ويرمكه ، مسئله نك ماهيت حقيقيه سني فقه و حقوق اسلاميه نقطه نظرندن اطرافيله
تدقيق و تشریحه مجبوريت حاصل اولمشدر .

بناء عليه اولاً خلافتي تعريف وتوضيح ، ثانياً خلافتك صورت اکتسابى
وعقد وکالت نوعندن بولونديغنى ، ثالثاً خليفه نك حائز اولدينى ولايت عامه نك ماهيتنى ،
رابعاً خليفه يه اطاعتك وجوبى ، خامساً وضع قوانينده صلاحيتك درجه شمولنى
بيان وتفصيل ايده جكز :

بوقا ريده خليفه يه (امام المسامين) اطلاق اولونديغنى سويله مشدك . بوكابناء دركه

« خلافت » مسئله سی ، علم کلامده (امامت) بحثی نامیله معروفدر . بعضی علمای خارجیه خلیفه و امام نصبک وجوبنی مکر ، علمای شیعهده امام المسلمین و خلیفه اوله جق ذاتک . معصوم اولسی لزومه قائل اولدقلرندن (امامت) بحثی ، علم کلامکده مباحث مهمه سی میانته داخل اولمشدر . بز براده بونلرک افکار و مطالعاتندن و علمای اهل سنتله اولان اختلافاتندن بحث ایدم جنک دکلز . مقصدمن علمای اهل سنتک و فقهانک بیاناته کوره مسئله نک ماهیت فقهیه و حقوقیه سی و اوزرینه ترتب ایدن احکام فقهیه نی بیلدیرمکدر .

(خلافت) لغتده برکیمسه به خلف اولمق معنسانه در . امیر المؤمنین و امام المسلمین اولان ذات محترم ، حضرت پیغمبره خلف اولدینی ایچون کندیسنه (خلیفه) اطلاق اولونمشدر . زهده و نه مقصدله خلف اولدینی ایضاحات آیه کوستره جکدر .

« خلافت » اصطلاحده « امامت » مرادفیدر . نمازده جماعته امام اولمق معنسانه اولان امامتدن تقریبو ایچون بوکا « امامت کبری » دیر . بویوک محقق صدر الشریعه نک (تعدیل العلوم) ، (موافق) و (مقاصد) کبی اک مشهور واک معتبر کتب کلامیهده « امامت » شو صورتله تعریف اولونیور : (امامت ، حضرت رسول اکرم دن خلف اوله رق امور دینی و دنیوبهده ریاست عامه در .) ﴿ ۱۱۰ ۱۱۱ ﴾ [ریاسته عامه فی امور الدین و الدنیا خلافة عن النبی علیه السلام] .

خاتم المجتهدین امام ابن همامده علم کلامه دائر اولان [مسایره] نامنده کی کتاب کزیننده امامتی ، (ملت اسلامییه اوزرنده تصرف عامه استحقاقدر .) دیه تعریف ایدیور [هی استحقاق تصرف عام علی المسلمین]

بو ایکی تعریف ، لفظاً و مفهوماً متغایر ایسه لرده نتیجه اعتباریله ایکیسنکده مدلول و ماصدقی بردر . زیرا اولکی تعریفده ذکر اولونان « ریاست عامه » ده ملت اسلامییه اوزرنده حق تصرف بولونمیه جق اولور ایسه ریاستک معنای قالمازه . ایکنجی تعریفه کوره « تصرف عامه استحقاق » خصوصیهده ، ریاست عامه منر حصول بولماز . وهله اولاده ایکنجی تعریف ، برحینک لازمی کبی کورونورسهده مطالعه آفقه نظر تدقیقه آلیتنجه آره لرنده تلازم بولوندینی ، هر ایکیسوده یکدیگرینک لازم

و ملزومی اولدینی مستبان اولور . برنجی تعریف علم کلامه ، ایکنجی تعریف فقهه اوفق وامسدر . مشارالیه ابن همام ، مجتهد درجه سنده بویوک فقیه اولدینی ایچون ایکنجی تعریفی اختیار ایتمشدر .

(تصرف عام) دن مقصد ، ملتک امور عامه سنده تصرفدرکه (ولایت عامه) دن عبارتدر . ولایت عامه نك نه ديمک اولدینی و دائرة شمولی زيرده آريجه ايضاح اولونه جقدر .

فصل اولده ، طرف رسالتدن احکام شرعيه نك صورت وضعی بحثده بیان اولونمشدی که دین اسلام ، هم دیانت و هم سیاستی جامع بر دین عالیدر . حضرت رسالتپناه اقدمز ، یالکز وضع شریعتله اکتفا بیورمدیلر . بر طرفدن قوانین شرعیه یی وضع و تبلیغ ایتدیلر ، دیگر طرفدن ده اوقوانین شرعیه نك اجراسنی بالذات درعهده بیوردیلر . مصالح ملتی رؤیت و امور عامه امتی تمشیت ایلدیلر . اطرافه والیلر وقاضیلر نصب واعزام ایتدکلری کبی امر جهادده دخی باش قوماندانلق وظیفه سنی بالنفس وبالفعل ایفا بیوردیلر . بوايسه اهل اسلام اوزرنده تصرف عام ديمکدرکه اسلامیتک جهت سیاسیه سیدر . « شرح مسایره » ده بوکا ، « نبوت » اوزرینه مترتب « امامت » دینلیورکه زمانمز عرف واصطلاحنجه (حکومت) تعبیردن قصد اولونان معنادن باشقه برشی دکلدر . کرچه بز « حکومت شويله یابدی ، بویله اجرا ایتدی » سوزنده اولدینی کبی بعضاً « حکومت » تعبیرنی ، هیئت ورجال حکومت معناسنده استعمال ایدرز . ایکن بو استعمال بطریق المجازدره ، مجاز حذفی قیلندندر .

ایشته شو ذکر اولونان سیاست ، امامت و حکومتده جناب نبوتمايه خلف اولدینی ایچون امام المسلمین حضرت تلرینه (خلیفه) و حائر اولدینی صفت و مقامده (خلافت) تسمیه اولونمشدر . بین الناس زباترد اولان [خلیفه پیغمبرک وکیلدر ، پیغمبر پوستنده اوطورویور] کبی سوزلرک معناسی بودر . یوقسه « وضع شریعتده وکیلی وخلقنی » ديمک دکلدر . اویله اولور ایسه خلیفه نك پیغمبر اولسی لازم کلیرکه بو ، هیچ بر کیمسه نك خالمرندن بیله کچمه مشدر .

تعریفات و ایضاحات مسروده دن آکلاشیلدورکه خلیفه حکومت و ملت اسلامیه نك

رئیسیدر. حائز اولدینی حق تصرف و ولایت ، عوام و خواص بالجمله مؤمننه و کافه امور ملته شاملدر . بونکله برابر اشبو ولایت عامه ، اویله پاپانک ولایتی کبی دیانی و روحانی اولیوب بر حکمدارک ولایت عامه سی کبی اداری و سیاسیدر . وظیفه سی دین اسلامی حفظ و صیانت ، امور عامه ده اجرای حکومت و سیاستدر . .

خلافتک صورت اکتسابی و عقد و کالت نوعندن اولدینی

آنفاً ذکر اولونان تعریفات ، « خلافت » لفظندن حاصل مصدر معناسی مراد ایدلمش اولمسنه کورهدر . یعنی خلیفه اولمقدن متحصّل « خلیفه لک » صفت و کیفیتنی تعریف و تبییندن عبارتدر . بو صفتک صورت اکتسابنه و معنای مصدریجه یعنی خلیفه اولمق معناسنجه (خلافت) ک ماهیت فقهیه سنه کلنجه ؛ بونی حقیقه آکلامق ایچون ایضاحات آتیبه بی کمال دقتله تعقیب ایتک اقتضا ایدر : عموم معتبرات فقهیه ده و تخصیص اعظم فقهای شافعیه دن مشهور « ادب الدین والدنیا » نام ارجیلک مؤلفی امام ماوردینک (احکام سلطانیه) نامنده کی کتابنده صراحتاً بیان اولدیفنه کوره فقهای اسلام ، « خلافت » ی ملت اسلامیه ایله خلیفه آره سنده بر نوع عقد و مقاوله اولمق اوزره قبول و تلقی ایتمشلردر . یعنی خلافت ، فقه و حقوق اسلامیجه ملت ایله خلیفه آره سنده عادتاً ایجاب و قبول ایله منعقد بر عقددر ، همده عقد و کالت نوعندنر .

حضرت رسول اکرم ، حین ارتحاللرنده خلیفه نصب و تعیین ایتهمش و بونی امتک حتی اولمق اوزره کندیلرینک اختیار و انتخابنه ترک ایله مش ایدی . حتی بو خصوصده هیچ بر توصیه ده دخی بولونمه مشدی . ارتحال نبویدن صکره اکابر امت یعنی مدینه منوره ده بولنان اصحاب کرام ، اوافق بر مذاکره و مناقشه یی متعاقب بالاتفاق حضرت ابوبکر صدیقی ایلك خلیفه انتخاب ایتدیلر .

بدیهیات فقهیه دندر که هیچ بر کیسه ، شخصاً و کندیکندن عامه ناس
اوزرنده تصرفه مالک خلیفه اولق حقی حائر دکدر . بو جهته خلیفه اولق ،
امتک انتخابه وابسته در . فقط ممالک اسلامیه نک وسعی ، نفوسک کثرتی سییله
انتخاب عام اصوله رعایت متمدن و پک بیوک محذوری مستلزم اولدیغندن فقها ،
یاکنز (اهل حل و عقد) که یعنی پای تختده بولنان رجال حکومت واصحاب تجربه
ورویتک (مبعوثان واعیان) انتخاب و بیعتی ، عموم افراد ملتک انتخابی مقامه
قائم اوله جفتی بیان ایدیورلر . بعضیلری ده هیچ اولمازسه مراکز ولایات اهل
حل و عقدی انتخابده داخل اولمیدر دیور . مختار اولان اولکی قولدر . اصحاب
گرامده اوله یا بمشردی .

مع هذا خلافت ، خلیفه طرفندن ولی عهد تعیین ایتک صورتیله ده منعقد
اولور . زیرا بعدالارتحال خلافت انتخاب کورولتوسی یوزندن اهل اسلام آره سنده
فته و تفرقه وقوعه محل بر اتمام ایچون قبلالارتحال خلافت اهل اولان ذاتی
ولی عهد تعیین ایتک خلیفه نک جمله حقوقدندر . نته کیم حضرت ابوبکر ، ملاحظه
سابقیه بناءً حضرت عمری کندیسنه ولی عهد تعیین و امته عرض و تبیین ایتشدی .
بونندن ده آکلاشیلیر که ولی عهد تعیینده کیفیتی ، اهل حل و عقدک تصویبده عرض ایتک
لازمه دندر . تا که عقد وکالت تمام اولسون . ایشه دولت علیه ده من القدیج جاری
اوله کان ولی عهد تعیینی اصولی بو اساسه مبتیدر .

خلافت ، بوجه معروض عقد وکالت نوعندن اولدینی ایچوندن که خلیفه بر طرفندن
حضرت پیغمبرک خلفی ، دیگر طرفندن ملتک وکیلدر . قاعدهً موکل ، وکیلنی
عزل ایتک حقی حائر اولدینی جهته کتب فقهیه ده بیان اولونان اسباب و شرائطک
تحقیقی حالده خلیفه نک خای یعنی موکلنی بولونان ملت طرفندن وکالتدن عزلی
جائز اولور . خلیفه ، اگر ملتک وکیل اولماش اولسه یدی ، اشبو خلع کیفیتی
مشروع اولمازدی .

خلاصه ، خلافت بر نوع وکالت دیمک اولدیغندن کتب فقهیه ده تصریح اولدینی
وجهله حقنده تمامیه قاعده وکالت احکامی جاری اولور . بو جمله دن اولق اوزره

خليفة نك خلی ویا وفاتی حائده وکلای دولت و مأمورین حکومتدن هیچ بری منزل اولماز. چونکه وکلا و مأمورین حکومت ، هر نه قدر ذات حضرت خلافتناهی طرفندن نصب و تعیین ایدلمش اولمیرینه منبی ظاهرده آنک و کیلی ایسه لرده، حقیقته ملتک و کیلدر لر . خلیفه حضرتلری ، آنلری عقد خلافتله آلمش اولدینی مآذونیت ضمنیه به بناءً تعیین و توکیل ایله مشدر. قاعده فقیه جه توکیل مآذون اولان و کیلک توکیل ایتدیکی کیسه ، حقیقته موکلک و کیلی اولور . بوقسه اول و کیلک و کیلی اولماز و بناءً علیه وکیل اول عزل ایدلمک و یا وفات ایله مکله وکیل نانی منزل اولماز. [مجله نك « ۱۴۶۶ » نجی ماده سنه باق] . عین قاعده ، رأساً و بلا اراده مأمور نصبنه مآذون اولان وکلا ، ولات و قضاتک نصب و تعیین ایتدکلری مأمورین و نواب حقلرنده دخی جاریدر . نته کیم دولت علیه ده علی العموم وکلا ، امرا و مأمورین سائر حقنده بو قاعده احکامی جاری اولمقده در .

کذلک قاعده وکالت اقتضاسجه وکیل ، موکلک قید و شرطنی رعایته مجبوردر . عکسی تقدیرده وکیلک تصرفی مؤکلی حقنده معتبر و نافذ اولماز . بناءً علیه ذات حضرت خلافتناهی نیک ضرورت تحقق ایتدیجه ملتک ضرر محضنه اوله رق واقع اولان تصرفاتی معتبر اولماز . چونکه بوکا دلالةً مآذون دکدر .

بوقاعده بالجمله رجال و مأمورین حکومتدخی شاملدر . آنلرده مقام خلافتدن صادر اولان قیود و شرطه حسب الوکاله رعایته مجبوردر لر . قضات دخی بو مجبوریتده داخلدر . قاضیلر ، حاکلر دخی مأمورین سائر کبی امام المسلمین حضرتلربنک و کیلی اولدقلری و بناءً علیه حائز بولوندقلری ولایت قضا آندن مأخوذ و مستفاد اولدینی ایچون آنک قید و شرطنه مخالقلری شرعاً صحیح و نافذ اولماز . زیرا بو صورتده ویردکلری حکملر ، فضولی اوله رق بلا ولایت ویرلمش اولور .

ایشته مجله احکام عدلیه نك [۱۸۰۱] نجی ماده سنده [قضا ، زمان و مکان و بعض خصوصاتک استثناسیله تقید و تخصص ایدر] دیه محرر اولان مسئله قانونیه نك علت فقیه سی بودر . مثلاً : ماده مذکورده بیان اولوندینی وجهله

بر مجتهدك رأى و قوليله عمل اولونمق اوزره امر خلافتناهی صادر اولسه آرتق حکام ، اول مجتهدك رأینه منافی دیگر بر مجتهدك رأیله عمل ایده منزلر ، ایدرلر ایسه حکملری صحیح و نافذ اولماز ..

— ۳ —

ولایت عامه نك ماهیتی و درجه شمولی

(ولایت) ، یوقاریده دخی بالمناصبه بیان اولوندینی وجهله « ایستر راضی اولسون ایستر اولماسون غیر اوزرینه سوز کچیرمک » دیمکدر. بعض فقها تعریفده کی (سوز کچیرمک) تعبیری یرینه (تصرف نافذ اولمق) تعبیرینی ذکر ایدیور [۱]. ایکنجی تعبیر برنجینک معنای لازمیدر. نتیجه اعتباریله هر ایکسی ده بردر .

ولایت ، اعتبارات مختلفه ایله اقسام و مراتب متنوعیه تقسیم اولنور. برکوه خصوصی و عمومی اولمق اعتباریله ایکی په منقسم اولور: ولایت خاصه ، ولایت عامه . . (ولایت خاصه) پدرك اولاد صفاری اوزرنده کی ولایتی کی ماهیت خصوصیه بی حائز اولان ولایتدر . (ولایت عامه) عموم افراد و افعاله شامل اولان ولایتدر . قضات و حکامک حائز اولدقلری ولایت کی . مع هذا بونلرک ولایتلری مطلق صورتده عام دکلددر . بر جهتن عام ، دیگر جهتنده خاصدر . دائرة قضا و حکملری داخلنده بولنان کافه افراد شامل اولدیضدن دولایی عام ایسه ده ، دائرة مذکوره خارجنده قالان افراد غیر شامل و بعض خصوصاته منحصر بولوندیضندن دولایی ده خاصدر . اصل « ولایت عامه » ، امام المسلمین حضرت تلبینک حائز اولدینی ولایتدر که علی العموم افراد ملته و هر نوع امور عامه په شاملدر .

ولایت ، ذاتی و غیر ذاتی اولمق اعتباریله ده ایکی قسمه تفریق اولنور: ولایت

[۱] عرفت الولاية في فتح القدير و العناية و الكفاية شروح الهداية بانها تنفيذ القول على الغير شاه اوابي . و في شرح الاشياء للعموي ان الولاية نفاذ التصرف على الغير شاه اوابي

ذاتیه ، ولایت غیر ذاتیه . (ولایت ذاتیه) ولینک ذاتندن نشأت ایدن ولایتدر . پدر و بوبوک پدرک اولاد و احفاد صفاری حقهده کی ولایتی کبی . (ولایت غیر ذاتیه) ولینک ذاتندن نشأت ایتیموب عقد وکالت کبی بر سبب خارجیدن تولد ایدن ولایتدر . وکیل ، وصی ، متولی ، قاضی و والینک ولایتی بو قیلدندر . ولایت ذاتیه ، ولینک شخصیه قاشم بر وصف ذاتی اولدینی ایچون آندن انفکاک کی قابل دکلدر . بو جهتله پدر و یا بویوک پدر نفسنی ولایتدن عزل و اخراج ایتسه معتبر و منعزل اولماز . [قال فی الاشیاء : ونقل ابن السبکی الاجماع علی انهما لو عزلا انفسهما لم یمنعزلا .] ولایت غیر ذاتیه ، وصف ذاتی دکلدر . صوکره دن طاری اولان بر امر خارجیدن متولد وصف عارضیدر و بناءً علیه انفکاک کی قابلدر . مثلاً موکاک عزلیله وکیل منعزل و ولایتی زائل اوله جفی کبی وکیلک نفسنی عزلیله ده منعزل اولور . بویوک کوچوک علی العموم مأمورین حکومتده بویله در . ونلرک حائز اولدقلمی ولایتدخی وصف ذاتی و لازم اولدیغندن عزل و استغفاری صحیح و معتبر اولور . امام المسلمین حضرت تلمینک حائز اولدینی ولایت عامه ده بو قیلدندر . یعنی انفکاک کی قابل بر وصف عارضی و غیر ذاتیدر . بناءً علیه اسباب مشروعه یه مبنی خلعی و کندیسنک امامت و سلطنتدن فراغتی شرعاً جائزدر .

اک موثوق و معتمد مؤلفات فقهیه دن مشهور (هدایه) صاحبی عمده الفقها امام برهان الدین مرغینانی [۱] حضرت تلمی ، وکالت و تولیت کبی بر عقد مخصوص

[۱] مشارایه امام برهان الدین مرغینانی ترکستان علماصندن و اعظم فقهای حنفیه دندر و پاک محترم بر ذات فضائل سماتدر . بالجمله کلمات انسانیه و علمیه یی نفسنده جمع ایتشددر . زمانک اک فدار و اک خونخوار ظلمه سی بیله کندیسنه پک زیاده حرمت ایدر لر مش . اصول و فروعده امامدر . سوزلمی بین الفقها سند اتخاذ اولونور . مسقط رأسی ترکستانده فرغانه ایالتنده (مرغینان) قصبه سیدر . (۵۹۳) تاریخنده ارتحال ایتشددر . اولاد و احفادی ده اکابر فقها دندر بو جهتله تأسیس ایتدیکی عاتله محترمه سی علم و فضیلت اوجانی اولشددر . مشارالیهک (هدایه) ، (منتقی) ، (تجنیس) ، (مختار النوازل) ، (نشر المذهب) ، (مزید) کبی فقها عندنده پک قیمتلی تألیفات فقهیه سی وارددر .

هله ذکر اولونان (هدایه) ، بوتون کتب فقهیه مک مأخذیدر . پک محققانه یازلمش بر اثر جلیادر . اوزرینه ابن همام ، تاج الشریعه ، شیخ اکمل الدین کبی فحول فقها طرفندن پک جوق شرح لر یازلمشدر . انکلیزجه یه ده ترجمه ایدلمشدر که بر نسخه سی منظور عاجزی اولمشدر . هدایه ، شرح لر ایله برابر مطبوعدر .

سبيله حصوله كلن ولايته (ولايت تفويض) اطلاق ايدييور . چونكه بو نوع ولايت ، اصل حق تصرفه مالك اولان ذاتك حقي اولوب آنك طرفدن عقد مذکور ايله صورت مخصوصهده مثلا و كياه ويا متولى به تفويض اولونمشدر ، زيرا وكيل و متولى ، موكل به اولان ايشده و امور وقفیهده اساساً حق ولايت و تصرفه مالك دكلدرلر . آنلر بو حقي پدرك ذاتنده مندج ابوت وصفی كبی بر امر ذاتی سبيله احراز ائمه مشلردر ، بلكه صوكره دن طاری و اختیاری اولان عقدوكالت و تولیت ايله موكل و واقفدن اخذ و تفوض ايله مشلردر . وصیلر ، قاضیلر ، حاكملر ، والیلر ، قوماندانلر و ناظرلر دخی بویلهدر . آنلرك ولايتلری ده بوجه معروض « ولايت تفويض ، جمله سندنر .

ايشته امیرالمؤمنین حضرت تلرینك حائز بولوندقلری (ولايت عامه) بونوعدنر . ملت طرفدن عقد خلافت و بیعتله كندیلرینه تفويض اولونمشدر . بونك ایچوندركه خلع و یا فراغت وقوعنده حق ولايتلری ساقط اولور . آرنق بو خصوصهده افراد امتدن هیچ فرقلری قالماز . بیانه حاجت یوقدركه ذات خلافتیناهیلری ، خلیفه اولمازدن اول اویله بر ولایتی حائز دكلردی . ولایت مذکوریه عقد خلافتله احراز ائتمشلردر . طبیعی خلع و یا فراغت وقوعنده حال سابقلرینه عودت ایدرلر .

شو ایضاحات فقهیه صورت قطعیهده کوستریيور كه حقوق اسلامیهده دوغریدن دوغری به اصالة و رأساً هیچ بر کیمسه ، حر ورشید اولان افراد اوزرنده امر و نهی و ماللرنده خود . سرانه تصرفاتی انفاذ ایلهمك حقی حائز دكلدر . اولاد صفار ، مجنون و سفیه اوله رق سن بلوغه واصل اولان اولاد کبار حقنده آبا و اجدادك حق ولايتلری ده ، آنلری حمایت و اموال و حقوقنی ضیاعدن صیانت مقصدینه مبنی مشروع قیاممشدر . بو اساسه بناءدركه پدرك صفار حقنده ضرر محض اولان تصرفی نافذ اولماز ، رشید اوله رق بالغ اولان و یا بالآخره اکتساب رشد ابدن اولاد کبار اوزرندهده برکونا حق ولایتی قالماز . بالکمز بونلر طرفدن خود بخود اجرا ایدیلن عقد نکاحك صحتنده و لیلرینك اذن و رضاسی شرط اولوب اولماسی مسئلهسی بین الفقها مختلف فیدر .

آوردن با حقوقنده ازدواج ، زوجه نك اموالنده زوجه حق تصرف و ولايت بخش ایدیور . زوجینی زوجك اسارتی آلتنه وضع ایدن بو اساس غیر منقول ، حقوق اسلامیه جه شایان قبول دکلدر . شریعت اسلامیه ده زوجه نك اموالنده زوجك اصلاً حق تصرفی یوقدر . زوجه تماماً حریت تصرفیه مالکدر ، دیلدیکی وجهله تصرف ایده بیلیر ، زوجی قطعاً مانع اوله ماز .

الحاصل علی العموم افراد ملتدن هر هانکی بر فردك بر سبب شرعی به مستند اولیان تصرفی ، دیگرلری ایچون مطاع وامری واجب الاتباع دکلدر . چونکه آنفاً بیان اولوندینی وجهله هیچ بر کیسه نك بلا سبب شرعی دیگرلرینه سوز یکیرمک (ولايت) حتی یوقدر . مثلاً بر کیسه بلا وکالت دیگرینک مالنی صائسه ویا ایجار ایسه مال صاحبی موافقت ایتدکجه بیع ویا ایجار مذکور معتبر اولماز . كذلك ایکی کشتی آره سنده تحدت ایدن بر نزاعی فصل ایچون ، صلاحیت قضائیه سی اولیان بر ذات چیقوبده خود بخود بر حکم اعطا ایسه حکم واقع صحیح و نافذ اولماز . ولوکه اول ذات پک محترم و مجتهد مطلق درجه سنده عالم بر ذات اولسون . آنک مجرد علم و اقتداری کندیسنه ولايت قضا بخش ایتز و بناء علیه خود بخود واقع اولان حکمی مطاع وامر ونهی واجب الاتباع اولماز .

لکن بر کیسه نك باشقه سی حقنده وقوع بولان تصرفی ، بر سبب شرعی به مستند ایسه معتبر اولور . بناء علیه آنفاً ذکر اولونان مثالرده اول مالی بیع ویا ایجار ایدن شخص مال صاحبی طرفدن توکیل ، نزاع مذکوری حکماً حل و فصله . قیام ایلین ذات متخاصمین طرفدن تحکیم یعنی حکم نصب و تعیین اولونمش ایسه بو صورتده وکیلک بیع ویا ایجاری موکلی حقنده ، حکمک حکم واقعی ده متخاصمین اوزرنده نافذ اولور . چونکه کرك وکیلک تصرفی وکرك حکمک حکمی ، موکل و متخاصمین طرفلرندن توکیل و تحکیم ایله کندیلرینه تفویض اولونان ولايت مستددر . عاقل و مختار اولان هر فرد ، کندی امور و خصوصنده دیلدیکی وجهله تصرف و ولايت حقی حائز اولدینی کبی بو حق تصرف و ولايتنی دیگرینه بخش و تفویض ایله مک حقی دخی حائدر .

بر کیمسه نك بالذات واقع اولان تصرفی کندی حقنده نصل ونه دن دولایی نافذ اولمق لازم کلبورسه ، بالرضا توکیل وتفویض ولایت ایلدیکی ذاتک بووکالت و ولایت استناداً وقوع بولان تصرفی ، اوصورتله وعین سببه مبنی اول کیمسه حقنده نافذ ومعتبر اولمق لازم کایر . اکر افراد کندی رضالریله اجرا ایتدکلری عقود تصرفاتک نتایجی قبوله مجبور طوتولیه جق اولسه لر، هیچ بر عقد ومقاوله نك حکمی قالماز . ودنیاده هیچ بر معامله نتیجه پذیر اولماز . قوت حقه غابه ایدر . بوده حقوقک ضیاعی موجب اولور . آرتق هیچ بر فردک عقد ومقاوله سنه یعنی سوزینه اعتماد ایدماز . مناسبات بشریه انقطاعه وبالنتیجه حیات اجتماعیه انحلاله اوغرار . بوکا محل بر اقامق ایچون انسانلری حقوق غیره تملق ایدن سوزلرینه صادق ومربوط قیلمق ضرورتی حاصل اولمشدر .

بوملاحظه مینیدرکه « کشتی اقراریله مواخذه والتزامیه الزام اولونور، وهر کیم که کندی طرفندن تمام اولان شئی تقضه سعی ایدر ایسه سعی مردود اولور ، قضیه لری ، فقهک بر قاعده اساسیه سنی تشکیل ایدر .

فردلر حقنده جاری اولان بوقاعده ، جماعتلر حقنده دخی جاریدر . یعنی جماعتلرده بینلرنده مشترک وعمومی اولان ایشلرینی آرزو ایدرلر ایسه مجتمعاً وبالذات اداره ایدرلر ، ایسترلر ایسه برینی توکیل وآکا تفویض ایلرلر . وشق ثانیده وکیلک نافع ویانفع ایله ضرر بیننده دائر اولان تصرفاتی قبوله مجبور اولورلر . ایچلرندن هیچ بری تصرفات مذکوریه قبولدن امتناع ایده من . زیرا بر جماعتک وکیلی ، عین زمانده اول جماعتی تشکیل ایدن افراددن هر برینکده وکیلدر .

عین قاعده الکبویوک جماعت دیمک اولان ملت یعنی هیئت اجتماعیه اسلامیه حقنده دخی جاریدر . شو قدر وارکه بونجه مهم امور دولتی ، تفرقه یه دوشمکسزین حسن تدویر وتمشیت امکان خارچنده بولوندیقندن امور دولت ومصالح ملتی رؤیت وتمشیتده مطلوب اولان اوصاف وشرائطی جامع ، قوانین شریعتی اجرا یه وشوکت اسلامی اعلایه قادر ، مملکتک داخلی وخارجی سیاستنی تدویره وایجابات حق ومعداتی نغیزده مقتدر بر ذاتی کندیلرینه وکیل مطلق ومفوض ، یعنی سوزی

مطاع و امر و نهی واجب الاتباع امام نصب و تعیین ایله مک امت اسلامیه اوزرینه واجبدر . علمای خارجییه ایله برایی معتزله علمای اشبو «نصب امام» قضیه سنک و جوونی انکار ایله جوازینه قائل اولویورلر سده آنلردن ماعدا بالعموم علما و فقهای اسلام بونک و جوینده متفقدرلر . اصحاب کرام حضراتی ده ارتحال نبویه هرشین و حتی دفن پیغمبریدن اول بواصرمهمک ایفاسنه شتاب ایده رک کوچوک (کوچک) بر مناقشه دن صکره جناب ابوبکر صدیقی کندیلرینه امام انتخاب و تعیین ایله مشلردی .

ایشته شواوزون ایضا احادن کرکی کبی آ کلاشامشدرکه خلیفه و امام المسلمین حضرت تلی، نفس الامرده امور دولت و مصالح ملتی رؤیت و تمشیتده ملت اسلامیه نیک وکیل و رئیسیدر . حائز اولدینی قوت و ولایت ده دوغریدن دوغری به ملتدن مأخوذدر . و امور و مصالح مذکورده نیک بالجمله اقسامنه ، امتک رجال و نساء صفار و کبار کافه افرادینه تام و شاملدر . (ولایت عامه) تعیرینک معناسی ده بودر . خلیفه دن ماعدا هیچ بر کیسه بو «ولایت عامه» یا مالک دکدر . قاضیلرک ، وایلرک و ناظرلرک ولایت عامه لری خلیفه دن مقبلسدر . آنلرک ایفا ایتمکده اولدقلری وظائف ، حقیقتده ذات خلافتناهنیک وظائفی جمله سندن اولوب بالذات و علی الانفراد ایفای قابل اوله میه جفتدن بالضروره آنلره تفویض ایله مشدر .

(ولایت عامه) نیک درجه شمرله کلمه : آنفاً بیان اولوندینی وجهله کرچه ولایت مذکورده عام و مطلقدر ، لکن بوتون بوتون ده مطلق دکدر . هرشیده اولدینی کبی بونک ده بر حدی وارددر . اونی تجاوز ایده من . ایدر ایسه شرعاً معتبر و نافذ اولماز . او حده (مصلحت عامه) ملاحظه سیدر . بونکله مقیددر . ذاتاً اشبو «مصلحت» قیدی علی الاطلاق هر نوع ولایتده جاری و وجودی مقتضی اولان بر قیددر . بناءً علیه ولایت ایسترو لایت خاصه نوعدن اولسون ، ایسترو لایت عامه نوعدن بولونسون آنک شرعاً معتبر اولسی ، اولبایده رعایتی لازمه دن بولنان مصلحتک و جوهرینه وابسته در . زیرا اولی ، وصی و قاضی کبی اصحاب ولایتک تحت ولایتلرنده بولونان افراد اوزرینه حق تصرف و ولایتلری ، آنلرک حقوقی صیانت و منافعه نظارت ایچون مشروع

قیامشدر . مصلحتی تضمن ایتین تصرف ایسه حقوقی صیانت و منافعہ نظارت
جمله نندن دکدر .

فقها بالجمله نصوص شرعیہ و موارد احکامی تتبع واستقرا ایدہ رک بو اساسی
تخریج ایتشلر و بونی تدین ایچون [رعیه اوزرینه تصرف مصلحتہ منوطدر]
قاعدہ سنی تثبیت ایله مشلردر . شو حالده امور عامه یه متعلق خصوصلرده دولتجه
تبعه اوزرینه واقع اولان تصرفات ، مصلحت عامه یی متضمن ایسه شرعاً صحیح
و معتبر اولور . دکل ایسه معتبر اولماز . مثلاً مصلحت عامه ملاحظه سنه بناء دولتجه
بعض ویرکولر طرحه لزوم کورولور ایسه قدر معروف و مقدار کافی ویرکولر طرح
و جباتی جائز اولور . فقط احتیاجدن فضلہ سی اسراف دیمک اولوب مصلحتی
متضمن اولدینندن طرح اولونه جق ویرکولرک مقداری ، مضارف لازمه یی تجاوز
ایتمه لیدر . ایدر ایسه شرعاً جائز اولماز .

کذا مجله احکام عدلیه نیک [۹۱۹] نجی ماده سنده محرر اولدینی اوزره بر محامده
و قوع بولان حریقک اطرافه سرایتی منع ایچون بر کیمسه نیک خانه سنی رضاسی
اولقمسزین امر ولی الامر ایله ییقیمق جائز اولور . لکن مذکور خانه یی ولی الامرک
امر مخصوصی بولونمقسزین قومشوسی مجرد کندی خانه سنی قورتارمق مصلدیه
یقیمش ایسه قیمتتی ضامن اولور . چونکه امور عامه ده تصرف ، دوغریدن
دوغری به رأساً و ابتداءً امام المسلمینه و ثانیاً آنک وکیلته یعنی بوکبی خصوصاتده
توجیه صلاحیت و تفویض ولایت ایله دیککی ولی الامر عاقددر . باشقه سنک بو بایده
برکونا ولایتی یوقدر . قومشونک کندی خانه سنی حریقندن قورتارمق ضرورتی
آنی ضماندن تخلیص ایدمه من . چونکه اضطرار غیرک حقنی ابطال ایتمز .
قومشونک حرکت واقعه سی بوجه مشروح جواز شرعی به ده مستند
دکدر . آنکچون ضمان لازم کبیر .

کذلك مجله نیک [۱۲۱۶ و ۱۲۱۷] نجی ماده لرنده بیان اولوندینی وجهله
و لدی الحاجه امر سلطانی ایله بر کیمسه نیک ملکی آنک رضاسنه باقلمقسزین قیمتیه
آلینوب طریق عامه الحاق اولونه بیلیر . فقط تأدییه ثمن اولونمقدجه ملکی یندن

آئینه‌ماز . « و « ماره‌یه مضرتی اولمدینی حالدہ برکیمسه طریق عامک فضله اولان برینی ثمن مثلیله جانب میریدن آلوب خانه‌سنه الحاق ایدہ بیلیر . « برنجی صورت، ملک صاحبک حریت تصرفیه‌سنی اخلاص ایتدیکی جهتله ضرر خاص متضمن ایسه‌ده مقابلنده نفع عامی مستلزمدر . چونکه مرور و عبوری تسهیل ایچون اختیار اولونیور . نفع عام ایچون ضرر خاص اختیار اولونور . ایکنجی صورت ایسه نه خاص، نه‌ده عام هیچ بر ضرری متضمن دکل، فضله اوله‌رق نفع خزینہ‌یی موجب . بناءً علیه هر ایکسی‌ده منفعت عمومی‌یی مستوجب اولدیغدن بو بوم‌تللو تصرفات ایچون مساع شرعی واردر .

لیمانلر ، ریختیملر ، اسکله‌لر ، شمندوفر خطلری انشاسی، شهره صو اساله‌سی کبی نفی عمومی عائد تاسیسات ایچون جبراً فقط ذکر بهاسی و برمک شرطیله استملاک معامله‌سنک جوازی بو اساسه مبتنیدر .

ایشته‌خلیفه و ذات حضرت پادشاهینک ولایت و نظارت عامه‌سی، وجه مشروح اوزره مصلحت عامه قیدیله مقیددر . تصرفات و اجراءات واقعه‌سی مصلحت عامه ملاحظه‌سنه مبتنی ایسه شرعاً جائز و نافذ اولور ، دکل ایسه یعنی کینی و شخصی بر مقصده مستند ایسه جائز اولماز . مثلاً امام‌المسلمین حضرتلری مجرد کندی نفسی ایچون ویا اولاد و تعلقاتندن برینه عائد شخصی بر مقصد ایچون بر ذاتک ملکنی رضایی اولقمسزین - ولود کندن فضله بر بدل ایله اولسون - جبر آیدندن آلسه شرعاً جائز اولماز . مشارالیهک ولایت عامه‌سی ، کندیلرینه بویله بر حق بخش ایتمز . ذات خلافتناهیملری امور دولت و مصالح ملته نظارت ایچون مقام خلافتله اجلاس اولونمشلردر ، یوقسه هیچ بر مصلحت و منفعت عامه بولونقمسزین مجرد کندی آرزوی شخصیلرینه اتباعاً دیلدیکی وجهله حرکت و بلا موجب شرعی خلقه ایقاع مضرت ایچون خلیفه نصب و تعیین اولونمامشلردر . « رعیه اوزرینه تصرف مصلحتله منوطدر . »

ولی، وصی ، متولی و قاضیلرک اموال صغار و ایتامده و اوقاف و ترکاتده وقوع بوله‌حق تصرفلرنده حکم ، بو منوال اوزره جاریدر . یعنی بونلرک تصرفلری‌ده مصلحت ایله مقیددر .

صاحب (بدایع) امام کاشانی ، کتاب مذکورک [قصاصدن عفو] باینده
دیورکه : [قصاصدن عفوک شرائط صحتندن بری ده کیفیت عفوک صاحب حق
طرفندن صدوریدر . زیرا عفو مذکور ، حق قصاصی اسقاطدر . بر حقه مالک
اولیان کیسه طرفندن اوحق اسقاط ایسه محالدر . شوخالده هیچ مناسبتی اولیان
اجنبینک قاتلی قصاصدن عفوی صحیح اولیه جنی کبی بر صغیر ایچون ثابت اولان
قصاصده اول صغیرک اب وجدینک عفوی دخی صحیح اولماز . چونکه قصاص
صغیرک حقیدر ، پدر وجدک حق دکلدر . اولر آجق صغیرک حقنی استیفا
ولایتی حائزدرلر . وبرده اب وجدک ولایتلری صغیرک منفعتنه نظرله مقیددر .
بلا بدل قصاصدن عفو ایسه منفعت دکل ، ضرر محضدر . زیرا عفو مذکور اصلاً
ورأساً حق اسقاطدر . پدر وجد ایسه بو صورتله حق اسقاطه مالک دکلدر .
بو سببه منیدرکه ذات حضرت پادشاهی ، ولیسی اولیان بر یتیم ایچون ثابت اولان
قصاصدن قاتلی عفو ایتمک حقنی حائز دکلدر . . .

امام شمس الأئمة السرخسی ده (مبسوط) نام کتاب مشهورینک (لقیظ) بچشنده
[امام المسلمین حضرتلری ، ملت اسلامیه نك حقوقنی استیفاده آنلرک مائب
وناظریدر . آنلرک حق ایسه کنیدلرینه نفی اولان شیده در . بناء علیه امام المسلمین
قاتلی بلا بدل قصاصدن عفو ایتمک حقنه مالک دکلدر . زیرا مشارالیه حضرتلری
حقوق مسلمینی استیفا ایچون مقام امامته اجلاس اولومشدر . یوقه آنلرک حقوقنی
ابطال ایچون دکل . [دیور . بوتون معتبرات فقهیه ده بومسئله حقنده بو صورتله
بیان مطالعه اولونیور . ایسته شوايضاحات مفصله دن ولایت عامه نك ماهیت ودرجه
شمولی حقنده تمامیه بر فکر صحیح حاصل اولمشدر . شمیدیه خلیفه یه اطاعتک
وجوبنی واسباب موجه ودرجه سنی ایضاح ایدلم .

خلیفه یه اطاعتک وجوبنی

خلیفه مطاع وامرونی واجب الاتباعدر . بوده ایکی جهته ثابتدر . بری

خلافت و ولایتک ماهیتی اقتضایی ، دیکری شارعک ایجابیدر . بناءً علیه خایفه یه اطاعت هم فقهاً ، همده شرعاً واجبدر .

فقهاً واجبدر . چونکه یوقاریده تفصیلاً ایضاح اولوندینی وجهله خلیفه ماتک وکیایدر . قاعده فقهیجه وکیلک حسب الوکاله واقع اعلان نصرنی موکلی حقهده نافه اولور . زیرا وکیلک حائز اولدینی ولایت ، موکندن مأخوذدر . موکل او ولایتی عقد وکالتله وکیله بخش ایتشددر . ولایتکه تنفیذ قول و انفاذ تصرفدن عبارتدر ، آنجق نتایج حقوقیه سنی قبول ایتمکله قابل تطبیقدر . بر کیمسه برایش حقهده دیکرینه حق تصرف و ولایت بخش ایدوبده بالآخره آثار مرتبه سنی قبولدن امتناع ایدمک اولورایسه وکالت و ولایتک معناسی قالماز . بوجهتله موکل ، حین توکیلده وکیلک تصرفدن تولد ایدمک نتایجک قبوانی التزام و تعهد ایلده مش دیمکدر . آرتق او نتایجی قبولدن امتناع ایدمک . ایدرسه قبوله جبر اولونور . بونک ایچوندرکه علی العموم افرادامت ، ذات حضرت خلافتیناهنک حسب الخلافه وقوع بولان تصرفاتی قبوله ، ارادات سنیسنه اتباعه مجبوردرلر . منطقی فقهی بونی ایجاب ایدر .

وبرده هر وظیفه بر حق تولید ایتدیکی کبی هر حقهده بر وظیفه تحمیل ایلر . بوده او حتی طابیق و آکارعایت ایلهمک وظیفه سیدر . بونلر متقابل وبرینک دیکرندن انفسکاکی غیر قابلدر . امیر المؤمنین حضرتلری حسب الوظیفه تصرف عام حقی حائز اولونجه ، آرتق امت اوزرینهده بوحقه حرمت ایتک و آنک آثار فعلیه سنی قبول ایلهمک وظیفه سنی ترتب ایدر .

ظاهرده ایکی ، حقیقتهده بر اولان مطالعات آنفهدن مستبان اولوبورکه خلیفه یه اطاعت و امر ونهیته متابعت قضیه سنی ، ماهیت خلافت و ولایتک امت اسلامیه اوزرینه تحمیل ایلدیکی فقهی و حقوقی بر وظیفه متحتمه در .

شرعاًده واجبدر . حتی فرضدر . بوده متعدد نصوص شرعیه ایله ثابتدر . بوبابده فقیه و متکلم بالجمله علمای اهل سنتک اجماعی ده منعقددر . «ای اهل ایمان ، الله ورسوله اطاعت ایدیکز ایچیکزدن اولوالامر اولانلرده اطاعت ایدیکز» .

مفهومند اولان [يَا أَيُّهَا الَّذِينَ آمَنُوا اطِيعُوا اللَّهَ وَاطِيعُوا الرَّسُولَ وَأُولِي الْأَمْرِ مِنْكُمْ] آیت جلیله سی ایسه ، علی العموم اولوالامر ، اطاعتک وجوبنده هجت قاطعه در .

اولوالامر ، امر صاحببری دیمک اولدیغندن ناظر ، قوماندان ، والی ، متصرف وقاضی کبی نه قدر آمر و ولی الامر وار ایسه جمله سنه شاملدر . (بخاری شریف) ده محرر اولان [اسْمَعُوا واطيعوا وَاِنْ اسْتَمِعَلْ عَلَيْكُمْ عَبْدٌ حَبَشِيٌّ كَانَ رَأْسُهُ زَيْبَةً] و [مَنْ رَأَى مِنْ أَمِيرِهِ شَيْئاً فَكْرَهُهُ فَلْيُضْرِبْ فَإِنَّهُ لَيْسَ أَحَدٌ يُفَارِقُ الْجَمَاعَةَ شِبْرًا فَيَمُوتُ إِلَّا مَاتَ مِثَّةَ جَاهِلِيَّةٍ] حدیث شریفلری ایله بوبابده وارد اولان دیگر احادیث صحیحه دخی بونی مؤیددر .

بوجهتله بونلرک وظیفه وصلاحیتلری داخلنده صادر اولان امر ونهیلرینه اطاعت واجبدر . یوقاریده بیان اولونمشدی که بونلرک امور عامه ده تصرفه و امر ونهیه صلاحیتلری ، خلیفه دن مأخوذ وتصرفات واقعه لری آکا مضاف الوب مشارالیه جمله سنک وبوتون ملت اسلامیه نیک رئیس وامیری بولوندیغندن اصل ولی الامر خلیفه در . آنک ایچون جمله سنندن اقدم ذات حضرت خلافت پناهی به اطاعت واجبدر . بوجهتله مشارالیهک امری ایله دیگر اولوالامرک امری تعارض ایسه مشارالیهک امری تقدیم اولونور .

وندن باشقه ذات حضرت پادشاهیدن ماعدا اولوالامرک ولایت امرلری ، وظیفه لرینه خاص ومنحصر اولدیغندن آنلره اطاعتک وجوبی ، وظیفه لرینه عائد اولان خصوصاتله مقیددر . امیرالمؤمنینک ولایتی ایسه امور دولت ومصالح مملکتته متعلق هرخصوصه عام وشامل اولدینی جهتله مشارالیه اطاعت قضیه سی مطلق وعمومیدر .

مع هذا اشبو قضیه اطاعت ، بوتون بوتون ده مطلق دکدر . خلیفه نیک ده بر آمری ، برده موکللی وار . آمری شریعت ، موکللی ماتدر . مأمور آمرک

امرینه ، وکیل موکک شرطه مخالفت ایده میه جکندن خلیفه بر جهندن شریعتک
امرینه مخالفت ، دیگر جهندن ملتک علیه حرکت ایتمه مکله مکفدر .
بوندنه آ کلاشیلیرکه خلیفه په اطاعتک وجوبی بری منفی ، دیگری مثبت
ایکی قید ایله مقیددر .

برنجیسی مشارالیهک امر ونهی مستلزم معصیت اولماق ، ایکنجیسی مصاحتی
تضمن ایتمکدر . برنجی قیده کوره شرعاً معصیت تشکیل ایدن افعاله خلیفه په
اطاعت واجب اولق شویله دورسون ، جائز دخی دکدر . مثلاً خلیفه بلا سبب
مشروع برینک قتلنی امر ایده جک اولسه بوا مره مطاوعت جائز اولماز . بو ظلمدر .
ظلمده اطاعت ایسه ظلمه آلت اولق دیمکدر که عین ظلمدر . [وَسَيَعْلَمُ الَّذِينَ
ظَلَمُوا أَيَّ مَثَلٍ يَنْقَلِبُونَ] .

کذلک شرعاً حرام اولان برشیئتک بلا ضرورت اکلی حقنده اراده سنیه
صادر اولسه بو اراده په متابعت جائز اولماز . چونکه اولوالامرہ اطاعتی امر ایدن
سالف الذکر آیت جلیله ، عین زمانده واول امرده جناب حقه ورسولنه اطاعتی ده
امر ایدیور . دیمک که بو اوج نوع اطاعتک اوچنی ده بریده جمع ایتمک ایجاب
ایدیور . بوده آنجق معصیت تشکیل ایتمین یولرده اوله بیلیر که بونلرده اجراسنه
مساغ شرعی بولونان افعالندن عبارتدر .

شوحالده آنفاً ذکر اولونان مثاللرده اولدینی کبی هیچ برسبب شرعی و احتیاج
حقیقی بولونمقسزین ، مجرد کینی اوله رق واجبک ترکی و حرامک ارتکابی حقنده
طرف سلطانیدن برامر و اراده صادر اولسه ، بوراده شو اوج نوع اطاعتک جمع
وتألیفی قابل اوله میه جفندن اراده مذکوریه متابعت جائز اولماز . زیرا متابعت
ایدلیکی تقدیرده جناب حقه ورسولنه مخالفتله ارتکاب معصیت ایدلمش اوله جق که
عین آیت کریمه حکمنجه جائز دکدر .

نته کیم آیت مشارالیهانک بو حکمنی بیان وتفسیر ضمننده وارد اولوب امام
سیوطی نک (الجامع الصغیر) نده محرر اولان و «خالقه معصیتده مخلوقه اطاعت

اولماز « مفهومند بولونان [لاطاعة لخلق في معصية الخالق] حديث صحيح ايله
« طاعت آنجق معروفده اولور ، مضموننده (بخاری شریف) و (مسلم) ده موجود
[إِنَّمَا الطُّعَاةُ فِي الْمَعْرُوفِ] حديث شریفی ، بوخصوصده صراحت قطعیه بی
حاویدر .

بو حدیثلردن باشقه « برمعصیتی ارتکاب ايله امر اولونمدهجه هر فرد مسلم
اوزرینه ، سودیکی وسومدیکی شیلرده امیرک سوزینی دیکله مک و آکا اطاعت ايله مک
واجبدر . اکر برمعصیتی ارتکاب ايله امر اولونورسه اولوقت سوز دیکله مک
و اطاعت ايله مک جائز اولماز . ، مآئنده (صحیح بخاری و مسلم) ده مذکور
عَلَى الْمَرْءِ الْمُسْلِمِ السَّمْعُ وَالطَّاعَةُ فِيمَا أَحَبَّ وَكَرِهَ مَا لَمْ يُؤْمَرْ بِمَعْصِيَةٍ فَإِذَا أُمِرَ
بِمَعْصِيَةٍ فَلَا تَسْمَعُ وَلَا تَطَاعُ لَفْظِ الْحَدِيثِ لِمُسْلِمٍ [حدیثی کی ثبوتی صحیح و دلالتی
قطعی ده برچوق احادیث شریفه ، مباحوث عنه مسئلهده اشتباهه محل براقیه جق
صورتده یکدیگری مؤیددر . بناءً علیه امر شارع ايله امر اولو الامر تعارض
ایتدکه شارع امری تقدیم اولونور ، آرتق امر اولو الامر التفات اولونماز .
شو ایضاحات ، بالاده ذکر اولونان ایکی قیددن برنجی قیده کوردهدر .

ایکنجی قیده کلنجه : بوقیده کوردهده مثلاً منافع ملک دولته منافی ، عامه نك
مضرتی داعی خصوصات حقنده صادر اولان اوامر و ارادات سنییه مطاوعت
جائز دکدر . قاعده وکالت احکامنجه امیر المؤمنینک بوکی تصرفاتی معتبر و نافذ
اولماز . زیرا یوقاریده بیان اولوندینی وجهله مشارالیهک حائز بولوندینی ولایت
عامه ، بویه ملت و مملکت حقنده ضرر محض اولان تصرفاته قدر عام و شامل
دکدر . عقد خلافت و بیعتله کنديسنه اویله بر مآذونیت و صلاحیت ویرله مشدر .
بالعکس حق تصرف و ولایتی ، دولت و ملک نفع و خیرینه استعمال ایدلک قید
و شرطی ايله مقید و مشروطدر . واقعا حین بیعتده بو جهت صراحة ذکر
ایدله مشدر و ایدلمز ، لکن بو بابه حال و مصاحتک دلالتی صراحتدن ده قوتلیدر

وبداهت درجه سنده قطعیدر . آنکچون تصریح ایداز . مع هذا اوچنجی خایفه حضرت عثمانک خلافتہ آتخابنده بویله بر شرط صراحة در میان ایدلمش و اوده قبول ایتمش اولدینی جهتله کندیسنه بیعت اولونمشدی .

ولایت عامه نك درجه شمولى ورعیه اوزرینه تصرفك مصالحتہ منوط بولوندینی حقنده یوقاریده بر تفصیل ایضاحات ویرلمش اولدیغندن تکراره دوشمه مک ایچون بوراده ایضاحات مذکوره دن صرف نظر اولمشدر .

بو ایکنجی قید یعنی مصلحتہ مخالف تصرف مسئله سوده ، عدل وحقه منافی وبناء عالیہ معصیت تشکیلنده برنجی قیده مساویدر . ایکیسنکده حکم شرعیلری بردر . بو اعتبار ایله ایکنجی قیدده برنجیده داخل اولدیغندن آریجه ذکر ایدلمسه ده اولوردی . فقط ماهیت حقیقیه لری اعتباریله آره لرنده مهم بر فرق بولوندیغندن مستقلاً ایکنجی برقید اولوق اوزره ذکرینه لزوم کورلمشدر . ماهیت فقیه لری اعتباریله بو ایکی قید آره سنده فرق بولوندینی کبی تعلق ایتدکلیری حقوق اعتباریله ده آره لرنده فرق واردر . هر ایکی قیدده حق شارعہ تعلق ایتکله برابر برنجیسی فردلرک ، ایکنجیسی عامه نك حقوقه تعلق ایدیور . بو ایکنجی نوع حقوق ، نظر شارعده پک محترم و معزز اولدینی ایچون لسان فقہده شاتی بجیلاً اشبو « حقوق عامه » یه « حقوق آله » اطلاق اولونور .

بوراده یعنی خلیفه نك امری مصلحتہ مخالف اولماق مسئله سنده نظر دقتہ آینه جق بر نقطه واردر که اوده بیه حال مصلحت عامه نك وجودی ، محقق و معلوم اولوق شرط اولماسیدر . مصلحتك وجودی معلوم ویا مظنون اولدینی وقتده خلیفه یه اطاعت واجب اولدینی کبی ، مشکوک و محتمل بولوندینی صورتده دخی ینه اطاعت واجیدر . بترکه امر مذکور مصلحتہ مخالف اولماسون . مصلحتك وجودی مشکوک اولوق دیمک ، مصلحتہ مخالف اولوق دیمک دکدر . بونلر باشقه باشقه شیلردر ، بر برینه قاریشدر ماملیدر . بر شینک وجودی برکیمسه یه کوره مشکوک اولورده دیگر برکیمسه یه کوره ظن غالب ایله مظنون وحتی محقق اوله بیلیر . بواجتهاد و تقدیر مسئله سیدر . محل اجتهادده امر ولی الامر

اطاعت واجبدر . عكس تقديرده مقصد فوت ، امور دولت ونظام وانتظام مملكت مختل اولور .

امام كاشانى [بدائع] نام كتاب مشهورنده دييوركه : (امام المسلمينه وآنك نأبى اولان اميرينه اطاعت لازمدر . آنجق معصيتك اجراسنى امر ايدر ايسه ، اطاعت جائز اولماز . امام المسلمین و یا امیری اگر ناسك كندیلرینه منفعتی اولوب اولدیقى كسدیره مدكلى بر شیشی امر ایدرسه ، اول شیئك معصیت اولدیعی معلوم اولینجه امر مذكوره اطاعت لازم اولور . زیرا محل اجتهادده امام المسلمینه اتباع واجبدر . [۱] . « اشباه » شرحی (حموی) ده دخی [مصنف یفی « اشباه » صاحبی ابن نجیم ، كثر شرحی (بحر رائق) ده ائمه خیفه دن نقلاً دييوركه « معصيتك غیرى احوالده امام المسلمینه اطاعت واجبدر . شو حالده امام المسلمین حضرتلری ، بركون اوروج طوتلماسنى امر ايدر ايسه طوتمق واجب اولور] . ديه محرردر [۲]

الحاصل معصیتی موجب اولیان احوالده اولوالامرء اطاعت واجبدر . احوال مذكوره ده ایكى نوعدر : برنجیسی ، اساساً فعل وتركى جائز اولان امور مباحدر بومقامده مندوب ومكروه دخی مباح حكمندهدر . ایكنجیسی ، اساس اعتباریله ممنوع اولدینى حالده اضطرار واحتیاجه بناءً اجراسنه شرع شریفك مساعده بویوردینی افعالدر .

برنجی نوعه مثال : امراض مستولیه نك منع انتشاری مقصدیله اساساً اكلی جائز اولان بعض ما كولاتك اكل ابدله مسی وآلینوب صا تلماسی حقنده اراده سنیه شرف صادر اولسه جائز وآ كا متابعت واجب اولور . ماهیتی اعتباریله حرام

[۱] قال فی البدائع : « طاعة امیر الامام لازمة لانه نائب الامام وطاعة الامام لازمة كذا طاعته لانها طاعة الامام الا ان يأمرهم بمعصية فلا تجوز طاعتهم اياه فيها ولو امرهم بشئ لا يدرون أينفتمون بهام لا فینبئ لهم ان یطیعوه فيه اذالم یعلموا كونه معصية لان اتباع الامام فی محل الاجتهاد واجب كاتباع القضاة فی مواضع الاجتهاد » ..

[۲] قال الحموی فی شرح الاشباه فی القاعدة الخامسة التي هي « تصرف الامام علی الرعية منوط بالمصلحة » : قال المصنف فی شرح الكثر ناقلاً عن ائمتنا « اطاعة الامام فی غیر المعصية واجبة فلو الامام امر بصوم يوم وجب .. »

و ممنوع اولمیان بر شینک ا کلی و بیع و شرایی اساساً جائز ایکن آرتق بواراده سبیله جائز اولماز .

ایکنجی نوعه مثال: یوقاریده بیان اولوندینی وجهه بلا سبب شرعی بر کیمسه نك ملكی ، آنک رضایی اولقسزین - ولود کردن افضله بدل ایله اولسون - جبراً لندن آلتق حرام و ممنوع اولدینی حالده احتیاج عمومی به و بناء علیه مصلحت عامه ملاحظه سنه مبنی آرتق آنک رضاسنه باقیلمیه رق حکومت طرفدن قیمت حقیقیه سی و پر یلوب آینه جق اولسه جائز و صاحب ملکک بوکا مطاوعت ایتمسی واجب اولور . چونکه « حاجت عمومی اولسون ، خصوصی اولسون ضرورت منزله سنه تنزیل اولونور ، و « ضرورتلر ممنوع اولان شیلری مباح قیلار » . و برده « ضرر عامی دفع ایچون ضرر خاص اختیار اولونور » .

افادات مسروده به نظر آناً ذکر اولناں اساسی ، یعنی « معصیتی موجب اولمیان احوالده اولوالامرہ اطاعت واجبدر ، اساسی ، شوشکه افراغ ایده بیلیرز : [هر زرده که اولوالامرک تصرف وامری شرعاً جائز اولور ایسه اوراده اولوالامرہ اطاعت واجب اولور . هر زرده که تصرف وامری جائز اولماز ایسه اطاعتده جائز اولماز] .

اولوالامرک تصرف وامری ، نه کبی یرلرده جائز اولوب نه کبی یرلرده جائز اولیه جنی مسئله سنه کلنجه : حقوق شارع و افراددن هیچ برحق اخلال ایتمدیکی هر یرده ، برحق اخلال ایتمدیکی تقدیرده مصلحت عامه بی تضمن ایتمدیکی یرلرده جائز اولور . عکسی تقدیرده جائز اولماز .

اظهار — بوراده شو مهم جهتک نظر دفته آلتسنی اخطاره لزوم واردر که « معصیتی مرجب احوالده خلیفه به اطاعت جائز اولماز ، دیمک ، مسلحاً قیام و عصیان جائز اولور دیمک دکندر . بوکا (خروج علی السلطان) دنیرکه کتب فقهیه ده و امام نووینک « صحیح مسلم » شرحنده تصریح ایلدیکی اوزره اولیه مجرد ظلم و فسق سبیله جائز اولماز . بوباشقه مسئله سیدر . بوملتی تفرقه به ، دولتی ضعفه مملکتی انحلاله دوشور مکدرکه برچوق نصوص قرآنیه واحادیث نبویه ایله صورت

قطعیه ده ممنوعدر. یوقاریده « صحیح بخاری » دن نقل اولونان و « صحیح مسلم » ده
شکل آتیده مذکور بولونان حدیث شریف، بو خصوصده صراحت کامله بی محذوریدر:
[مَنْ كَرِهَ مِنْ أَمِيرِهِ شَيْئًا فَلْيَضْرِبْ عَلَيْهِ فَإِنَّهُ لَيْسَ أَحَدٌ مِنَ النَّاسِ يَخْرُجُ
مِنَ السَّلْطَانِ شِبْرًا فَمَاتَ عَلَيْهِ الْإِمَامَاتُ مِثَّةَ جَاهِلِيَّةٍ] ايشته بو حدیث شریفده
امیر المؤمنیندن صادر اوله جق مکروه و منفور افعاله قارشى صبر ایدلمسى توصیه، بو کبی
حرکات ظالمانه سببيله « خروج علی السلطان » قضیه سنک مشروع اولیه جفی صراحة
بیان بویوریلپور .

کذاک امام مسلمک تخریج ایلدیکی احادیث شریفه دن « ایلروده برچوق فتنه
و فساد ، تفرقه و شورشی موجب حادثات ظهور ایده جکدر . هر کیم که امام واحد
اطرافنده طویلانمش اولان بوامتک ایشینی بوزمه بی ، قوت و جماعتلری تفریق
ایتمه بی مراد ایدرسه ، کیم اولورسه اولسون و وروکز ، اولدور و کز . ، مآلنده اولان
[اِنَّهُ سَتَكُونُ هَنَاتٌ وَهَنَاتٌ فَمَنْ اَرَادَ اَنْ يُفَرِّقَ اَمْرَ هَذِهِ الْاُمَّةِ وَهِيَ جَمِيعٌ
فَاَضْرِبُوهُ بِالسَّيْفِ كَاَنْتُمْ مَنْ كَانُوْا فِي رَاوِيَةٍ فَاَقْتُلُوْهُ .] حدیث شریفی ایله ینه
بومآلده بولونان [مَنْ اَتَاكُمْ وَاَمْرُكُمْ جَمِيعٌ عَلٰى رَجُلٍ وَّاحِدٍ يُرِيْدُ اَنْ يَشُقَّ
عَصَاكُمْ اَوْ يُفَرِّقَ جَمَاعَتَكُمْ فَاَقْتُلُوْهُ] حدیثی ، و [مَنْ خَرَجَ مِنَ الطَّاعَةِ وَفَارَقَ
الْجَمَاعَةَ فَمَاتَ مَاتَ مِثَّةَ جَاهِلِيَّةٍ] و کذا [اِذَا بُوِيعَ لِخَلِيفَتَيْنِ فَاَقْتُلُوا الْاٰخَرَ
مِنْهُمَا .] اخر جهه مسلم [حدیثلری ، بوبابده هر درلوشک و شبهه بی دفع و ازاله بی
کافی و هریری مستقل بر دلیل جلیدر .

مع هذا ظلم و جور کده بر حدی و بر درجه سی واردر . او حدی تجاوز ایدر . جک
اولور ایسه مسئله ونکنی دکشدیرر . ایش خلعه قدر وارر . دیمک که بوده
« ضرر عامی دفع ایچون ضرر خاص اختیار اولونور ، قاعده سنه تابع بر کیفیتدر .
تفصیلاتی کتب فقهیه ده مسطوردر .

اعتراض

زمانمزده تفسیر و حدیثه اولدجه بضاعه و مطالعه صاحبی اولقله برابر فقهه انسانی اولیان ویا احکام شرعیه نك حقایقه و شارعك مقاصدینه نفوذ ایده جك ذکابه مالک بولونمیان بعض افکار بسیطه اصحابی ، بو مسئله نك یعنی اولوالامرہ اطاعت قضیه نك حقیقتنی تمامیه احاطه ایده میورلر . ایده مدکاری ایچون قبول ایتمك ایسته میورلر . حتی بوندن اوچ درت سنه مقدم بعض مطبوعات موقوتده بومسئله یه دائر آچیلان اوزون بر مناقشه قلمیه ، مع التأسف بزده هر وقت اولدینی کبی تزیه بر مباحثه علمیه شکلندن چیقهرق مشائمه یه منجر اولمش و طرفین یکدیگری تجهیل و تحمیق ایلده اکتفا ایتموب تکفیره قدر کیمش ایدی .

اساساً و حد ذاتنده بویوک بر اهمیت حقوقیه یی حائز اولان بوبحث ، اولوقدنبری اهمیتنی برقات دها آرتیرمشدر . بونك ایچوندرکه بزده بوراده بومسئله یی اوزون اوزادی یه تدقیقه مجبور اولدق .

ایکی صورتله اعتراض اولونیور . اعتراضلر وهله اولاده قوتلی کورونورسه ده بر از تمیق نظر اولوندقده هیچ بر قیمت علمیه لری اولدینی تظاهر ایدر . تدقیقات سالفه اوزرینه بویکی نوع اعتراضك هر ایکسی ده کند بلکلرندن سقوط ایتمیشلرسه ده حقیقتی برقات دهاتنوبره و ذهنلرده موجود شبهه و تردد لری ازاله یه مدار اوله جنی ایچون بروجه آتی برر برر ایراد و جوابلری اعطا اولونمق مناسب کورلمشدر :

برنجی اعتراض — باشده خلیفه اولوق اوزره علی العموم امرایه اطاعتك

وجوبی حقتنده یوقاریده ذکر واستدلال اولونان [اطیعوا الله واطیعوا الرسول واولی الامر منکم] نظم جایی ، بو خصوصده مدار احتجاج اوله ماز . زیرا آیت مشار الیهاده کی « اولی الامر » دن « امرأه مقصود اولدینی مسلم دکلدر . بو بین العلماء مختلف فیه بر مسئله در . بعض اکابر تابعین ، مراد علمادر دیور . آئیده (امرأه)

دینیبوده (اولی الامر) دینیبوده بو قولی تأیید ایدر . اکر مقصد امر اولسه یدی
دوغریدن دوغری یه « امر » دیردی ، « اولی الامر » دینزدی . نتیجه اعتبار یه
آیتک مدعایه یعنی امرایه اطاعتک وجوبی قضیه سنه دلالتی قطعی دکل دیمک اولور .
شو حالده دلالتی قطعی اولمیان بو آیت جلیله ایه دعوا یه استدلال صحیح دکدر .
دیلک ضعفی ، مدعایکده ضعفی انتاج ایدر

جواب — ایشته برنجی اعتراض بودر . شمعی بو اعتراضی کله بکلمه

تعقیب و تدقیق ایده لم : اوت ، (حسن بصری) ، (عطا بن ابی رباح) ، (ابو
العالیه) و (ضحاک) کبی بعض اکابر علمای تابعین ، آیت مذکورده کی (اولی
الامر) دن امرای مقصود اولدیغنه ذاهب اولمشلر . لکن بو فکر عامه علمای اسلام
طرفدن قبول ایدلمه مشدر . امام نووی نک (مسلم) شرحنده بیان ابتدییکی وجهله
اسلاف و اخلافدن مختلف صنوف علمایک یعنی مفسرین ، محدثین ، متکلمین
وفقهایک اتفاقه قریب اکثریت عظیمه لری اولوالامردن امرای مقصود اولدیغنده
متحددر . بوتون معتبرات فقهیه دهده امرایه اطاعتک وجوبی قضیه سنه بو آیتله
استدلال اولونیور .

لفت عربیه ده بو بایده شاهد عادلدر . چونکه اولوالامر ، اصحاب امر دیمکدر .
(امر) لفظی لغتده ایکی معنایه کلیر . بری او امرک مفردی اولان امردر .
دیگری امورک مفردی اولان امردر . برنجی صورتده بو بورمق و بو بورق معنایه در .
ایکنجی صورتده حال و شان ، حادثه و ایش معنایه در . هر ایکی صورتده ده علمایه
بطریق الحقیقه « اولوالامر » اطلاق صحیح اولماز . زیرا علما حقیقتده بر ایش
و بر وظیفه باشنه کچمدکجه نه امر و فرمان ، نه ده ایش صاحبی دکدر لر . اونلر آنجق
اصحاب علم و فضیلتدر . اولوالامر ولایت امری حائر اولانددر که بونلرده امرادر .
بوراده (امرای) دن مقصد ، باشده امیر المؤمنین اولمق اوزره ناظر ، قوماندان ،
والی و قاضی کبی ولایت امری یعنی وظیفه سنک بخش ابتدییکی صلاحیته مبنی امر
و نهی ایتک ، عامه اوزرینه جبراً سوز کچیرمک حقنی حائر اولانددر . بو حقک

نصل ونه صورتله احراز اولونه جنی ایسه یوقاریده تفصیلاً ایضاح اولوندیغندن تکرارینه حاجت یوقدر .

علما ، علما اولوق حیثیتیه اشبو ولایت امری ، تعیر اصطلاحیسیله ولایت عامه بی حائر دکدر . علما رأی صاحبدر لر . اونلرله استشاره اولونوره رأیلرندن استفاده ایدیلیر . لکن رأی ذاتیلرینی قبوله بر مجبوریت شرعیه یوقدر .

علمایه اولوالامر اطلاق اولسه اولسه مجاز طریقله اوله بیلیر . حالبوکه بوراده یعنی [اطیعوا الله واطیعوا الرسول واولی الامر منکم] آیتده « اولی الامر » نظم کریمه ، بو صورتله مجازه حمل ایتک دوغری اوله ماز . زیرا آشاغیده بحث مخصوصنده ایضاح اولونه جنی اوزره « کلامده اصل اولان معنای حقیقده ، معنای مجازی آنک خلقی وفرعیدر . بناء علیه بر کلامک معنای حقیقی به حملی ممکن وصحیح اولدجه معنای مجازی به حملی جائز اولماز . تعیر دیکرله بر کلامک معنای حقیقیسنی اراده به مانع برقرینه موجود اولدجه اول کلامی معنای مجازی به حمل ایتک صحیح اولماز . عکسی تقدیرده سوزه ولغته اعتماد قالماز ، هر کس هر کلامه دیلدیکی معنایی ویرمهک قالفار . آرتق بر کلامدن مقصود اولان معنایی آکلامق قابل اوله ماز . کلامده معنای مقصودی افاده ده حجت اولمقدن چیقار . بونک ایچوندرکه بومشاهده علم بیان ایله علم اصول متفقدر .

ایشته بو قاعده به بناء آتیده کی (اولی الامر) ی بطریق المجاز علما معناسنه حمل ایتک صحیح اولماز . چونکه بوراده معنای حقیقی بی یعنی امر صاحببری معناسنی اراده به مانع و علم صاحببری معناسنی استخراجه باعث برقرینه یوقدر . بالعکس کرک قرینه عقلیه و کرک قرینه کلامیه معنای حقیقیسی یعنی امرا معناسنی مقصود اولدیغنه دلالت ایدیور .

قرینه عقلیه دلالت ایدیور . زیرا آنفاً بیان اولوندینی وجهله اصحاب امر ، حقیقنده امرادر . ولایت امری آنجق اونلر حائردر . علما ولایت امری حائر دکدر . مکرکه کندیدرینه والیک وقاضیک کی بروظیفه وولایت تفویض ایدلش اوله . بو تقدیرده امرادن بوسیلله اولوالامر دن معدود اولور لر .

قرینه کلامیه ده دلالت ایدیور. چونکه آیت مشارالیهانک سیاق و-باقی امرای مقصود اولدیغنه برقرینه فاطمه تشکیل اتمکده در . زیرا آیتک اوست طرفی ولایت امر و قضای حائز اولان ولات و قضاته اماناتی اهانه تودیع و بین الناس عدل ایله حکم ایتلمینی امر ایدیور. آلتی ده نزاع و اختلاف و قوعنده کتاب وسنته مراجعت ایدلمسی و جوبنی بیان ایله یور . [۱]

معتضلرک [آیت مشارالیهاده (امرا) دینیبوده (اولی الامر) دینمسی ده «مقصود علمادره» دینلرک قولنی تأیید ایدر . مقصد امرای اولسه یدی دوغریدن دوغری به «امرا» دینردی ، «اولی الامر» دینزدی [طرزنده سرد ایتدکلی مطالعه به کلنجه : بو مطالعه کندی علیهلرینه چیقار . چونکه امرای دیندیکی کبی علماده دینه مشدر . شو حلاله بزده عین مطالعه نی طرز آتی به قلب ایله علیهلرینه استعمال ایدرز و دیرزکه اگر اولوالامردن مقصد علما اولسه یدی (اولی الامر) یرینه دوغریدن دوغری به (علما) و یاخود (اولی العلم) دینردی . بونلردن بری و یا آنلرک مقامنه قائم اوله جق دیکر بر تعیر ذکر ایدلمسی ، اولوالامردن علما مقصود اولیوب امرای مراد ایدلمش اولدیغنه دلالت ایدر . بو مطالعه آنلرک ککندن دها قوتلی ، همده بک قوتلی اولدینی وارسته اشقیاهدر .

بوتون بو دلائلدن صرف نظر ایدره رک خصمک مطالعه سنی قبول ایدره جک اولسه ق ، ینه ادعایزه یعنی خلیفه به و آنک نصب و تعیین ایتدیکی رجال دولت و مأمورین حکومته اطاعتک و جوبنی قضیه سته خلل کلز . چونکه مطالعه مذکوره نهایته الامر آیت مبحوث عنهانک دلالتی ظنی اولسنی اقتضا ایدر . بوايسه وجوبک ثبوتنه مانع دکلدر . یوقاریده فصل ثانیده ، احکام خمسّه تکلیفیه نک ایضاحی صره سنده بیان ایدلیکی و بحث مخصوصنده ده توضیح ایدیه حکمی اوزره دلیل ظنی

[۱] آیت مذکورمک اوست طرفی [ان الله يأمرکم ان تؤدروا الامانات الی اهلها و اذا حکمتم بین الناس ان تحکموا بالعدل] ایت جلیله سی ، آت طرفی ده [فان تنازعتم فی شیء فردوه الی الله و الرسول ان کنتم تؤمنون بالله و بالیوم الآخر ذلك خیر و احسن تأویلاً] آیت منبغه سیدر .

ایله وجوب ثابت اولور . بوده بزم ایچون کافیدر . اعتراض مذکور اولسه اولسه امرایه اطاعتک فرض اولدینغه قائل اولان فقها عاینه وارد اوله بیلیر . حالبوکه بوده دوغری دکلدر . زیرا فقهانک بوخصوصده دایلی یالکنز آیت مشارالیهادن عبارت دکلدر . بوپابده دها برچوق نصوص شرعیه وارد اولمشدر . نته کیم برقاچ دانسی یوقاریده صحیح بخاری ومسلمدن تفلاً ذکر اولونمشدی . بحث سابقده اوزون اوزادییه تحلیل وتوضیح اولوندینی وجهله خلافت و ولایتک ماهیتلریده باشلی باشنه برر دلیل تشکیل اتمکدهدر . زیرا خلیفهیه واصحاب ولایت اطاعت ایدلیه جک اولورسه خلافت و ولایتک معناسی قالماز . امور دولت و مصالح ملت بالکلیه مختل اولور . قوت حقه غلبه ایدر . مملکتده وملت آرهسنده برشورش دائمی حکم سورر . نتیجهده وقتيله اندلسده اولدینی کبی دولتده، ملتده، حتی دین وشریعتده محو ومنقرض اولور کیدر .

ایشته بوخصوصده وارد اولان اونصوص شرعیه ایله برابر مباحوث عنه آیت جلیلهینی وبرده شو مطالعه ایله حکمت تشریح ومقصد شارعی امان واذعان ایله نظارتدقیقندن کچیرن فهقا، بونلرک هیئت مجموعهسندن (بدائع)ده تصریح اولوندینی کی امیرالمؤمنینه اطاعتک فرضیتنی استخراج ایله مشلدرر . بزجه شبهه یوقدرکه دیگر علماده بومشلهده فقها ایله متحددر . اونلرک بومقامده فرض یرینه (وجوب) تعیرینی قوللانماری، معنای اعمی اعتباریلهدرکه فرضده شاملدر . فصل ثانیدهده سویله مشدم که فقهای حنفیهدن ماعدا علمای اسلام عندنده فرض ایله وجوب آرهسند . فرق یوقدر . اصولیون وفقهای حنفیهده وجوب تعیرینی اکثریا معنای اعمنده استعمال ایدرلر .

بعض علماده آیت مذکورهده کی (اولی الامر) دن هم امراء همده علما مقصود اولدینغه ذاهب اولمشدرر . ابن قیمده (اعلام الموقمین) نامیله موسوم ومشهور اولان کتابنک باش طرفنده [والتحقیق ان الامراء انما یطاعون اذا امروا بمقتضى العلم فطاعتهم تبع لطاعة العلماء] دیشنه نظراً بوفکره ذاهب اولویور . بز بوندهده بر اصابت وحقیقت کوره میورر . چونکه برکره بوفکره کوره

آیتده کی « اولی الامر » دن عین زمانده هم معنای حقیقی وهم معنای مجازی ایکیسی بردن مراد ایدلمش اوله جق . حالبوکه قاعدهٔ اطلاق واحده برکلامدن معنای حقیقی ایله معنای مجازینک ایکیسی بردن قصد اولونه ماز .

نائیاً هر ایکی معناده عموم مجاز طریقله قصد ایدلمشدر ذیلله جک اولسه ، بوندنده اقوال علمایه اتباع و تقلیدک واجب اولسی لازم کلیر . حالبوکه یوقاریده (دین و شریعت) بختنده مشارالیه ابن قیمک استاذی ابن تیمیه نک (الفرقان) نامنده کی کتابندن نقلاً بیان ایدلدیکی وزیرده (اجتهاد و تقلید) بختنده دخی تفصیلاً ایضاح اولونه جنی وجهله تقلید واجب دکلدر . خصوصاً رتبهٔ اجتهادی احراز ایدن بویوک علمانک دیکر لرینی تقلید ایتسی قطعاً جائز اوله ماز . مشارالیه ابن قیمک کندیسیده تقلیدک شدتله علیهنده در . حتی ذکر اولونان (اعلام الموقعین) ی بالخاصه بونک ایچون تألیف ایله مشدر .

بیضاوینک (منهاج) ی ، علامهٔ قارینک (فصول البدائع) ی کبی معتبرات اصولیه و بالجمله مطولات فقهیهده صراحةٔ بیان اولوندینی اوزره علمایه بالکنز بریرده اطاعت واجب اولورکه اوده والی وقاضی اولمق کبی برنوع ولایت عامه یی حائز اولدقلری زماندن عبارتدر . بوده علمادن بولوندقلری ایچون دکل ، بلکه اولبابده مقتضی ولایت مخصوصه یی حائز وبوصورتله (اولوالامر) عدادینه داخل اولدقلرندن دولاییدر .

واقعا علما (امر بالمعروف) و (نهی عن المنکر) وجیهه سیله مکلف و بناءً علیه واجبات و محرماتده امر ونهی حقی حائزدر . لکن بوباشقه بر مسئله در . بو صنف علمادن بولونسون بولونماسون علی الاطلاق امت اسلامیه اوزرینه شرع شریفک تحمیل ایدلدیکی وظیفهٔ مراقبه دن متولد بر حقدرکه واجبات و محرماتی بیلن بوتون افراد ملت بو حقی حائزدر . بوده [کُتِبَ خَيْرَ اُمَّةٍ اُخْرِجَتْ لِلنَّاسِ تَامُرُونَ بِالْمَعْرُوفِ وَتَنْهَوْنَ عَنِ الْمُنْكَرِ] آیت منیفه سیله ثابتدر . بناءً علیه بو حقی مراقبه امام شمس الاثمه نک (مبسوط) نامیله معروف اولان اثرینک « کتاب السیر » نده

دیدیکی کبی ملت اسلامیہ نك صفت ممیزہ سیدر ، صنف علمایہ مخصوص و منحصر بر کیفیت دکلدر . بوخصوصده معروفات و منکراتی یعنی واجبات و محرماتی اجتهاداً ومدلاً بیلن برعالم ایله تقلیداً و سماً اوکره نن بر جاهل آره سنده فرق یوقدر . بوجتی برعالم برجاهله قارشی استعمال ایله بیله چکی کبی برجاهلده ارتکاب معصیت ایدن برعالمه قارشی استعمال ایله بیلبر .

افادات سابقه دن علمانك قدرینی تنزیل کبی بر مقصد آکلاشلماسین ! بو پك چرکین برافترا وسوء تفهم اولور . رتبه جلیله علمك اک عالی واک نجیب بررتبه اولدیغنی و بر انسان ایچون بوندن دها عالی ودها نجیب بررتبه بولونمدیغنی بحق تقدیر ایدنردت . یکانه مقصدمن ، حقایق شرعیه یی یا ککش فکرلردن تجرید و تخلیص ایله اولدیغنی کبی کوسترمك و [أنزلوا الناس منازلهم] حدیث صحیحی منطوقجه هر کسی کندی موقعنه اقعاد ، هر حق صاحبه اعطا ایله مکدر .

الحاصل امور دولت و مصالح ملتده حق تصرف و ولایت عامه یی حائر اولان ، یوقاریده تفصیل اولوندیغنی وجهله آنجق ذات خلافتناهیدر . علمانك بو باده نه شرعاً ، نه فقهاً و نه ده عقلاً هیچ برحق و ولایتی یوقدر . بناءً علیه عامه ایچون یالکتر خلیفه یه و برده آنک تفویض ولایت ایتدیگی اولوالامرہ اطاعت و اجبدر . خلیفه ، ایستر [الخلافة بعدی ثلاثون سنة ثم تصیر ملکاً] حدیث شریفی مفهومیمنجه خلافت کامله یی حائر خلفای راشدیندن اولسون ، ایستر خلافت کامله یی حائر بولونمیان ملوک و سلاطیندن بولونسون حکمده مساویدر . بوجهتله علی الاطلاق خلفایه و ملوک و سلاطینه اطاعت و اجبدر . بوخصوصده وارد اولان نصوص شرعیه مطلقدر ، بالجمله خلفا و امرایه شاملدر . بوتون مذاهب فقهیه فقهای بومسئله ده متفق اولدیغنی کبی ائمه حدیث و علمای کلام دخی بو حکمده فقها ایله متحد و یکزباندرلر . امام نووی (صحیح مسلم) شرحنده بومسئله ده اجماع منعقد اولدیغنی بیان ایدیور .

علمایه کلنجه : آنلر بوجه مشروح ولایت عامه یی حائر اولمدقلرندن بو باده آنلره اطاعت قضیه سی موضوع بحث اوله ماز . علما اصحاب مشورتدر . کرک

دولت و كرك ملت همچون هر حال و كارده علمایه احتیاج دركاردر . خصوصیه (وشاور هم فی الامر) و (امرهم شورى بینهم) نظم جلیلاری مقتضاسنجه حكومت اسلامیه مشورت (مشروطیت) اساسی اوزرینه مبتنی و مؤسسدر . بو جهته امیرالمؤمنینك امور دولت و مصالح مملكتی تدویر و تمشیده اصحاب علم و معرفت و ارباب تجربه و رویتله مشاوره ایتمی لازمه دندر . لکن علمادن معین برذاتك - ولو كه زمانك اك بویوك عالمی اولسون - رأی و قولنه اتباعه مجبوربت شرعیه سی یوقدر . مصیب كورر ایسه قبول ایدر ، كورمز ایسه ایتمز . ایشته شوافادادن مستبان اولویور كه مباحوث عنه آیت کریمه ده کی (اولی الامر) دن علما مقصود اولدیغنی ادعا ایدن بعض علمانك اشبو ادعایه ، هیچ بر دلیل صحیحه مستند دكدر . بناءً علیه بالاده ذكر اولونان برنجی اعتراض ، اساساً وارد اولماقوله برابر ماهیه ده هیچ بر اساس شرعی به مستند دكدر .

ایکنجی اعتراضه - دیورلر كه اولوالامرہ اطاعت قضیه سی ، احکامی شرع شریفده مسكوت عنه اولان احواله مخصوص و منحصردر . حکمی نصوص شرعیه ایله ثابت افعاله شامل دكدر . عكسی تقدیرده احكام شرعیه نك اولوالامر طرفدن جواز نسخه قائل اولوق لازم کلیر كه اصلاً جائز دكدر . مثلاً حلال اولان بر شیشی منع ایتك ، آنی حرام قیلمق دیمكدر . بوده حل و اباحه حکم شرعیسی نسخ ایتك دیمكدر . نسخ ایسه آنجق شارعہ مخصوص و منحصرأ آنك حقیدر . هیچ بر فردك نسخ احكامه صلاحیت شرعیه سی یوقدر . بناءً علیه امیر المؤمنین ، نه شرعاً جائز و حلال اولان بر شیشی ممنوع و حرام ، نه ده حرام اولان بر شیشی حلال قیله ماز و بوكی یرلرده مشارالیه اطاعت جائز اولماز . . .

جواب - اوت هیچ شبهه یوقدر كه نسخ آنجق شارعہ مخصوص و منحصردر . شارعدن باشقه هیچ بر فردك نسخه صلاحیتی یوقدر و اوله ماز . چونكه بوصورتده شریعتك حکمی قالماز . ائمه حنفیه دن [عیسی بن ابان] کبی بعض اکابر اصولیون ، اجماع ایله نسخهك جوازینه قائل اولمش ایسه ده بوفکر ، جمهور علما طرفندن

مظهر قبول اولیوب رد ایدلمشدر . نسخ آنجق نص شارع ایله اولور . رأی ایله ، اجماع ایله نسخ جائز اولماز . بناءً علیه امام المسلمین حضرتلرینکده بوبابده هیچ بر صلاحیت شرعیسی قبول اولونهماز . نسخ نتیجه اعتباریله شرع جدید وضع ایتک دیمکدرکه نه خلیفه نك ، نه ده مرشد کامل ومجتهد اعظم کبی باشقه بر ذاتک بوکا قطعياً وقاطبةً حق وصلاحیتی اوله مااز . بوجهله مسلمدر . بونی انکار ایدن ، عکسی ادعا ایلینده یوقدر . یوقاریده (دین وشریعت) بختنده برتفصیل ایضاح اولوندینی اوزره بویله برادعا ، دین اسلامه سالک اولان برذاتک لسانه یاقشماز .

بویولده اعتراض ، (نسخ) ک نه دیمک اولدینی بیلمه مکدن ایلری کلیر . نسخک معنای شرعیسی بیلینه جک اولور ایسه اعتراض مذکور ، جوابه حاجت قالمقسزین کندیلکنندن سقوط ایدر . آکلاشیلیورکه معترض ، ایکی جهتدن غفلت ایدیور . بری نسخک نه دیمک اولدینی . دیکری اولوالامرہ اطاعت قضیه سنک امر شارع مقتضایی بولوندینیدر . معترض بویکی جهتی تدقیق ایتک زحمتی اختیار ایتش اولسه یدی بویله براعتراض درمیان ایتزدی . بوجهتله بومشکلک مفتاح حلی بویکی نقطه نك بیلنمسنددر ، بونلر بیلینه جک اولور ایسه اشکال مذکور حل ایدلمش اولور .

شو حالده ذکر اولونان اعتراضه ، بوجه آتی ایکی صورتله جواب ویریلیر : اولاه خلیفه نك وتعبیر اعم ایله اولوالامرک امر ونهی نافذ وواجب الاتباعدر دیمک ، خلیفه واولوالامر احکام شرعیسی نسخ وشرع جدیدوضمنه صلاحیتداردر دیمک دکلدر . نسخ مسئلهسی باشقه ، اولوالامرہ اطاعت قضیهسی باشقه در . ثانیاً ، اولوالامرہ اطاعتک وجوبیده بر حکم شرعیدر ، متعدد نصوص شرعیه واجماع ایله ثابتدر . بوجهتله اولوالامرک امر ونهی ، شارعک مساعدده سنه وبعض خصوصاتده امرینه مستنددر . آنکچون اولوالامرہ اطاعت ، شارع اطاعت دیمکدر . وامر شارع ایله واجبدر . شریعتدن خارج باشقه برشی دکلدر . ایکنجهی جواب ، یوقاریده مفصلاً ایضاح اولوندینی ایچون تکرارینه حاجت یوقدر . فقط برنجی جواب ، ایضاحه محتاج اولدینندن بوجه زیر ایضاح اولونور .

اصول بزدوی ، توصیح و فصول البدائع کبی اک معتبر اصول فقہ کتابلرندہ بیان اولوندینی اوزره نسخ ، بر حکم شرعینک مدت جریانی نہایت بولدیفنی بیاندن عبارتدر . تعریف دیکرله نسخ ، حکم اولی رفع و تبدیل ایله مکدر . برنجی تعریف شارعک علمنه ، ایکنجی تعریف بزم علممزه نظر آدر . شو تعریفلردن آکلاشینیرکه نسخ ایله حکم اول کلیاً مرتفع وزائل اولور ، بعدالنسخ آنک وجود و بقاسندن اثر قالماز . او آرتق منعدم ویرینه باشقه بر حکم قائم اولور . بوده مثلاً حلال اولان برشینک حل و اباحه سی کلیاً واصلی اعتباریله رفع و ازاله ایدوب آنی لعینه حرام قیلمق و بالعکس حرام اولان برشینک حرمتی اساس و ذاتی اعتباریله رفع ایدوب آنی لعینه حلال یا بمق ایله حصول بولور . نته کیم بوجهت (اصول بزدوی) نک حقیقت و مجاز بختنده صراحة ذکر ایدلمشدر .

یوقاریده فصل ثانیده بیان و تفصیل اولوندینی وجهله حرام ایکی نوعدر :

حرام لعینه ، حرام لغیره . حرام لعینه عینی و ذاتی حرام اولان شیدر . لاشه وقان کبی . حرام لغیره ذاتی حرام اولیوب حرمتی ذاتندن خارج باشقه برشیدن نشأت ایدن شیدر . غیرک مالی اکل ایتمک کبی . برنجیسنده منشأ حرمت ، اول شینک ذاتی و ماهیتدر . مثلاً لاشه نک منشأ حرمتی کندی ماهیتدر . ایکنجیسنده منشأ حرمت ، کندی ماهیتندن خارج باشقه برشیدر . مثلاً غیرک اکمکنی بلااذن اکل ایتمک حرامدر . لکن بونک حرمتی ، اکمکک ذاتندن و ماهیتندن متولدکلدر . باشقه سنک مالی اولمسندن و بناء علیه غیرک حتی تعلق ایتسندن دولاییدر . اکمکک کندیسی ایسه ماهیتته نظراً حرام اولیوب حلالدر . بونک ایچون صاحبنه حلال اولور . حالبوکه حرام لعینه ، ماهیتته نظراً حرام اولدیفندن صاحبنه حرامدر . [بویابده فضاه ایضاحات ، فصل ثانیده بحث مخصوصنده کچمشدی ، اورایه مراجعت ایت .]

ایشته شو تعریفات و ایضاحات ایله نسخک ماهیت شرعیه سی آکلاشلمش اوله جفتدن فضله ایضاحات اعطاسنه لزوم کورلمه مشدر . شمدی ده بونی خلیفه نک امرینه تطبیق ایدلم . باقالم امر مذکور اطاعتکک وجوبندن منصوص اولان احکام شرعیه نک نسخی لازم کلیورمی ، کلیورمی ؟ . . .

ذات حضرت پادشاهی، مصلحت عامه ملاحظه سینه مبنی حل و اباحه سی نص شرعی ایله ثابت اولان افعال مباحه دن هر هانکی برینی منع ایتسه، ذکر اولونان حکم شرعی بی نسخ ایتمش اولماز . چونکه بو، نه او حکم شرعینک مدت جریانی نهایت بولدیغنی بیاندر، نه ده اوننی رفع و تبدیلدر . حکم مذکور کماکان باقی و جاریدر، مدتی نهایت بولماش اصلی اعتباریله رفع و تبدیل اولونماشدر. مثلاً حل و اباحه سی [أَحَلَّتْ لَكُمْ بِأَيِّمَةِ الْأَنْعَامِ] نص جلیلی ایله ثابت اولان صغیر و یا قویون اُنک منع اکلنی حقیقه - نسلک و یا صحت عمومیه نک محافظه سی کبی بر مصلحت عامه ملاحظه سینه بناءً - اراده سینه صادر اولسه، بو اراده او حکم منصوصی نسخ دیمک اولماز . زیرا بوراده صغیر و یا قویون اُنک ذاتی حرام قیلنمیور . ذاتی اصلی اعتباریله اوینه حلالدر . صغیر و یا قویون اُنی بو اراده سینه ایله یوقاریده [حرام لعینه و حرام لغیره] بختنده بیان اولوندیغنی وجهله فعل اكله صالح محل شرعی اولمقدن چیقارلماش و بناءً علیه اصل حکم شرعی رفع و تبدیل اولونماشدر . بو جهتله اشبو اراده سینه حکم شرعی بی نسخ دیمک دکلددر.

آنفاً ایضاح اولوندیغنی اوزره نسخ، آنجق حلال اولان برشیئی حل و اباحه سی کلیاً اصلی اعتباریله رفع و ازاله ایدره ک حرام لعینه عدادینه ادخال ایتمکه اولور . تعیردیگرله نسخ، برشیئی کندیسندن مقصود اولان فعله، مثلاً بيمك فعلنه صالح محل شرعی اولمقدن چیقارمقله اولور . بوراده ایسه بویله برشی یوقدر . اراده سینه ایله ممنوع اولان شیء، اولسه اولسه حرام لغیره قیلندن اولور .

بونک ایچوندرکه بر کیمسه، اکلنی با اراده سینه ممنوع اولان صغیر و یا قویون اتی اکل ایدره ک اولسه لعینه حرام اولان بر شیئی اکل ایتمش اولماز، بالعکس عینی اصلی اعتباریله حلال اولان برشیئی اکل ایتمش اولور . بناءً علیه بوجهتدن مؤاخذه اولونماز. لکن دیگر برجهتدن یعنی امر ولی الامر عدم اطاعتندن و بو اطاعتک و جوینی افاده ایدن امر شارع مخالفتندن دولایی مؤاخذه اولونور. نته کیم بر کیمسه برینک اکلکنی بلا اذن اکل ایتسه، ذاتاً و اصلاً حرام اولان بر شیئی اکل ایتمش اولیوب

لغيره حرام اولان يعنى باشقه سنك ملكى اولديغندن دولايي ممنوع اولان بر فعلى ارتكاب ايله مش اولور . بو جهته اول كيمسه فى الاصل حرام اولان بر شئى اكل ايتديكندن دولايي دكل ، غيرك مانى بلا اذن اتلاف ديمك اولان بر فعل ممنوعى ارتكاب ايتديكندن دولايي مؤاخذه اولونور .

الحاصل نسخ ، بر حكم شرعى يي اسلندن واساسندن رفع ايتك ويريته باشقه بر حكم اقامه شئى صورتيله تبديل ايله مكدور . بوده مثلا حلالى حرام لعينه و حرامى حلال لعينه ياقوله حصوله كليز . حالبوكه امر ولى الامر ايله بر حلال حرام لعينه ويا بر حرام حلال لعينه ياپلمش اوليور . يالكز حرام لغيره ويا حلال لغيره حكمنى اكتساب ايله مش اوليور . بو ايسه نسخ ديمك دكلدر . اونرك حكم اصليرى بيه باقيدر ، تبديل ايتمه مشدر .

بو مقامده بر سؤال وارد خاطر اولور كه شودر : بر شيدده حل و حرمت كنج برى بريته ضد ايكي حكم شرعى اجتماع ايدده بيليرمي ؟ بناء عليه بر شئى ، ولو كه حرام لغيره اولسون عين زمانده هم حلال وهم حرام اوله بيليرمي ؟ ..

بو سؤاله بر وجه آنى جواب ويرييلير : واقعا بر شيدده بر زمانده و بر جهتدن يكديكريته ضد ايكي حكم شرعى اجتماع ايدده من . چونكه بو صورتده اجتماع ضددين لازم كليز كه محالدر و تكليف مالايطاقى مستلزمدر . بو سبيله بر شئى عين جهتدن هم واجب وهم حرام ، يا خود هم حلال وهم حرام اوله ماز .

لكن جهتلر مختلف اولديغى تقديرده بر شيدده باشقه باشقه جهتلردن برى بريته ضد ايكي حكم شرعى اجتماع ايدده بيلير . بونده بر محذور يوقدر . زيرا بو صورتده اجتماع ضددين لازم كليز . اجتماع ضددين محذوري آنجق جهتلر متحد اولديغى تقديرده وارد اولور ، جهتلر مختلف اولونجه وارد اولماز . بناء عليه جهتلر مختلف اولوق شرطيله بر شئى بر جهتدن حلال ، ديكر جهتدن حرام اوله بيلير . تعبير ديكرله بر جهتدن مطلوب ، ديكر جهتدن ممنوع اوله بيلير . بونده محدث ، فقيه و متكلم عموم علماي اهل سنت متفقدر . يالكز امام احمد بن حنبل حضرتلى مخالفت ايتمشدر . امام غزالى (مستصفي) نام كتابنده امام شاراليهدن اول اسلافك بو مسئلهده اجماعى منعقد اولديغى بيان ايديبور .

بونك مسائل شرعيه ده بك جوق مثالی واردر . از جمله مكان مغبوبده نماز قيلمق مسئله سی بونك مثال مشهوریدر . معلومدر که هیچ برکیمسه دیکرینك ملکئی اشغال ایتك حقئی حائز دکادر . بو غصب دیمکدر که صورت قطعیه ده ممنوعدر . نظر شارعه ده حقوق عباد بك محترم اولدیغندن الكیوک عبادت اولان نماز ایچون بیله غیرك ملکئی اشغال شرعاً تجویز ایدله مشدر . شو حاله برکیمسه دیکرینك مثلاً عرصه سنه بلاذن داخل ولهرق نماز قیلسه ، اشبوصلات نماز اولمق جهت واعتباریه صحیح و بناء علیه فاعل مکلفدن دین صلات ساقط اولور . قضا لازم کلز . فقط بونماز ، عین زمانده غیرك ملکئی اذن و رضایی بولمقسزین اشغال و بوده غصب دیمك اولدیغندن بواعتباریه برفعل ممنوع ارتکاب ایدلمش اولور . ایشه بومسئله ده صلات اصلی اعتباریه صحیح و مشروع ، وصفی یعنی امر مجاوری اعتباریه مکروه و غیر مشروعدر . کذلک زوجه یه تقرب کیفیت ، اساساً مشروع اولدیگی حاله عادت حالده یعنی وقت حیضه تقرب ، (لَا تَقْرَبُوهُنَّ حَتَّى يَطْهُرْنَ) نص جلیلی ایه ممنوعدر . مع هذا زوج ، اشبو ممنوعیت شرعیه یه مخالفتله زوجه سنه تقرب ایدمك اولسه حال حیضه تقرب اولمق اعتباریه ممنوع ، اصلی اعتباریه یعنی زوجه منکوحه یه تقرب اعتباریه ده صحیح و مشروع اولور : زنا کی باطل اولماز . بناء علیه اوزرینه حکم شرعی ترتب ایدر . شو حاله بو تقریدن تولد ایدمك جوجق ولد مشروع اولور ، بیلرنده توارث جریان ایدر .

کذا درده قدر تعدد زوجاتك مشروعیتده زوجه لر آرمسند . عدالته وقاعده مساواته تمامیه رعایت ایتك ، (فَإِنْ خِفْتُمْ أَنْ لَا تَعْدِلُوا فَوَاحِدَةٌ) نظم کریمی ایجابجه شرط اولوب عکسی تقدیرده بردن فضله زوجه آلمق جائز دکلدر . بونکله برابر نفس الامرده حقیله رعایتی متعذر اولان بو شرط عدالته و مساواته رعایت ایدمه یه جک اولان برکیمسه ، اشبو ممنوعیت شرعیه یه مخالف اولهرق ایکی ویا اوچ قادین تزوج ایتسه ، ایکنجی و اوچنجی زوجه لری ایه واقع اولان معامله ازدواجیه زنا نوعندن اولماز . بولردن تولد ایدمك جوجقلرده ولد مشروع و بابالرینه وارث

اولورلر. زیرا درده قدر تعدد زوجات اصلی اعتباریله و (فَانَكِحُوا مَا طَابَ لَكُمْ
مَنْثَى وَثَلَاثَ وَرُبَاعَ) نص منی ایله مشروعدر. مسئله مفروضهده کی ممنوعیت
اصلندن دکل، باشقه برجهندن یعنی عدل و مساواته عدم رعایت قضیه سندن متولددر.
ماء مفسوب ایله آبدست آلمق، جمعه نمازینه اذان وقتنده معامله بیع و شراده
بولونمق دخی بویهدر. ماء مفسوب، مفسوب اولمق یعنی باشقه سنک مالی بولونمق
حیثیتیه آنی ولوکه آبدست ایچون اولسون اتلاف ایتمک قطعاً جائز دکلدر، حرامدر.
مع هذا غاصب آنکه آبدست آله صحیح اولور. آرتق تکرار ایکنجی بر آبدست
آلمق واجب اولماز. فاعل بونکه واجبی ادا ایتمش اولور. چونکه ماء مفسوب،
ماء طهور اولمق اعتباریله آنکه آبدست آلمق مشروعدر. باشقه سنک مالی اولمق
اعتباریلهده آنی اتلاف ممنوع و غیر مشروعدر. اولکی اعتبار ایله آبدست صحیح اولور.
ایکنجی اعتبار ایلده عین زمانده بر ممنوعیت شرعیه ارتکاب ایتمش دیمک اولور.
جمعه نمازینه اذان وقتنده بیع دخی بو حکمدهدر. یعنی بیع مذکور نص قرآن ایله
ممنوع اولمقته برابر اصلی و ماهیتی اعتباریله مشروع و صحیح اولور، اوزرینه احکام
بیع ترتب ایدر.

آرتق بونلرک شرع شریفده امثال و اشباهی بک چوقدر. اساسی (حسن و قبح)
مسئله-یدر. آشاغیده بحث مخصوصنده تفصیل اولونه جنی اوزره بر شی حد ذاتنده
کوزل اولمقته برابر باشقه بر جهندن چرکین اوله بیلیر. زیرا حسن ذاتی قبیح غیریه
منافی دکلدر. عکسیده بویهدر. بونک ایچوندرکه اصولیون افعال بشریه بی کوزلک
و چرکینلک اعتباریله حسن لعینه و حسن لغیره، قبیح لعینه و قبیح لغیره ناملریله
تقسیم و تفریق ایدرلر.

ایشته شو ذکر اولنان مثاللرک هر برنده باشقه باشقه جهتلردن یکدیگرینه ضد
ایکی حکم شرعی اجتماع ایتمشدر. بونترده بویه اولدینی کی امر ولی الامر مخالف
مسئله سنده دخی حکم بو منوال اوزره جاریدر. مثلاً یوقاریده ذکر اولونان مثاله
اولدینی وجهله بر کیسه، بر مصلحت عامه ملاحظه سنه بناء طرف خلافتنا هیدن

اکلی منع اولونان صیغیر اتی اکل ایتمش اولسه ، فی الاصل نص شارع ایله مباح اولان بر شیئی اکل ایتمش اوله جفتدن اصلی اعتباریله حلال و مشروع اولور و بو جهتدن مؤاخذه اولونماز. فقط عین زمانده اطاعتی ینه نص شارع ایله واجب اولان اراده خلافتناهی به مخالفت اعتباریله ده ممنوع و غیر مشروع اولور و بوندن دولایی مؤاخذه اولونور .

مسئله نی بر قات دها تنویر ایتمش اولوق ایچون شو جهتی ده عرض ایده ایم که احکام شرعیه ، احکام اصلیه و احکام غیر اصلیه اولوق اوزره ایکی قسه تفریق اولونور. احکام اصلیه ، دوغریدن دوغری به ابتداء واصله وضع و تشریح اولونان احکامدر. احکام غیر اصلیه ، اسباب عارضیه مبنی ثانیاً مشروع قیلینان احکامدر. مثلاً لاشه نی اکل ایتمک حرامدر ، صوایچمک مباحدر ، رمضان اینده اوروج طوتمق فرضدر. ایسته بونلر یعنی لاشه نك حرمتی ، صویک اباحه سی ، اوروجک فرضیتی ، اسباب عارضیه مبنی اولیه رق دوغریدن دوغری به رأ و ابتداء وضع و تأسیس اولوندقلری ایچون برر حکم اصلیدر لر .

بونکله برابر بر محله آچلقدن هلاک اوله مرتبه سنه کلوبده لاشه دن باشقه بیه جک بر شی بوله میان بر شخصک لاشه نی اکل ایتمسی ، بوغازنده لوقه قالدیغندن دولایی حیاتی تهلکه یه کیرن بر ذاتک صوایچمسی واجب ؛ خسته اولان بر کیمسه نك اشتداد مرضنی موجب اولماق ایچون اوروج طوتمامسی جائدر . بومسئله لرده کی وجوب ایله جوازده بر سبب عارضی و عذر شرعیدن دولایی مشروع قیلندقلری جهته حکم غیر اصلیدر لر .

کذا بر کیمسه نك مالی آنک اذن و رضای بولتمقسزین اتلاف ایتمک ، مثلاً برینک خانه سنی جبراً بیقیمق صورت قطیعه ده ممنوعدر ، حرامدر . بو حرمت ده ابتداء واصله وضع و تشریح اولونمش بر حرمت اولدیغندن حکم اصلیدر. مع هذا جوارده ظهورایدن حریقک اطرافه سرایتی منع ایتمک مقصدینه مبنی امرولی الامر ایله اول خانه نك هدمی سرعاً جائز اولور. بوجوازده بر حکم غیر اصلیدر ، مصلحت تامه معذرتنه مبنی مشروع قیلنمشدر .

احکام مذکورہ نك شریعتہ و فقہدہ امثالی بك چوقدر . بونلرك و یوقاریدہ
بکن مسائلك هیچ بری نسخ دكلدر . شرعآدہ ، عقلاَدہ بونلرہ نسخ اطلاق
اصلا صحیح اولماز . نسخ ، بر حکم اصلی بی کلیاً رفع و النفا و آنی موجب اولان
دلیل شرعی بی عملدن تماماً اسقاط ایتك ، یرینه دیگر بر حکم اصلی جدید اقامہ
ابله مك صورتیلہ وقوع بولور . مسائل مذکورہ ایسه بویله برشی واقع اولماشدر .
بونلرہ حکم اصلی و آنك مستند بولوندیغی دلیل شرعی ، کماکان باقی و معمول بهدر .
کرك حکم اصلی و کرك حکم غیر اصلی هر ایکسی ده شرعاً معمول به و معتبر اولان
برر دلیل شرعی به مستند حکم شرعیدرلر . برنجیسی اصلدر . عوارضدن قطع نظر
ایدلرکده ذاتی و ماهیتی اعتباریله ثابت ولایتغیردر ، اصلا تحول ایتمز . ایکنجیسی
دوغریدن دوغری به آنك فرعی دکلرده فرعی مثابه سندهدر . احوال و اشخاصه ،
عوارض و اسبابه کوره تحول ایدر .

احکام غیر اصلیه نك اکثریسی ، اعذار عباده بناءً احکام اصلیه بی تخفیف
و بناءً علیه خلقه یسر و سهولتی تحصیل ایچون مشروع قیلنمشدر . اسان شرعده
بو قبیل احکام غیر اصلیه به (رخصت) ، ماعداسنده (عزیمت) اطلاق اولنور .
بحث مخصوصنده تفصیلات اعطا اولونه چقدر . [**إِنَّ اللَّهَ يُحِبُّ أَنْ تُؤْتَى رِخْصَةٌ
كَمَا يُحِبُّ أَنْ تُؤْتَى عَزَائِمُهُ** . . حدیث رواه الامام احمد والیهقی والطبرانی] .

ایشته سو ایضاحات مفصله کوستریورکه کرك احکامی شریعتده مسکوت عنه
قالان امور مباحده و کرك احکامی منصوص اولان احوال و افعاله اولوالامرہ
اطاعت قضیه سی احکام منصوصه بی نسخ دیمك دكلدر . بونك نسخ ایله اصلا مناسبتی
یوقدر و بو خصوصده احکام غیر منصوصه ایله احکام منصوصه مساویدر . بناءً علیه
یوقاریدہ ذکر اولونان « نسخ » اعتراضی من کل الوجوه باطل و غیر وارددر .

سالف الذکر احکام اصولیه و مسائل فقہیه نك جمله سندن قطع نظر ایدلرکی
تقدیرده دخی ینه اعتراض مذکور وارد دكلدر . چونکه یوقاریدہ تفصیلاً بیان
اولوندیغی وجهله امور عامه به متعلق خصوصاتده اولوالامرک مصلحتی تضمن ایدن

تصرفاتك تفادى ، اولبايده وارد اولان متعدد نصوص شرعيه مستند بر حكم شرعى اولدينى كې اولوالامرء اطاعتك وجوبى كىفتى ده عىنى نصوص شرعيه راجعاه مستند بر حكم شرعيدر . بونك ايچوندر كه اولوالامرء اطاعت ، شارع ، اطاعت ديمكدر . بشقه برشى دكلدر .

مسئله حد داننده يك مهم وغايت نازك بر مسئله اولمقله برابر آكلاشلميه جق درجه ده دى مغلوق و مشكل دكلدر . حال بويلا ايكن ينه نه قدر ايضاحات ويريلسه كافى كليور ، بر جوق ذهنلك شبهه وترددن قورتولمدينى كوروليور . آكلاشلييور كه بو مسئله ده ذهنلى ترده دوشورن كىفت ، حلال و حرام كله لريدر . برى چيقوبده [نصل اولويورده حكومت ويا خليفه ، حرامى حلال ، حلالى حرام ياپاييليور ؟ !! . هيچ بو شرعاً تجويز اولونه بيليرمى ؟ .. بو عادتاً !!] نمود بالله !! . [ديه جك اولسه ، در حال كوزلر يره اينيور . ذهنلر حيرت وتردد ايچنده قالييور .

حالبو كه مطالعات سالفه ايله مباحث سابقه ده بيان اولونان احكام فقهيه واصوليه ، امعان واذعان ايله تدقيق وتامل اولونه جق اولور ايسه بو بايد ترده اصلا محل اولمدينى تين ايدر . بر كره حكومت يعنى اولوالامرء ، حرامى حلال ويا حلالى حرام ياپاييلير دين يوقدر . بونى ياپان انجق شارعدر . شارعدن باشقه هيچ بر كيمسه نك بوكاصلاحتى يوقدر باشده خليفه اولمق اوزره على العموم اولوالامرء افراد كې شريعتك امرونهينه تابعدر ، احكام شرعيه ايله مقيددر . بونده سوز يوقدر . لكن دوشونوليور كه اولوالامرء امور عامه ده تصرفاتى و آنلره اطاعتك وجوبى ده ، شريعتك امرونهيه مقتضاسيدر . او حالده اولوالامرء امر ونهيندن و آنلره اطاعتك وجوبندن بر حرامك حلال - يعنى حلال لغيره - و بر حلالك حرام - يعنى حرام لغيره - تعيرديكرله جائز اولميان بر شينك جائز و بالعكس جائز اولان بر شينك غير جائز اولمى لازم كليور سه بو اولوالامرء دوغريدن دوغرى يه ذاتلرندن متولد صلاحيتلرندن ، رأساً ومستقلاً اونلرك امرونهيلرندن دولاي لازم كليور . بلكه شارعك بو خصوصه شرف تعلق ايدن امر ونهينك مقتضاسى اوله رق لازم كليور .

مع هذا یوقاریده بیان اولوندینی اوزره اولوالامرہ اطاعتک وجوبی امرتده وجودی مشروط ولا بداولان ایکی شرطی خاطر دن چیقار ماملیدر. بری اولوالامرک امر ونهی شارعه قارشی معصیتی مستلزم اولماق ، دیکری مصلحت عامه یه مبتنی بولونمقدرد. دأتما وهر یرده بو ایکی قیدی نظراعتباره آلمق لازمدر . بونلردن بری بولونیمه جق اولور ایسه اولوالامرک تصرفی وامرونهی جائز اولیه جنی کبی اطاعتده واجب اولماز .

ایشته بورایه قدر واقع اولان ایضاحات ایله خلیفه یه واولوالامرہ اطاعتک نره لرده واجب اولدینی ، نه کبی یرلرده جائز اولیه جنی و بو باده سرد ایدیلن اعتراضاتک مجرد حقایق شرعیه یه عدم وقوفدن نشأت ایتمش بولوندینی تامیله آکلاشلمشدر . اگر شو نرومندن فضله اعطا اولونان ایضاحات دخی قناعت بخش اولیور و یا سوزمزه اعتماد ایدلیور-ه ، یوقاریده صرہ سی دوشدکجه کوستریلن مأخذله واعتماد اولونان هر هانکی کتب فقهیه یه مراجعت ایدلسین ، سوزلرمز دوغریمیدر ، دکلیدر ؟ آکلاشیلیر .

خُذْ مَا تَرَاهُ وَدَعْ شَيْئاً سَمِعْتَ بِهِ
فِي طَلْعَةِ الشَّمْسِ مَا يُغْنِيكَ عَنْ زُحَلٍ

خليفة نك وضع قوانینده درجه صلاحیتی

مقام خلافت ، وضع قوانین خصوصنده معین بر مجتهدک رأی واجتهادیه شرعاً مقید دکلدر . یوقاریده (دین و شریعت) بحثده بیان اولونمشدی که مجتهدلرک مجرد رأی واجتهادلرندن متولد احکام فقهیه شریعت دکلدر . شریعت ، آنجق واضع شریعتک وضع ایتمدیکی احکامدر که احکام منصوصدن عبارتدر . بو جهته ذات حضرت

پادشاهی ، هانکی مجتهدك اجتهاداتی زمانك احتیاجنه موافق بولور ایسه آنی .
ترجیح ایدر . بو خصوصه صلاحیت کامله بی حائزدر .

بو صلاحیتی بیان مقصدیله در که فقها [مسائل اجتهادیه ده امام المسلمین حضرتلری ،
مهرانکی بر مجتهدك رأیله عمل ایدلمنی امر ایدر ایسه آنکله عمل واجب اولور]
دیور . نته کیم بو جهت مجله احکام عدلیه نك [۱۸۰۱] نجی ماده سنده تصریح
ایدلیکی کی معتبرات فقهیه دن (بدایع) نامیله معروف اولان کتاب کزینک بومسئله
حقنده کی عبارسی یوقاریده (۱۲۶) نجی صحیفه نك هامشده عیناً نقل ایدلمشدی .

بونک سببی شودر که نصوصه مستند اولیان اقوال فقها ، محصول آرادر . نظر
شریعتده رأی اولمق اعتباریله بر رأیک دیگر بر رأی اوزرینه رجحانی اوله میه جفتدن .
اقوال فقها نك ، موجود و متروک بالجمله مذاهب فقهیه نك شرع شریفه نسبتی مساویدر .
دولتجه تنظیم قوانین خصوصنده کوزه دیله جک اساس ایسه منافع عمومیه مملکت ،
تعبیر اصطلاحیسی وجهله مصالحت عامه ملندر . بناء علیه هانکی مجتهدك رأی وفکری
بو اساسه توافق ایدیورسه او ترجیح و اختیار اولونور .

دولتی عوام ناس منزله سنه تنزیل ایتمه ملیدر . افرادك بر مذهب معینی التزام
ایتمسند . بروجوب شرعی ویا بر لزوم سیاسی تصور اولونه بیلیر . فقط حکمت تشریعه
ومقاصد شارع ، نظراً دولت حقنده اوله بروجوب و بویله بر لزوم تصور اولونه ماز .
حالبوکه بحث آتیده ایضاح اولونه جنی اوزره افرادك بیله معین بر مذهب فقهی بی
التزام ایتسی شرعاً واجب دکلدرد . نته کیم مذاهب موجوده نك تقررندن اول افراد ،
زمانمزده اولدینی کی معین بر مذهبه سالک دکلردی .

افراد حقنده ثابت اولیان شوو خوب ، حکومت حقنده نصل تصور اولونه بیلیر؟ .
حکومت ایتی افراد ایتی دکلدرد . افراد کندی خصوصی ایشلرنده معین بر مذهبی
کندیلرینه دستورالعمل آنماز ایدم بیلیرلر و شخصلرینه منحصر قالیر . ذات حضرت
پادشاهی ده شخص هایونلرینه عاند خصوصاتده بو صورتله حرکتده مختاردر . لکن
امور دولتی تدویرده حال وزمانك ایجاباتی ، ملنک و هر صنف خلنک احتیاجاتی ،

خلاصه دولت و ملتک ترقی و تعالیسی نه کی شیره متوقف ایسه آنلری کمال دقت و بصیرتله نظر اعتباره آلهرق آکا توره اتخاذ تدابیره شرعاً و وظیفهٔ مجبوردر .
زیرا خلافت و حکومت تشکیلندن مقصد و غایه ، [الاسلامُ یَعْلُو وَلَا یُعْلَى]
حدیث شریفی منطوقجه دولت اسلامیه و کلمه الهیه بی اعلا ، مات اسلامیه نك سعادتتی
استحصالدر . غایه بو اولنجه بونک اسباب حصولتی استکماله صرف مقدرت امر
مهمیده مقام خلافت ایچون ایفاسی واجب بر وظیفهٔ مبعجاهدر . چونکه [مایتوقف
علیه الواجب فهو واجب] قاعده اصولیه سی ایجابجه ، بر شی واجب اولدقده آنک
موقوف علیهی اولان شی دخی واجب اولور .

شو حالده حکومتی بر مجتهدک اقوالیله تقييد ایتمک ایجاب ایدره . زیراحکومت ،
او صورتله تقييد ایدیله جک اولور ایسه وظیفه سنی مطلوب و جهله ایفا ایدره منر .
بونندن ده غایه مقصوده به بدل بیلیمه رک ، ایستیمه رک عکسی والیم نتیجه لر حصوله
کلیر . نته کیم مع التأسف شمدی به قدر اویله اولمشدر . زمانمزده بونک بعض نتایج
مؤلمه سی کورلمش و کورلمکده بولنمشدر .

مسائل فقهیه و فتاوی واقعه برر برر نظر تدقیق و تبعدن کچریله جک اولور ایسه
کورولور که فقها ، افکار فقهیه لرنده مختلف نظریه لر تعقیب ایتمکله برابر زمانلرینک
شرائط حیاتیه سنه کوره اجتهادانده بولونمشدردر . بونکله برابر امام شعراینک
دیدیکی کبی به ضیلری تشدید جهتی ، بعضلری ده تخفیفی التزام ایتمشدردر . احتمال که
بر مجتهدک اجتهادات واقعه سی ، کندی زماننک احوال اجتماعیه و حادثات حقوقیه سنه
موافقدر . لکن آنک بوتون اجتهاداتنک زمانمز احوال اجتماعیه و معاملات حقوقیه سنه
موافقتی تصور ایتمک ، وقتیه بجهٔ احکام عدایه جمعیتک ادعاسی کبی صافدر و نلق
و حیاتی تقدیر ایتمک دیمک اولور .

زمانمزده حیات بوتون بوتون دکشمش ، باشقه برشکله کیرمشدر . شرائط
حاضرهٔ حیاتیه ایله دور مجتهدینده کی شرائط حیاتیه آره سنده ، بوابیکی زمان آره سنده کی
فرق قدر عظیم فرق واردر . بوده بک طبیعی^۱ پر کیفیتدر . چونکه هر زمانک بر حیاتی

وهرحياتك كندينه كوره ايجاباني بولونمق قانون حيات يعنى سنت آلهيه مقتضاسيدر .
بونك ايجوندر كه زمانمزه مدنيت حاضره نك ايجاباتندن اوله رق جريان ايتمكده
بولونان معاملات جسيمه ومقاولات متنوعه يي ، بر مجتهدك بوندن بيك سنه اول
تحدث ايدن حادثات حقوقيه ايجون مدارتطبيق اولمق اوزره وقوع بولان مجتهداتنه
توفيق ايله مك امكان خارجنده در .

مثلا مذهب حنفيه احد عاقدينه نفى اولان شرط ايله بيع فاسددر . قانون
مدنيز اولان مجله احكام عدليه ، مذهب حنفي اوزره ترتيب ايدلمش اولديغندن
قانون مذكورك مواد مخصوصه سي بو اساس اوزرينه تحرير اولونمشدر . مذهب
حنفينك مؤسس عالقدرى امام الاثمه امام اعظم ابوحنيفه (رضى الله عنه) حضرت تارينك
اشبو اجتهاد عاليرى ، كندى زمانلرنده جارى اولان معاملات ناسه موافق اوله بيلير .
لكن عقولرينه استناداً سويله رم كه زمانمزه جريان ايتمكده اولان اصول ومعاملات
تجاريه يه موافق دكلدر . زمانمزه معاملات مدنیه نك اس الاساسى (سربستى مقاوله)
قاعده سي تشكيل ايديبور .

بو كون معاملات مذكوره يي ذكر اولونان مسئله يه تطبيق ايدمك اولسه ق
جمله سنك فسادينه حكم ايتمه من ايجاب ايدر . واقعا مشاراليه حضرت تارينه كوره
احد عاقدينه نفى اولان شرط ، متعارف اولورايسه معتبر اولور . مجله دهده بو جهت
تصريح ايدلمشدر . فقط عرفى تقدير و آنى اثبات ايله مك قضيه سي ده ، طرفينى ومحاكمى
اوزون مدت اوغراشديره جق مشكل بر مسئله در .

حالبوكه ، سربستى مقاوله ، اساسى ، امام اعظمك معاصر لرندن و آنك كبي
اثمه فقهدن امام ابن شبرمه حضرت تارينك اجتهادينه تماماً توافق ايديبور . [المسلمون
على شروطهم وفي رواية عند شروطهم] حديث مشهورى ده ابن شبرمه مذهبنى تأييد
ايله يور . كرچه امام اعظم شرط ايله بيعك منى حنفته بر حديث روايت ايديبور سه ده ،
ابن شبرمه ده آكا قارشى رسالتپناه افندمرك بالذات شرط نافع ايله عقد بيع اجرا
ايتمش اولدفلرينه دائر بر حديث صحيح نقل ايديبور . بو مسئله حنفته نقل اولونان

حدیثلر متعارض اولدقلرندن آنلردن برحکم قطعی چیقارمق قابل دکدر . بونک ایچوتدرکه مجتهدلر بوبابده متخالف اجتهادلرده بولونمشلردر.

حدیثلر متعارض ، اقوال مجتهدین متخالف اولدقلری جهته آنلردن صرف نظر ایده رک قرآن کریمه مراجعت ایده جک اولور ایسه ک ابن شبرمه مذهبه و سربستی مقاوله اساسنه بک مساعد اولدیغی کورورزه . چونکه [یا ایها الذین آمنوا لا تاکلوا أموالکم بینهکم بالباطل إلا ان تکون مجارة عن تراض منکم] آیت جلیله سی ، احد عاقدینه نافع بر شرط بولونسون بولونسون علی الاطلاق تراض طرفینه واقع اولان معاملات تجاریه نیک معتبر اولدیغنه دلالت ایدیور . ابن شبرمه ده بونی ادعا ایله یور . [یا ایها الذین آمنوا اوفوا بالعقود] و [اوفوا بالعهود] آیت کریمه لری ایسه بوبابده ده اصریحدر . زیرا بو آیتلرک ظاهر معناسندن وعموم الفاظندن هر نوع عقد و شرطک معتبر و مشروع اولدیغی صراحة مستفاد اولوبور .

محققین علمای خلیه دن مشهور ابن قیمک [اعلام الموقعین] ده ، اکابر فقهای مالکیه دن امام ابوبکرین عربینک [احکام القرآن] نامیله موسوم کتابنده تحقیقلرینه کوره بو آیتلرده کی (العقود) و (العهود) لفظلری ، مفهوم اصطلاحلرینه ده شامل اولان معنای لغویلری اوزرینه وارد اولمشدر . بونکله برابر ایکیسی ده جمع معرفدر . قاعده اصولیه جه جمع معرفلر الفاظ عموم مدندر . عام اولان بر لفظده اصل اولان ایسه جمیع افرادینه شمول افاده ایتمکدر . شو حالده بو ایکی نظم جلیل بالجمله عقود و شروطه ، هر نوع تمهدات و مقاولاته شامل دیمکدر . بو آیت جلیله لرک معنای ظاهرلرینی تاویل و عموم لرینی تخصیص ایدن حدیثلر ایسه بعضلری متعارض ، بعضلرینک ده معنای مقصوده دلالتلری خفی اولدیغندن بحث مخصوصنده بیان اولونه جق قاعده تعارضه نظراً قرآنک ظاهرینه معارض اوله بیله جک قوت و کفایتی حائر دکدرلر .

شومختصر تحقیقاندن آکلاشیلدیورکه بوکون مشارالیه ابن شبرمه مذهبی ترجیح و مجله بی آکا کوره تعدیل ایله مکده هیچ بر ممنوعیت شرعیه یوقدر . بالعکس قرآن

کریمک ظاهری ایله آنقا ذکر اولونان و تمارضدن خارج قالان [المسلمون علی شروطهم] حدیثنده موافقدر . بعض علمای حدیث ، بو حدیثک ضعفه قائل اولمشارسده امام سیوطی [الجامع الصغیر] نام کتاب مشهورنده (صح) کشیده سیله محتفی بیان ایدیور . ائمه حدیثدن امام ترمذی ، اک مشهور رمعتبر حدیث کتابلرندن اولان یعنی (کتبسته) نامیله معروف آلتی حدیث کتابندن بری بولونان (جامع السنن) نده باب صلحه حدیث مذکورى محتوی شو حدیث شریفی نقل و تخریج ایدیور :

[الصلح جائز بین المسلمین إلا صلحاً حراماً حلالاً أو اَحَلَّ حراماً و المسلمون علی شروطهم إلا شرطاً حراماً حلالاً أو اَحَلَّ حراماً] . امام مشارالیه بو حدیثی تخریج ایتدکن صکره [هذا حدیث حسن صحیح] دیه رک صراحة تحسین و تحصحیح ایله یور . آرتق بو حدیث ، بو بابه پک صریح و قطعی الدلاله در . چونکه بو حدیث شریف ، بالکمز بر شرطی تجویز ایتدیور که اوده حلالی حرام و یا حرامی حلال قیلان شرطدن عبارتدر . بوندن ماعدا هر نوع شرطک معتبر و لازم الرعایه اولدیغنی صراحة مفاد ایدیور .

حفاظ حدیثدن و فقهای خلیه دن ابن قیم ، هندستانک (دهلی) شهرنده طبع اولونان [اعلام الموقعین] نام کتابک برنجی جلدینک (۱۲۷) مجی صحیفه سنده دیور که :

[جمهور فقهای کوره عقود و شروطده اصل اولان صحتدر ، مکرکه شارع ابطال و یا نهی ایتمش اوله . قول صحیحده بودر . زیرا عقود و شروطک بطلانیله حکم ، تحریم و تأئیمیه حکم دیمکدر . حالبوکه معلوم اولدیغنی اوزره حرام آنجق جناب حق و رسولک تحریم ایتدیکی شیدر . ائمه آنجق جناب حق و رسولک فاعلنی تأئیم ایلدیکی فعلدر . نه کیم واجبده آنجق حضرت شارعک واجب قیلدیغنی فعلدر ، كذلك دیندخی حضرت ذوالجلالک وضع و تشریع ایتدیکی شریعتدر . (بوراده بحثه تعلق اولمیان و عباداته متعلق بولونان براییکی - طرلق عبارده سی اختصار مقصدیله ترجمه ابدله مشدر . س) .

شو حالده بطلان و تحریمی حقنده بر دلیل شرعی قائم اولوتجهیه قدر عقود ، شروط و معاملاتده اصل اولان صحتدر . زیرا عقود و معاملات ، شارع طرفندن

تحریم ایدیلنججه به قدر معفودره. شارع آنلرک تحريم و ابا حسندن سکوت ایدرایسه آنلری محريم و ابطال ایله حکم جائز اولماز . چونکه حلال جناب حقه احلال، حرامده جناب حقه تحريم ایتدیکی شیدر . حکمندن سکوت ایدلیکی شی ایسه معفو دیمکدر [۱] . بناءً علیه هر هانکی بر شرط ، عقد و معامله که شارع آنک حکمی بیان ایتیب سکوت ایتشدره، آرتق آنک حرمتنه قائل اولمق جائز دکلدرد. چونکه حضرت شارع محضا بر رحمت الهیه اولمق اوزره سکوت ایتشدر ، یوقسه نسیان واهالندن دولایی دکل .

جناب شارع حقه نسیان واهال نصل تصور اولونه بیلیرکه بر چوق نصوص شرعیه ، شارعک تحريم ایتدیکی عقود و شروطدن ماعدا بالجمله عقود ، شروط و معاملاتک مباح اولدیغنی تصریح ایدیور . جناب حق بتون عقد و عهده و قالیبه امر ایتیش و قرآن کریمده [وَأَوْفُوا بِالْعَهْدِ] و [يَا أَيُّهَا الَّذِينَ آمَنُوا أَوْفُوا بِالْعُقُودِ] و [وَالَّذِينَ هُمْ لِأَمَانَاتِهِمْ وَعَهْدِهِمْ رَاعُونَ] و [وَالْمُوفُونَ بِعَهْدِهِمْ إِذَا عَاهَدُوا] بویورمشدر . بوبابده قرآن کریمده دها بر چوق آیت وارد . . .

مشارالیه کتاب مذکورک (۱۲۸) نجی صحیفه سنده ده ذکر اولون آنلرک عام و مطلق اولدیغنی و بونلری بعض عقود و شروطه تخصیص صورتیه تأویله قیام ایتک ، آیتلرک عمومی ابطال ایله مک دیمک اولدیغندن برهان شرعی قائم اولدجه جائز اولیه جغنی بیان ایتدکدن ، بعض غیروارد اعتراضاته دخی جواب ویردکدن سوکره دییورکه : [جناب حق ، (الا ان تكون تجارة عن تراض منكم) آیت منیفه سی ایله عاقدین ییتده بالتراضی واقع اولان تجارتی مشروع و مباح قیلمشدر . شو حالده عاقدین ، حکم الهیه مخالف اولیان بر شرطه راضی اولورلر ایسه اول شرطک معتبر و جائز اولسی لازم کلیر . آرتق شرط مذکورى الغا و آنلری

[۱] مشارالیهک مقام تعلیلده سویله دیکی بوسوز ، بر حدیث شریفک مألیدرکه شودر : [الحلال ما احل الله في كتابه والحرام ما حرم الله في كتابه وما سكت عنه فهو مما عني عنه رواه الترمذی وابن ماجه]

التزام ایتمدکلری و شارعكده الزام ایله مدیکی بر شیله الزام جائز اولماز
مشارالیه ابن قیمةک اولکی افاداتی، نصوص شرعیةک احکامنی بیاندن عبارتدی.
بو سوزی ده مقتضای قیاسی بیاندر . مهرانکی بر مسئله حقنده بر حکم شرعی فی
استخراجک طریقیه ده بودر: یعنی اولاً نصوص شرعییه مراجعت ایتمک، آنلردن
حکم مطلوب استخراج ایدیله مدیکی تقدیرده ثانیاً طریق قیاسه سلوک ایله مکدر .
ذاتاً بو خصوصده وارد اولان احادیث نبویه تعارض ایتمدکلری ایچون احتیاجه
صالح دکلردر دینله جک و ذکر اولونان آیات قرآنییه ده بعض علمانک ذهابلری
وجهله تأویل ایدیله جک اولور ایسه ، آرتق بالضروره قیاسه مراجعتدن باشقه
کندیسیله حکم مطلوبه توصل اولونه جق بر طریق قالماز . نته کیم ائمه حنفیهک
شرطی شرط ملایم، شرط لغو و شرط مفسد ناملریله اوچ قسمه تفریق ایتملری ده
قیاس طریقله در . چونکه شرطی بوضورتله اوچه تفریق ایدن بر نص شرعی یوقدر .

حس عصینک تولید یلدیکی شائبه طرفکیریدن تجرید نفس ایله حق الانصاف
دوغریسی سویله جک اولور ایسه ، ابن قیمةک تماماً حقلی اولدیغنی تسلیم ایتمک
اقتضا ایدر . چونکه ماهیت حقیقیه لری اعتباریله عقد ایله شرط آره سنده بفرق
یوقدر . ایکیسی ده بر خصوصی الزام و التزامدن ، تعیر دیگرله تعهددن عبارتدر .
عقدک متقابل ، شرطک بلا مقابل اولسی ماهیت اصلیه لری و حکم لری اوزرنده
حائز تأثیر اوله ماز . حقه تعلق اعتباریله ده یینلرنده بفرق یوقدر . هر ایکیسی ده
کوک حق شرعی و کورک حق غیری اخلاص ایتمور . یالکز عاقدینک حقوقه تعلق
ایدیور . بو کبی یرلرده یعنی حق شرعی و حقوق ناسی اخلاص ایتمور ، صرف
طرفینک حقوقه تعلق ایدن تصرفانده آرانه جق شی ایسه ، رضاء طرفیندن
عبارتدر .

اوحالده بالتراضی واقع اولان عقدک مشروعیتنی قبول ایدوبده عینیه عقدکی
رضاء طرفینه مترون اولان شرطک صحت و مشروعیتنی قبول ایتمک ، بلا مانع
قیاسک حکمندن عدول ایله مک دیمک اولورکه بو، قیاسک ادله شرعییه در اولدیینه
قائل اولان فقها عنندنه آنجق بر نص صریحه و یا اجماع امه و یا خود مصلحت

حاجه کبی بر احتیاجه بناء تجویز اولونه بیلیر . بوراده ایسه بو اوج شیدن هیچ بری یوقدر .

نص صریح یوقدر . اکر اولسه یدی ائمه فقه آره سنده بروجه مشروح اختلاف بولونمازدی . بومقاسمه شرط ایله بیعک ممنوعیتیه دائر (نهی النبی علیه السلام عن بیع و شرط او عن بیع و شرطین) طرزنده و صورت مطلقه و وارد اولان حدیث ، مقصد شاری افاده صراحت کافیه نی حاوی دکلدر . بونک ایچوندرکه مختلف صورتلره تفسیر اولونمشدر . فضله اوله رق جابر بن عبدالله حدیثیه منافیدر . شویله که بعض غزواتدن عودت نبویه ده رسالتیناه اقدمز اصحاب کرامدن مشار ایله جابرک دوه سنی صائون آلمق ایستر ، حضرت جابر مدینه منوره یه قدر اوزرینه بینمسنی شرط ایدر ، رسول اکرم اقدمزده موافقت ایلر . بناء علیه بیع مذکور بوشروط ایله بینلرنده منعقد اولور . بالآخره مدینه یه مواصلتده رسالتیناه اقدمز ، هم ثمن مییی وهم ده مییی حضرت جابره احسان بو یورور . بو حدیث بخاری شریفده و دیگر امهات کتب احادیثیه موجود اولقله برابر شرط ایله بیعک جوارینه دلالتده ده پک صریحدر . بوجهتله اولکی حدیث مبهم اولقله برابر اشو جابر حدیثی ایله متعارضدر .

امام طحاوی (شرح معانی الآثار) ده ، امام شمس الائمه السرخسی (مبسوط) ده مشار ایله جابر بن عبدالله روایت ایتدیکی حدیث مذکور [مدینه منوره یه مواصلتلرنده ثمن مییع ایله برابر مییی ده حضرت جابره احسان واعاده بو یورمه . لرندن آکلاشیلورکه حادثه مذکورده رسالتیناه اقدمز صورت جدیده عقد بیع اجراسنی مراد ائمه مشدر ، معامله سنیله ری مجرد . مشار ایله تلطیف ضمننده اختیار اولونمش لطیفه دن عبارتدر] یولنده تاویل و توجیه ایدیورلر سه ده فکر قاصرانه مزجه بوتوجیه ، وجیه دکلدر . زیرا توجیه مذکور شارعک حکم شرعی خلاقه دلالت ایده جک حرکته بولونمسنی تجویز ایتک دیمک اولورکه تصوری بیله جائز دکلدر . اکر مقصد پیغمبری صرف لطیفه دن عبارت اولسه یدی ، ثمن مییع ایله برابر مییع احسان واعاده بو یورلدینی صره ده بوجهت تصریح و شرط

ایله بیعك جائز اولیه جنی تنیه بویوریلوردی . حالبوکه بویله برتنیه عالی شرف واقع اولماشدر .

مشارالیهما نك شوتوجیهی تسلیم ایدیله جك اولسه بیله شرط ایله بیعك ممنوعیتی حقیقه ذکر اولونان برنجی حدیث، ینه تعارضدن قورتوله ماز . چونکه بوتقدیرده حدیث مذکور، یوقاریده بیان ایدیلن (المسلمون علی شروطهم الاشرطاً حرم حلالاً او اهل حراماً) حدیث صحیحی و آیات قرآنیه ایله تعارض ایتمش اولور . تعارضلری حسیله آرهدن حدیثلری قالدیره جق اولور ایسه ك سالف الذکر آیات قرآنیه ، اطلاق وعمومی اوزره باقی قالیرکه بوندنده قیاسه منافی برنص شرعینك وجودی دكل، بالعكس مقتضای قیاسی مؤید نصوص شرعیه نك موجود بولوندینی نتیجه سی تظاهر ایدر .

اجمعه یوقدر . چونکه بروجه مشروح امام ابن شبرمه نك بومسئله ده امام ابوحنیفه یه مخالفتی بولوندینی کبی ابن ابی لیلی ، امام مالک و امام احمد کبی هربری بررمذهب فقهی مؤسسسی برچرق مجتهد مطلقلرده بوخصوصده باشقه باشقه اجتهادلرده بولونمشلردر .

احتیاج ناس قضیه سی ایسه بوتون بوتون عکسفی مستلزمدر . یعنی قیاسدن عدول ایله شرط ایله بیعك فسادینی دكل ، بالعكس برمقتضای قیاس شرط ایله بیعك جوازینی مستوجبدر . چونکه زما نمزده جریان ایدن معاملات و مقاولانده طرفین اقتضاسنه کوره اویله شرطلر درمیان ایدیورلرکه اگر مجله ده اولدینی وجهله احد عاقدینه نفی اولان شرط ایله بیع جائز دكلدر دینله جك اولسه ، معاملات مذکورده نك کافه سنه عدم جواز ایله حکم ایتمك لازم کلیر . بوایسه معاملات ناسك توسعنه و بالتیجه بویله نازك برزمانده انکشاف ملی یه مانع اولق دیمکدرکه هم شارعك بو کبی برلرده تطبیق اولونمق اوزره وضع بویوردینی قاعده تخفیف و مسامحه یه ، همده ینه امام اعظمك تأسیس ایلدیکی (استحسان) اساسنه منافیدر . یوقاریده فصل اولده ، دور رسالته ده اصول تشریعدن بحث اولوندینی صروده

بیان اولونمشدی که جناب شارع رسول اکرم (ص، ع) اقدامن حضرتلری،
(يُرِيدُ اللَّهُ بِكُمُ الْيُسْرَ وَلَا يُرِيدُ بِكُمُ الْعُسْرَ) و (مَا جَعَلَ عَلَيْكُمْ فِي الدِّينِ مِنْ
خَرَجٍ) آیت کریمه لری ایله (إِنَّ الدِّينَ يُسْرٌ) و (خَيْرُ دِينِكُمْ أَيْسَرُهُ) و (أَبْ
الْأَذْيَانِ إِلَى اللَّهِ الْحَنِيفَةَ السَّمْحَةَ) حدیث صحیح لری منطوقجه معاملاتده عائد
احکام فرعیده تخفیف و تسهیل سور، مسامحه جهتنی التزام ایدردی. اصحاب
کرامدهه دائماً بوجهتی یعنی خلقه سهوات کوسترلمسنی، لزومسز یرده اسلامیتدن
تفسیری موجب اوله جق شدتلر استعمال ایدلمه منی خاصه تنبیه و توصیه بویوردی.
یوبابده شرفوارد اولان [يَسِّرُوا وَلَا تُعَسِّرُوا وَبَشِّرُوا وَلَا تُنْفِرُوا]
حدیث شریفی ایسه مشهور و باجمله معتبرات کتب حدیثده مسطوردر.

امام اعظم ابو حنیفه حضرتلریده، نام طالیرینه اضافله تأسیس بویوردینی
مذهب فقهیده وضع ابتدیکی (استحسان) قاعده منی، ایشته بو و بوکبی نصوص
شرعیه و مقاصد تشریحیه دن استخراج ایله مشدر. امام سرخسی استحسانک مختلف
تعریفلرینی نقل اتدکدن سوکره [بو تعریفاتک خلاصه منی شودر: استحسان
قولایلق ایچون کوچلکی ترک ایتمکدن عبارتدر. دینده اصل اولانده بودر.]
دیور. و قیله بخارا اهالیسنده بوج تکثر اتمسی اوزرینه اکا بر فقهای حنیفه
اشبو استحسان قاعده سنه بناء بیع بالوفای و آنک برنوع مخصوصی اولان بیع
بالاستقلال تجویز ایتشلر، اسباب موجب منی اولدرقده حاجت عمومی اولسون
خصوصی اولسون ضرورت منزله سنه تنزیل اولونور، و ضرورتلر ممنوع اولان
شیلری مباح قیلار، دیمشدر. حالبوکه بیع بالوفاء خصوصیه بیع بالاستقلال احد
عاقیدنه نفعی اولان شرط ایله بیعدن باشقه برشی دکدر.

دیمک که حال وزمانک ایجاباتندن اولوق اوزره قاعده استحسانه استناداً ابن
شبرمه مذهبنی اختیار ایدره کجمله احکام عدلیه منی آکا کوره تعدیل ایدره کج اولسه ق
مذهب حنفیدن خارجه چیقمش اولیه جغز. چونکه فقهای حنیفه، شو ایکی نوع

عقد بیعی تجویز ایتمکه مذهب حنفیدن چیقمش اولدقلری کبی بزده چیقمش اولیز . فقهای حنفیه نك (مشقت تیسیری جلب ایدر) ، (ازمانك تبدلی ایله احكامك تبدلی انكار اولونه ماز) و (معاملات ناسی فساده نسبتدن ایسه مهما امکن صحتہ حمل ایتك اولادر) کبی قاعده استحصانك مبتنی اولدینی اساسلری کوسترمک ایچون تخریج وتأسيس ایتدکلری قواعد فقیه ، بویله یرلرده تطبیق اولونمیوبده نه کبی یرلرده تطبیق اولونه جقدر ؟ ! فقها بوقاعده لری تطبیق اولونماق ایچونمی وضع ایتشلردر ؟ یوقسه زمانك عادتا ضرورت درجه سنی آشان احتیاج حاضری ، هنوز احتیاج نوعدن عد اولونمورمی ؟ . .

وقتیله تشکل ایدن بجه جمعیتی طرفندن (۱۲۸۵) تاریخده تنظیم قیلان اسباب موجب مضطه سنده ، مباحوث عنه مسئله یه یعنی احد عاقدینه نفی اولان شرط ایله بیعك فسادینه دائر [زیرا بیع وشرادن مقصد تمليك وتملك خصوصی یعنی بلا مانع و مزاحم مشترینك میسه و بایمك ثمنه مالك اولمسی کیفیتدر . حالبوکه برطرفه نافع اولان شرطك اجراسنی اول طرف طالب و طرف آخر آندن هارب اوله رق منازعه یه مؤدی اوله بیلیر . بوصولده ایسه عقد بیع تمام اولامش دیمك اولور . فقط عرف و عادت منازعه یی قاطع اولدیغندن علی الاطلاق شرط متعارف ایله بیع تجویز اولونمشدر .] دیه محرر اولان مطالعه یه کنجه : بومطالعه ، بالآخره تعلیل بعدالوقوع قیلندن اوله رق ، همد مذهب حنفی علینه چیقاجنی دوشونلندن سویلنمش سوزدن عبارتدر .

تعلیل بعدالوقوع قیلندندر . چونکه بوسوز امام اعظمك کندی سوزی دکلدر ، بعض متأخرین حنفیه طرفندن مقام تعلیلده در میان ایدیلن مطالعات جدلیه جمله سندندر . مذهب حنفی علینه در . چونکه مذهب حنفیه احد عاقدینه نافع اولان شرطك عقد بیعی مفسد اولمسی مسئله سی مطلق دکلدر . عقدیبعك مقتضای اولیان ، مقتضای عقدی تأیید ایتمین و متعارف بولونیمان وعین زمانده احد عاقدینه نفی اولان شرطه مخصوص و منحصر در . بناء علیه مقتضای عقددن اولان ، یاخود مقتضای عقدی تأیید ایدن و یاخود متعارف بولونان شرط ایله بیع ، مذهب حنفیه دخی

صحیح و شرط معتبر در . نته کیم بو جهت ذکر اولونان مضبطه ده تلمیح و مجله نك [۱۸۶ ، ۱۸۷ ، ۱۸۸] نجی ماده لرنده تصریح اولونمشدر .

شو حاله مثلا « فلان شیئی ترهین ایتمک » یا خود شو آدمی کفیل و یرمک شرطیله بر شی صائمق ، مقتضای عقد اولان تسلیم نمن کیفیتنی تأیید ابتدکی ایچون مذهب حنفی و مجله یه کوره جائز و شرط معتبر اولور . حالبوکه ذکر اولونان مطالعه یه نظراً شرط مذکور مفسد و بناءً علیه اشبو بیع فاسد اولمق لازم کلیر . زیرا بو شرط بایع ایچون نافع بر شرط اولدیغندن مذکور مضبطه نك تعیری و جهله بایع آنک اجراسنی طالب ، مشتری آندن هارب اوله رق منازعه یه مؤدی اوله بیلیر . بو صورتده ایسه یه مضبطه مذکوره نك بیانی و جهله عقد بیع تمام اولماش دیمک اولور .

ایشته بو صورتله مجله جمعیتنک کندی فعله منافی اولان شو مطالعه ، نتیجه ده مذهب حنفی علیه چیقه جغندن صاحب مذهب عندنده شایان قبول بر مطالعه دکلدرد . خصوصیه اشبو مطالعه نظر اعتباره آینه جق اولور ایسه بر چوق عقود و مقاولاتنک معتبر اولماسی اقتضا ایدر . چونکه هر نوع عقد و مقاوله ده طرفین آره سنده حقی حقسز منازعه وقوعی اکسینک دکلدرد . منازعه واقعه یی بر نوع عقده مفسد عد ایدوبده دیگرنده عد ایتمه مک ایسه ترجیح بلا مرجح دیمک اولور که منطقی و فقهاً تجویز اولونه ماز . مطالعه سالفه ده [فقط عرف و عادت منازعه یی قاطع اولدیغندن علی الاطلاق شرط متعارف ایله بیع تجویز اولونمشدر .] دینیلیر . عرف و عادت منازعه یی قاطع اولورده عقد و مقاوله قاطع اولماز می ؟ عرفک منازعه یی قطع ایتمسی طرفینک متعارف اولان شیئه رضاسنه دلالت ابتدکی ایچوندر . هر هانکی بر شرط ایله اجرا ایدیلن عقده ایسه طرفینک اول شرطه رضاسی صراحةً موجود اولدیغندن عقد واقع مؤخرأ تحدث ایدن نزاع طرفینی بطریق الاولی قاطع اولور .

اگر « عادت محکدر » و بناءً علیه قانون حکم و قوتنده در دنیلیرسه ، بزده دیرزکه علی الاطلاق شرط نافع ایله بیتمک و اجاره کبی دیگر بر عقدک صحیح و شرطک

معتبر اولوجنی قانونه درج ایدلمکله نفس قانون و بناءً علیه دها قوتلی اولور . یوق
اگر ناسی تقرر ایدن عرف و عادت لرندن و از کچیر مک مشکل و حرج و مشقی مستوجب ،
مشقت ده تیسیری جالب اولدینی ایچون شرط متعارف ایله بیع تجویز اولونمشدر
دنیله جک اولور ایسه ، بزده بونی یعنی زمانمزده نصوص قاطعه شرعیه یه مخالف
اولماقله برابر اجراسی قابل اولان هر هانکی بر شرط ایله عقد بیعک و عقود
سأره نك صحتی قبول ایتمک تیسیری و انکشاف ملی نی موجب اوله جفنی ادعا ایتمکده
اولدینمزدن نتیجه ده برلشمش اولورز .

خلاصه مجله جمعیتک ذکر اولونان مضبوطه سنده مندرج مطالعه سابقه ، هانکی
جهندن محاکمه ایدیه جک اولسه مجروح و اعتباردن ساقط اولدینی تین ایدر . مطالعه
مذکورده ، یوقاریده دیدیکمز کی افقه الفقها و امام المجتهدین امام ابو حنیفه حضر تلی کی
بر مجتهد اعظمک قولی اولیوب صو کره دن بعض متأخرین حنفیه طرفندن خلافتیه
دائر مقام تعلیلده سرد ایدیلن مطالعات جدلیه قیلندندر .

دولت علیه نك قانون مدنیسی اولان « مجله احکام عدلیه ، ده تعدیلی مقتضی
مسئله بوندن عبارت اولیوب علی الاطلاق معدومک بیعی باطل اولسی ، خیار رؤیته
مشتریتک خیر بولونمی ، سلمک بعض شرائطی ، استهلاک عین اوزرینه وارد اولان
اجاره نك بطلانی ، موجرایله مستأجر دن برینک وفاتیله اجاره نك انقاسخی ، منفعتک
مال نوعندن عد ایدلیه رك مضمون اولماسی کی دها بر جوق احکام قانونیه وارد رکه
بونلرک زمانمزده قابلیت تطبیقیه سی اولدینندن احتیاج حاضره و مذاهب سأره فقهییه
کوره تعدیلی ضروریدر . افادات سالفه دن و مباحث متقدمه دن سبق ایدن ایضاحات
و تحقیقاتدن مستبان اوله جفنی اوزره بو خصوصه بر مانع شرعی ده یوقدر .

حال بویله ایکن حالاً زمانمزده مجله نك اولدینی کی محافظه سنه طرفدار بر جوق
ذواته تصادف ایدیلیور . بونلرک بعضری حقایق شرعیه دن غافل اولدیلری ایچون
-وزلری اعتباردن ساقط ایسه ده بعضری ده حقایق شرعیه یه واقف اولماقله برابر
ینه مجله نك عدم تعدیلی التزام ایدیور . دولت علیه نك بدایت تأسسندبری محاکمه

وبالجمله معاملات دولته فقه حنفی التزام ایدیه کش اولدیغندن بو کونده اولصورتله حرکت ایدنیسی آرزو ایدیایور . آرزویه دیه جک یوق ایسه ده نه چاره که زمانمزده تماماً بو آرزویه تبعیت امکان خارجنده در . واقعا امام اعظم (ر ، ض) حضرتلری ، حس انصاف ایله متحلی بعض مخالفلرینک ده اعترافی وجهله کندیسنه خاص دهایی فقهی به مالک بر ذات جلیل الصفات اولوب بالعموم معاصرلرینک وصوکره کلن فقهانک اعلم وافقهی ، تأسیس بویوردقلری مذهب حنفی ده هیئت عمومی سی اعتباریه بالجمله مذاهب فقهیه نك اکل وار ججیدر . لکن مع التأسف براقاج دانه سی یوقاریده ذکر اولونان بر قسم مسائلی ده عصر حاضرک احتیاجاتی تطمیننه کافی دکلدرد .

بونک ایچوندرکه فقه حنفی بی اساس اتخاذ ایتک رآنک احکام اصلیه سندن مهم امکان آیرلامقله برابر دیگر مذاهب فقهیه دن ده زمانک احتیاجاتنه اوفق اولان مسائلی آله رق مجله بی باشدن آشاغی به قدر تعدیل ایله مک وبو صورتله احتیاجات حاضره بی تطمین ایده جک بر قانون وجوده کتیرمک تحت وجوده در . بو جهت یعنی حال وزمانک ایجاباتنه توفیق حرکت ، بر دولت ایچون مقتضای ضرورت وبصیرت اولدیغنی ییلدکلری ایچوندرکه مشارالیه امام اعظم حضرتلری ، « استحسان ، اساسی تأسیس بویورمشلر ومتأخرین فتهاده [امام المسلمین هرهانکی مجتهدک قولی ایله عمل ایدلمسنی امر ایدر ایسه آنکله عمل واجب اولور] دیمشردر .

مسئله نك زمانمزده بک زیاده اهمیت و نزا کتی بولوندیغندن سوزی لزومندن فضله اوزاتمغه مجبور اولدق . کرچه پولیچه وسائر امره محرر سندات تجاریه ، آنونیم وقوماندیت وقوللککتیف شرکتلری ، افلاس و تجارت بحریه معاملاتی ، معدنلرک ایشله دلمسنه ومؤسسات نافعه به متعلق مقاولات کبی زمانمزده جاری بر چوق مسائل مهمه نك دخی بو مقامده تبیین احکامی لازمه دن ایدیه ده ، بونلرک جهت شرعیه لری ایضاحات سالفه دن منقهم اوله جنی کبی مباحث آتیه دن دخی انکشاف ایده جکندن هم صدودن بوتون بوتون آیرلامق ، همده تطویل مقال ایله ایراث کلال ایتمه مک ایچون ایضاحلرندن صرف نظرله جمله سنه شامل اولمق اوزره افادات سابقه بی

خلاصه الخلاصه اوله رق بر وجه آنى تلخیص ایله لزومندن زیاده اوزامش اولان اشبو بجه نهایت ویرلمسی مناسب کورلمشدر . شوبله که :

حکومت یعنی مقام خلافت ، وضع قوانین خصوصنده معین بر مجتهدک کندی زماننده متحدث حادثات حقوقیه حقنده قابل تطبیق اولان اجتهاداتنه دکل ، احوال وازمانک تبدلی ایله غیر متبدل ، ثابت ولایتغیر احکام منصوصه قطعیه به وبوصورتله ثابت وقطعی اولیان مسائلهده زمانک تولید ابتدیکی احوال وشرائط حیاتیتهنک الجاآنه تابعدر . بناءً علیه هرهانکی مجتهدک رأی واجتهادینی - تعبیر عرفیسی ایله - « معاملات ناسه ارفق ومصاحبت عصره اوفق » بولور ایسه آنى ترجیحه شرعاً وفقهاً مآذونددر، دها دوغریسی ملت ودواتک وضعیت حاضرهسنه کوره مجبوردر . بونی تقدیر ائمه مک ؛ شریعتی ده ، فقهی ده ، حیاتی ده ، وظیفه حکومتی ده بیلمه مک وآکلاماق دیمکدر .

حتی حکومت ، سائر علوم وفنونده اولدینی کبی ایجاندده غرب حقوق مدنیه سندنزده استفاده ایده بیایر . بوندهده بر محذور شرعی یوقدر . . چونکه [**الْكَلِمَةُ الْحِكْمَةُ ضَالَّةُ الْمُؤْمِنِ خَشِيْتُ وَجَدَهَا فَهِيَ أَحَقُّ بِهَا**] . . . احرجه الترمذی وان ماجه وابن عساکر [حدیث صحیحی مفهوممنجه حکمت ، مسلمانلرک ضایع ایدوبده آرامقده اولدقلری اوز مالیدر ، زرده بولورلر ایسه آنى اخذه دیگر ملترلرین زیاده لایق ومستحقدرلر . شوقدر وارکه اخذ ایدیله جک شینک ، اقتباس اولونه جق احکام حقوقیانک حکمت اولسی ، منافع ملک ومات ایچون مفید و ضروری بولونسی شرطدر . عکس تقدیرده فائده مطلوبیه بدل داعی مضر اولورکه هیچ بر صاحب اذعان عنندنه تجویز اولونه ماز .

بو مناسبتله شو مهم جهتی ده عرض ایدیم که شرقک علم فقهی ، حقوق اسلامییه اولقله برابر - لدی المقایسه آکلاشیله جفی اوزره - اصلی روما حقوقی وبر قسم احکامی عادات واحوال محلیه ایجابی اولان غربک علم حقوقدن دها اساسلی ، دها متین و حقوق طبیعی بشریه به دها ملایم اولدیغندن احتیاج حقیقی تحقق ائمدکجه احکام فقهی بی بالکلیه ترک ایله بلا لزوم وعلی العمیا آوروپا قانونلرینی

ترجه ابدرك موقع تطبيقه وضعه مسارعت ، منافی حکمت و بصیرت اوله جنی کی
شیبه قدر شناسی بده موافق دوشمز .

هرشیدن زیاده بو بجنده افراط و تفریطدن بجانب لازمدر . بو خصوصده
افراطده ، تفریطده اقوام و حکومت سالفده اولدینی کی بزده ده دولت و ملنك
کلیاً انقراضنه باعث اولور . دنیاده حقیقت و اعتداله رعایت قدر کوزل بر شی
یوقدر . ادولتك تعالیسی ، ملنك سعادتسی ایسته بور ایسهك حقیقتی کورملی ،
اعتداله رعایت ایتملی بز . دین و شریعت ، عقل و عرفان ، تجربه و تاریخ و زمان
بو باده متفقدر . حضرت پیغمبر صلی الله علیه وسلم اقدمزك اك بویوك دعالرندن
بری ده « یاربى بزمه حقایق اشیاى اولدیجی کی کوتر ، مانده اولان [اللهم ارنانا
الاشیاء كما هی] دعاسی ایدی .

اخطار — یوقاریده یوز النجی صحیفه نك طقوزنجی سطرنده کی
[اوفوا بالعهد] آیت کریمه سی سهواً صیغه جمع ایله [اوفوا بالعهود] شکلنده
یازلمشدر . اون دردنجی سطرندده ینه جمع صیغه سیله (العهود) دیه محرردر .
حالبوکه مفرد صیغه سیله (العهد) اوله جقدر . آلت طرفنده کی اون بشنجی سطرده
محرر [ایکیسی ده جمع معرفدر] عباره سی دنخی یا کلشدر . (برنجیسی جمع معرف ،
ایکنجیسی اسم جنس معرفدر) طرزنده تصحیح اولونمایدر . اون آلتنجی سطر .
ده کی (جمع معرفلر الفاظ عمومنددر) عباره سی ده (جمع معرفلر ایله اسم جنس
معرفلر الفاظ عمومنددر) اوله جقدر . کلمات و عبارات مذکورنك بو صورتله
تصحیحی مع الاعتذار رجا اولونور

اجتهاد و تقلید

اهنراد

اجتهادك تعريفی ، شرطی و حکمی - مجتهد - مجتهد فيه - اجتهاده متعلق بهض مسائل -
طریق اجتهاد - طبقات مجتهدین و فقہا

اجتهادك تعريفی ، شرطی و حکمی

اهنراد ، لغتده چالشق دیمکدر . لکن علی العاده و قولای بر ایش ایچون چالشق دکل ، کلفتی و مشقتلی بر ایشی وجوده کتیرمک ایچون بوتون وسع و طاقتی صرف ایتمک صورتیله چالشقمدرکه پک جوق چالشق دیمک اولور . لغت هریبده انسانیک قالدیرمه جنفی درجده بویوک بر قایا پارچهسی حقنده . بوی قایابی قالدیرمه اجتهاد ایتدی ، دینیر . فقط کوچوک و کوچک ، بر طاش ایچون و بوطاشی قالدیرمه اجتهاد ایتدی ، دینیز .

اصطلاحده اجتهاد ، (احکام شرعیة ظنییه ادله تفصیلیه سندن استنباطه بذل مقدرت) معناسنه نقل و تخصیص اولونمشدرکه معنای لغویسی اعم ، معنای اصطلاحده حیسی اخصدر . اجتهاد ایدنه (مجتهد) ، اجتهاد اولونان حکمه (مجتهد فيه) دینیر . تعریفده کی (ظنییه) قیدی قید احترازیدر ، احکام قطعیه دن احتراز ایچون ایراد اولونمشدر . زیرا احکام شرعیة قطعیه ده اجتهاد جاری اولماز . احکام قطعیه ده اجتهاد جاری اولماز دیمک اصلا و هیچ جاری اولماز دیمک دکلدر . جاری اولور ، لکن مجتهد خطا ایدرسه آثم اولور ، معذور اولماز دیمکدر . حالبوکه احکام شرعیة ظنییه ده خطا ایدر ایسه آثم اولماز . معذور و حتی اجتهاد واقعه ده حسن نیتدن و چکدیکی مشقتدن دولایی مأجور بیله اولور . نته کیم زیرده ایضاح اولونه جقدر . تعریفده کی (ادله تفصیلیه) تمیزندن مقصوده ، بوقاریده فصل ثانیده علم اصول فقہک تعریقی صدندنه بیان اولوندینی وجهله ادله معینه و مشخصه در . اوراده ده

سویله مشدك : بو قید ، احكام شرعیه دن هر برینك كندیسه مخصوص اولان معین و مشخص بر دلیلدن استنباط اولونه جفتی کوسترر . مثلا صلاتك و جوبی (ائیموا الصلاة) امر مخصوص و معیندن استخراج اولوندینی کبی زكاتك ، صومك و سائر واجبات شرعیه نك كافه سنك و جوبلری دخی کندیلرینه مخصوص اولان ادله معینه دن استنباط اولونمشدر .

شو تعریفدن آکلاشیلدور که اجتهاد ، هر بر حکم شرعی نی دوغریدن دوغری به کندیسنه مخصوص اولان دلیل معیندن استخراج ایله مکدر . شو حالده احكام شرعیه نی ، دلائلندن مجرد اوله رق کتب فقهیه ده کوروب حفظ ایتك صورتیه بیلمه یه اجتهاد اطلاق اولونماز . بویه دلائلنه انفاذ نظر ائیمه رك مجرد تقلید طریقله فروع فقهی حفظ ایدن ذاته ، بیکلرجه و حتی یوز بیکلرجه مسائلی حفظ ایتش اولسه دخی مجتهد دینمز . مجتهد دینیه چکی کبی فقیه دخی دینمز . چونکه اصطلاح اصولیونده فقیه ، مجتهد مراد فیدر . زمانمزده او کبی حافظ المسائله فقیه اطلاق ، اصولیونه کوره اطلاق مجازیدر ، اطلاق حقیقی دکلددر . بر کیمسه فقیه اوله بیلماك ایچون مجتهد اولوق لازمدر مجتهد ایسه باشقه نی تقلید ایتمز ، کندی ادراک و اجتهادیه استخراج احكام ایدر .

اجتهادك شرائطی ، شرائط اجتهاد ایکیدر . برنجیسی اهلندن صادر اولوق ، ایکنجیسی محله مصادف بولونمقدر . بناءً علیه اجتهاد ، اهلندن صادر و محله مصادف اولور ایسه صحیح و معتبر اولور . اهلندن صادر اولماز ویا محله مصادف بولونمازسه معتبر اولماز . بو مقامده معتبر اولماز دیمك بویه شرائطی جامع اولمیان اجتهاد ، خطا ایسه اجتهاد ایدن ذات معذور اولیوب آثم اولور و اوذات حاکم ایسه محله مصادف اولمیان اجتهادی نقض اولونور دیمکدر . اما اجتهاد ، اهلندن صادر اولوقله برابر محله ده مصادف اولور ایسه بو صورتده مجتهد ، یوقاریده بیان اولوندینی اوزره معذور اولوب اجتهادنده خطا ایتمکه آثم اولماز و حکم واقعی دیگر بر مجتهد طرفندن نقض اولونه ماز . بو مسئله ، آشاغیده آریجه تفصیل اولونه جقدر .

امیرهادك همكسى ، اجتهادك حكمى ، خطا احتمالى اولمقله برابر حكم شرعى به غلبه زندن عبارتدر . بونك ايجوندر كه احكام شرعى قاطعيه ده و كنديسنده اعتقاد جازم واجب اولان اصول دينده اجتهاد جارى اولماز . زيرا بونلرده حصول ظن كافى اوليوب علم قطعى واعتقاد جازم لازمدر [كذا فى التلويح] . بوده آنجق براهين عقليه ويا نصوص قاطعه شرعيه ايله حاصل اولور . بونلرك وجودى حالده ايسه اجتهاده محل قلمماز . حتى مجتهد ، براهين عقليه ويا نصوص قاطعه شرعيه به مخالف اجتهادده بولونه جق اولور ايسه آنك بواجتهادينه التفات اولونماز .

تأنيه — بعضرينك ظن ايتديكى كى اجتهاد ، يالكز قياسدن عبارتدكلدر . اجتهاد قياس طريقيله اوله جنى كى نصوص شرعيه نك دلالتندن ، ايما و اشارتندن ، وجوه لغويه و تصرفات ادبيه و بيانيدن و بونلره مماثل احوال سائرهدن استدلال صورتيله ده اولور . بو جهنله علامه ابركلك (تغير التنقيح) ده تصريحى وجهله اجتهاد ايله قياس بيننده عموم و خصوص مطلق وارددر . اجتهاد اعم ، قياس اخصدر . هر قياس اجتهاددر ، اما هر اجتهاد قياس دكلدر . بونك ايجوندر كه قياسك دليل شرعى اولديغنى رد و انكار ايدن فقهاى ظاهرية ، اجتهادى بوتون بوتون رد ايتيورلر .

مجتهد

آنفاً بيان اولونديغى اوزره مجتهد ، اهليت اجتهادى حائز اولان فقيه ديمكدر . اجتهاده اهليت ايسه شرائط اهليتى جامع اولمقله حاصل اولور .

سُرَاطُ اَهْلِيَّةٍ ؛ اجتهادك شرائط اهليتى ايكيدر . برى جميع مدارك شرعى يعنى احكامه تعلق ايدن باجمله دلائل شرعيه يى محيط اولمق ، ديكرى او دلائلك روحه نفوذ ايدمك ذكا و نظر فقهي به مالك بولونمقدر . فقها ، بوييله نظر فقهي به مالك اولان ذاته (فقيه النفس) اطلاق ايدرلر . برنجى شرط كسى ، ايكنجى شرط

فطریدر . ایکسجی شرطی حائز اولیان برنجی شرطی حائز اولقله مجتهد وفقیه اوله ماز .

۱ — برنجی شرط : مدارک شرعی محیط اولق ایچون دوت شیئی بیلیمک لازمدر : کتاب . سنت ، مواقع اجماع و وجوه قیاس . کتاب ایله سنتی بیلیمک ایچون بوتون آیات قرآنیہ واحادیث نبویہنی بیلیمک شرط دکلدر . یالکیز احکامه تعلق ایدن آیات واحادیثی بیلیمک کافیدر . حتی بونلری حفظ ایتمده شرط دکلدر . حین حاجتده مراجعت ایچون موقعلرینی یعنی هانکی آیتک هانکی سوردهده بولوندیغنی ، حدیثلردن هانکی حدیثک کتب احادیثدن هانکی کتابک تره سنده موجود اولدیغنی بیلیمک مقصدی تأمینه کفایت ایدر .

امام غزالی ایله ائمه مالکیه دن امام ابوبکر بن عربی ، احکامه تعلق ایدن آیات قرآنیه نیک مقصداری بشیوز اولدیغنی سویله یورلر . احکامی محتوی اولان احادیث نبویه نیک مقصداری بک چوق ایسه ده . (تخریر) شرحی (تقریر) ده فقه حنبلی مؤسس ایمام المحدثین امام احمد بن حنبل حضرتلردن نفلاً احکام اصلیه به وامهات مسائله متعلق حدیثلرک بیک ایکی بوز قدر اولدینی مذکوردر . بعض علماء بر مجتهد ایچون بیلیمسی لابد اولان حدیثلرک اوج بیک ، بعضلری ده دهها زیاده اولدیغنی بیان ایدیورلر . امام غزالی ده (مستصفی) ده (سنن ابی داود) ویا (سنن بهقی) کی احکام حدیثلرینی جامع اولان بر حدیث کتابنک وجودی کافیدر دیدور . لکن ائمه شافعیه دن امام نووی ، (صحیح بخاری) ، (صحیح مسلم) ده موجود اولان بعض احکام حدیثلرینک ذکر اولنان (سنن ابی داود) ده موجود اولدیغندن بحثله غزالی نیک بوسوزینی رد ایدیور فقط مجتهد اولق غیرتنه دوشن بر ذات « کتب سته » نامیله معروف اولان آلتی کتابی یعنی (صحیح بخاری) ، (صحیح مسلم) ، (سنن ابی داود) ، (سنن ترمذی) ، (سنن نسائی) و (سنن ابن ماجه) نی ویا خود بونلرک حاوی اولدقلری احکام حدیثلرینک جمله سنی جامع اولقله برابر (سنن دار قطنی) کی دیگر حدیث کتابلرنده مسطور احکام حدیثلرینی دخی محتوی بولونان

(منتقى الاخبار) نام کتابی [۱] وهله بوتون حدیث کتابلرنده موجود حدیثلرک همان کافه سنی جامع اولان (کنز العمال) نامیله معروف کتاب کیری (۲)، تزدنده بولونمدره. حق اولور ایسه آرتق مشارایه امام نووی نكده برديه جکی قالماز. اصحاب کرام بوتون احادیث نبویه بیلمزلردی، آنک ایچون اجتهادات واقعه لرنده اکثریا قیاس طریقنه سلوک ابدرلردی. حق حضرت عمر کي بعض اکابر فقهای اصحاب بیله برچوق مسائله او ابابده وارد اولان احادیث نبویه به مطلع اولمقسزین اجتهاده بولونمشلر، مؤخرآ اجتهادلرینه مخالف احادیثه مطنع اولونجه اجتهادلرندن رجوع ایتمشلردی (کذا فی التقرير) .

آیات واحادیثک بعضلری ناسخ، بعضلری منسوخ اولدیغندن بولرک ناسخ ومنسوخلرینی فرق وتمیز ایتک ضروریدر. بونک ایچون متعدد کتابلر تألیف اولونمشدر. تفسیرلر ایله کتب احادیث شرحلری ده بوجهتی متکفلدر. و برده حدیثلرک سندلرینی یعنی متواتر، مشهور و خبر واحد اولمق کي بزه طریق و صوللرینی سلسله اسانید واحوال روای و صحیح، حسن، ضعیف، مسند و مرسل کي انواع احادیثی دخی بیلمک مقتضیدر. چونکه بر مسئله ده حدیثلر تعارض ایدنجه قویسنی ضعیفنه تقدیم ایتک، ضعیف ویا غیر صحیح حدیث ایله استدلال ایدلمش اولماق ایچون بوللری بیلمک ایجاب ایدر.

[۱] ذکر اولان (منتقى الاخبار)، مشهور ابن تیمه نك بونک پدری ائمه حدیثدن و اکابر فقهای حنبلیه دن ابوالبرکات امام مجدالدین ابن تیمه نك تألیف کرده سیدر. مشارایه بو اثرنده بالاده مذکور کتب سنه ایله مذهب حنبلیه مؤسسای امام احمدک (مسند کبیر) ی و (سنن دارقطنی) کي دیگر بعض حدیث کتابلرنده موجود احکام حدیثلرینی جمع ایتمش و اثر مذکور کتب فقهیه کي ابواب فقهیه اوزرینه ترتیب ایله مشدر. مشهور شوکانی اشبو اثر جلیل اوزرینه (نيل الاوطار) اسمیله مسمی سکز جلدی حاوی کوزل بر شرح یازمشدر.

[۲] مذکور (کنز العمال) بوتون حدیث کتابلرنده موجود احکامه و غیر متعلق کانه احادیثی جامع اولمق اوزره تألیف اولونمشدر. قرق بش بیک حدیثی جامعدر. هدستانک حیدر آباد شهرنده طبع اولونمشدر. الیوم برلینده آلمان مستشرقلرندن پروفیسور میتووخ طرفندن تدریس ایدلنکده اولدیغنی کچن سنه برلینه کیتدیکنده بالذات مومی الیه دن ایشیتدم !.

لکن زمانمزدہ بوندن بیک بوقدر سنہ اول کلوب کیتمش اولان راویلرک احوالی ، عادل و وثوق الکلام اولوب اولمقلرینی برر برر تحقیق ایتک قابل اولمیه جغندن بو خصوصده ائمہ حدیثک جرح و تعدیلنه ، حدیثلرک انوعی حقیقده کی بیانانہ اعتماد ایلمک ضروریدر . واقعا بو برر نوع تقلید دیمکدره ، مجتهد اوله جق ذات ایچون ایسه کندی تحقیقاتنه استناد ایتک لازمدر . فقط بوکا امکان بولونمدیغندن توسل اولونه جق باشقه چاره یوقدر . اوت ، نقد رجال و تراجم احواله دائر بویوک کوچوک برچوق آثار وجوده کتیرلمش و بمضلری ده مطبوع بولونمشدر . لکن بونلره مراجعت ده مؤلفلرینک سوزلرینه بلادلل اعتماددن باشقه برشی اولمدیغندن بوبابده نه پاییه جق اولسه ینه تقلیددن قورتولوناماز . مع مافیہ یا لکز بوجهت حقیقده تقلید ، حقیقت اجتهاده منافی دکلدز .

بیاه حاجت یوقدرکه قرآن کریم ایله احادیث نبویه ، لسان عربی اوزره وارد اولمقلرندن بالطبع بر مجتهد ایچون لسان عربی یا سلیقه یا تحصیلاً بیلمک لازمدر . فقط بوتون لغات عربیه و قواعد لسانیه بی بیلمک شرط دکلدز . آیات واحادیثدن استخراج احکام ایچون لزومی درجه سنی بیلمک کافیدر . بونکله برابر هر حالده علم اصول فقه قواعدینی اطرافیله بیلمک الزمدر . زیرا علم اصول فقه مجتهد عامیدر . مجرد مجتهدلر ایچون تدوین اولونمشدر . بونک ایچوندرکه بو علمی حقیقه بیلمین بر ذات ، نه قدر عالم اولور ایسه اولسون ولوکه علم تفسیر و حدیثده ؛ صرف ، نحو و معانی کبی علوم لسانیه ده متبحر بولونسون ، ینه فقیه و مجتهد کامل اوله ماز . بناءً علیه رتبه اجتهادی احراز ایده بیلمک ایچون علم اصول فقهده اختصاص تام صاحبی اولمق شرط اولدر .

فقط علم فروع فقہی بیلمک شرط دکلدز . چونکه فروع فقہ ، اجتهادک ثمره و نتیجه سیدر ، آکا تقدم ایده من . مع هذا امام غزالی ، (مستصفی) ده « زمانمزدہ اجتهاد آنجق فروع فقہده ممارسه ایله حاصل اوله بیلیر ، دیور . مشارالیه زماننده فقہده ممارسه ، اهلیت اجتهادک شرائطی جمله سندن اولور ایسه بزم زمانمزدہ بطریق الاولی شرط اولور . زیرا فصل اولده « دور مجتهدین ده

اصول فقه ، بچشمه ده سويله مشدك كه دورتابعيندن سوكره فقه ، برصنعت مخصوصه
حالي اكتساب ايله مش ومعين بر مذهبك بعض مسائل جزئيه سندن قطع نظرله
وهيئت مجموعهي اعتباريله غايت مكممل بر علم اولمئدر . بيك بو قدر سنه دنبري
ظهور ايدن بويوك كوچوك بيكلرجه مجتهدين وفقهانك تلاحق افكاريله يك متين
ويك اساسلي كليات اصليه وقواعد فقهيه تخريجه و تأليفه ايتريك بولمئدر .
هيچ بر مجتهد مستغني اوله ماز . خصوصيله علم اصول فقه ايله علم فروع فقه توأم
اولوب بريني حقييله تحصيل ايدم بيلمك ديكريني تحصيله وابسته اولديغندن بونقطه
نظردن دخي زمانمزده مجتهد اولمق ارزوسنده بولونان بر ذات ايچون فتمده ممارسه
صاحبي اولمق لابددر . واقعا دور اصحاب و تابعينه اولديني كبي زمانمزده دخي
فتمده ممارسه صاحبي اولمقسزبن رتبه اجتهادي احراز مكنندر واقعات آنفهدن
آنفهدن آكلاشديني اوزره ذكي و عزمكار بر ذات ايچون يك او قدر مشكلده
دكلدر . آنجق ابتداسندن انتهاسنه قدر بوتون مسائل فقهيه ده فقهانك تدقيقات
وتلاحق افكاريله وجوده كلن قواعد مذكورويه اصلا عطف نظر التفات ايتمه رك
استخراج احكامده طريق اصحاب و تابعينه سلوك ايله مك ، عمري استيعاب ايدم جك
اوزون ويك يوروجي بر يولدر .

بر مجتهد ، اجتهادات واقعه سنده اجماعه مخالفت ايتمش اولماق ايچون مواقع
اجماعي ده بيلمسي لازمدر . بوني بيلمك ايچون ده تا اصحابدن اعتباراً بوتون فقهاي
اسلامك اقوالني ، زمرلرده اختلاف ايدوب نه كبي مسائله اتفاق ايتمش اولدقنرني
تحقيق ايتسي ايجاب ايدر . فقط بو شرط ، اجماعك دليل شرعي اولديغني قبول
ايدن مجتهده نظر ادر . اكر مجتهد اوله جق ذات ، معتزله علماسندن نظام ايله شيعه
علماسني كبي اجماعك دليل شرعي اولديغنه قائل اولماز ايسه بالطبع اونك ايچون
مواقع اجماعي بيلمك لازم دكلدر .

وجوه قياسي بيلمكده لازمدر . زيرا اجتهادك روحي قياسدره . بو جهته
بر مجتهده قياسك ارکان وانواعني ، شرائط واحكامني اطرافيله بيلمك لازم كلير .
بونلري بيلمكده علم اصولك قياس بختني بيلمكده حاصل اولور . مع هذا بوده يعني

بر مجتهد ایچون وجوه قیاسی بیلمه نك لزومنی ده ، قیاسك ادله شرعیه دن اولدیغنه قائل اولان جمهور علمایه کوره در . علمای ظاهریه کبی قیاسك ادله شرعیه دن اولدیغنی قبول ایتمین علما غندنده ایسه وجوه قیاسی بیلمك ، اجتهادك شرائط اهلیتی جمله سندن دکلدر .

۲ -- ایکنجی شرط : یوقاریده « اجتهادك شرائط استیاتی ایکیدر . بری جمیع مدارك شرعی محیط اولمق ، دیکری اونلره نفوذ ایدمه جك ذکا ونظر فقهی به مالک بولونمقدرد . « دیشدك . هر درلو مناسبه نام بر مجتهد اوله بیلمك ایچون برنجی شرط نه قدر لازم ایسه ایکنجی شرط ده اونسینده وبلکه دها زیاده لازمدر . ایکنجی شرطی حائز اولمیان بر ذات ، برنجی شرطی حائز اولمقله وحتی بوتون آیات قرآنیه وعموم احادیث نبویه بی عن ظهرا القلب حفظ ایتمش بولونمقله حقیقی وتام بر مجتهد ایچون وجودی منتضی اولان اوصاف وشرایطی نفسنده جمع ایتمش اولماز . حقیقی بر مجتهد ایچون مرشدین اول لازم اولان ، نصوص شرعیه نك مناظرینی یعنی مستند اولدقلری علل واسبابی ، بوعلل واسبابك ده مبتنی بولوندقلری حکمت اشریع ومقاصد شاری بیلمك وآکلامقدر . نصوص ودلائل شرعیه نك ایچ یوزینه انفاذ نظره مقتدر اولمیان ، تعبیر عرفیسی اوزره فقیه النفس بولونمیان ساده دل بر ذات ؛ نه نصوصك مستند اولدینی علل شرعیه بی ؛ نه ده شارعك مقاصد تشریحیه سنی فهم وادراك ایدمه بیلیر . بوکیاری اجتهاداتنده بصیرت اوزره بولونماز ، خطاسی صوابندن زیاده اولور . دلائلك تصادم وتعارضنده هانکیسینی ترجیح ایدمه جکنی بیله میوب صیقیشیر قالیر . فقیه انساب اولمیوب یالکزروایت وحفظ حدیث ایله اشتغال ایتمش اولان اصحاب حدیثك اکثریسی بوکیلندرد . بونلر حافظ المسائل وحامل الفقهدرلر ، لکن فقیه ومجتهد دکلدرلر .

نیجه ارباب حدیث واردرکه ده بوکبی حافظه لرنده بیکلرجه احادیث شریفه بی بریکدیردکلری حالدده حدیثلرک محتوی اولدینی احکام فقهیه بی استخراجه مقتدر دکلدردر . بونلر فقه ایدن زیاده حدیث بیلیرلر ، لکن فقها کبی حقایقنه نفوذ ایدمه مزلر . فقیه حدیثی بونلردن اخذ ایدر ، فقط اونلرک آکلابه مدقلری برچوق

احکامی او حدیث کردن استخراج ایله ینه اونلره تفهیم ایلمر . بو حال اسـلاف آرسنده پک چوق واقع اولمشدر .

ننه کیم بر کون ائمه حدیثدن امام اعمش ، ائمه فقهدن امام ابویوسفدن بر مسئله نك حکمی استفسارایدر ، مشارالیه جوانی ویرنجیه امام اعمش ، « بو حکمی نره دن استخراج ایتدک ؟ » دیر . مشارالیه ده « سنک بکا روایت ایتدیگک حدیثدن ، جوانی ویرر و حدیثی قرائت ایدر . بونک اوزرینه امام اعمش ، « بن بو حدیثی سن دنیایه کلمه دن اول او کوندیگم حالده بو کونه قدر معناسنی آکلاماشم . » دیر و امام ابویوسفک فقاہتنی تسلیم ایلمر [کذا فی ابن خلکان] . حضرت شارعه ده ، « بندن بر حدیث ایشیدوبده عیناً حفظ ایدن سوکرده ایشیتدیگی کبی باشقه سنه نقل و روایت ایلمن ذاتک جناب حق قدرینی عالی ایتسین . زیرا فقهی حامل بعض ذوات واردر که حد ذاتنده فقیه دکلدور ، بعضیسی ده کندیسندن دها فقیه اولانه

ناقلدر ، مائنده اولان [نَصَرَ اللهُ امْرَأً سَمِعَتْ مِنِّي حَدِيثًا فَوَعَاهَا ثُمَّ اَدَّاهَا كَمَا سَمِعَهَا فَرُبَّ حَامِلٍ فَقِيهِ غَيْرُ فَقِيهِ وَرَبَّ حَامِلٍ فَقِيهِ اِلَى مَنْ هُوَ اَفْقَهُ مِنْهُ] (۱) حدیث شریفی ایله بو جهتی صراحةً بیان بو یوردمشدر .

الحاصل آنفاً بیان اولونان ایکی شرطدن برنجیسی اجتهادک روایت ، ایکنجیسی درایت جهتیدر . بر کیمسه بو ایکی جهتی جامع اولدجه اهلیت اجتهادی اکتساب ایده منر . زیرا احکام شرعیه نی استخراجده درایتسز درایت معتبر اولیه جفی کبی درایتسز روایتده کافی دکلدور . [فی اصول البزدوی قال الامام محمد فی کتاب ادب القاضی : لا یستقیم الحدیث الا بالرأی ولا یستقیم الرأی الا بالحدیث حتی ان من لا یحسن الحدیث او علم الحدیث ولا یحسن الرأی فلا یصاح للقضاء والفتوی] ۲۰

بو حدیث صحیح والفاظ مختلفه ایله منقولدر . « کنز العمال » ده امام احمد ، ابوداود ، ترمذی ، ابن ماجه و حاکم کبی ائمه حدیث طرفندن تخریج اولوندینی مذکوردر . (نضر) فعلی ضادک تشدیدله ده سرویدر .

اجتهاد تجزی قبول ایدرمی ، ایتزمی ؟ . .

بو مسئله ده علما اختلاف ایتشردر . اکثریتک فکرینه کوره اجتهاد تجزی قبول ایدر . یعنی بر مجتهدك بالعموم مسائله مجتهد اولسی شرط دکادر . بعض مسائله مجتهد ، دیگر لرنده غیر مجتهد اولسی جائزدر . ائمه شافیه دن امام غزالی وابن دقیق العید ، ائمه حنفیه دن ابن همام وابن ساعاتی کبی محققین بو فکری قبول ایتشردر . بعضیلری ده اجتهادك متجزی اولدیغنه قائل اولویورلر . منلا خسرو کبی مقلدین ده بو رأی تقلید ایله مشلردر .

معقول و نزد شارعده مقبول اولان ، اکثریتک فکریدر . معقولدر . زیرا بر کیمسه بعض مسائلك بوتون ادله سنی تحقیق و تحصیل ایدرده دیگر مسائلك دلالتی جمع و تحصیل ائمه مش اوله بیلیر . بوتون مسائل شرعیه نك دلالتی ضبط و استحصال ایتدیکندن دولایی اول کیمسه بی ادله مخصوصه سنی تحقیق و تحصیل ایتدیکی بعض مسائله کندی تحقیقاتیله عمل ایتدیرمه مک ، اوننی عن دلیل حاصل اولان علمی ترك ایله تقایده سوق ایتک دیمکدر که خلاف معقولدر . آشاغیده ایضاح اولونه جفی اوزره تقلید ، جهل دن باشقه بر شی دکادر . علم جهله فدا اولونه ماز .

نزد شارعده مقبولدر . زیرا دلیلدن متولد علم ریب و شبهه دن آزاده در . تقلید ریب و شبهه دن عبارتدر . جناب شارع ایسه [دَعَا مَا يَرْيَبُكَ إِلَىٰ مَا لَا يَرْيَبُكَ] حدیث شریفی ایله شك و شبهه بی موجب اولان شیئی ترك ایله ریب و کاندن آزاده قیلان شیئه اتباعی امر ایدیور . [اسْتَفْتَيْتَ فَهَيْسَكَ وَ اِنْ اَفْتَاكَ الْمُفْتُونَ] حدیث شریفی ده بر کیمسه نك کندی وجدان و اجتهادینك حکمنه متابعت ایتسی لزومی کوستریور [کذافی مسلم الثبوت و شرحه] . قرآن کریمده [وَلَا تَقْفُ مَا لَيْسَ لَكَ بِهِ عِلْمٌ] نظم جلیلی ایله دین اسلامده اصل اولان علمه متابعت ، جهل و تقلیددن مجانبت اولدیغنی بیان ایدیور .

افلیتک رأی یعنی اجتهادك تجزی قبول ائمه جکفی اختیار ایدن منلا خسرو

مرحوم ، بو فكري تأييداً و اجتهاد فقاهت ديكر . فقاہت ايسه بلاغت و سائر ملكاتدن عبارت اولان علوم كيدير . نصل كه بر شخص ، شكر و شكابت ، مدوح ذم كبي بر نوع كلامي مقتضاي حاله مطابق اوله رق سويله . كله بليغ اوليوب صفت بلاغته متصف اولق و آكا بليغ دينه بيلمك ايچون هر نوع كلامي مقتضاي حاله مطابق اوله رق سويله بيلمك اقتدار و ملكه سني حائر اولق لازم كلييورسه ، بر مجتهد ايچون ده طبعي اونك كبي هر نوع احكام شرعيه يني ادله مخصوصه سندن استنباطه كنديسيله مقتدر اوله جق ملكه صاحبي اولق لازمدر . دييورسه ده بوسوز ، آنجق مجتهد مطلق و كامل حقنده دوغريدير . مجتهد مقيد يعنى بعض مسائلده اجتهاد ايله مقيد اولان مجتهد حقنده دوغري دكلدر . زيرا مجتهد مقيد ايچون اويله بر ملكه كامله نك وجودي لازم دكلدر .

علمای اصول ، مجتهدی مجتهد مطلق و مجتهد مقيد نامرئيه ايكي به تفریق ايدسيورلر . مجتهد مطلق ، جميع مسائل شرعيه ده اجتهاد و افتايه اهليتي حائر اولان مجتهددر . مجتهد مقيد ، بعض مسائلده اجتهاده مقتدر اولوب ديكر بعض مسائلده اجتهاده اهل اولمايان و بناء عليه باشقه بر مجتهد مطلقي تقليد ايدن زاندر . ايشته يوقاريدده اهليت اجتهادك شرائطي اولق اوزره بيان اولونان اوصاف و معلوماتك جمله سي مجتهد مطلق حقنده در . مجتهد مقيد حقنده دكلدر . مجتهد مقيد ايچون او شرائطك كافه سنك وجودي لازم دكلدر . هانكي نوع مسئله دائر اجتهاده بولونه جق ايسه اونلر حقنده وجودي مقتضى اولان شرائط و معلوماتي جامع اولق كافيدير . مثلا فقهك معاملات قسمنده مجتهد اوله جق بر ذات ايچون معالاه متعلق بالجمله نصوص شرعيه يني بيلمك لازمدر . فقط عبادات و عقوباته متدائر نصوص شرعيه يني دخي بيلمك لازم دكلدر [كذا في المستصفي و التحرير] .

مجتهد فيه

مورد نصدده اجتهاده مساغ يوقدر .
مجتهد فيه ، حقنده دليل قطعي موجود اولمان هر حكم شرعيدير . محل اجتهاد

و مسئلهٔ اجتهادیه تعییر لرندن مقصود اولان معناده بو کبی احکام شرعیه در. شو حالده هر هانکی بر حکم شرعی که حقیقه بر دلیل قطعی موجود دکدر؛ او حکم شرعی مجتهدیه، محل اجتهاد و مسئلهٔ اجتهادیه در. بناءً علیه آنده اجتهاد جاری و معتبر اولور یعنی مجتهد بو کبی مسائله خطا ایدر ایسه معذور و حتی مأجور اولور. بالعکس هر هانکی بر حکم شرعی که حقیقه بر دلیل قطعی موجود در؛ او حکم شرعی ده مجتهدیه، محل اجتهاد و مسئلهٔ اجتهادیه دکدر. بناءً علیه بونده اجتهاد جاری و معتبر اولماز. شو حالده بو کبی احکامده مجتهد خطا ایدر ایسه معذور اولیوب آثم اولور. اجمالاً بیان اولونان شو مسئلهٔ اصولیه نی ایجه اکلایه یلمک ایچون تفصیلات آتییه کسب و قوف ایتک لازم کلیر. شویله که:

احکام شرعیه، احکام قطعیه و احکام ظنیه اولوق ازره ایکی قسمه منقسمدر. احکام قطعیه، دلیل قطعی ایله ثابت اولان احکامدر. احکام ظنیه، دلیل ظنی ایله ثابت اولان احکامدر. دلیل قطعی اوچ نوعدر: عقل، نص قاطع، اجماع. عقلمن مقصد، مقدمات یقینه دن ترکیب ایدن برهان عقایددر. مقدمات یقینه دن مقصوده؛ ایستر بدیهی اولسون، ایستر نظری اولسون علم یقین افاده ایدن نفس الامر مطابقی قضایای جازمه و ثابتدر. بر حکم عقلی، نفس الامر مطابقی دکل ایسه آکا جهل دینر. جازم اولمقله برابر ثابت اولیوب تبدله محتمل بولونور ایسه آکا تقلید اطلاق اولنور. جازم اولمیان حکم لره ده ظن دینر. بو حکم لری محتوی اولان قضیه لره ده صره سیله قضیه جهلیه، قضیه تقلیدیه و قضیه ظنیه دینر.

عقلده، بر دلیل شرعیدر. کتاب، سنت نصل بر حجت الهیه ایسه عقلده بر حجت بالغه صمدانیه در. بناءً علیه عقلک صورت قطعیه ده ابطال ایتدیکی شیئی شرع تجویز ایتمز، شرعک تجویز ایتدیکی شیئی ده عقل ابطال ایله منزه. بونک ایچوندر که «عقلاً محال اولان شرعاً ممکن اولماز.» حقیقی علم کلام علماسی عندنده قضایای اولیه صره سنه کچمش و حتی «عقل ایله نقل تعارض ایتدکده عقل اول، نقل آنکله مؤولدر، سوزی بر قاعده کلامیه اولمشدر.» کشف زدوی، صاحبی امام عبدالعزیز بخاری ده کتاب مذکورده «عقلک خلاقه شرعک ورودی مستحیلدر، دیور

و « سنت » بمخنده دخی [خبر واحد اولان حدیث ، اگر مقتضای عقله مخالف اوله رق وارد اولمش ایسه نظر اولونور . بلا تعسف تأویلی قابل ایسه تأویل صحیح ایله تأویل اولونور . یوق اگر اولوجهله تأویلی ممکن دکل ایسه حضرت شارعك اوحدی باشقه - نندن نقل و حکایه طریقیله - بویه مش اولدیغنه و یاخود راوینك اکسکک و یا فضله روایت ایتدیگنه حکیم اولونمقی واجب اولور . نصل که کتابه و یا سنت متواتره و یاخود اجماعه مخالف اولور ایسه بو صورته حرکت اولونور . زیرا بونلر ادله قلمیادر . خبر واحد ایسه دلیل ظنیدر . دلیل قطعی ایله دلیل ظنی آره سنده بر وجهله تعارض واقع اوله ماز . دلیل ظنی دلیل قطعی مقابله ساقط اولور . دیور .

فقط بو مسئله ده شو نقطه یه دقت ایتک لازم کلیر که عقل ، حقیقتی ادراک سمعه یعنی شارعدن استماع و نقله توقف ایتمین معرفت کله یه نك وجوبی کی مسائل اعتقادیه ده وعدل واحسانک حسنی ، ظلم وعدوانک قبحی کی بعض افعالک حسن و قبحی ادراکده و بونلره مماثل بعض مسائلده مستقل بر دلیل کافی ایسه ده امور خفیهدن اولان و حقیقتی ادراک سمعه و بر دلیل نقلی به توقف ایدن احکام شرعی فرعیده مستقل و کافی بر دلیل دکلدر . بویه حقیقتی ادراک سمعه توقف ایتمین مسائل کلامیه و اعتقادیه (عقلیات) ، شارعدن استماع و نقله متوقف اولان مسائلده (سمعیات) و (نقلیات) تعیر اولونور . سمعیاته شرعک و رودینه توقفی اعتباریله ده (شرعیات) اطلاق ایدیلیر ، نصل که آیات قرآنیه واحادیث نبویه ، شارعدن منقول اوله لری اعتباریله (ادله نقلیه) دینبایر .

نص قاطع تمیرینه کلنجه : بو تعیردن مقصد ، شارعدن نبوتی و معنای مقصوده دلالتی قطعی اولان نص شرعیدر . بر حکم شرعی به دلالتی پک باهر بر صورتده قطعی اولان آیات ایله احادیث متواتره کی . نبوتی و یا دلالتی قطعی اولمان نصه « نص قاطع » دینبویب نص ظنی و دلیل ظنی دیر .
نصوص شرعیه ، ثبوت و دلالتی نك قطعی و ظنی اعتباریله تقسیم ایدیلرک اولور ایسه درت قسمه اتقسام ایدر .

برنجیسی، قطعی الثبوت و قطعی الدلاله در. معناری قطعی اولان آیات واحادیث متواتره کبی .

ایکنجیسی، قطعی الثبوت و ظنی الدلاله در. معناری ظنی و تاویله محتمل بولنان آیات واحادیث متواتره کبی

اوچنجیسی، ظنی الثبوت و قطعی الدلاله در. معناری قطعی اولان خبرواحد کبی
دردنجیسی، ظنی الثبوت و ظنی الدلاله در. معناری ظنی اولان خبرواحد کبی
بونلرک یا لکز برنجیسی، نص قاطع و دلیل قطعیدر. دیگر اوچی نص ظنی
و دلیل ظنیدر. برنجیسی ایله فرض ثابت اولور. ایکنجی و اوچنجیسی ایله وجوب
ثابت اولور. دردنجیسی ایله دندب و استحباب ثابت اولور. بونلر تعارض ایتدکلرنده
برنجیسی ایکنجیسنه، ایکنجیسی اوچنجیسنه، اوچنجیسی ده دردنجیسنه ترجیح
اولونور [کذا فی کشف البردوی] .

شو ایضا حاتدن مستبان اولور که احکام قطعیه، براهین عقلیه و یا نصوص قاطعه
ویا خود اجماع ایله ثابت اولان احکامدر. احکام ظنیه ده، مقدمات ظنیه دن تشکل
ایدن دلائل عقلیه، ثبوتی و یا دلالتی ظنی اولان نصوص شرعیه و قیاسات فقهیه کبی
ادله ظنیه ایله ثبوت بولان احکامدر .

احکام قطعیه یه ساده جه قطعیات، احکام ظنیه یه ده ظنیات اطلاق اولونور، مسائل
اعتقادیه اصلیه، براهین عقلیه و نصوص قاطعه کبی دلائل قطعیه ایله ثبت اولدیگی
جهتله بالعموم فرق اسلامییه علما نه کوره قطعیاتدن اولدینی کبی اجماعک، خبر
واحدک و قیاسک حجت شرعیه اولسی مثللو قواعد اصولیه دخی ادله قطعیه ایله
ایله ثابت اولدیغندن جمهور علمایه کوره قطعیاتدندر. بونلردن باشقه احکام فرعیه
و عملیه نک مهم بر قسمی ده نصوص قاطعه و یا اجماع ایله ثابت اولدنی جهتله قطعیاتده
داخلدرلر . حتی ارکان اربعه اسلامییه نک یعنی صوم و صلات، حج و زکاتک
فرضیتی و قتل نفس، شرب خمر، اکل میته، فعل زنا، غصب و سرقتک حرمتی
کبی بعض احکام فرعیه نک احکام دینه دن اولدقلری بالضروره معلومدر . زیرا
بوکبی احکام شرعیه مختلف و متعدد نصوص قاطعه، قرناً بعد قرن بالعموم افراد

ملتك تواتر عمومىسى وبالجملة علمائى اسلامك اجماع عامى ايله ثابتدر كه بوضورتله ثبوت ، بونلوك دين و شريعت احكامندن اولدقلى حقنده بالطبع علم ضرورى حاصل ايدر . بويلا احكام دينه دن اولدقلى علم ضرورى ايله معلوم اولان احكام شرعيه يده صرف علماده (ضروريات دينيه) اطلاق اولونور .

ايسته كرك عقليات و اعتقاديانه دائر اولسون و كرك فرعيات و فقهيانه متدائر بولونسون على العموم قطعيات محل اجتهاد دكلدر . زيرا بونلر يقيناً معلوم اولان مسائل و جليات شرعيه در . اجتهاد ايسه معلوم اولميان مسائله جارى اولور . چونكه اجتهاد ، شارع طرفندن احتياجه بناء تجويز اولونمشدر . احكامى معلوم اولان مسائله ايسه اجتهاده احتياج يوقدر . و برده اجتهادك حكى و نتيجه سى ، احكام شرعيه يه ظن حاصل ايتمكدن عبارتدر . دلائل قاطعه ايله يقيناً معلوم اولان مسائله تحصيل ظنه قيام ايتك عبث و مستحيلدر [كذا فى الكشف]

شوحالده بر مجتهدك عقلاً مثبت اولان مسائل عقليه و اعتقاديده بر ايهين عقليه يه قارشى وقوع بولان اجتهادى معتبر اوليه جفى كى نصوص قاطعه ، و يا اجماع ايله ثابت اءقادى و عملى ، اصلى و فرعى بالجملة احكام شرعيه ده نصوص قاطعه يه و يا اجماعه مخالف اجتهادانى دخى معتبر و جائز اولماز . بوضورته مجتهد ، كنديسنه و يريلن ماذونيت و صلاحيت خارجه چيقمش و بناء عليه ارتكاب آثم ايتمش اولور . اجتهاد واقع اهلندن صادر اولمش اولسه بيله محله صرف ايدلمش اولديغندن مجتهدى خطاستده معذور قيلماز . بو جهته احكام قطعيه ده مجتهد خطا ايدر ايسه معذور اوليوب آثم اولور و حاكم ايسه حكى نقض اولونور . ايسته (مورد نصدده اجتهاده مساغ يوقدر .) ديمك ، بوديمكدر . (نص) دن مقصوده نص قاطعدر .

اما حقنده دلائل و نصوص ظنيه دن باشقه بر دليل قطعى موجود اولميان احكام ظنيه ، محل اجتهاد اولديغندن بر مجتهد بو كى مسائل اجتهاديده دلائل و نصوص ظنيه يه مخالف اجتهاده بولونور و بناء عليه خطا ايدرايسه آثم اولماز و حكى نقض اولونماز . چونكه بو صورتده اجتهاد اهلندن صادر و محله مصادف اولمش ، مجتهدده كندى وسع و اقتدارى داخلنده وظيفه سنى ايضا ايتمشدر . آرتق بالضروره معذور و خطاسى معفو اولور ، حتى معتبرات كتب احاديثده و خصوصيله (صحيح بخارى)

ایله (صحیح مسلم) ده موجود [إِذَا حَكَمَ الْحَاكِمُ فَاجْتَهَدَ فَأَصَابَ فَلَهُ أَجْرَانِ وَإِذَا حَكَمَ فَاجْتَهَدَ فَأَخْطَأَ فَلَهُ أَجْرٌ وَاحِدٌ] حدیث شریفی منطوقنجه مأجور بیله اولور . الحاصل جمهور علمای اسلامه کوره مجتهد قطعیاتده خطا ایدر سه ایسه آثم اولور ، ظنیاتده خطا ایدر سه آثم اولماز . معتزله علماسندن مشهور حاجظ ایله ینه علمای معتزله دن عبدالله العنبری وبشر مریمی ، بو مسئلهده جمهوره مخالفت اییدیورلر . حاجظ ایله عنبری قطعیاتی ظنیاتده ، مریمی ده بالعکس ظنیاتی قطعیاتده الحاق اییدیور . حاجظ دیور که : « اجتهاد ، مجتهد اوزرندن مسئولیت احرویه نی رفع ایدر . بناء علیه بر مجتهدك اجتهادی ، دین اسلامی رد وانکاره مؤدی اولسه بیله ینه اول مجتهد آثم اولمیوب معذور اولور . زیرا بعدالاجتهاد قلبده حاصل اولان اعتقادی رفع وازاله ایتك مجتهدك ید اقتدارنده دکدر . مجتهدك اقتداری داخلنده بولو بر شی وارسه اوده آنحق فعل اجتهاددن عبارتدر . بر کره اجتهاد واقع اولدقن صوکره آرق اونك نتیجه سی اوله رق حاصل اولان اعتقادی قلبدن چیقاروب آتمق بشرک اقتداری خارجنده در . چونکه اجتهاد تامدن متولد اعتقاد اضطرار ایدر . اختیاری دکدر . تحت اختیارده بولونمیان بر امراضطرارینك قیضنی تکلیف ایسه وسع بشر داخلنده اولمیان بر شیئی تکلیفدر که تکلیف مالایطاقدر . تکلیف مالایطاق ، عقلاً جائز اولمدینی کبی [لَا يُكَلِّفُ اللَّهُ نَفْسًا إِلَّا وُسْعَهَا] آیت جلیله سی صراحتنجه شرعاًده جائز وواقع دکدر .

بو جهته بو مسئلهده معاندایله مجتهدی تفریق ایتك ایجاب ایدر . قطعیات دینی نی رد ایله دین اسلامی انکار ایدن بر کیسه نك اشبو انکاری ، اگر مجرد تعندن نشأت اییدیور ایسه شهسز آثم ومستحق مجازات اولور . یوق اگر عقلی ونقلی ، علمی وفقی عموم دلائلی تدقیق وبو خصوصده هیچ بر نقصان جهت بر اقیه جق درجهده بوتون قدرتی صرف ایله مک صورتیله واقع اولان اجتهادندن تولد ایله یور ایسه بو تقدیرده معذور اولوب آثم اولماز . ، [کذا فی التحریر والمسنفی] .

حاجظك بومطالعه سنه قارشی جمهور علماطرفندن بوجه آتی جواب ویرلمشدر :

د بر چوق نصوص قاطعه شرعيه ، ضروريات و قطعات دينيه ايمانك و جوبى مسئله سنده معاند ايله مجتهدى تفريق ايتيمور ، بلا استثنا هر كس اوزرينه دين اسلامه ايمانك فرض عين اولدينى و ايمان ايتيم هر كيم اولور ايسه اولسون الك بويوك كناهى ارتكاب ايتيمش و بناء عليه الك شديد مجازات اخرويه يه كسب استحقاق ايله مش اوله جفنى صورت قضيه ده افاده ايدييور . بو خصوصه اصحابدن اعتباراً مخالفينك ظهورينه قدر كچن مدت نظر قنده قرناً بعد قرن ، عصرأ بعد عصر بوئون اهل اسلامك اجماعات تامه سى منعقد .

بر مجتهد نتيجه اجتهادينك نقيضى تكليفك تكليف مالا يطاق قينندن اوله جنى بحثه كلنجه : قطعات دينيه يي رد و انكار ايدن بر مجتهدك مكلف اولدينى و طيفه اجتهادى تماماً ايضا ايتيمش اولدينى تسليم ايتيميز . چونكه ضروريات و احكام قطعيه دينيه حقنده مختلف و متعدد ، عقلى و نقلى اويله باهر و اويله قطعى يراهن و نصوص موجود در كه آنلى شرائطى جامع اوله رق نظر صحيح و امعان ايله تدقيق و تأملدن مدلوللرينى يعنى احكام مذكوره يي تصديق و قبول ايله مك بالضروره لازم كلير . بناء عليه شرائط لازمه نظر و اجتهادى مستجمع اولان بر مجتهد و بر متفكر ايچون ، دلائل مذكوره يي حقيقه و صورت صحيحه ده تدقيق و ترتيبدن سو كره نتايج مطلوبه يي قبول ايتيموب رد و انكار جهتنى التزام ايله مسى تصور اولونه ماز .

حقيقت بويله اولونجه بر ذاتك اصول ديانيه و احكام قطعيه دينيه يي رد و انكار ايتيمس ، مجرد ذكر اولونان دلائل و نصوص موجوده يي وجه مشروح اوزره نظر صحيح و فكر تام ايله استكناه و تأمل ايتيمديكسندن و بناء عليه اولبابده واقع اولان تقصيرندن متولد اولدينى بي اشتباهدر . الحاصل مجتهد نظر صحيح ايله مكلفدر . اجتهادى احكام قطعيه يي انكاره مؤدى اولان مجتهد ايسه وظيفه سنى حسن ايضا ايتيمش ديمكدر . شو حالده اجتهاد فاسدندن دولانى هيچ بروجهله معذور وغير اتم اوله ماز ، ...

عبدالله العنبرى نك بو مسئله ده كى فكرى ايجه آكلاشيله مامش اولديغندن بعض عالما جا حظه همفكر اولدينى ، بعضيرى ده تاميله همفكر اوليوب يالكز خلق قرآن ، خلق اعمال و اراده حادثات كى فرق اسلاميه اده سنده مختلف فيه اولان و تكفيرى .

موجب اوليان مسائل كلاميه ده جا حظك فكرنده بولونديغنى سويله بورلر .
(مستصفي) ده محرر اولديغنى اوزره غنبرينك اخوان مذهبي اولان بعض علماي معتزله
دخى مشارالیهك بوايكنجى فكره قائل اولديغنى بيان وبوفكرى تايد ضمنتده
« بوبله تكفيرى موجب اوليان ايكنجى درجه ده كي مسائل اعتقادي حقتده
موجود آيات واحاديث، قسماً متشابه و قسماً متعارض اولديغندن هر فرقه كندى
آكلايشنه كوره كلام الهى ونبوى به اوفق وعظمت الهيه اليق ظن ايتديكى
فكره ذاهب اولمش وبوصورتله جهل سي ده اجتهاد لرنده معذور بولونشدر . »
مطالعهنى درمیان ايديبورلر .

غنبرى ، (قدر) ه قائل اولان اهل سنت حقتده [هُؤُلَاءِ عَظَمُوا اللَّهَ] =
« بونلر جناب حقى تعظيم ايتديلر ، قدرى انكار ايدن اهل اعتزال حقتده ده
[هُؤُلَاءِ تَزَهُوا اللَّهَ] = « بونلر جناب حقى تزيه ايتديلر ، ديرايمش . غنبرينك
بوسوزلرينه واساس دين اسلامى نفي وانكار ايدنلر حقلرنده بونلره مشابه برسوز
سويله مه مش اولسنه باقيليرسه ايكنجى فكرده بولونديغنى آكلاشيلير .

برنجى فكرك جوابى يوقا ريدم كچمش اولديغندن تكرر اربنه حاجت يوقدر . ايكنجى
فكره جواباً غزالي دييوركه : « بوفكر عقلاً محال دكلدر . لکن شرعاً و اجماعاً باطلدر .
اسلاف امت ، مسائل فرائض وفروع فقهمده كنديلرينه مخالفت ايدنلر عليهم رنده
التزام شدت ايتدكلرى حالده او كي مسائل كلاميه ده مخالفت ايدنلرى مبتدعه دن
يعنى بدعت وضلالت فكريه اصحابندن عدايده رك شدتله عليهم رنده بولونورلر وحتى
آنلرله مناسبت ومصاحبتى قطع ايدرلردى . بوايسه قطعى بر دليل شرعى ديمكدر .
بونك تحقيقى شودر كه بر شينى واقعه ونفس الامر ه مخالف اوله رق اعتقاد جهلدر .
جناب حق حقتده جهل ايسه صورت قطعيه ده حرام ومذمومدر . كلام الهينك
قدمنه اراده الهيه نك شرور ومعاصى به ، قدرت خالقك يوتون كائنات و حادثاته
شمول تعلقنه جهل ده جناب حقه وديته جهلدر . بناءً عليه بو كي جهلدر دخى
جناب حقه جهل كي حرام ومذمومدر ، هيچ بروقتده هيچ بر عاقل ايچون
معذرت تشكيل ايتمز

بشر مریسی یه کلنجه : بوذات جا حظ ایله عنبرینک فکر لرینه بوتون بوتون مخالف و تماماً ضد بر فکره ذاهب اولورق و کرك احکام اعتقادیه و عقلیه ده و کرك احکام فرعیه و فقهیه ده هیچ بر مجتهد معذور و اوزرندن اتم و مسئولیت مرفوع دکدر . احکام اعتقادیه ده اولدینی کبی احکام فقهیه ده دخی حق واحد و متعیندر و هر بری حقنده دلیل قاطع موجوددر . بوجهتله هر کیم خطا ایدر ایسه اتم اولور . شو قدر وار که محظی بعضاً خطاسیله ارتکاب کفر ایتمش اولور ، الوهیت و نبوت مسئله لرنده اولدینی کبی ، بعضاً فاسق اولور ، خلق قرآن و اراده حادئات مسئله لری ایله بونلره مماثل مسائلده اولدینی کبی ، بعضاً فاسق اولیوب یالکمز اتم اولور ، مسائل فقهیه ده اولدینی کبی . ، دیور .

قیاسک ادله شرعیه دن اولدینی قبول ایدن علمادن و معتزله مذهبه سالاک اولانلردن ابوبکر اصم و ابن علیه ایله قیاسک دلیل شرعی اولدینی ردوانکار ایدن امامیه کبی شیعه و اهل حدیثدن ظاهریه علمایی دخی بشر مریسینک بورأینه اشتراک ایدیورلر .

بونلر ادعائی و اقلرینی اثبات ایچون دیورلرکه : « وجوب و حرمت کبی احکام و تکالیف شرعیه ده نفی اصلی ، تمیز دیکرله برائت اصلیه قاعده سنک حکمی جاریدر . یعنی شرعی و یا عقلی بر دلیل قطعی ایله خلافی تبین ایتدکجه احکام شرعیه نك نفی و عدم وجودی ایله حکم اولونمق ضرورت عقلیه مقتضیاتنددر . زیرا احکام شرعیه ، شرعک و رودیله وجود بولان امور وجودیه دندر . بداهت عقلیه ایله صورت قطعیه ده معلوم اولان حقایق دندر که صوکره دن حصوله کلان بر امر وجودیه اصل اولان عدمدر . بوقضیه ، صوکره دن وجودن بولان امر وجودینک ماهیتی اقتضاسندن اولدینی جهنله بونک صدقه عقل ، بلا تأمل بداهتاً و قطعاً حکم ایدر .

شو حالده افعال بشریه ده هر هانکی بر مکلفیت شرعیه ، ذکر اولونان نفی اصلی قاعده سنه استثنا تشکیل ایدم چکندن دلیل قطعی ایله ثابت اولمسی اقتضا ایدر . بناءً علیه ادله قاطعه نك اثبات ایتدیکی احکام ثابت اولور ، اثبات ایتدیکی احکام ده

نفی اصلی اوزره باقی قالیر . بوبایدہ ظنہ و ادلہ ظنیہ به اعتبار اولونماز . زیرا ظن ایلہ یقین زائل اوله میه جفندن یقیناً ثابت اولان بر شیک خلافی ینه یقیناً ثابت اولمق لازم کلیر .

بوده آنجق مقدمات یقینیه دن ترکیب ایدن دلایل عقلیه و یا خود نبوت و دلالتی قطعی نصوص شرعیه ایلہ اوله بیلیر . و برده ، بر جماعتی بر شی ایلہ مکلف طوتمق ، اول جماعت افرادی ایچون مساوی بر صورتنده او سیئه دلالتی ظاهر اولان بر دلیلک وجودی حالده صحیح و معقول اوله بیلیر . اوبله بر دلیلده آنجق دلیل قطعی دن عبارتدر . بو مقامده دلیل ظنینک یری یوقدر . زیرا دلیل ظنینک بر شیئه دلالتی ، احوال و قرائح اشخاصه و او احوال قرائح دن متولدر ذهنیتلره ، آکلایشلره کوره تبدل و مخالف ایدم جکندن مطلوب اولان قوه دلالتی حائز دکلدر ، . . .

مطالعات آنفه ، استخراج احکامده قیاس فقهی ایلہ خبر واحد نوعندن اولان احادیث نبویه بی احتیاجه صالح ادله شرعیه دن عد ایتیلره کوره دوغری اوله بیلیر . نته کیم احکام فرعیه ظنیه ده خطا ایدن مجتهدی تأییم ایلمن یعنی آتم و کناهار اولدیغنه قائل اولاندک اکثرین قیاسک ، بعضری ده خبر واحدک ادله شرعیه دن اولدقلرینی قبول ایتیلرلر . ذاتاً بونلری قیاس ایلہ خبر واحدک مابه - الاحتیاج دلیل شرعی اوله لرینی نفی وانکاره سوق ایدن شوده مطالعات مذکورده در . لکن یوقاریده اسملری کچن ابوبکر اصم و ابن علیه کبی قیاسک حجت شرعیه اولدیغنی قبول ایدنلره کوره شو مطالعات دوغری اوله ماز . چونکه بر طرفدن احکام شرعیه نك ادله قطعیه ایلہ . ثبوتی لزومی ادعا ایتک دیگر طرفدن قیاسک حجیتته قائل اولمق ، تناقضه دوשמکدن باشقه بر شی دکلدر . زیرا قیاسک ادله ظنیه دن اولدیغنی عندالعلما مسلماتدندر . شو حالده بونلر یا بو مسئله ده کندیلری ایلہ همفکر اولان ظاهریه و امامیه علماسی کبی قیاسک حجیتی انکار ایدناردندرده بو خصوصده آنلردن واقع اولان روایت دوغری دکلدر . یا خود قیاسک قطعیتته و قطعی اولمیان قسمنک کندیلرنجه معتبر اولمادیغنه قائل اولویورلر .

و برده امام غزالی ، مشارالیه مانک بشر مرئسی ایلہ همفکر اولدقلرین صورت

مطلقه بیان ابتدیی حاله اصول بزدوی شرحی (کشف الاسرار) ده ابو بکر اصم ایله ابن علیہنک و احکام فرعیہ اجتهادیهنک هر بری حقننده دلیل قطعی موجوددر. بو جهته اجتهادنده خطا ابدن مجتهدك عملی صحیح اولماز و حکمی نقض اولونور. شو قدر وارکه دلیل مذکور خفی و غامض اولدیفندن خطاسی مفو و بناء علیه اوزردن ام و مسئولیت مرفوع اولور، دیدکلری بیان و اهل سنتدن (ماتریدیه) فرقه سنک رئیس امام ابو منصور ماتریدی کبی بعض اکابر علمانک ده بو فکره تمایل بولندینی آیان اولونویور. بو روایت کوره مشارالیهمانک یالکنز بر نقطه ده یعنی احکام اجتهادیه ده دلیل قطعی موجود اولدینی فکرنده بشر مرسی به موافق و فقط احکام مذکوریه متعلق اجتهاده وقوع بولان خطا اوزرینه ام و مسئولیت ترتیب ایده جکی نقطه سنده مخالف اولدقلری آکلاشلیور.

افادات سابقه دن مستفاد اولویورکه قیاس ایله خبر واحدك استخراج احکامه حجت شرعیه اولمرینی قبول ایتمیان علما عندنده، ادله قاطعه ایله ثابت اولان احکام شرعیه خارجنده قالان احکام ظنیه ده ذکر اولنان (نفی اصلی) قاعده سی خلاقه اوله رق اجتهاده بولنمه مساع یوقدر. بناء علیه او کبی برلرده مسائل اجتهادیه ده دلیل ظنی به استناداً بر شینک وجوب و یا حرمتنه قائل اولوق، مسئولیت اخرویه بی مستلزم اولور.

جمهور علما طرفدن بولنره جواباً دئیرکه: نفی اصلی، برائت اصلیه و اباحه اصلیه تعیرلری ایله افاده اولونان و برنجینک معناسی «احکام شرعیه ده اصل اولان عدمدر»، ایکنجینک معناسی «ذمتده اصل اولان برائت و عدم مکلفیتدر»، اوچنجینک معناسی ده «اشیاده اصل اولان اباحه در. دیمک اولان و مفهوماً متغایر اولدقلری حاله نتیجه متحد بولونان شواوچ قاعده اصلیه به دیه جک یوق ایسه ده بولنرک جلافه ادله ظنی به استناداً اجتهاده بولنمه نك مستلزم مسئولیت اوله جنی ادعای مسلم دکلدر. زیرا بوقاعده لر کلیات عامه در، یعنی یک کلی و هر شینه شامل اوله جق درجه ده عمومیدر. بودرجه ده کلی و عمومی اولان برقاعده نك مستثنیاتی چوق اولور. نته کیم ادله قاطعه ایله ثابت نه قدر احکام شرعیه و ارسه جمله سی

بوقاعده لردن استثناء و تخصیص اولونمشدرد. برقاعده نك مستثنیاتی نه مرتبه چو غالبه
اوقاعده نك دلاقی ده اونستنده کسب ضعف ایدر. آرتق آنک حجیته خلل کلیر.
قطعی ظنیته، حتی بک ضعیف ظنیته منقلب اولور. بونک ایچوندر که قواعد مذکورده،
شرعک ورودیله احکام شرعیه کنیدیلرندن استثناء و تخصیص ایدلرندن اول یك
قطعی اولدقلمری حالده شرعک ورودندن صـ و کره بالعکس بک زیاده اکتساب
ضعف ایتشلردرد. بوجهتله نصوص ظنیه و قیاس کبی ادله ظنیه ایله بو بونلره بمائل
قاعده لرك احکامی خلافته استدلال جائز اولور و بناء علیه مجتهد آثم اولماز. زیرا
جواز، ائمه منافیدر. [هذا الجواب مستفاد من شرع تنقیح الفصول للقرافی
فی الباب الثمینی فی ادلة المجتهدین] . . .

و برده اصحاب کرام، بوقاعده لرخلافته اجتهادده بولونورلر و آره لرنده فرائضه
وسائر احکام فرعیه به متعلق برچوق مسائل فقهیه ده اختلاف ایدرلر و هیچ بری
دیگری نی تأییم ایتمز، خلقه فتوی ویرمکدن و خاقتی ده آنی تقلیددن منع
ایله مزیدی. حالبوکه خوارج کبی اهل سنت اعتقادینه مخالف اعتقادده بولونانلره،
زکاتک و جوبنی انکار ایدنلره و بونلره بمائل رأی واجتهادده بولونانلره نفرت
و علیهلرنده التزام شدت ایله جمله سنی تأییم ایدرلردی. سببی ده بو کبی احکام حقنده
دلائل قاطعه موجود اولمسیدر. اگر ذکر اولونان مسائل فقهیه حقنده ادله
قاطعه موجود اولسهیدی او کبی مجتهدات فقهیه ده دخی ادله مذکورده خلافته
اجتهادده بولونانلری اول وجهله تخطه و تأییم ایلرلردی. اصحاب کرامک بو حالی،
مسائل فرعیه اجتهادیه ده خطا ایدن مجتهدک آثم اولمیه جفته دال بر دلیلی اجماعیدر که
اسلافدن اخلافته تواتراً منقولدر. [کذا فی المستصفی للافزالی]

اجتهاده متعلق بعض مسائل

— ۱ —

مسئله — : مسائل اجتهادیه ده معین بر حکم شرعی وارمیدر، یوقیدر؟
بو مسئله، هر مسئله دن زیاده علمای اسلام آره سنده اختلافی موجب اولمش بر مسئله در.

مسئله يك او قدر حلی مشكل بر مسئله دكلدر . خصـ و صيله بومسئله نك تعین ماهيته متعلق (صحیح بخاری) و (صحیح مسلم) ده موجود [اِنَّ اَعْظَمَ الْمُسْلِمِينَ فِي الْمُسْلِمِينَ جُرْمًا مَنْ سَأَلَ عَنْ شَيْءٍ لَمْ يُحْرَمْ فُحْرَمَ عَلَى النَّاسِ مِنْ اِجْلِ مَسْئَلَتِهِ] حدیث شریفی ایله امام ترمذی و ابن ماجه نك تخریج ایلدکاری [الحلالُ مَا أَحَلَّهُ اللهُ فِي كِتَابِهِ وَالْحَرَامُ مَا حَرَّمَ اللهُ فِي كِتَابِهِ وَمَا سَكَتَ عَنْهُ فَهُوَ مِمَّا عَفَا عَنْهُ] حدیث منیفی کبی شارعدن نقل صحیح ایله منقول متعدد احادیث معتبره ؛ [قُلْ لَا اَجْدُ فِيمَا اُوْحِيَ اِلَيَّ مُحْرَمًا عَلٰى طَاعِمٍ يَطْعَمُهُ اِلَّا اَنْ يَكُونَ مَيْتَةً] و [يَا أَيُّهَا الَّذِينَ آمَنُوا لَسْنَا لَكُمْ بِشَيْءٍ اِنْ تَبَدَّلْتُمْ كُفْرًا تَسُوْكُمْ] آیت جلیله لری کبی نصوص قرآنیه ده وارد اولمشدر .

حال بویله ایکن ، ینه علمانك بومسئله حقنده اوزون وقاریشیق اختلافاته دوشمش اولمیرینه حیرت ایتمه مک قابل دكلدر . مسئله نك اهمیت فوق العاده سی درکار بولندیغندن اولا علمانك افکار مختلفه سی ، سوکرده ملاحظات عاجزانه منری بیان ایده جکیز . بومسئله حقنده واقع اولان افکار مختلفه نك ضبطی ایچون شووجهله بر خلاصه در میان اولونه بیلیر :

بومسئله اجتهادیه ده مجتهد هنوز اجتهاد ایتزدن اول ، عندالله معین بر حکم یا بوقدر وحق متعدددر ، ویا واردر وحق واحددر . یوق اولدیغنه کوره یا او حقوق متعدده حقیقتده و نزد باریده ، تساویدر ویا خود ایچلرندن بری احق وار جحددر . حکم موجود اولدیغنه کوره ده ایکیدن خالی دكلدر : یا او حکمه دال بر دلیل موجود دكلدر ویا موجوددر . موجود ایسه یا قطعیدر ویا ظنیدر . قطعی اولدینی تقدیرده خطا ایدن مجتهد ، یا آثم اولور ویا اولماز . ظنی اولدینی صورتده یا مجتهد اولدیل ظنی به اصابتله مکفدر . یا خود دكلدر ..

ایشته شو احتمالاتك هر برینه بر قسم علما ذاهب اولمش و بوضورتله بومسئله

اطرافنده یدی فکر وجوده کلهشدر . بونلری دلائلی ابله برابر برر برر نقل وایضاح ایتک ، یک اوزون کیده جکندن بحثی داغیتامق ، سوزلری لزومندن زیاده اوزاتمش اولماق ایچون نفرعاه عائد تفصیلاتدن صرف نظرله اکه اساسلی فکرلری و بوفکرلر حقنده درمیان ایدیلن مطالعاتی توضیح ایله اکتفا ایده جکزه . شویله که : آتفاً ذکر اولونان خلاصه یه براز دقت ایدیلیرسه کورولورکه بو بحثده بروجه آتی اوج اساسلی فبکر واردر :

۱ فکر — « بر مسئله اجتهادیهده قبل الاجتهاد اصلا معین بر حکم یوقدر . حکم آتبق مجتهدک ظنندن عبارتدر . بناءً علیه مسئله اجتهادیهده حق ، اختلاف ایدن مجتهدلرک عددی نسبتنده متعدد و جملهسی ده عدالله متساویدر . »

۲ فکر — « بر مسئله اجتهادیهده واقعا معین بر حکم شرعی یوقدر . لکن نفس الامرده بر حکم یعنی (اکر شارع طرفندن بر مسئله جتهادیهده بر حکم وضع وتمین ایدیله جک اولسه یدی مطلقاً بو وضع اولونوردی) دینیه بیله جک برشی واردر که مقصد شارع اشبه اولان شیدن عبارتدر . بوجهتله بر مسئله اجتهادیهده اقوال مختلفه فقهانک جملهسی ده حق اولقله برابر مزیه متساوی اولیوب ایچلرندن هانکیسی ، اوشینه توافق ایدیورسه اوقول دیکر لرندن احق ومقصد شارع اشهدر . »

۳ فکر — « مسئله اجتهادیهده معین بر حکم شرعی واردر و حق واحددر . حکم اوله مجتهدک ظنندن عبارت و حق متعدد دکلدر . حکم مذکور هانکی مجتهد اصابت ایتمش ایسه اومصیدر ، اصابت ایتیلرده مخطیدر لر . شوقدر واردر که عندآهیده متعین اولان او حکم شرعی ، بزجه صورت قطمیهده معلوم اولمدیفندن هانکی مجتهدک اصابت ، هانکیسنک خطا ایتمش اولدینی یقیناً بیلینه مز . »

بیانه حاجت یوقدر که اوچنجی فکر برنجی فکره تماماً ضد ، ایکنجی فکرده آره لرنده متوسط و برنجی فکر دن متولددر . علم کلام علماسنک اکثریسی ، از جمله اهل سنتدن (اشعریه) فرقه سنک قسم کلیسی برنجی فکره ، بر قسمی ده ایکنجی فکره ذاهب اولمشدر . آنکچون برنجی فکر ایله ایکنجی فکر ، جمهور

متكلمينه نسبت اولونور. فخر الاسلام بزدوی امام ماوردی کبی بعض اکابر علما ،
بو برنجی فکر ایله ایکنجی فکری صورت مطلقهده معتزله به نسبت ای دیوورلر سهده
(مسلم الثبوت) صاحبك دیدیکی کبی برنجی فکری معتزله نك جمله سنه و حتی اکثریسنه
نسبت ایتمك دو عری اوله ماز . احتمال که معتزله علمه ساسی ایکنجی فکره ذاهب
اولمشلردر . لکن برنجی فکر ، آنلرک حسن و قبح حقنده کی نظریه لرینه منافیدر .
چونکه آشاغیده ایضاح اولونه جنی اوزره معتزله افعال بشرک حسن و قبح ذاتیسنه
قائلدرلر . بو نظریه به کوره حسن ذاتی بی حائر اولان یعنی ماهیتی اعتباریله حد
ذاتنده کوزل اولان فعلك واجب و بالعکس قبح ذاتی بی حائر اولان فعلك ده حرام
اولسی لازم کلیر . اصول بزدوی شرحی (کشف) ده رؤسای معتزله دن ابوعلی
جیانی ، ابو هاشم و ابو هذیل ابله بونلره پیرو اولانلرک مسائل اجتهادیده معین بر
حکم شرعینك عدم وجودینه قائل اولدقلری ذکر اولونیور سهده برنجی فکره می ،
یوقسه ایکنجی فکره می ذاهب اولدقلری بیان اولونیور . حسن و قبح حقنده ذکر
اولونان اساسه نظراً بونلرک ایکنجی فکری اختیار ایتلمی ایجاب ایدر .

اما اشعریه ؛ حکمت الهیه و تشریحیه بی ، افعال بشرده حسن و قبح حقیقی
و ذاتی بی انکار ایدوب عدل و حق ، ظلم و بطلان ، خیر و شر ، نیک و بد ، کوزللك
و چیز کینلك کبی کلماتك افاده ایتدکلری معنالرك امور اعتباریه و اضافیه دن و موضوعات
شرعیه دن بولوندقلرینه قائل اولدقلری ایچون برنجی فکر ، بونلرک اشبو نظریه لرینه
تماماً توافق ایدر . بوندن دو لاییدر که باشده اشعریه نك امامی و رئیس اولی امام ابو الحسن
الاشعری ایله رئیس ثانسی قاضی ابوبکر باقلانی واک بویوک مدافع لوندن امام غزالی
اولدقلری حالده اشعریلرک قسم کلیمی ، مباحوث عنه برنجی فکری اختیار ایتمشلردر .
بوجهتله برنجی فکری معتزله دن زیاده (اشعریه) فرقه سنه اسناد ایتمك ، حقیقته
دها زیاده توافق ایدر . اهل حدیثدن بعض متكلمین ، فقه شافعینك رئیس ثانسی
امام مُرَبَّی کبی بعض اکابر فقها دنخی برنجی فکری ترجیح ایله مشلردر .

امام غزالی ، (مستصفی) نامیله معروف اولان کتابنده برنجی فکری اختیار ایتدیکنی
و ایکنجی فکره ذاهب اولانلری بلاتردد تخطئه ایله دیدیکنی صورت قطعیه ده بیان ،

دلالتی ده اوزون اوزادی به سرد و اتیان ایدیور . مذاهب اربعه فقهیه به منسوب
فقهائک اکثریسی اوچنجی فکری قبول ایتدکلرندن اوچنجی فکریه جمهور
فقهیایه نسبت اولونور .

برنجی فکر ایله ایکنجی فکریه ذاهب اولانلر ، متفقاً بوتون مجتهدلرک
اجتهادلرینی تصویب ایله «هر مجتهد مصیبدر» دیدکلری ایچون بونلره (مُصَوَّبَه)
اطلاق اولونور . اوچنجی فکریه قائل اولانلرده اختلاف ایدن مجتهدلردن یالکیز
برینی تصویب ، دیکرلرینی تخطئه ایله «مصیب» واحدر ، دیکرلری تخطیبدر .
مجتهد بمضاً اصابت بمضاده خطا ایدر . دیدکلرندن بونلرده (مُخْطِئَه) اطلاق
اولونور . بزده بوندن سوکره بونلری بوناملر ایله ذکر ایدمکچیز .

دیمک اولویورکه مسائل اجتهادیده معین بر حکم شرعینک وجودنده اختلاف ایدن
علمای اسلام ، اول امرده مصوبه و محطئه ناملریله ایکی بویوک قسسه آزیلدیورلر . سوکره
مصوبهده برنجی و ایکنجی فکریه ذاهب اولوق اعتباریله ایکی فرقه به انقسام ایدیورلر .
شویله که : مصوبه ازلا (بر مسئله) اجتهادیده عندالله معین بر حکم شرعی یوقدر .
حکم شرعی مجتهدک رأی وظننه تابعدر . بناءً علیه بر حادثه فقهیهده مجتهد نتیجه
اجتهادنده نهی حکم ظن ایتمش ، اجتهادی نهی منجر اولمش ایسه او مجتهد حقنده
حکم شرعی آتبحق اوندن عبارتدر . بوجهتله هر مجتهد مصیبدر و جهل سنک رأی
وقولی حقدر . هیچ برینه خطا و بطلان اسناد اولونه ماز . مسئله اجتهادیده
حق واحد دکلدر ، بالعکس اختلاف ایدن مجتهدلرک عددی نسبتنده متعدددر .
نقطه سنده اتحاد ایدیورلر .

لکن بو نقطهده اتحاد ایتدکلن سوکره [متعدد اولان او - حقوق یعنی ظنون
واقوال فقها نزد الوهیتده مزیه متساویمیدر ، یوقسه ایچلرندن برینک دیکرلری
اوزرینه رجحان و مزیتی وارمیدر ؟] نقطه سنده افتراق ایدیورلر . بر قسمی
ذکر اولونان حقوق واقوال متعدد نیک عندالهیده متساوی اولدیغنه ، دیکر بر
قسمی ده بالعکس برینک دیکرلرندن احق و ارجح بولوندیغنه ذاهب اولویور و ایشته
بوصورتله یوقاریده ذکر اولونان برنجی فکر ایله ایکنجی فکر وجوده کلیور .

مخطئه ده او چنجی فکریه یعنی «مسئله اجتهادیه ده قبل الاجتهاد عندالله معین بر حکمک موجود اولسی، فکرنده اتفاق ایتدکن صوکره او حکمه دال بردلیک وجودنده اختلاف ایتشردر. بر قسمی نه قطعی، نه ده ظنی هیچ بردلیک موجود اولدیغه، بر قسم قلیلی ده دلیل قطعینک موجودیتته اکثریت کلیه سی ده دلیل ظنینک وجودینه قائل اولشردر. بحث سابقده بیان اولوندیغی وجهله فقهای حنفیه دن فقط معتزله علماسدن پسر مریمی وابن علیه کبی دلیل قطعینک وجودینه ذاهب اولانلر خطا ایدن مجتهدک آثم اولوب اولیه حقیقده، دلیل ظنینک وجودینه قائل اولانلرده مجتهدک اولدیلله اصابتله مکلف اولوب اولدیغی نقطه سنده اختلاف ایله مشردر. بو اختلافات نتیجه سنده مخطئه فرقه سی، کوچوک بویوک متعدد حزبلره آیرلشدر. [کل جزب بما لَدَیْهِمْ فَرِحُون].

فقهایتک اکثریتی، دلیل مذکورک ظنی اولدیغنه و خفاسی حسیله مجتهدک اولدیل ظنی به اصابتله مکلف اولدیغنه قائل اولشردر. فقهای حنفیه تک قسم کلیسی ده بورایی قبول ایتشردر. مذاهب اربعه فقهییه مؤسسوری امام ابوحنیفه، امام مالک، امام شافعی و امام احمد حضراتنک بومسئله حقیقده کی فکرلری لایقیله آکلاشیله مامش و بویابده کندیلدن هم مصوبه، هم ده مخطئه فکرنده بولوندقلرینه دلالت ایده جک متباین سوزلر نقل اولونمشدر. امام ابوحنیفه حضرتلری؛ [کل مجتهد مصیب و الحق واحد] یعنی «هر مجتهد مصیب و فقط حق واحددر.»، دیمش، لکن بوسوز مقصدینی تفهیم و افاده ده صریح اولدیغندن مختلف صورتلره تفسیر اولونمشدر. کیم هانکی فکریه ذاهب اولمش ایسه «شارالیهک بوسوزینی او فکریه کوره تاویل ایله مشدر.

(اصول بزروی) ده و آکا تبعاً (توضیح) ایله (مرأت) ده؛ خطا ایدن مجتهد حقیقده فقهای حنفیه تک ایکی به آیرلقلری، بر قسمنک مجتهد مخطینک هم ابتداء و هم انتها یعنی هم ابتداء اجتهادنده دلیلله نظراً، هم ده نتیجه اجتهادنده حکمه نظراً مخطی اولدیغنه؛ بر قسمنک ده ابتداء مصیب اولوب انتها مخطی بولوندیغنه ذاهب اولدقلری نقل و بیان اولونیور. لکن محقق شهیر کمال الدین ابن

هام ، (تحریر) ده بوتقلى جرح ایدیور و [بوتقل و بو اختلاف تحمق ایده مز -
زیرا اجتهاده ابتدا وابتداء ، مجتهدك وظیفه مأموره سیدر . مجتهد اونکله مکلفدر .
بوجهتله مجتهد ابتداء اجتهادنده خطادکل ، امره امتثال ایتشددر . امره امتثال نصل خطا
اوله بیلیر؟ بوکا هانکی عالم قائل اولور؟ . اگر « ابتداء اجتهادنده دلیله نظر اخطیدر ،
سوزندن مقصد « اجتهادنده بعض شرائط اجتهادی اخلال ایتدیکندن دولای
مخطیدر ، دیمک ایسه بونده کیمسه نك اختلافی یوقدر . بومتفق علیه بر مسئله در .]
دیور .

ایشته بویخت حقنده موجود اولان شومشوش وقاریشیق اقوال و اختلافانی
بوصورتله مختصراً قیدونثیت ایتدکن صوکره یوقاریده ذکر اولونان اوچ اساسلی
فکره قائل اولانلرک دلیلرینی نقل وتدقیق ایدلم :

کرک برنجی فکره و کرک ایکنجی فکره ذاهب اولان مصوبه ، « مسائل
اجتهادیه ده قبل الاجتهاد معین بر حکم شرعی یوقدر . » ادعاسنی اثبات ایچون مختلف
دلیللر سرد ایدیور لر سده بزجه اک قوتلیسی ، امام غزالی نك (مستصفی) ده
ایراد ایله دیکی دلیدرکه بوجه آتی خلاصه نقل اولونور . دیورکه : [طنیانده
یعنی حقنده عقلی و قلی ادله قطعیه موجود اولیاب مسائل اجتهادیه ده معین بر حکم
شرعی یوقدر . چونکه حکم ، حضرت شارعك افعال مکلفینه تعلق ایدن خطابندن
عبارتدر . خطاب شارع ایسه آنجق ایکی طریقك بریله معلوم اولور . بری شارعدن
صراحت مسموع اولق ، دیکری دلالت قطعیه ایله مدلول بولونمقدرد . مسموع اولق
ایچون نطق صریح و نص قطعی لازمدر . مدلول بولونمق ایچون ده حضرت پیغمبرك
برفعلی ایشله مسندن و یا خود باشقه سی طرفندن ایشله نیر ایکن کوروبده سکوت
ایتمسندن عبارت اولان بر دلیل قطعی نك و چودی لازمدر .

بر مسئله ده بویله بر خطاب مسموع و یا مدلول موجود اولوبده مجتهد آکاواقف
اولمش ایسه اومسئله ده ، اومجتهده کوره حکم شرعی موجود دیمکدر . آرتق مجتهد
اومسئله ده خطا ایدر ایسه معذور اولیوب آتم اولور . کذلک اویله بر خطاب موجود
اولوبده مجتهد ، کندی قصیرندن دولای آکاواقف اولماش ایسه یعنی مجتهدك آکا
عدم وقوفی شرائط اجتهادی تماماً ایفا ایتمه مسندن و بناء علیه ممکن اولان بر طریق

متیسر ایله آتی تحری و تتبع ایله مه مسندن نشأت ایتمش ایسه ینه آتم اولور. اما راوینک روایت ایتمه سی و یا خود پک اوزاق بر محله بولونمسی کبی کندی قصیرینه تعلق ایتمین بر سبب خارچیدن تولد ایله مش ایسه آتم اولماز . و بو تقدیرده خطاب مذکورہ مطلع اولان مجتهد حقنہ حکم موجود ، مطلع اولیان حقنہ ده مفقود دیمک اولور .

فقط بونلر بچشدن خارچدر . بچشمز او یله بر خطاب مسموع ومدلول موجود اولیان مسائل اجتهادیه ظنیه حقنہ در . او حالده بر مسئله ده که روجه مشروح نا خطاب مسموع ، نه ده خطاب مدلول موجود در ؛ آرتق او مسئله ده حکم شرعی ده غیر موجود دیمکدر . واقعا مسائل اجتهادیه ده ادله ظنیه وارد . لکن ادله ظنیه لذاتها ادله دکدر ، امارات و قرائن ظنیه جمله مسندندر ؛ ظن افاده ایدر لر ، علم افاده ایتمز لر . ظن نفسک بر شیئه ، نفی و اثباتدن بر جهته میل ایتمسندن عبارتدر که دائما تبدله معروضدر . علم ایسه اصلا تبدل ایتمز . بوجهته ادله ظنیه ، حقیقته ایصال و علم یقین استحصال ایدمک ادله حقیقیه دن معدود دکدر . دلیل دیه حقیقی و غیر متبدل علم حاصل ایدن دلیلہ دیره ، بو کبی امارات ظنیه ده ادله اطلاق اطلاق مجازیدر ، اطلاق حقیقی دکدر .

بو قیل ادله ظنیه نک حکمی ، اشخاص و احواله کوره تحول ایدر . بر شخصه کوره ظن افاده ایدن بر دلیل ظنی ، دیگر بر شخصه کوره هیچ بر شی افاده ایتمز . حتی شخص واحد حقنہ بیله بر زمانده و بر حالده ظن افاده ایدن بر دلیل ظنی ، دیگر بر زمانده و دیگر بر حالده او ظنی افاده ایتمز . بو خصوصه احوالک ، حساباتک ، سجه نک ، تلقیناتک و بونلردن متولد تمایلات قلبیه نک و ذهنیتلرک کلی دخل و تأثیری وارد . زیر احوال و حسابات ، اخلاق و تمایلات ، تلقینات و ممارسات و بونلره مماثل حالات ، کندیلرینه ملایم دوشن ظنونی تولید ایدر . مثلا مزاجی حدید ، غضبی شدید اولان بر شخص ؛ کندیسندہ شہامت و انتقام بولونان هر شیئه میل ایدر ده طبیی ملایم و قلبی رقیق بولونان دیگر بر شخص او کبی شیردن قوت ، رفق و مساعه جهته و بونلری مفید اولان ادله به میل و رغبت ایلر . کذلک علم فقه ایله ممارسه سی اولان بر ذاتک

طبعه مناسب اوله رق ظن افاده ایدن بر دلیل ، علم کلام ایله کسب ممارسه ایدن دیگر برذاتک طبع و فهمنه مناسب دوشمیه جکی جهته اوطنی تولید ایتمز . بویه متحول ، احوال و اشخاصه کوره دلالتی متبدل اولان برشی ، حقیقته دلیل و طریق معرفت اوله ماز .

ایشته ظنونک و ادله ظنیه تک ماهیتلری بوندن عبارتدر . مسئله تک حقیقتنی ستر ایدن اورتو اورتو دن قالمق ایچون بوجهت ایجه آکلاشلملیدر . زیرا بویچده غلط و خطانک باشلیجه سببی ایکیدر . بری ظن افاده ایدن اماراتی ادله حقیقیه دن عدایمک ، دیکری حل و حرمت کبی احکام شرعییه بی اعیان و اشیانک اوصافی ظن ایله مکدر . بونلرک ایکیسی ده یا ککشددر . برنجیسی اماراته بطریق المجاز ادله اطلاق اولونمشدن ، ایکنجیسی ده حلال و حرام تعییرلرینک ، کذلک مجاز طریقله اعیانه نسبت و اضافت ایلمسندن نشأت ایتمشددر . بعضیلری حسن و قبحی افعال و اشیانک اوصاف ذاتیه سی ظن ایتمکاری کبی فقهاده ، بعضی نصوص شرعییه ده حل و حرمتک اعیانه نسبت اولوندقلرینی کوره رک احکام شرعییه بی اعیانک اوصافی ظن ایتمیلر . دوشونم دیکرکه اونسبت ، نسبت محازییه دره نسبت حقیقیه دکلددر . چونکه احکام شرعییه ، افعال مکلفینه تعلق ایدن خطابات شارعدن عبارت اولدینی ایچون افعالک صفاتیدر ، اعیانک دکل . [..

ایشته امام غزالی تک بومسئله حقنده کی دلیلی و خلاصه مطالعاتی بوندن عبارتدر . مشارالیه بومقامده دها بعضی مطالعات سرد اییدیور ، معارضلرینک دلائل و شبهاتی برر برر نقل و ایضاح ایله جوابلرینی اعطا اییدیورسه ده بونلرک جمله سنی نقل ایتمک ، لزومندن فضله تطویلی موجب اوله جنی کبی بعضیلری ده برر مناسبته آشاغیده ذکر ایدیله چکندن اطنابدن احترازا نقلندن صرف نظر اولونمشددر .

مصوبه تک هر دلیلنه مخططه طرفدن آیری آیری جواب ویرلدیکی حالده غریبدرکه الله بولونان اک مشهور واک مفصل اصول کتابلرنده امام غزالی تک بودیلنه قارشلی اختیار سکوت اولونیور . جواب شویله دورسون دلیلک کندیسینی بیله نقل ایدیور . سانکه متأخرین ارب تألیف ، مشارالیهک اثر مذکورینی یعنی (مستصفی) بی کورمه مشر و یاخود آنک اجتهاد بحثنی او قومه مشر ، حتی ذکر اولونان ذللی

دیگر مصوبیتند ده ایشیتمه مشر ا . احتمال که بمضیاری (مستصفی) بی حقیقه کورمه مش و اوقومامشدر . لیکن اصول بزدوی شرحی (کشف الاسرار) مؤلفی ، هم کورمش ، هم اوقومش وهم ده آتک اجتهاد بمختنه عاند برچوق مسائلی کندی کتابنه درج ایتش و آنلری (مستصفی) دن اقتباس ایله دیکنی ده صراحة ذکر ایله مشدر . حال بویله ایکن صاحب (کشف) ، مصوبه نك دیگر دلیلمری برر ذکر ایله درك جمله سه آری آری جواب ویریورده غزالینك اوزون اوزادی به بسط و بیان ایله دیکنی بودلیلی حقنده کویا هیچ کورمه مش و ایشیتمه مش کبی حرف واحد سویله میور !! .

دوغریسی ، كرك صاحب (کشف) ك و كرك ابن حاجب و ابن همام کبی بك درین دوشونن و هر مسئله بی اینجه دن اینجه به تدقیق ایدن بویوك مؤلفلرك بوسکوتلرینه بردرلو عقل اپردیره مدك . عقلمرك اردیکنی برشی وارنه اوده ، ذکر اولنان دلیلک اساس اعتباریه بك قوتلی اوله سی و بزم کوردیکمز کتب اصولیه ده جوابسز قاله سیدر . بودلیل اساس اعتباریه بك قوتلدر دیدک . فی الحقیقه اصولیون حکم شرعی بی افعال مکلفینه تعلق ایدن خطاب شارعدر ؛ فقهاده او خطاب شارعك ائیدر دیه تعریف ایدیورلر که نتیجه اعتباریه بویکی تعریفك ایکیسیده برشیدن عبارتدر . بیانه حاجت یوقدر که خطاب شارع ، « شونی یاییکنز ، ویا » یاییکنز ، ویا خود « ایسترسه کنز یاییکنز ، ایسترسه کنز یاییکنز ، کبی امر ونهی ویا تخیر صورتنده ویا خود بونلردن برینك مقامنه قائم اوله جق طرزده شارع طرفدن مخاطب اولان انسانلره توجیه اولونان کلامدن باشقه برشی دکلدر . بوجهتله « برحادثه اجتهادیه ده حکم شرعی وارمیدر ، یوقیدر ؟ » مسئله سی ، عین زمانده « برحادثه اجتهادیه ده خطاب شارع موجودمیدر ، دکیدر ؟ » مسئله سیدر .

شوحالده بر مسئله ده حکم شرعی واردر . ویا یوقدر دیه بیلمک ایچون ، هرشیدن اول اومسئله حقنده خطاب شارع وارمیدر ، یوقیدر ؟ اوکا باقق اقتضا ایدر . خطاب شارع واریسه حکم شرعی ده واردر . یوق ایسه یوقدر .

ایشته غزالینك بواساس ، بونقطه حقنده کی مطالعاتنه دیه جک یوقدر بو بمختده

بزی حقیقتہ ایصال ایدہ جک الکیصہ واک صاغلام طریق معرفتہ بودر. طرفینک یعنی کرک مہسوبہنک وکرک نخطہنک بوبخندہ ایراد ایتدکری دلائل سائرہنک هیچ بری ، بودر جہدہ قوہ اقصایہنی حائز دکلدرد . ۵۴۰ بمضیبری نحری و تنویر حقیقت ایچون دکل ، صرف خصمی الزام ایچون سویلنمش مطالعات جدلیہ جملہسندردر .

لکن مشارالیهک آنفاً ذکر اولونان «خطاب شارع معلوم اولوق ایچون ، شارعدن نطق صریح و نص قطعی ایله مسموع اولسی ، یاخود فعل پیغمبری کی بردلیل قاطع ایله مدلول بولونمسی لازمدر .» سوزی خیلی سوز کوتورد . چونکہ بو صورتده احکامی ، مقصودہ دلالتی ظنی اولان بعض آیات قرآنیہ وبر چوق احداث نبویہ ایله ثابت اولان پک چوق مسائل شرعیہده قبل الاجتهاد حکم شرعی یوقدر . ذیمک لازم کلہ جک . زیرا دلالتی ظنی اولان آیات قرآنیہ نصوص صریحہ و قطعیہدن اولدقلری کی الیمعتبر حدیث کتابلرنده بیله موجود احداث صحیحہنک اکثریسی دخی - خبر واحد نوعندن اولدقلری جهتلہ - نصوص قطعیہدن دکلدردر . جملہسی ده مجتہدلرہ نظراً ادلہ ظنیہدندردر . حالبوکہ مجتہدلرہ کوره نصوص ظنیہدن معدود اولان آیات واحادیث مذکورہنک کافہسی ، شارعہ و اصحابہ کوره نصوص قطعیہدندردر . اصحاب کرام اولنلری و اولنلر حقندہ کی بیانات و تفسیراتی ، بلاواسطہ دوغریدن دوغری بہ حضرت شارعدن استماع ایتمشلردر . بناءً علیہ شارعدن استماع ایتمین مجتہدلرہ نظراً صورت قطعیہده معلوم اولیان بونصوص و خطابات شارع ، آنلری شارعدن اخذ وتلقی ایدن اصحابہ نظراً قطعياً معلوم و حقیقتده موجودرلر . بمختمزده مسائل اجتهادیہده نفس الامرده حکم شرعی موجود اولوب اولدینی حقندہدر .

شوجہتی ده عرض ایدہیم کہ غزالینک بودلیلندہ تقریب تمام دکلدرد . یعنی بوتون مدعایی اثباتہ کافی ، مجموع مطلوبی مستلزم دکلدرد . چونکہ کرک مشارالیهک وکرک آنک فیکرنده بولنان دیکر مصوبینک دعوالری ، ایکی شقی ، ایکی مطلوبی محتویدر . بری مسئلہ اجتهادیہده معین حکم شرعینک عدم وجودی ، دیکری عندالله حقک تعدیدر . دلیل مذکور آنفاً بیان اولدینی اولرہ اساس اعتباریلہ

برنجی مطلوبی مستلزم ایسده ایکنجی مطلوبی مستلزم دکدر . بوجهت آریجه اثباته محتاج بر کیفیتدر . زیرا بر مسئلهده عندالله حق متعددور دیمک ، نفس الامرده و نزد الوهیتده حق یوقدر دیمکدن باشقه برشی دکدر . بوراده شوقطه بی قید ایتمک ایجاب ایدیورکه بو بخدمده (حق) دن مقصد ، عندالله ثابت و راجح معناسنه اولان حقدور .

بر مسئله اجتهادیده معین بر حکم شرعینک موجود اولمامسندن ، او مسئلهده معین بر حکم موجود اولمامسی لازم گلز . واقعا حکم شرعینک وجودی ، حکم وجودینی استلزام ایدر . لیکن حکم شرعینک انتقاسی ، حکم انتقاسنی استلزام ایتمز . حکمی شریعتده کلیاً مسکوت عنه اولان ، تعبیر دیگرله حقتده نه صراحةً ونه دلالةً خطاب شارع بولونمیان بر مسئلهده خطاب شارع معناسنه حکم موجود اولماقله برابر عندالله ثابت و راجح معناسنه حق موجود اوله ییلور . بوجهتله بویکی مطلوبی بر بردن تفریق ایله آری آری تدقیق و اثبات ایتمک اقتضا ایدر . کونک امام غزالی کبی تعدد حقوقه قائل اولانلرک بو خصوصده کی مطالعهلرینی و کونک بحتک بوتون محتویای حقتده وارد خاطر اولان مطالعات طاجزی بی ، دیگر طرفک یعنی ایکنجی و اوچنجی فکره ذاهب اولانلرک مطالعاتی دیکله دکدن صکره بیان ایده گلز . چونکه بو تقدیرده مسئله عمومی بر صورتده تدقیق و تحلیل ، حقیقتدهها مفید بر شکلده تنویر ایدلش اولور : او حالده بر زده اولنلری دیکله یهلم :

مصوبه نیک ایکنجی فکره قائل اولانلری ، دعوالرینی تصویر و اثبات ضمنتده دییورلرکه : [اوت بزده اشتراک و تصدیق ایده رز : حقتده خطاب شارع موجود اولمیان بر مسئله اجتهادیده طرف شارعدن موضوع و معین بر حکم یوقدر . حکم شرعی مجتهدلرک ظنلرینه تابعدر . بناء علیه بر مسئلهده اختلاف ایدن فقهانک هربری حقتده حکم شرعی ، کندی اجتهادینک ایجاب ابتدکی شیدن عبارتدر . بواعتبار ایله هر مجتهد مصیدره هیچ برینه خطا اسناد اولونه ماز . بونکله برابر نفس الامرده و نزد باریده برشی ، - غزالی نیک تفسیرینه کوره - بر حکم [۱] واردرکه اوده

[۱] فسر الغزالی هذا القول في المستصفي وقال : ذهب قوم من المصوبه الى ان في الحادثة التي لائن فيها حكماً معنياً يتوجه اليه الطلب اذ لا بد للطلب من مطلوب . لكن لم يكلف

«اگر شارع طرفندن او مسئله حقنده بر حکم شرعی وضع و تعیین ایدیه جک اولسهیدی مطابقاً بو وضع اولونوردی ، تعیر دیگرله قابل اولسهیدی ده او مسئله حقنده شارع مراجعت ایدلهیدی هر حالده شارع اونک حکم شرعیسی بودر دیر ایدی ، دینله بیله جک شیدر [۱] .

ایشته بوشو ، مقصد شارع اشبه اولان شیدر و مجتهدک قبله طلب و اجتهادیدر . مجتهد بوئی طلب ایدر ، اجتهادی بوکا توجه ایلر . هانکی مجتهدک رأی و اجتهادی بوکا اصابت ایتمش ایسه او مجتهدک قوی ، دیگر مجتهدلرک اقوالیدن احق و اشهدر ، مسئله اجتهادیده بویله اشبه دینه جک شوده یوقدر دینه من . زیرا اوتهدیرده اجتهادک معناسی قالمار . اجتهاد ، برنوع طلب و تحریدن عبارتدر . اورتهده طلب و تحری ایدیه جک بر شی بولونمازسه مجتهد ، نهی طلب و نهی تحری ایده جک ؟ بلا مطلوب طلب عبث و مستحیلدر . شو قدر وارکه مجتهد ، بهمه حال او شیئی بولمق و آکا اصابت ایتمکله مکلف دکلدر . بوجهتله هر مجتهد مصیبدر ، یعنی ، همدسه ترتب ایدن وظیفه مأموردهسنی ایفا ایتمشدر . حقیقتده اوشیده اصابت ایتمیوب خطا ایتمش اولسه بیله وظیفه مکلفهسنی ایفا ایتمش اولسندن دولایی مصیب حکمنده در . [...]

بو فکر ، اصولیون عنندنه (قول بالاشبه) نامیله معروفدر . ذکر اولونان شی حقنده « مقصد شارع و حکم شرعی به اشبه اولان بودر ، دیندیکی ایچون اوشیده (اشبه) و بوکا قائل اولهیه (قول بالاشبه) اطلاق اولونمشدر . ائمه شافعیه دن امام ابواسحاق شیرازینک کتاب (اللمع) نده بعض ائمه حنفیه نک ، (جمع الجوامع) دهده ائمه حنفیه دن امام ابویوسف ایله امام محمدک و ائمه شافعیه دن امام ابن سیرینجک بو

المجتهد اصابتة لذلك كان مصيبا وان اخطأ ذلك الحكم امين الذي لم يؤمر باصابتة بمعنى انه أدى ما كلف فاصاب ما عليه .

[۱] قال الفرانی فی شرح (تنقیح الفصول) معنی القول بالاشبه انه لیس فی نفس الامر حکم معین وانما فی نفس الامر مالوعین الله شیاً لیعینه فهو اشبه الامور بمقاصد الشریعة . كما تقول لانی بعد رسول الله صلی الله علیه وسلم وفي الزمان رجل صدیق لوان الله تعالی بیعت نبیاً لبعته .

فكرده اولدقلرى بيان وتصريح اولونيور [١]. اصوليون مالكيه دن شهاب الدين قرافى ده (تنقيح الفصول) ناميله معروف اولان كتابنده «مصرده نشأت ايدن علمانك برقىسى بوقولى اختيار ايله مشردر» دييور (مستصفي) ده ده «امام شافعينك سوزلرى بوقولى اختيار ايتديكنه دلالت ايدييور. دينلييور.

امام خزالى ، (قول بالاشبه) نامى ويريلن بوايكنجى فكري جرح وابطال ايچون دييور كه : [بو اشبه دينيان شى ، بالقوه حكمدر . بالفعل حكم دكلدر . «شارع طرفدن برحكم وضع ايديه جك اولسه يدي . مطلقا بووضع اولونوردى» دينيلن اوشى ، اكر حقيقه شارع طرفدن بالفعل وضع ايدلمش اولسه ايدى اولوقت حكم شرعى اولوردى . مادام كه فعلاً وضع ايدله مشدر ، او حلاله حكم دكلدر . آرتق آندن بحث اتمه نك معناسى بوقدر . شارعك تاصل برحكم وضع ايده جكي بيلينه من . هر درلو حكم وضع اتمك احتمالى واردر . عقل بو يابده ممكن اولان هر نوع حكىنجى ايدر . احتمال كه جناب حق ، قولارينك صلاحى حادثات اجتهاديه ده معين برحكم وضع ايتيوب آنلك حكم لرتنى مجتهدلك ظنلرينه تابع قيلمقده بيلمشدرده اوييه تقدير واراده بويور مشدر

لكن غزالينك بو اعتراضى ، حادثات اجتهاديه ده معين برحكم شرعى واردر دين مخطئه عليه وارد ايسه ده (اشبه) . قائل اولانلر عليه وارد دكلدر . زيرا

[١] قال الامام ابواسحاق الشيرازى التوفى سنة (٤٧٦) فى كتابه (اللمع) : «اختلف القائلون بان كل مجتهد مصيب فقال بعض اصحاب ابى حنيفة رحمه الله ان عند الله غرور وغل اشبه مطلوب ربما اصابه المجتهد وربما اخطأ ومنهم من انكر ذلك والقائلون بالاشبه اختلفوا فى تفسيره فمنهم من أبى تفسيره باكثر من انه اشبه وحكى عن بعضهم انه قال الاشبه عند الله فى حكم الحادثة قوة الشبه بقوة الامارة وهذا تصريح بان الحق فى احد يجب طلبه وقال بعضهم الاشبه عند الله تعالى ان عنده فى هذه الحادثة حكماً لونها عليه وبينه لم ينص الاعليه .»

قال الامام ابن السبكي فى (جمع الجوامع) : «اما المسئلة التى لا قاطم فيها من مسائل الفقه فقال الشيخ ابوالحسن الاشعري والفاضل الباقلانى وابو يوسف وعمد وابن سريج كل مجتهد مصيب ثم قال الاولان حكم الله فيها تابع الظن المجتهد فما ظه فيها من الحكم فهو حكم الله فى حقه وحق منله وقال الثلاثة الباقية هناك ما لو حكم الله فيها لكان حكم به ومن ثم قالوا فيمن لم يصادف ذلك الشئ اصاب اجتهاداً لا حكماً وابتداءً لا انتهاء .»

زیرا بونلر ، شبه تسمیه اولونان شینک طرف شارعدن بالفعل وضع ایدلمش حکم شرعی اولدیفنی ادعا اتمیورلر . بونلرده مشارالیه کی « مسائل اجتهادیه ده معین و بالفعل موضوع حکم شرعی یوقدر ، دییورلر . نته کیم امام مشارالیه کندیسی ده (مستصنی) ده بو اعتراضک باشنده بونلرک دعوالرینی اولوجهله تصویر ایدیور . وجهته مشارالیهک بو جواب و اعتراضی حسب البشریه اثر غفلتدر .

بونلرک مدعالرینی اثبات ضمنتده « بواشبه دیدیکمز شی ، مجتهدک قبله طلبیدر . مجتهد اجتهادیه بونی طلب ایدر . اکر بو اشبهده نفس الامرده موجود دکلدر دینله جک اولور ایسه اولوقت بلامطلوب طلب لازم کلیرکه عبثدر ، مستحیلدر . » یولنده ایراد ایتدکلری دلیله جواباً امام غزالی دییورکه : [ایشته سزک اصل خطا کز بو قطعهده در . ظن ایدیورسکزکه مجتهد ، مسائل اجتهادیه ده حکم الهی بی طلب ایدیور . مجتهد ، لسان شرعده حکم دینلن شینک خطاب شارعدن عبارت اولدیفنی بیلدیکی حالدده ناصل اولورده خطاب شارع وارد اولمایان بر مسئلهده ینه ونی طلب ایدر ؟ ! خایر ، مجتهد سزک ظن ایتدیکی کز کی حکم طلب اتمیور اونک طلب ایتدیکی شی ، غلبه ظندن عبارتدر .

بومقامده مجتهد ، کمی به راکب اولق اوزره ساحل بخرده دوران ذاته بکزر . اودقیقهده کمی به بینمه نک شرعاً جائز اولوب اولدیفنی آکلامق ایستین او ذاته « باق دوشون ، اکر هیچ بر تهلکه اولدیفنه غلبه ظن حاصل ایدر ایسه ک سنک ایچون کمی به بینمک مباحدر . عکسی تقدیرده حرامدر . حصول ظندن اول حقهده بو خصوصده معین بر حکم شرعی یوقدر . بومسئله نک حکم شرعیسی ، سنک تدقیق وتأمل نتیجه سنده حاصل ایده جکک ظنه تابعدر . دینله جک اولسه شبه یوقکه اوذات اباحه و تجریم حکملر دن برینی دکل ، بلکه سلامت و تهلکه جهتلرندن برینه غلبه ظنی طلب ایدر . مجتهدده اونک کییدر . مجتهدده بر مسئله اجتهادیه ده حکمی دکل ، غلبه ظنی طلب ایلر . ۱ . »

مشار الیهک بوجوانی ده - عفو عالیرینی تمنی ایدرم - دوغری دکلدر . برکده یوقاریده بیان ایتدی کمز وجهله (شبه) . قائل اولانلر ، بو شبه تعییرندن

افعال مکلفینه بالفعل تعلق ایدن خطاب شارع معناسنه اولان حکم شرعی بی مراد ایدیورلرکه اونلره « مجتهد سزک ظن ایتدیکیکزی حکم طلب ایتیور . » دیه جواب ویرله بیلسین . ثانیاً ، مشارالیهک « مجتهدک طلب ایتدیکی شی ، غلبه ظندن عبارتدر . » سوزی اونلرک علیه دکل ، بالعکس لهنه در . زیرا اونلرده بونی ادعا ایدیورلر . اونلرک « اشبه مجتهدک مطلوبیدر ، مجتهد آنی طلب ایدر . » دیمه لرندن مقصدلری ، « مجتهد اکا غلبه ظنی طلب ایدر . » دیمکدن باشقه برشی دکدر . بیانه حاجت یوقدرکه بومقامده « مجتهد برشینی طلب ایدر ، دیمکله « مجتهد برشینه غلبه ظنی طلب ایدر ، دیمک بیننده فرق یوقدر . غایتی اولکی تمیرک تعیر مجازی اولسندن عبارتدر . بوجهته غزالینک بوسوزی ، اونلری الزام ایده جک بر جواب تشکیل ایتمز .

مشارالیهک مقصدی ، « مجتهدک طلب ایتدیکی شی ظن مجرددر . یعنی مضموندن هاری برظندر . نفس الامرده بوظنه متعلق اوله جق برشی ، برمظنون یوقدر ، دیمک ایسه بوهیج دوغرو اوله ماز . مشار الیهده بونی قصد ایتمز . چونکه بو تقدیرده بلا مضمون ظنک وجودی لازم کلیرکه عقلاً محالدر . بالبداهه معلومدرکه ظن ، تعلق ایده جک برمتعلق ، برمظنون ایستره . بلا مضمون ظن تصور اولنه ماز . مطلوب طلبک ماهیتی اقتضاسندن اولدینی کی مضمونده ظنک ماهیتی اقتضاسندنر و لزوم بین ایله لازم غیر مفارقیدر . ظن تحقق ایدنجه اکا متعلق اولان مضمونده تحقق ایدر . بو کیفیت ضروریات منطقیه دن اولوب انکاری مکابره و معانده در . ذاتاً اشبه قائل اولانلری ، بو (اشبه) فکرینه سوق ایدن شیده ایشته بو ضرورت عقلیه در . نته کیم اونلر بوجهتی صراحتاً بیان ایدیورلرکه بونی بزه اوکره دنده ینه مشارالیه غزالیدر .

اما مشارالیهک « مجتهدک طلب ایتدیکی شی ، غلبه ظندن عبارتدر . » سوزنده کی ظندن مقصدی ، بوجه مشروح ظن مجرد اولیوبده بو کلامیده مضمونک حکمدن واشهدن باشقه برشی اولدیغنی افاده ایتک ایسته یورسه — که مقصدی ده بودر — احوالده اوشی نه در ؟ اونی تعیین ایتک ایجاب ایدر . تا که حقنده بیان مطالعه

ایدیاه بیلسین . اگر « اوشی مجتهدك كشدنجه حکم ظن ایتدیگی شیدن عبارتدرکه حقیقتده نه حکمدر ، نه ده اشهددر . بوس بوتون بشقه برشی در . « دینیلجك اولور ایسه جواباً دیرزکه بوصورتده اجتهادك معناسی قالماز ، مجتهد بیهوده یره اوغراشییور دیمك اولور . زیرا هم بر طرفدن مسائل اجتهادیده عنده نه حکمك نه ده اشبه دینیلن برشیتك وجودی اولمادیغه ایمان ایتك ؛ همده دیگر طرفدن ینه حکمه غلبه ظن طلبنده بولونمق عبثله اشتغال ایلیمکدن باشقه برشی دکلدر . مجتهد مهندس ویا باشقه برمسلسکه سالک بر ذات دکلدرکه اجتهاداتیله حکمدن واشهدن باشقه برشی طلب ایتسین .

یوقاریده مشار الیه طرفدن ذکر اولان مثال کلمجه : بومثالده اشبه قائل اولئرک لهنه وغزالیك کندی علمنده در . چونکه مثال مذکورده تصویر اولدینی وجهله کمی به بینمک ایستهین ذاتك حقنده غلبه ظن طلبنده بولوندینی شیء کرچه ظاهراً ودوغرودن دوغرویه حکمدن باشقه برشی در — یعنی سلامت ویا تهلیکه در — فقط حقیقتده ودولاییله اباحه وحرمت حکملرندن بریدر . زیرا سلامت وتهلیکه ، کمی به بینمک خصوصنده اباحه وحرمت حکملرینك مناطری یعنی علتلری دیمکدرلر . علتك وجودی معلولنك وجودینی استلزام ایده چکی جهتله هر هانکی بر مسئلهده علت حقنده غلبه ظنی طلب ، عینی زمانده معلولی اولان حکم حقنده غلبه ظنی طلبدر .

بوکا لسان اصولیونده (تحقیق مناط) دینیر . قیاس ایله بر مسئلهنك حکمنی استخراجده طریق بودر . مجتهد اولاً مقیاس علیه اولان اصلك علتنی استخراج ایدر . بوکاده (تخریج مناط) اطلاق اولتور . ثانیاً او علتك مقیاس اولان فرعهده موجود اولوب اولدیغنی تحقیق ایلر . موجود ایسه معلولی اولان حکمده موجود دیمك اوله جفتدن فرعی اصله الحاق ایدر ، یعنی اصلك حکمنی فرعهده اظهار ایلر ، ایسته بوکاده (قیاس) تسمیه اولتور .

اوچنجی فکرک ذیلی

اوچنجی فکره قائل اولان مخطئهك اساس دعوالری یوقاریده ذکر

اولونمىشى . دييورلردى كه : « مسئله اجتهاديهده عندالله معين بر حكم شرعى واردر وحق واحدر . حكم اويلاه مجتهدلرك ظنلرينه تابع وحق متعدد دكلدر . بناء عليه هر مجتهد مصيب اوليوب بالكز برى مصيب ، ديكرلرى مخطيدرلر . مع هذا حكم مذكور ، يقيناً معلوم اولديغندن هانكى مجتهدك اصابت ، هانكىسنىك خطا ايتمش اولدينى بيان من . وحقنسه موجود اولان دليل ، بك خفى وغامض اولديغندن ويا هيچ بولونمديغندن مجتهد اولديله اصابتله مكلف دكلدر . هر مجتهد اوزرينه كندى راي وظيفه عمل ايتك واجدر . خطا ايدز ايسه معذور وحقى ماجور اولور . . . »

يوقايرده سويلشذك كه بونلرده اساس دعوالرى اولان « مسئله اجتهاديهده عندالله معين بر حكم واردر ، دعواسنى اثبات همچون عقلى و نقلى متعدد دلائل ايراد ايديورلرسده هيچ برى قناعت بخش اوله حق قوتى حائز دكلدر . جمله سنه مصوبه طرفندن جوابلر و يرلشدر .

مخطة نك ايراد ايتدكارى دلائل عقليه مياننده الك قوتلى كوردبكمز دليل ، مصوبه نك ايكنجى فكره يعنى (اشبه) . قائل اولانلرى طرفندن درميان اولونان دليلدر . مخطة بو دليل كندى دعوالرى همچون استعمال ايديورلر . و [اجتهاد طلب و تحريدن باشقه برشى دكلدر ، مجتهد اجتهاديله حكم شرعى يي طلب و تحرى ايدر . « مسائل اجتهاديهده معين بر حكم شرعى بو قدر ، فكري قبول ايدياجك اولور ايسه اجتهاد عبث اولور . وبلا مطلوب طلب لازم كلير كه مختصدر .] دييورلر .

بياندن مستفيدو كه بومطالعه ، مصوبه نك امام غزالي كى مسائل اجتهاديهده حكم شرعى يي و اشبهى نفى و انكار ايدن قسمنه قارشى قوتلى و حتى بك قطعى بر داييلدر . نته كيم اشبهجيلر اونلره بو دليل ايله غلبه ايتمشلردى . لكن بو دليل مخطئه نك دعواسنى اثباته كافي دكلدر . چونكه اشبهه قائل اولانلر طرفندن جواباً ديفيلر ، هم ده بك حقللى اوله رق ديفيلر كه : « اوت ، هر طالب همچون بر مطلوبك وجودى لازمهدن اولديى كى مسئله اجتهاديهده دنخى مجتهد همچون بر مطلوبك وجودى لابدر . بونى بزده تسليم

ایده رز . فقط بوندن مطلقاً او مطلوبك خطاب شارع معناسنه حکم اولمسی لازم گلز . بز دیرزکه او مطلوب ، بزم (اشبه) تسمیه ایتدیکنمز شیدر . مجتهد اونی اونی طلب ایدر . مطلوبك حکم شرعی اولدیغنی ادا ایسه زیاده نی ، طلبك مقتضای ضروریندن فضله بریشی ادا درکه باشقه بر دلیل ایله آریجه اثبات ایتک ایجاب ایدر .

مخطئه نك تعلی دیلاری ، عقلی دیلارندن ده قوتلیدر . مع هذا بونلرده اشهدن فضله برشی افاده ایتزلر . بر کره بحث سابقده (بخاری شریف) ایله (مسلم) دن نقل اولونان و «حاکم حکم ایتدیکی زمان اجتهاد ایدر واصابت ایدر ایکی اجره ، خطا ایدر سه بر اجره فائل اولور ، مآئنده بولونان [اذا حکم الحاکم فاجتهد فأصاب فله اجران واذا حکم فاجتهد فأخطأ فله اجر] حدیثی کی مجتهدك بعضاً خطا ایدر جکی کوسون حدیثلر ، ثانیاً بو خصوصده اکابر اصحابدن منقول اترلر ایله استدلال ایدیورلر . دیورلرکه : [اگر مسئله اجتهادیده معین بر حکم شرعی اولماسه یدی ذکر اولونان حدیث ایله اوکامائل دیگر برایکی حدیثده مجتهدك اصابتده ، خطا ایدر جکی بیان بویورلمازدی . بو حدیثلردن آکلاشیلورکه مسئله اجتهادیده عندالهیده معین بر حکم وارد .

اصحاب کرامده مسائل اجتهادیده خطادن پک زیاده اجترایدرلر و یکدیگرلری تخطئه ایلرلردی . حضرت ابوبکر صدیق . بر مسئله میرائیده « رأیی بیان ایدیورم . اگر صواب ایسه جناب حقنددر ، خطا ایسه بندن و شیطاننددر . » [۱] دیمشدر . عبدالله بن مسعودده ، مفوضه نك یعنی مهر تسمیه اولونمقسنزین تزویج ایدیلوبیده قبل الاجتماع زوجی وفات ایدن قادینك مهری حقنده بر آیدوشوندکدن صکره حضرت ابوبکرک سویله دیکنی سویله مش یعنی « رأی واجتهاد می سویله یورم اگر صواب ایسه جناب حقنددر ، خطا ایسه بندن و شیطاندر . جناب حق ورسولی بو خطادن بریدرلر . » دیمش ایدی . دیگر بروایتده (صواب ایسه ،

[۱] قال ابوبکر رضی الله عنه فی الکلافة : « اتول فیها برأیی فان یکن صواباً فن الله وان یکن خطأً فنی ومن الشيطان اراه ما خلا الوالد والولد . فلما استخلف عمر قال : انی لاستحی من الله ان ارد شیئاً قاله ابوبکر . رواد الیهنی [کذا فی التفریر شرح التفریر] .

خطا ایسه (لفظلری رینه (اصابت ایدر ایسه ، خطا ایدر ایسه) عبارهلری منقولدر .

برکون جناب عمر فاروق ، حامله برقادیخی برتهمندن دولایی برای استجواب حضور خلافتناهلرینه جلب ایدر . قادین مباشری کوروب کیفیت جلبه مطلع اولونجه پک زیاده قورقار وقورقوسندن اسقاط جنین ایلر . حضرت عمر ، حادثه نك حکمی حقنده مجلسنده حاضر بولونان اصحابك رأیلرینی استفسار ایدر . بر روایتده یالکمز عبدالرحمن بن عوف ، دیگر بر روایتده مشارالیه ایله برابر حضرت عثمان « ولایت عامه کز حسیله حق تأدیعی حائزسکمز . اوزریکمز هیچ بر شی لازم کلز . » جوابنده بولونورلر . بالآخره جناب فاروق ، حادثه یی ومشارالیه مانك رأیلرینی حضرت امام علی به سوبلر ورأینی طلب ایدر . حضرت علی ده « اکر اونلر عن اجتهاد بورأیده بولونمشلر ایسه خطا ایشلر ، یوق اکر بلا اجتهاد سوبله مشلر ایسه سزی آدامشلر . اوزریکمز ائم ترتب ایدم چکنه قائل دکلم ، لکن جنینک دیتی ویرامه کز لازمدر . » دیر . کذلک بر مسئله میرائیده مشارالیه حضرت علی ، ابن مسعود وزید بن ثابت کبی بعض اکابر فقهای اصحاب ، ابن عباسی تحفته ایله مشلر ، ابن عباس ده آنلری نخطئه ایشدر . حتی ابن عباسک [من شاء باهله ان الله لم یجعل فی مال واحد نصفاً ونصفاً وثلاثاً] یعنی « بی بومسئله ده تحفته ایدنلردن کیم ایسترسه اونکله مباحله به یعنی بری بریمزه لعنتله بد دطایه حاضریم که جناب حق بر متوفانک مالنده ایکی نصف وبرثلک قیلیمه مشدر . » ودیگر بر مسئله ده مشارالیه زید بن ثابت حقنده « زید بن ثابت اللهدن قورقمیورمی که متوفانک اوغلنک اوغلنی اوغلی حکمنده طوتارق وارث قیلیورده باباسنک باباسنی باباسی منزله سنه تنزیل ایمیوب وارث قیلیمور . » دیدیکی منقولدر [۲] .

الحاصل بو باده اصحاب کرامدن بو کبی منقولات چوقدر . اصحابک بو حالی یعنی اجتهاده خطا اطلاق وآنندن احترازلری ، اختلاف ایتدکلری مسائله بربرلرینی

[۲] قال ابن عباس فی زید بن ثابت رضی الله عنهما : « الایتی الله زید بن ثابت یجعل ابن الابن ابوا لایجعل اب الاب ابا » [کذا فی التحریر وسلم الثبوت]

تخطئه ، یکدیگر لری علیهنه اعتراض ایله ملری ؛ آره لرنده تکرر ایدره رك شایع اولمش وهیچ بری طرفدن تخطئه نك جوازی انكار اولونماشدر . اكر مسئله اجتهادیده معین بر حکم شرعی غیر موجود و هر مجتهد مصیب اولسهیدی اصحاب کزین ، بوجه معروض خطاستان احتراز ایتمزلر ویکدیگر لری تخطئه ایله منزله ، بری طرفدن دیگری تخطئه ایدیلنجهده بو تخطئه بی در حال ردوانكار ایدر لر دی . بوندن منقهم اولویور که اصحاب عننده مسئله اجتهادیده معین حکم شرعی موجود و آکا اصابت ایدن مجتهد مصیب ، ایتمینده مخطیدر و بو مسئلهده اونلر ك اجماعی منقدر

ایسته تخطئه نك مدعالرینی اتبات ضمنتده ایراد ایتدکلری دلائل نقلیه نك الك قوتیلری بونلردر . اتفاقید و اشارت اولوندینیرجهله بو احادیث و آثار منقوله نك هیئت مجموععی ، برنجی فکره ذاهب اولان مصوبه یه قارشى ظاهر آ اولدجه قوتلی بر دلیل تشکیل ایدر سهده (اشبه) . قائل اولانلر علیهنه بر دلیل اوله ماز . چونکه اشبه اصابت ایتمین مجتهده دخی خطا اسنادی صحیح اوله جفتدن بو مجتهده نقل و ایراد اولونان بالاده مذکور و غیر مذکور احادیث نبویه و آثار صحابه نك هیچ بری ، عندالله (اشبه) ك وجودینه دلالتدن فضل بر شیئ مفید دکلدر .

بو بویه اولقله برابر مصوبه نك برنجی فکره قائل اولانلری ده ، بو دلائله قارشى مختلف جوابلر و بریورلر . دیورلر که : [بر کره یوقاریده ذکر اولونان و حاکم حکم ایتدیکی زمان اجتهاد ایدر و اصابت ایلر سه ایکی اجره ، خطا ایدر سه بر اجره نائل اولور ، مآلده بولونان حدیث شریف بزم علیهمزه دکل ، بالعکس لهمزه دلیلدر . چونکه بو حدیث شریفده خطا ایدن حاکمک بر اجره نائل اوله جنی بیان بو بوریور . حالبوکه اللهم حکمندن باشقه برشی ابه حکم ایدن حاکم مخطی ، مکافات الهیه یه کسب استحقاق ایدر سه . بو حدیثدن آ کلاشیلدیور که مسئله اجتهادیده معین بر حکم الهی یوقدر . ثانیاً بو حدیث ایله بو بایده روایت اولونان دیگر بر ایکی حدیث ، خبر واحد نو عننددر . سزکده تسلیم و قبول ایتدیکنز قواعد مقررده دندر که بو کبی مسائل اصولیه خبر واحد ایله استدلال صحیح دکلدر .

ثالثاً بز حاکم مطلوبه اضافتله خطا اطلاقی انکار ایتمیورز . بز آنجق
ماوجه یعنی حاکم اوزرینه رعایتی واجب اولان حکمه نسبتله خطایی انکار ایتمیورز
چونکه متخاصمین آره سنده فصل خصومتله مکلف اولان حاکم مطلوبی ، مالی
صاحبنه وحتی مستحقنه رد و ایضالدر . بونده حاکم بعضاً اصابت ایتمزده مطلوبنه
نظراً غطی اولور . مع هذا او حاکم ، واجبه و جناب حقک اونک اوزرینه اولان
حکمنه نظراًینه مصیبدر . زیرا حاکم اوزرینه جناب حقک حکمی ، شهودک
شهادتندن وینات سائرتهک دلائلندن حاصل ایده جکی ظن غالبه اتباعدر . حاکم
بونکله مکلفدر .

اصحاب طرفندن اجتهاده خطا اطلاقه و بربرلرینی تحطه کیفیته کلنجه :
بونده مختلف جهتلر ، متعدد احتمالر واردر . بو کیفیت ، بعض اصحابک کندی
اجتهاد لرنبجه مجتهدک بعضاً مصیب و بعضاً غطی اوله جنی فکرینه ذاهب اولمردن
متولد اوله بیله جکی کبی اجتهاد واقمک نصه و یا اجماعه مخالف اولسی خوف و اعتقادندن
یا خود تحدث ایدن حادثه لزومی درجهده بذل مجهود ایله استکمال نظر ایتمدیکی
و یا خود اجتهاده اکتساب اهلیت اولونمدینی ظنندن نشأت ایتمش اوله بیلیر . خصوصاً
خطادن احتراز کیفیتک مجرد اثر تواضع و مقتضای خوف الهی اولسی احتمالی ده
یک وارددر . نه کیم صحابه کرام حضراتی ، کندی ایمانلرنده اصلا شک و شبهه
ایتمدکلری حالده ینه ایمان و اعتقاد لرینک صحتنی مشیت الهیه به تعلیق ایدرلر و بن
مؤمن ان شاء الله ، دیرلر ایدی . بوقدر احتمالات عدیده به محتمل بولونان بر دلیل ،
هیچ احتجاجه صالح حجت اوله بیلیرمی ؟ ..

قالدی که به احتمالاتک جمله سندن قطع نظر اولونسه دخی ینه سالف الذکر
آثار صحابه ، بو مسئلهده بزى افحام و طرفنزدن سرد اولونان بر اهین قاطعه بی
حکمدن اسقاط ایده جک بر دلیل قوتی حائر دکلدرد . زیرا جمله سیده خبر
واحددر .

بونلرک نه فردلرنده ، نه ده هیئت مجموعه سنده لفظی و یا معنوی تواتر بولونمدینی
کبی شهرت دخی بوقدر . بوجهتله بو مسئلهده اجماع صحابه تک انمقادینه دائر وقوع
بولان ادعا ، هیچ برسند مستند اولمیان ادعای مجرددن عبارتدر . [..

تنوير مقام

ايشته بويحشه دائر اصول كتابلرنده كورولن افكار ومطالعاتك اك اساسيليري واك قوتيليري بونلردن عبارتدر . بونلك خارجنده سرد ايديلن ملاحظاتك همان جمله سى ؛ حقيقتى تنوير ايچون دكل ، صرف خصمى الزام ايچون اراد اولونان شبات جدليه قيلندندر كه تفليط اذهاندن باشقه ، حقيقى وعلمى بر فائده ي مفيد دكلدر . مقصد سى ، الزام خصم اوليوب تنوير حقيقت اولديفندن آنلك نقلندن صرف نظر ايلدك .

مطالعات سالفه دك وطرفزدن وقوع بولان تشریحاندن آكلاشلمشدر كه بو بويحنده اك قوتلى دليل ، (اشبه) ، قائل اولانلك دليلدر . اعتقاد عاجزانه سزه كوره اساس اعتباريله اك دوشرو فكرده بونلك فكريدر . لكن بحث ، بو صورتله مطلق اوله رق . تصوير ايديلنجه ، ينه مطلق اوله رق شواوچ مختلف فكره ذاهب اولان علمادن شوقسم حقليدر ، شوقسم حقسنزدر ديمك جائز اوله ماز . سوز اوزادقجه اوزار ، بر نتیجه قطعيه استحصالى قابل اولماز . بحثى نتیجه يه ايصاله حقيقتى اولانجه قوتيله ظاهره اخراج ايچون مبهم ومظلم قالان برايكي نقطه يه تنوير ، هانكى طرفك هانكى جهتلرده حقلى ، نه كبي قطعه لرده حقسنز اولديفنى تعين ايتمك اقتضا ايديبور .

بويله باييلميه جق اولور ايسه ، بروجه معروض اوچ قسمه آيرلمش اولان علمانك جمله سنى ده بعض جهتلردن حقلى ، بعض جهتلردن حقسنز كورمك ايچاب ايدر . مؤلفر بولازمه تأليفه رعابت ايتدكلرى ايچون حلى او قدر مشكل اوليان بو مسئله يه بلالزوم اغلاق ايتمشر ، آيرى آيرى تدقيق ايدلمسى لازم كان ايكي مسدله يه بربرينه قارشديره رق بحثى ايچندن چقلميه جق برحاله كتير مشلردر . حالبوكه مسئله نك ماهيت حقيقيه سنى تعين ايديه بيلمك ، بو باده ممكن اولديفنى قدر واضح بر فكر درميان ايله بيلمك ايچون بحثى ايكيه آيرمق ومبرينى منفرداً تدقيق ايله مك تحت وجوبده در .

طرفینک ادعا و مدافعتی ، دقتی بر نظرله تدقیق ایدیله جک اولور ایسه کورولورکه بویخنده موضوع انخاذا اولونان مسئله بر دکل ، ایکیدر : بری [مسائل] اجتهادیهده عندالله معین بر حکم وارمیدر ، یوقیدر ، دیکری (مسائل اجتهادیهده عندالله حق واحدیدر ، متعددیدر؟) مسئله سیدر؟ ، و افین بویخنده (حکم) ایله (حق) ی برینه قارشیدریورلر و بونلری الفاظ مترادفه کبی تاقی ایدیورلر . حالبوکه (حکم) تمیرینک مدلول اصطلاحیسی اولان (حکم شرعی) مانسه ، (محق) تمیرینک مدلولی یه مانسه در . آره ارنده بحسب وجود هر ایکی جهندن لزوم یوقدر . آنک ایچون بز مسئله اجتهادیهده معین بر حکم شرعینک موجود اولماپندن ، او مسئلهده عنداقه معین بر حکم موجود اولماسی لازم کلز . واقعا حکم شرعینک وجودی ، حقتده وجودینی استلزام ایدر . فقط حکم شرعینک انتفاسی ، حقت انتفاسی استلزام ایتمز . قریباً ایضاح ایده حکمز اوزره حکمی شریعتده کلیاً مسکوت عنه اولان مسائله اولدینی کی بز مسئلهده عندالله حق موجود اولورده ، معین بر حکم شرعی موجود اولیه بیلیر . یوقایدده بالناسه سویله دیکمز وحه ایله بوراده (عندالله حق) تمیرندن مقصد ، نزد الهیده ثابت و راجح اولان سیدر .

ایشته بوسیه میندرکه بز بویخت حقتده کی مطالباتمیزی خطادن سالم بولوندیرم بیلیمک ایچون ، مسئله بز بوسورتله ایکی یه تفریق ایدرک هر بری حقتده کی ملاحظاتمیزی آیری آیری بیان ایده جکمز . اولا برنجی ، سوکرده ایکنجی مسئله یی تدقیق ایده جکمز .

مسئله — : مسائل اجتهادیهده عندالله معین بر حکم وارمیدر ، یوقیدر؟ .

بوسؤاله قطعی بر جواب و بره بیلیمک ایچون ، هر شیدن اول بوراده کی (حکم) دن مقصود اولان معنای تعین ایتمک ایجاب ایدر . هجا بومسئله یی موضوع بحث ایدن علمانک بولمیردن مقصدی ، معروف و مصطلح اولدینی اوزره (افعال عباده متعلق خطاب شارع) معنانه اولان (حکم شرعی) میدر ، یوقه عندالله ثابت بولونان

(حکم نفس الامری) میدر ؟ برنجیسی افعال عبادہ بالفعل تعلق ایدن خطاب شارعدر . ایکنجیسی بالفعل تعلق ایتمین : قوهده قلوب فمسله وساحه شریعتہ چیماهان خطاب شارعدر برنجیسی بالفعل حکمدر . ایکنجیسی بالقوه حکمدر . برکره بوجهت تعین ایدرسه مسئلهک حلی قولایلشمش اولور .

اسلافک وامام ابوحنیفه وامام شافعی کی ائمه فقهک بو بخدمه (حکم) دن هانکی معنای قصدایتدکری معلوم دکدر . آنلردن بو باده برنقل صریح یوقدره ذاتاً آنلردن قیریق دوکوک نقل اولونان عباراتده (حکم) تمیری یوقدره . یوندن آکلاشیلورکه ائمه متقدمین ، ایکنجی مسئلهن یعنی مسائل اجتهادیده حقلک واحد اولوب اولماهی مسئلهنی موضوع بحث ایتمشله ، بو برنجی مسئلهدن بحث ایتمه مثلددر بومسله بالآخره متأخرین طرفدن موضوع بحث ایدلمشدر .

امام غزالی ، (حکم) ک معنای اصطلاحیسی قصد ایدیور . آنک ایچون « حکم ، افعال مکلفینه تعلق ایدن خطاب شارعدن عبارتدر . بوجهتله خطاب شارعک صریح و قطعی بر صورتده مسموع و مدلول اولدایی رده حکمک بولونمیه جنی درکاردر . » دیور . مشارالیهک بویانه نظراً علی العموم مصوبه ، (حکم) دن بو معنای قصد ایدیورلر دیمکدر . مخطئه هانکی معنای قصد ایتدکرینی تصریح ایتمورلر سده . اطلاقلرینه و (اشبه) فکرینی رد ایدشلرینه باقیلرسه اونلرکده (حکم) تعیرندن مصوبه کی معنای مصطلحی اولان حکم شرعی نی مراد ایتدکری آکلاشیلور یوقا کر مخطئه ، (عندا حکم) تعیرندن بو معنای قصد ایتدوبده (اشبه) . قائل اولانلر کی (حکم نفس الامری) ، تمیر دیکرله (بالقوه حکم) معنای قصد ایدیورلر سده ، احواله مصوبه ایله مخصه آرهنده جهت بحث برلشمش اوماز . تقیه نظرلر ، باشقه باشقه دیمک اولور . بو صورتده مخطئه ایله اشبهجیلر آرهنده کی اختلافک معنای قالماز فضله اوله رق برنجی مسئله ، بحثدن خارج قاله رق یوز ، لکنز ایکنجی مسئله منحصراً لیکه آنفاً بیان اولدیر اوزره بونی آشاغیده ابریمه ایضاح ایدمکدر .

(عندالله حکم) تعیرندن حکم شرعی مقصود اولدیفنه کوره یوقاریده کی [مسائل اجتهادیده عندالله معین بر حکم وارمیدر ، یوقیدر ؟] سؤاله ، (مسائل اجتهادیه) تمیر مطلقن بوجه آتی برر قید ایله قید ایدمک بری منفی ، دیکری

مثبت ایکی صورتله جواب ویریز .

برنجی صورت جواب: (حکمی شریعتده کلیاً مسکوت عنه اولان مسائل
اجتهادیهده معین بر حکم شرعی یوقدر .)

ایکنجی صورت جواب: (حکمی شریعتده ولو نصوص ظنیه ایله مظنون و یا فعل
و تقریر پیغمبری ایله مدلول اولان مسائل اجتهادیهده معین بر حکم شرعی واردر .)
ایشته بزم بومسئله حقنده فکریمز بودر . و کیم نه دیرسه دیسون بزم بونده
اصلاً اشتباهمز یوقدر . بونک خلافت و قوعبولان ادعایک جمله سی ده بوشدر .
هیچ بر اساس صحیحده و دلیل قطعی به مستند دکدر .

بزی بوفکر قطعی به سوق ایدن دلیل بروجه آتی بیان و سرد اولنور :

حکم شرعی ایستر اصولیون و فقهانک تعریفی و جهله « افعال عبادیه تعلق
ایدن خطاب شارعدر . و یا آنک اثریدر . » دیه تعریف ایدلسون ؛ ایستر باشقه
صورتله تعریف ایدلسون ، نه دینورسه دینلسون هیچ شبهه یوقدر که او حکم
شرعی ، انسانلر ایچون مابه العمل اواق اوزره طرف شارعدن بالفعل وضع
و تشریح بیورولمش اولان قانون الهی در ؛ دین ده ، شریعت ده بوندن عبارتدر .
یوقاریده (دین و شریعت) بحثنده کورمشدک که علما ؛ دینی (وَضَعُ الْهَيِّ

سَأَلُوا لِدَوَى الْعُقُولِ بِاخْتِيَارِهِمُ الْمُحْمَدِيَّ إِلَى الْخَيْرِ بِالذَّاتِ = اصحاب عقولی اختیارلری
ایله بالذات خیرلی اولان شیلره سوق ایدن وضع الهی در) ، شریعتی ده
(مَا شَرَعَ اللَّهُ لِعِبَادِهِ مِنْ الدِّينِ = حناب حَقِّك قوللری ایچون تشریح بیوردینی
احکام دینی در) دیه تعریف ایدرلر . بو تعریفلرک افاده ایستیکی معناده بودر .
لفظلرک ، تعبیرلر باشقه باشقه اولماقله برابر جمله سندن مقصود اولان معنا
بودر . (حکم شرعی) تعبیرینک حقیقتی بوندن عبارت اولنجه ، بر
حکم شرعی تعبیر دیکرله دین و شریعت بالفعل وضع ایلمش اولماق ایچون
(ثُمَّ انَّا عَلَيْنَا بَيَانُهُ) آیت کریمه سندن ده مستفاد اولدینی اوزره طوغریدن طوغری به

بو مابعدی فورملر دارالفنون عثمانی حقوق مدرسه سی (۳۳۸ سنه سی) دو قورده
صنفي طلبه سی طرفندن طبع ایلمشدر . [۲۴۰۰ محمد کمال]

واضع شریعت طرفندن صراحة وبادلالة بیان ایدلمک لازمدر. بیان بولندقیه ،
بالفعل حکم شرعی بولنماز .

واضع شریعتک بیانی ایکی دن خالی دکلدر. یا قولاً اولور ویا فعلاً اولور.
قولاً بیانی نصوص دن ، فعلاً بیانی جناب پیغمبرک برایشی بالذات ایشله مهسندن
ویا خود دیکرینی ایشلرکن کوروبده ویا ایشلدیکنی ایشیدوبده سکوت ایتمسندن
عبارتدر . بوسکوت پیغمبری یه اصطلاحده (تقریر) اطلاق اولنور .

اشبو فعل پیغمبری و تقریر پیغمبری شارع طرفندن واقع اولوق حیثیتیه
برایشک یعنی ایشله نن اوایشک شرعاً جائز اولدیغنه بک واضح بر صورتده
دلالت ایتدیکی ایچون بیان شارعک نوع دیکری و قولاً بیانی فوقنده در .

شارعک شرعاً ممنوع اولان برایشی ایشلمسی تصور اولنه میه جنی کبی
باشقه سفی ایشلرکن کوروبده ویا ایشیدوبده سکوت ایتسی دخی تصور اولنه مازه
عکس تقدیرده وظیفه نبوت و تشریحیه سفی ایفا ایتمه مش ، احکام شرعیه یی تبلیغ
ایله مه مش دیمک اولور که خاطره کتیر یلمسی بیله جائز دکلدر .

بو خصوصده نصوص شرعیه نک قطعی ویا ظنی اولمسی بیننده بفرق بو قدر .
هر ایکی نوع نصوص شرعیده نفس الامرده شارعک خطاب و بیانندن عبارتدر
قطعیت و ظنیت بزم آکلایشمزه کوره در ، شارع و نفس الامرده نظراً دکلدر .
بر اھن شرعی ایستر قطعی اولسون ایستر ظنی اولسون مادامکه شارعک
کلامی در البته شارع آندن بر معنا مراد ایشلدر) ایشته اومعی حکم شرعی دره
اما نصوص ظنیه امارات و ادله ظنیه قیلندن ایمش ، بزه کوره علم افاده ایتمیوب
ظن افاده ایدر ایمش و بردلیل ظنی ایله مدلولی آره سنده ارتباط حقیقی بولندیغندن
اکثریا ظنک حقیقتدن تخلف ایتدیکی واقع اولور ایمش ... وارسین او یله
اولسون ، بوندن نصوص ظنیه ایله منصوص اولان مسائله معین بر حکم شرعی نک
موجود اولماسی لازم گلز ؛ بلکه او حکم شرعی نک بزجه صورت قطعیه ده معلوم
اولماسی لازم کلور . بر شینک معلوم اولماسی ایسه اول شینک حقیقتده موجود
اولماسی استلزام ایتز . برشی حد ذاتنده موجود اولورده بزجه معلوم اولمایه .

بیلور . ذیاده موجود اولان حقائقک اکثریسی بو قیلدن دگلی در ؟ ذاتاً مجتهدی اجتهاده سوق ایدن سببده بودر یعنی حکم شرعینک غیر معلوم اولمسی کیفیتی در . اکر حکم شرعی - مسائل قطعیهده اولدینی کبی - صورت قطعیهده معلوم اولسهیدی اجتهاده نه لزوم ونهده مساع قابلردی . ناصلکه نصوص قطعیه ایله منصوص اولان مسائل قطعیهده اجتهاده مساع یوقدر .

امام غزالی نك یوقاریده نقل اولنان افاده سندن واضحاً آ کلاشیلور که مشارالیه مسئلهینی مجتهدک علمنه نسبتله تصویر ایدیلور . آنک ایچونده (بر مسئلهده بر خطاب شارع موجود اولوبده مجتهد آ کا مطلع اولماش ایسه حکم شرعی او مجتهده کوره مفقود ، مطلع اولان مجتهده کوره موجود دیمک اولور) دیور . مسئله بو صورتله تحریر یعنی مجتهدک علمیه تقييد و بناء علیه (مجتهدک علمنه نظراً مسائل اجتهادیهده معین بر حکم شرعی وارمی در ، یوقی در ؟) شکله افراغ ایدیله جک اولورسه او وقت بحث دیکشمش اولور . بو صورتده شبهه سز (جقنده نصوص ظنیه وارد اولان مسائل اجتهادیهده دخی مجتهدک علمنه نظراً معین بر حکم شرعی یوقدر) سوزی یک طوغری اولور . چونکه ، ظن باشقه ، علم باشقه در . نصوص ظنیه ایسه آنجق ظن افاده ایدر ، علم افاده ایتمز . علم افاده ایدن نصوص قطعیه و براهین عقلیه در . موضوع بحث اولان مسائل اجتهادیهده ایسه ، نه نص قطعی ، نهده برهان عقلی موجود در . لیکن بو باشقه بر مسئله در ، بحث بونده دکلدر . بحث نفس الامرده مسائل ظنیهده معین بر حکم شرعینک موجود اولوب اولماسی حقنده در .

نصوص ظنیه ایله منصوص اولان مسائلده مجتهدک علمنه نظراً حکم شرعی موجود دکلسهده نفس الامرده نظراً موجود در . نفس الامرده نظراً وجود دکلدر دینیه سز . دینیه جک اولورسه ، مطالعات سالفهیه نظراً ایضاحات و بیانات مذکوریه بناء حقیقته توافق ایتمز .

(امام غزالی) نك طوتدینی اساسه کوره مجتهدک بالعموم خبر واحد لرله دلالتی ظنی اولان دیگر نصوص شرعیه ایله عمل ایتمه سی ، بتون مسائل

ظنیه ده بیهوده بره اجتهاد ایله اتعاب نفس ایلمسی لازمکلور . نتکیم قیاس ایله خبرواحدك ادله شرعیه دن اولمالرینی قبول ایتمیان بعض مذاهب اسلامیه علماسنه کوره بویله در . حالبوکه (غزالی) نك بومسئله ده فعلی قولنه توافق ایتمیان بعض مذاهب علمیه علماسنه کوره بویله در . حالبوکه (غزالی) نك بومسئله ده فعلی قولنه توافق ایتمیور؛ سوزلری ده بر برینی طوتمیور . چونکه مشارالیه بر طرفدن (علی العموم مسائل ظنیه ده معین بر حکم شرعی یوقدر) دییور، دیگر طرفدنده (ادله ظنیه دن اولان قیاس و خبر واحدله عملاک لزومنه قائل وبالذات اجتهاد ایله عامل) اولیور .

ایشته بزبوکریویه دوشمه مک ایچون یوقاریده « مسائل اجتهادیه ده عندالله معین بر حکم شرعی وارمی در ، یوقی در؟ » سؤالنه جواب ویررکن « مسائل اجتهادیه بی ایکیه تفریق ایده رک ؛ حکمی شریعت ده کلیاً مسکوت عنه اولان مسائل اجتهادیه ده معین بر حکم شرعی یوقدر ، اما « حکمی شریعت ده ولو نصوص ظنیه ایله منطوق ویا فعل و تقریر پیغمبری ایله مدلول اولان مسائل اجتهادیه ده معین بر حکم شرعی وارد ، دیدک .

ایشته بونقطه ده مصوبه حقسنز، مخطئه حقلی در . فقط مخطئه « حکمی شریعت ده کلیاً مسکوت عنه اولان مسائل اجتهادیه ده دخی قبل الاجتهاد معین بر حکم شرعی وارد ، دیدکری ایچون بونقطه ده آنلر حقسنز ، مصوبه حقلی در . چونکه بوکبی مسائله آرتق نه صراحتاً ونه دلالتاً ، نه قولاً ونه ده فملاً هیچ بر خطاب و بیان شارع یوقدر .

حال بویله ایکن ینه بوکبی مسائل ده حکم شرعی وارد . دیدک بر شی حقنده عینی زمانده هم وار هم یوق دیدکدر که بنفسه بطلانته یینه در . اونوتمایلم که بخدمت حکم شرعی حقنده در .

مخطئه ده مصوبه ایله یکنزبان اوله رق حکم شرعی بی « افعال عباده تعلق ایدن خطاب شارع ویا اثریدر ، دییه تعریف اییدیورلر . شوخالده بر طرفدن (حکم شرعی) یه خطاب شارع معناسنی وپر مک ، دیگر طرفدن خطاب شارعک

بولندینی برده حکم شرعی نك وجودینه قائل اولمق ، بر زمانده بر شیشی هم یوق
هم وار دیمك دكلدرده نهدر ؟

بونی تجویز ایتك اجتماع نقیضینك امکانه قائل اولمقدر . اجتماع نقیضین
ایسه امتناع عقلی ایله ممنوع اولان قضایای بدیهیه دندر . همده بدیهیات عقلیه نك
مرجع اساسی در .

بوراده مخطئه طرفندن بر جواب ویریله بیلور که اولدقجه قوتلی در . کرچه
اصول کتابلرنده بو جوابه تصادف اولنه مدیسهده وارد خاطر اولایینی جهتله
ایرامی و بو جوابهده جواب ویرلمسی مناسب کور و ماشدر .

جواب: فی الحقیقه خطاب شارعك بولمادیینی برده حکم شرعی نك ده بولنمایه جنی
در کاردر . بوجهت جمله جه معلوم و مسلم در . فقط بو مقامده مسلم اولمیان بر
جهت واردر که اوده حکمی شریعتده مسکوت عنه اولان مسائلده خطاب
شارعك غیر موجود اولسی کیفیتی در . ایشته بوجهت مسلم دکلدر . کرچه
بو کبی مسائلده صراحة خطاب شارع موجود دکلسهده دلالة موجوددر .
زیرا مسائل مذکوره مسائل قیاسیهدر . قیاس ایسه خطاب شارعك وجودینه
دال بر دلیل شرعی در . حتی بمضماً خبر واحد اوزرینه بیله تقدیم و نصوص
ظنیه آنکله تخصیص اولنور . بوجهتله قیاسده شارعك تر نوع بیانی دیمکدر ،
او حکمدهدر .

بونك ایچوندر که حقنده نصوص شرعیه وارد اولمیان مسائل قیاسیهده
شارع طرفندن خطاب و بیان واقع اولمامشدر دیمك طوضری اولماز . مسائل
مسکوت عناده دخی بیان واردر . شوقدر که اوبیان نص و فعل و تقریر دکل ،
قیاس در . بوجهتله حکمی شریعتده مسکوت عنه اولان مسائلده دخی معین
بر حکم شرعی نك وجودینی قبول ایتك ضروریدر . بونی قبول ایتهمك قیاسك
دلیل شرعی اولمسی قبول ایتهمك دیمك اولور که (امامیه) و (ظاهریه)
مذهبی در . جالبو که مصوبهده داخل اولدینی حالده جمهور فقهایه کوره قیاس ،
خبر واحد و امثالی نصوص ظنیه کبی ادله شرعیه دن معدوددر .

جوابه جواب: اوت ، مصوبه ده داخل اولدینی حالدہ جمهور علماء اسلام
 عندندہ قیاس ده بردلیل شرعیدر . بونکله برابر قیاس شارعک بیاناتی جمله سندن
 عد ایتک طوغری دکلدر . زیرا قیاس ، قیاسک یعنی مجتهدک فعلی در . نه قولاً
 ونه ده فعلاً شارعک بیانی دکلدر . شارعک نه قولی ونه ده فعلی اولیان برشیئی
 شارعہ اسناد ایتک هیچ وجهله طوغری اولماز .

قیاسک ادله شرعی دن محدود اولسی ، نزد شارعده ثابت و راجح اولان
 حکم نفس الامری بی ، تعیر دیکرله عندالله حتی استخراج ایچوندر . حکم
 نفس الامری و عندالک حق ایسه حکمی شرعی دیمک دکلدر . بوندنطولاییدرکه
 قیاسک دلیل شرعی اولسندن مسائل قیاسیه ده قبل القیاس معین و موضوع بر
 حکم شرعی نک موجود اولسی لازم گلز . بناء علیه مسائل قیاسیه ده حکم شرعی نک
 وجودنی قبول ایتمه مک ، قیاسک دلیل شرعی اولسنی قبول ایتمه مک دیمک اولماز .

بوسیه مبفی بومسئله ده قیاسک دلیل شرعی اولسنبه استدلال ، مصوبه نک
 حکم نفس الامری بی یعنی بالقوه حکمی و اشبهی ده انکار ایدن قسمه قارشى
 صحیح اوله بیلورسده (اشبه) قائل اولانلره قارشى صحیح اولماز . زیرا قیاس
 ایله طاب اولتان حکم بالفعل حکم شرعی اولمایوب بالقوه حکمدر . اشبهچیلر
 ایسه بالقوه حکمه قائلدرلر و یوقاریده مرور ایتدیکی اوزره اوکا (اشبه)
 تسمیه ایدرلر .

بوندن باشقه قیاس شرعیک بیاناتی جمله سندن عد ایتک ، حکمی شرعیعنده
 مسکوت قالمش مسائلک وجودنی انکار ایتک اولور . حالبوکه بالذات شارع
 بونک عکسنى یعنی شرعیعنده احکامندن سکوت ایدلمش مسائلک موجود اولدیغنی
 بیان بیوریور . بتون موارد احکامی یعنی شرعیعنده حکملری وارد اولان
 مسائل شرعی بی تبیع واستقراده بوکا شهادت ایدبیور .

بو خصوصده متعاد نصوص شرعیه وارد . ازجمله سنن ترمذی وابن
 ماجه ده مذکور (الْحَالُ مَا أَحَلَّ اللَّهُ فِي كِتَابِهِ وَالْحَرَامُ مَا حَرَّمَ اللَّهُ فِي كِتَابِهِ)

وَمَا سَكَتَ عَنْهُ فَهُوَ مَعْفَا عَنْهُ) حدیث منینی ایله حفاظ حدیث دن و علمای حنبلیہ دن ابن ربیع (جامع العلوم) ندہ ائمہ مالکیہ دن ابو بکر بن العربی نک (احکام القرآن)، ندہ امام شاطبی نک (الموافقات) ندہ و (کنز العمال) ده موجود (ان الله فرض فرائض فلا تضيعوها وحدوداً فلا تعتدوها وحرم أشياء فلا تنهلوها وسكت عن أشياء رحمة لکم لا عن نسيان فلا تبحثوا عنها) حدیث شریفی وارد اولمشدر .

برنجی حدیث شریفک مفهومی شودر : (حلال جناب حق کتابنده حلال قیلدینی شیدر . حرام ده اللهک کتابنده حرام قیلدینی شیدر . حکمندن سکوت ایتمدیکی شی ده مظهر عفو بیوردینی افعال جمله سندندر)

ایکنجی حدیث شریفک معناسی ده بودر : (جناب حق فرائضی فرض قیلمشدر . آنلری تضییع ایتمه بیکنز . حدود الهیه سفی تحدید ایتمشدر . آنلری تجاوز ایله مه بیکنز . بعض شیلری تحریم ایلمشدر . آنلری تناول ایتمه بیکنز . اونوش اولدیغندن دکل ، مجرد سزه مرحمتندن ناشی بر قسم شیلرک ده احکامندن سکوت بیورمشدر . آرتق آنلردن بحث ایتمه بیکنز .)

اشبو ایکنجی حدیث شریف کتب سته ده موجود دکلسه ده ذکر اولنان (جامع العلوم) و (کنز العمال) ده بو حدیثک اعظم ائمہ حدیثدن و مجتهد مستقلردن مشهور امام اسحاق بن راهوبه ، امام بیهقی ، دار قطنی ، طبرانی ، ابونعیم وابن النجار کبی متعدد ائمہ حدیث طرفندن تخریج و امام نووی و ابوبکر سمعانی کبی محققین طرفندده تحسین ایلدیکی مذکوردر .

*
*
*

فصل اولده (دور رسالت) ده اصول تشریعدن بحث ایلدیکی صره ده جناب رسالت ابان افندییز حضرت تلمینک ، حکمی بیان اولنیمان مسئله لر حقندده - تشدید متضمن احکام ورودندن خوفاً - کندیلرینه سؤال ایراد ایلمسفی سومد کبری بیان ایلمش و هر سنه حجک فرض اولوب اولمادیغنی سؤال ایدن ذاته جواباً اوت دیسه یدم هر سنه حجک ایتمک واجب اولوردی ، شزده اداسنه

مقتدر اوله مازدیگز. سزدن اول هلاک اولانلر آنجق کثرت - و اللری و پیغمبرلری
 اوزرینه اختلافلری حسبیلله هلاک اولمشلردر . بن سره نه بی امر ایدر سه
 بقدر الاستطاعه آنی یاییکز. برشی دن نهی ایدنجه ده آنی ترک و آندن اجتناب
 ایدیکز) مآئنده (لو قلت نعم لو جبت ولما استطعتم ثم قال ذرونی ما ترککم
 فانما هلك من کان قبلکم بکثرة سؤالهم واختلافهم علی انبیائهم فاذا امرتکم
 بشیء فأتوا منه ما استطعتم واذا نهیتکم عن شیء فذعوه ...)

« رواه مسلم والبخاری ومالك وغيرهم » بیوردقلری ذکر اولمشدر .
 کربک بوحدیث و کربک (ان اعظم المسلمین فی المسلمین جرماً من سأل عن شیء لم
 یحرم فحرم علی الناس من اجل مسئلته... اخرجہ البخاری والمسلم) حدیث منیفیلله
 (قل لا اجد فیما اوحی الی محرماً علی طاعم یطعمه الا ان یکون میتة ...
 الآیه) آیت جلیله سنک تضمن ایتدکلری معاده ذکر اولنان حدیثلری مؤبددر .
 امام شاطبی « الموافقات » نده [ج - ۱ - ص - ۱۸۹] ایشو احادث نبویه
 و آیت جلیلله و برده ابن عباس و عیید ابن عمیرکی بعض اعظم فقهای اصحاب
 و تابعینک ، شریعتده مسکوت عنه اولان مسائلک معفو اولدیفنه دائر وقوع
 بولان افاده لرینه استناداً حلال ایله حرام آرهنده بر (مرتبه عفو) بولدیفنی
 و بو مرتبه نک - وجوب ، ندب ، اباحه ، حرمت ، کراهدن عبارت اولان -
 احکام خسه دن خارج اولدیفنی سوبلیور . ایشته بو و بوکی نصوص شرعیه دن
 صورت قطعیده مستبان اولبور که شرعشریفده احکامی بیان اولنما بوب مسکوت
 عنه قالمش مسائل موجوددر . آنک ایچون « قیاس ده شارعک بر نوع بیانیدر »
 سوزی هم شارعک بیانات مذکورهنه همده استقرایه منافیدر .

واقما (مرتبه عفو) و یا (اباحه اصلیه) دنیلان حکم ده بر نوع حکم
 شرعیدر و بواعتبارله حکمی شریعتده مسکوت عنه اولان هیج بر مسئله یوقدر
 دینیلله بیلیر . لکن بو ، بختدن خارج باشقه بر مسئلهدر . بوندن یوقاریده برنبده
 بحث ایتدیگمز کی آشاغیده ده آیروجه بحث ایده جکز . بزم بوراده مقصدیمز
 قیاسک بیانات شارع جهلسندن اولما دیفنی و طرف شارعدن حکملری صراحة

وایدالاه بیان اولن بیان مسئله لرده بتماها همین و موضوع حکم شرعی بولنمدیغنی بیان واتیاندر . (حکم شرعی) دن مقصوده امر ونهی ویا تخیر صورتلرندن بریله ثابت اولان احکام خمسة مذکورده دن بریدر . نتیجه اعتباریله شوايضاحاتدن صورت قطعیده تبین ایدیورکه قیاس ادله شرعیده دن اولمغله برابر شارعک بیاناندن معدود دکلدر .

قیاسک انصوص ظنییه اوزربینه تقدیم وترجیح اولنسی کیفیته کلاجه : بونک سببی قیاسک بیانات شارع جمله سندن اولسی دکلدر . بو کیفیت انصوص ظنییه ک معنای مقصوده دلالتی خفی و شارعدن ثبوتی بک ضعیف اولسی کبی اسباب مختلفهیه مبغیدر . نته کیم مباحث مخصوصه سنده ایضاح اولنه جقدر .

مع هذا بومقامده شوجهتی قید و تثبیت ایتک اقتضا ایدیورکه بزم بوراده قیاسدن مقصودیمز انصوصک دلالتندن خارج قالان و صرف مجتهدینک آکلایشندن عبارت اولان قیاسدر . بوکا لسان عرفده (رأی) اطلاق اولنور . عندالاطلاق (قیاس) تعیرندن مقصوده بودر .

بعض علمانک (قیاس اولویت) تسمیه ایله بکی بر نوع قیاس واردرکه طوغریدن طوغرییه نصک مفهومنده داخل و بلا تأمل ذهنه متبادردر . مثلاً (والدینه اوفدیمه) معناسی مفید اولان (ولا تهل ایها اف) آیت کریمه سی عینی زمانده (والدینکی ضرب ایتمه ، سب و شتم ایلمه) معنایخوده مفیددر . مخاطب بونظم کریمی ایشیدیر ایشیتمز در حال بومنعوتک مناظ و علقی (اذا) اولدیغنی آکلار . و بوبدن والدینی ضرب و شتمک ممنوع اولدیغنه سرعته انتقال ایلمه . و بناء علیه (والدینه اوف دیمک ممنوع اولمغله ، اولنری ضرب و شتم ایتکده بطریق اولی ممنوع اولور) دیر . ایشته بو برقیاسدر . لکن مخاطب بوقیاسی ذهنده اوقادار سریع اوقادار آنی بر صورتده یابارکه بونی کندیلدی ده فرق ایده من . چونکه بوقیاس طوغریدن طوغرییه نصک مفهومنده داخلدر . واداندن اعلایه انتقال در . بو (کیت بونی فقرایه توزیع ایت ، فقط فلانه ذره ویرمه) کلامنه بکزر . مخاطب بو (فلانه ذره ویرمه) سوزندن عینی

زمانده « ذره دن فضله برشی و برمه » معناسی ناسل آكلارسه ذكر اولنان آیت جلیله بی ایشیدن ذواتده بوندن « والدینکه قارشی سب و شتم ضرب و توبیخ کبی اذابی موجب افعال و حرکانه دخی بولونما، معناسی او صورته آكلار. ذهنک بر معنادن دیکرینه اتقالی ، بویله ادنان اعلایه اوله جنی کبی اعلا دن ادنا په ده اولور . و هر ایکی صورته نفس کلام بوانتقاله اشارت و تذهبی متضمن بولنور . بوانتقال رأی و تأمله محتاج اولمق سزین طوغریدن طوغری به کلامک دلالت و فحواسندن مستفاد اولدینی ایچون ، اصولیون بونی قیاس اقسامندن عدا تیمور . بناء علیه (قیاس) تعبری بوکا تشمیل ایله مه بورلر . بوکا اصول حقیقه ده (دلالت نص) و اصول شافیه ده (فحوای خطاب) اطلاق اولنور .

بوجهته بوراده بونوع قیاسی اصل قیاسدن تفریق ایتک و بونی نصه ارجاع ارجاع ایتک انتضا ایدر . بوندن باشقه بر نوع قیاسی دها واردر که اونیده نصه ارجاع ایتک مقتضیدر . بوده عاتی منصوص اولان و بونکله برابر حکمنک فرعه ده نبوتی کیفیتک نزد شارعده مقصود اولدینی ظاهر بولنان قیاسدر .

ایشته بو ایکی نوع قیاسدن برنجیسی طوغریدن طوغری به ، ایکنجیسی طولایسیله نصوصک دلالتنده داخل بولندیغندن شارعک برنوع بیانی عد اولنه بیلورلر . هله برنجیسنک بیانات شارعدن معدود اولدیغنده شبهه به محل بوقدر . بناء علیه بو ایکی نوع قیاسک تحقق ایتدیکی مسائله معین بر حکم شرعی موجوددر دیمک صحیح اولور . بوجهته بزم بوراده (قیاس) لفظندن قصد ایتدیکنز معنا بولره شامل دکدر . مقصدیمز بو ایکی نوع قیاس خارچنده قالان قیاسلردر . بونلرده نصوصک دلالتنده داخل و آنلره راجع اولمایوب مجرد مجتهدک رأی و تقدیرینه مستد اولان قیاسلردن عبارتدر . آرتق بو کبی قیاسلر ، هیچ بر زمان و هیچ بر وجهله شارعک بیانانندن عد ایدیه منز . و بناء علیه بونلرک محل جریان اولان مسائله دخی معین و موضوع بر حکم شرعی واردر ؛ دیمک قطعاً معقول اولماز . بوقاریده ذکر اولنان نصوص و دلائلک منطوق و مدلولنده کلیاً منافی دوشر و بالنتیجه بوندن - بیله بهرک

وايسته مه برك - حضرت شاعری تگذيب ايمك و فضلہ اوله رقده آيات جايه قرآنيه مذكوره نك دلالتی و حدیثلرك مضمون مشتركی حقهده طار بر ساحه و حدود تصورنده بولنلق كبی بر تناقضی مؤدی اولور كه بو، فضولی بر حرکت و شارعدن زیاده شریعتہ و قوف ادعا سنده بولنلق ديمك اولور .

بوچیر کین نتیجه دن قورتوله بيلمك ایچون اوچ طریق دن برینه توسل دن باشقه چاره یوقدر . یا ذکر اولنان حدیثلری تأویل و یا صحیفی انکار ايمك و یا خود خبر واحد اولد قلر دن طوتدیره رق بویله بر مسئله اصوا یه ده حجت اوله مه یه جقلرینی در میان ايمك و یا خود (مسائل اجتهادیه عندالله معین بر حکم وارد) دینلرك بوسوزلرنده کی (عندالله حکم) تعبیرندن مصادلری (بالقوه حکم) و (عندالله حق) ديمك در ديه رك سوزلرینی بو صورتله تأویل و تصحیح طریق التزام ايمك در . حدیث شریفلری تأویله هیچ بر سبب معقول اولمادینی کی معنالی ده اوقدر صریحدر كه باشقه بر معنایه حمل ایدیلرلی احتمالی یوقدر . صحیفینی انکار ایسه هیچ طوغری اوله ماز چونكه او حدیثلرك هربری (صحیح بخاری) و (مسلم) کبی اك معتبر حدیث کتابلرنده موجوددر .

خبر واحد اولمالرینه کلنجه : فی الحقیقه هربری منفرداً نظر اعتباره آلدننده خبر واحد نوعدن اولدیغنه شبهه ایدیلر من ایسه ده مختلف حادثلر حقهده مختلف زمانلرده شرفوارد اولمق صورتیه متعدد و جمله سی ده بر نقطه ده مشترك اولد قلرندن ، هیئت مجموععلری اعتباریله او نقطه ده و اوقدر مشترك حقهده خبر واحدك فوقنده در لر . فضلہ اولارق سالف الذکر آيات جلیله قرآنيه نك دلالتی ده بو حدیثلرك مضمون مشتركی تصدیق و تأیید ایدیور . آنك ایچون احادیث مذكوره بومسئله ده احتیاجه صالح حجج شرعیه دندرلر .

خصوصاً بو حدیثلر بومسئله ده یالکیزده دکلردر . انصوح قرآنيه نك دلالتندن باشقه یوقاری ده بیان اولنان برهان عقلی ایله دلیل استقرائی ده آنلرله برابردر . شو حالده اوچیر کین نتیجه دن قورتوله بيلمك ایچون بر چاره قالمش اولور كه اوده آنفأ بیان اولونان اوچنجی طریقہ توسل دن عبارتدر . ایسته بو طریقہ توسل ارنور ،

و بناءً عليه « مسائل اجتهادیه در عندالله معین بر حکم وارد » سوزنده کی (حکم) دن مقصد (بالقوه حکم) و یا (عندالله حق) دیکدر. دنیله جک اولورسه او وقت او محذور بر طرف ایدلمش اولور. عبارده کی (عندالله) قیدی ده بوتأویل ایچون اولدقجه قوتلی بر قرینه تشکیل ایدر. لکن بو تقدیرده یوقاریده ده بالما سبه سویله مش اولدیغمز اوزره برنجی مسئله ایله شیمدی ایضاح ایدر جکمز ایکنجی مسئله برلشمش اولور.

ایشته بزم بو برنجی مسئله حقنده یعنی (مسائل اجتهادیه در عندالله معین بر حکم شرعی، اریدر، یوقیدر؟) مسئله سی حقنده کی فکر و مطالعه من بوندن عبارتدر که خلاصه الخلاصه سی شودر :

مسائل منصوصه و مدلولده معین بر حکم واردو. لکن مسائل قیاسیه ده یعنی حکم شریعتده کلیاً مسکوت عنه اولان مسائله معین بر حکم شرعی یوقدر. شوقدر وار که بوکی مسائل مسکوت عنهاده بالقوه حکم و عندالله معین بر حق موجوددر. فقط بو، بالفعل موضوع بر حکم اولمادیغندن حکم شرعی دکدر. بناءً علیه بوالقوه حکمه حکم شرعی اطلاق صحیح اولماز. شمای ده ایکنجی مسئله حقنده کی ملاحظاتی بیان ایدم.

*
**

مسئله — ۲

مسائل اجتهادیه در عندالله حق واحدی در، متعددی در؟ برنجی مسئله ده اساس اعتباریه علمای اسلامک اوج قسمه آیرلمش اولدقلمی، یوقاریده کورولمشدی. بو ایکنجی مسئله ده ایسه اولیه اوج قسمه دکل، اساس اعتباریه ایکی قسمه آیریلوب بر قسمی حقلک تعددیت، دیگر بر قسمیده حقلک وحدتنه قائل اولمشلدر.

مصوبه نك برنجی قسمی (مسائل اجتهادیه در معین بر حکم شرعیده، حکم نفس الامریده موجود دکدر.) دیدکاری ایچون بونلر (مختلف فیله اولان

بر مسئلهٔ اجتهادیه‌ده اقوال فقهانک جمله‌سی حقدور. بناءً علیه بر مسئلهٔ اجتهادیه‌ده حق، اختلاف ایدن مجتهدلرک عددی نسبتده متعدددر (دیورلر .

مصوبانک (اشبه) . قائل اولان یعنی (مسائل اجتهادیه‌ده معین بر حکم شرعی یوق ایسه‌ده عندالله بر حکم نفس الامری وارددر) دینن ایکنجی قسمی ایله مسائل اجتهادیه‌ده قبل الاجتهاد معین حکم شرعینک وجودینه ذاهب اولان مخطئه‌ده ، محل اختلاف اولان بر مسئلهٔ اجتهادیه‌ده نفس الامرده عندالله حق واحددر ، بناءً علیه نفس الامر اعتباریله اقوال فقهانک جمله‌سی حق دکلددر . ایچلرندن هانکیسی عندالله نابت اولان حقه توافق ایدیورسه یالکیز او حقدور دیکرلری باطلدر ، دیورلر .

کرچه فخرالاسلام بزدوی) کی بعض مؤلفلر یو ایکنجی مسئله‌ده دخی علمانک اوچ قسمه آیرلینی؛ برنجی قسمک: مسائل اجتهادیه‌ده عندالله حقمک متعدد اولدیغنه؛ ایکنجی قسمک: حقمک تعددیه برابر ایچلرندن برینک عندالله احق بواندیغنه ؛ اوچنجی قسمکده : حقمک واحد اولدیغنه قائل اولدقلربی بیان ایدیورلر .

لکن براز تعمیق نظر ایدیورسه کوریلورکه ایکنجی قسم ایله اوچنجی قسم آره‌سنده اساس و نفس اخر اعتباریله برفرق یوقدر. چونکه « حق متعدد اولغله برابر او حقوق متعدده‌دن یالکیز بر دانه‌سی عندالله احقدور . » دیمک « نفس الامرده عندالله حق واحددر ، دیمکدن باشقه برشی دکلددر .

یوقاریده بیان اولنمشدی که حقمک تعددیه برابر ایچلرندن برینک عندالله احق اولدیغنه قائل اولانلر (اشبه) فکرینه ذاهب اولانلردر . ینسه یوقاریده بیان اولنمشدی که بونلر، حکم نفس الامری به یعنی نفس الامرده بالقوه حکمک موجود اولدیغنه قائل اولورلر . وکاه (احق) وکاه (اشبه) تعبیرلریله آکا اشارت ایدیورلر . بوجهتله « عندالله احق واحددر ، دیمکله « عندالله حق واحددر ، دیمک آره‌سنده اساس و نتیجه اعتباریله فرق یوقدر . اشبه‌جیلرک حقمک تعددینه قائل اولملری نفس الامرده نظراً دکل مجتهدک مکلفیتنه نظر آدر .

زیرا مجتهد از زریته واجب اولان شی کندی ظنی و نتیجه اجتهادی ایله عمل ایتکدر . هر مجتهد بونکله مکلفدر . بومکلفیتده بر حکم شرعی اولدیفندن بواعتبارله هر مجتهدك قولى حقدرد و بناءً علیہ بر مسئلهده اختلاف ایدن مجتهدلرک عددی نسبتنده حق متعدددر ، دینیه بیلور .

ایشته اشهبجیلرک (مختلف فیه اولون مسئله اجتهادیده حق متعدددر) دینیه لری بواعتباریلهدر . فقط بوندن نفس الامر اعتباریلهدر عندالله حقدرد تعدد اولسی لازم کلز . او اوله اولمغله برابر نفس الامرده و نزد باریده حق واحد و متعین اوله بیلور . نته کیم بونلر ، « او حقوق متعددهدن بری عندالله احقدرد ، دینیکله بومعناهی افاده ایتک ایستیورلر . حتی (غزالی) نک بیانسه کوره بوجهقی تصریح دخی ایدیورلر . بوجهتله (فخرالاسلام) ک بیان و تفریق ایتدیکی ایکنجی قسم ایله اوچنجی قسم اساس اعتباریلهدر . آرالندهکی اختلاف و نزاع لفظی و اعتباریدر . حقیقی و نفس الامری دکدر . واقعا بو ایکی قسم آره سنده اساسله و حقیقی بر اختلاف وارددر . لکن او اختلاف ، برنجی مسئله حقدرددر . بو ایکنجی مسئله حقدرد دکدر . یوقاریده بیان اولدینی اوزره بو ایکی مسئله باشقه باشقه مسئله لردر ، بونلری بریرینه قاریشدیرمه ملیدر .

اما مصوبه نک برنجی قسمی ایله بو ایکی قسم آره سندهکی اختلاف ، اوله لفظی و اعتباری اولما بوب حقیقی و نفس الامریدر . چونکه اونلر ، هم مجتهدك مکلفیتنه ، همده نفس الامر نظرأ حقدرد تعددینه قائلدرلر . آنک ایچون بز یوقاریده (بومسئلهده اساس اعتباریلهدر علمای اسلام ایکی قسمه آریلوب بر قسمی حقدرد تعددینه و دیگر قسمی ده وحدتنه قائل اولمشاردرد) دیدک ، فخرالاسلامک بیانی وجهله « اوچ قسمه آریلشلردر » دیدک .

الحاصل بوراده ایکی جهت نظر وارددر : بری مجتهدك مکلفیتی ، دیگرى نفس الامردر .

مجتهدك مکلفیتی نظر اعتباره آله جق اولور ایسه احوالده (محل اختلاف اولان بر مسئله اجتهادیده حق متعدددر) دینیه بیلور . فقط بو صورتده نتیجه

اعتباریله بوسوزك معنایی (هر مجتهدك رأی و اجتهادی كندی حقنده صحیح و آنكه عملی مشروعدر. هیچ بر مجتهد نتیجه اجتهادندن مسئول دكلدر) ديمك اولوز. « هر مجتهد مصیدر ، مفهومنده ائمه حنفیه دن یعنی امام اعظم ابوحنیفه ایله امام ابی یوسف و امام محمد دن منقول (كل مجتهد مصیب) سوزینك معنایی ده بودر. نته کیم بوسوزك آخزی اولوق اوزره نقل اولنان (و لحق عندالله واحد) کلامی بوبابده بر قرینه قاطعه در. چونکه عندالله حق واحد اولقله برابرینه هر مجتهدك مصیب اولسی آنجق بومعناجه اولابیلوز .

بعض علمانك بوسوزی بر (ابتداء) قیدینی علاوه ایله (هر مجتهد ابتداء مصیب در) طرزنده تفسیر ایتلمی ده شوسو وینلدیكمز معنادن باشقه بر معنایی مفید دكلدر. لکن بوباشقه بر مسئله در. بونك بك او قدر بحثه دگری یوقدره اصل شایان بحث اولان جهت ، هر مجتهدك انتها ده مصیب اولوب اولدایینی کیفیتی در ، که بجمیزی تشکیل ایدن جهته ده بودر. اگر نفس الامر نظرأ عندالله حق متعدد دنیله جك اولورسه ، بوسورتده هر مجتهدك ابتداء ده ، انتها ده مصیب اولسی لازم کلور . یوق اگر نفس الامر نظرأ عندالله حق واحد در نیلوز ایسه بوتقدیرده (هر مجتهد ابتداء مصیب اولقله برابر نفس الامر ده ثابت اولان حقه اصابت ایدن مجتهد انتها ده مصیدر . اصابت ایمان مجتهدده انتها مخطیدر) ديمك لازم کلور .

ایشته بزم بوجمیده تدقیق ایتك ایستدیکمز مسئله ده بودر . بوجهت بوسورتله تثبیت ایدلکدن سوکره شمیدی ده بومسئله حقنده کی اختلافك منشائی و هانکی طرفك حقی ، هانکی طرفك حقسنز اولدایینی کندی آ کلابشمز کوره بیان ایده لم :

اول امرده شوراسنی عرض ایدهیم که هر هانکی بر شی حقسنده (حق متعدد میدر ، واحد میدر) دییه اورتابه بر مسئله آتیلنجه در حال هرشیدن اول ذهنه بر سؤال تبادل ایدر :
حق تعدد ایدرمی ؟

اوت ؛ زمانلر ، مكانلر ، شخصلر وياجهت نظرلر باشقه باشقه اولانجه حق تعدد ايده بيلورسه ده بونلر متحداوانجه حق تعدد ايتمز . بونلر ك انحادى حالنده دخی حقك تعددینه قائل اولمق حقك وجودینی اساسندن انكار ايلكدر . ذاتاً بو بحثده (عندالله حق متعددر) دييانلر ك مقصدی ده بودر . يوقسه (حقیقه حق متعددر) ديمك دكلدر .

بومسئله اجتهادیه ده حقك وجودینی انكار ايتك ، تعددینی ادعا ايلكدن اهنلدر وحقنده برخیلی دلائل سرد اولنه بيلور . نتهكیم آشاغیده (حسن وقبح) بحثنده بیان اولنه جقدر . [۱] اما نفس الامر حقیقه حقك تعددینه ادعا اویله دكلدر . بونی ادعا ايتك نفس الامرده برشیده وبرزمانده ، برشخص حقنده وبرجهندن (حل) و (حرمت) کبی ایکی ضدك جواز وعدم جواز کبی ایکی تضیك اجتماعی ادعا ايلك ديمكدر که بطلانی ضروریات عقلیه دندر . بونی هیچ بر قائل ادعا وتجویز ايتمز . آنك ایچون بو مقامده (عندالله حق متعددر) ديمك (نفس الامرده حق یوقدر) ديمكدن باشقه برشی دكلدر .

بومسئله نك اساسی (حسن وقبح) مسئله سی در . بوجهتله بومسئله ده کی اختلاف منشائی ، حسن وقبح حقنده کی اختلاف قدر . آشاغیده تفصیلاً کوره چکزه شریعتدن قطع نظرله افعال بشرده کوزلك ، چیرکینلک واری ، یوقیدر ؟ مسئله سنده علمای اسلام اختلاف ایتشلر در . (جبری) واهل سنتدن (اشعری) فرقلری کبی بر قسم علما افعاله حسن وقبح حقیقی بی انكار ایدیبورلر . بونلر (افعال بشر حدذاتنده و نفس الامرده) (حسن وقبح) تعبیر عمومیلری تحتنده مندرج اولان عدل واحسان ، ظلم وعدوان ، جبر وشر ، فضیلت و رذیلت ، علویت وسفلیت کبی اوصاف ایله متصف دكلدر . بوکبی اوصاف موضوعات شرعیه و اوصاف اضافیه دندر . شرعشریف نه بی امر ایتش ایسه او کوزل اولمشدر ؛ نه بی منع ایتش ایسه اوده چیرکین اولمشدر .

[۱] ۱۳۲۸ ، ۱۳۲۹ سنه لرنده نشر ایدیلن ایکنجی جزؤده بوبعث وارد .

اگر امر ایتمدیکنی منع ایلمش ، منع ایلمدیکنی ده امر ایلمش اولسه ییدی
 امر بر عکس اولوردی . بنا برین کوزل دینیلان بر فعل حد ذاتده کوزل
 اولدینی ایچون امر اولنماشدر بلکه امر اولندینی ایچون کوزل اولمشدر .
 کذلک چرکین دینیلان بر فعل نفس الامرده چرکین اولدینی ایچون منع
 اولنماشدر . بالعکس منع اولندینی ایچون چرکین اولمشدر . عقلاک و نفس
 الامرک بو باده اصلا دخل و تأثری یوقدر . عقل مجرد خطابات شرعی فهم
 وادرا که آلت در . شریعت دن قطع نظر ایلمک صورتیله عقل کندی باشنه
 قالدوره افعالک حسن و قبحی ادراک ایده من . عقله کوره افعال بشریه تک
 جمله سی ، کوزلاک ، چرکینلک نقطه نظرندن بر برینه مساویدر . نفس الامرده
 وماهیت ذاتیه لرینه نظراً نه کوزل دینیلان فعل کوزلدر . نه ده چرکین دینیلان
 فعل چرکیندر .

خلاصه : (کوزلاک ، چرکینلک یوقدر) دیسورلر بونلر عینی زمانده
 افعال و ارادات الهیده حکمت و مصلحت یوقدر دیهرک حکمت تشریحی ده
 انکار ایدرلر . بالجمله احکام و موضوعات شرعییه امور تعبدیه دن عد ایدرلر .
 سوکره استخراج احکامده قیاسی دلیل شرعی عد ایده رک و علم اخلاقه دأر
 کتابلر یازارق تناقض دن تناقضه دوشرلر ، که بونلردن بری ده (امام غزالی) در .
 معتزله و اهل سنت دن ماتریدیه فرقه لری کبی بر دیگر قسم علماده بوفکرک
 تماماً عکسنی ادعا ایله : (دینک و شریعتک و رودندن اول دخی افعال بشرده
 حقیقتده کوزلاک و چرکینلک واردر . اوصاف مذ کوره بعض افعاله نسبتله
 فی الحقیقه اوصاف اضافیه دن ایسه ده دیگر بر قسم افعاله نسبتله اوصاف حقیقیه
 و ذاتیه دندر . اویله ظن اولندینی کبی امور اعتباریه دن و صرف موضوعات
 شرعییه دن دکلدر . بو جهتله کوزل دینیلان بر فعل ذاتنده کوزل اولدینی
 ایچون شرعاً امر اولنماشدر . یوقسه امر اولندینی ایچون کوزل اولمش دکلدر .
 کذلک چرکین دینیلان بر فعلده نفس الامرده ، چرکین اولدینی ایچون منع
 اولنماشدر : یوقسه منع اولندینی ایچون چرکین اولمش دکلدر . عقل اویله
 مجرد خطابات شرعی فهم وادرا که مخصوص بر آلت دکلدر . شریعتدن قطع

نظر ایدلدیکی تقدیرده دخی عقل ، مستقلاً بعض افعالک حسن وقیحنی نظر
 واستدلاله محتاج اولقسزین بالبداهه ادراک ایدر. بعض افعالک حسن وقیحنی ده
 نظر واستدلال ايله ادراک ایدر . امور خفیه دن اولان افعالده شرع
 ارشاداتنه محتاج اولور . شرعشریفده عقلک ادراکاتی تأکید و تأیید؛ امور
 خفیهده خفانی کشف وازاله ايله عقلی تنویر وارشاد ایلر.]

دیورلر؛ افعال واردات الهیهدهده حکمت ومصالحتک وجودینه وبناء علیه
 حکمت تشریهدهه قائل اولیورلر . مذاهب اربیه فقهیهنک یعنی حنفی، مالکی،
 شافعی ، حنبلی مذهبایرینک مؤسسری بولنان درت بیوک امام باشده اولوق
 اوزره جمهور فقهاده بو ایکنجی فکری قبول ایدینورلر .

ایشته حسن وقیح حقیقه موجود اولان شو ایکی نظریه دن برنجیسنه
 کوره (حکمی شریعتده مسکوت اولان مسائل اجتهادیهده عندالله حق
 یوقدر) دیمک ؛ ایکنجیسنه کورهده بالعکس (مسائل مذکورهده عندالله
 حق واردر) دیمک لازم کلور . علمای اشعریه برنجی نظریه یه ذاهب اولدقلری
 ایچون درکه «مسائل اجتهادیهده عندالله حق معدوددره دیورلر. بوسوزلریله
 آنفاً ایضاح ایدلدیکی وجهله حقیقتده و تزدالوهیتده (حق)ک موجود اولمادیغنه
 اشارت ایدینورلر .

علمای مآریدییه یعنی حنفیه ايله جمهور فقهاده ، ایکنجی نظریه یه قائل
 اولدقلرندن طولانی درکه «مسائل اجتهادیهده عندالله حق واحدره دیورلر.
 بولردن هانکی طرفک حقیقی هانکی طرفک حقیق اولدیغنه کلنجه :
 حسن وقیحک وجودینه وحقک وحدتنه قائل اولانلر حقیقی، حسن وقیحک
 عدم وجودینه وحقک تعددینه ذاهب اولانلر حقیق درلر . طرفینک بو باده
 دلائل ومطالعاتی آشاغیده (حسن وقیح) بختنده تفصیلاً سرد و بیان اولنه.
 جفتدن بوراده ذکرندن صرفنظر اولمشدر [*] یالکیز شو قدرینی عرض

[*] مذکور بحث (۲۲۹ ، ۲۲۸ ، ۲۳۰) سنلری طرفنده نشر ایندیکم ایکنجی

ایده‌ییم که بر مسئله اجتهادیه‌ده جواز وعدم جواز کبی امور متباینه دن برینک نزد باری‌ده دیکرینه راجح اوله جنی درکاردر . عکسی تقدیره ، یکدیگرینه متباین اولان ایکی شیئک عندالله بربرینه مساوی اولسی ، بوندن‌ده مابینک مساواته انقلابی وبوندن‌ده ضدین و تقیضینک اجتماعی کبی محالات عقلیه‌نک امکان وقوعی لازم کلور که تصوری بیله مستحیلدر . بوندن‌ده صورت قطعیه‌ده مستبان اولور که عنداللهی‌ده امور مذکورده دن بری دیکرینه راجحدر هانکیسی راجح ایسه عندالله حق‌ده اوندن عبارتدر . ایکیسی‌ده راجح ، ایکیسی‌ده حقدر دینه‌منز . زیرا بو تقدیره بر شیئک عینی زمانده هم راجح ، هم‌ده مرجوح ، هم حق ، هم باطل اولسی ؛ نتیجه اعتباریله برشی حقنده هم وار ، هم یوق دینه‌سی لازم کلور؛ که بالبداهه مستعدر .

وبرده یوقاری‌ده اشتهجیلرک دیدکلری کبی مجتهد ، اجتهادیه عندالله راجح اولان شیئی یعنی حق طلب ایدر .

مسائل اجتهادیه‌ده عندالله حق یوقدر دینه‌جک اولورسه ، بلامطلوب طلب لازم کلور که عبثدر . اجتهادی عبث اولمق دن قورنارمه؛ ایچون «مسائل اجتهادیه‌ده عندالله حق متعدد» دیمک کافی دکلدر . زیرا بونکله اجتهاد ، عبث اولمق دن قورنیله‌ماز . چونکه بو صورتده اجتهادده اویله قفا باطلاده‌جق ، چاتلاده‌جق درجه‌ده اناب‌ذهنه محل قالماز . مادامکه حق متعدددر . احوالده لاعلی‌التمین اولردن برینی کلینی کوزل اخذ واختیار ایتک کفایت ایلر . الحاصل هانکی جهت دن محاکمه ایدیلورسه ایدلسون ینه نتیجه‌ده اشبو تعدد حقوق فیکرینک بطلانی تبین ایدر .

ایشته بزم بو ایکنجی مسئله حقنده کی ملاحظاتمزده بوندن عبارتدر . بحثنی تحلیلی و محتوی اولدینی مسائلی آیری آیری تدقیق ایده‌لم دیرکن سوزی بک‌زیاده اوزاندق لکن مسائل فقهیه‌نک ماهیت شرعیه‌لرینی ونظر شریعتده کی موقعلرینی حقیقه تقدیر ایتک بو بحثک محتوی اولدینی حقائق ادرا که وابسته اولدیغدن بو بحثه دأثر نه‌قدر سوزسویانسه نه‌قدر تفصیلات متممه ویرالسه بجا‌در .

معین بر مذهب فقہی بی التزام ایله اظهار تعصب ایدنلر و هر کسی حق حکومتی بیله تنظیم قوانین ده اومذهبی اختیاره سوق ایتک ایستیانلر بو حقائقه کسب وقوف ایتمش اولسه لردی تعصب لرینک بو خصوصده کی غیرت لرینک نه قدر بوش و معنامز اولدینفی آکلار لردی .

- ۲ -

مسئله - اجتهاد ایله اجتهاد نقض اولونماز

محل اجتهاد اولان بر حادثه ده ، بر قاضی مجتهد طرفدن اعطا اولنان حکم اکا مخالف اولان دیگر بر قاضی به رفع و عرض اولندوقده نقضه مقتدر اولما بوب تصدیق و تنفیذه مجبوردر .

کذلک بر حادثه اجتهادیه ده بر مجتهد ، کندی اجتهادیه حکم ایتدکن سوکره اجتهادی تبدل ایتسه حکم اولی نقض ایدمه منزه . انجق ایلروده تحوت ایدمه جک حادثات مماثلده ایکنجی اجتهادیه حکم ایدر .

بو مسئله نك - بی شودر که هر ایکی اجتهادیه رأی و تقدیردن عبارتدر . بر رأیک رأی اولوق اعتباریه دیگر بر رأی اوزرینه رجحانی یوقدر . فضله اولاروق اجتهاد اول قضایه اتصالی سببیه تا کد ایتمش و بوسورتله اجتهاد ثانی دن اقوی بولنمهدر . آرتق اونک دوتنده دیمک اولان ایکنجی اجتهاد ایله نقضی جهته کیتمک جائز و نافذ اولماز . واقعا ایکی رأیدن برینک مستند الیهی دیگرینک مستند الیهندن دها قوتلی اولا بیلور ، فقط نه قدر قوتلی اولورسه اولسون نهایت ظنیدر . زیرا بحتمز مسائل اجتهادیه حقنده در . یوقاریده کچمشدی که مسائل اجتهادیه ، ادله ظنیه به مستند اولان مسائلدر . ادله ظنیه نك درجه قوت و حقیقتنی تعیین ایسه تقدیره عائد بر کیفیتدر . حالبوکه تقدیر ، رأیدن باشقه برشی دکندر .

خلفای راشدین حضراتی بوسورتله حرکت ایتشلردی . یعنی کندی قاضیلری

ظرفندن کندی رایلیینه مخالف اولارق اعطا اولنان حکملری نقض ایتمیوب
 تنفیذ ایتمشلردی . بر کون خلیفه ثانی جناب فاروق کندی قاضیسی حضرت
 ابوالدردانک بر حادنده کندی رایینه مخالف حکمنه مطلع اولنجه، محکوم علیه
 خطاباً (بن ابوالدردانک یرنده اولسه ایدم سنک لهنه حکم ایدردم) دیر، بونک
 اوزرینه محکوم علیه (او حالد شمدی بونی یایمه کزه نه مانع وار ؟ حاز اولدینگز
 ولایت و صلاحیت شرعییه بناءً نقض بیوریکنز) دینجه مشار الیه حضرتلری
 - حضرت عمر الفاروق - (بو مسئله رأی و اجتهاد مسئله سیدر ، مسائل
 تقدیریه دندر . حقنده نص یوقدر ، رأی ایسه اصابت و خطا ده دیکر رأی
 ایله مشترکدر) جوابی ویرر و بناءً علیه حکم واقعی نقض ایتمز .

مشهور (قاضی شریح) ده چوق کره خلیفه رابع حضرت امام علینک
 رأی و اجتهادی خلافسه حکم ایدردی . امام علی ده آنک بو حکملرینی نقض
 ایتمیوب امضا یعنی تصدیق و تنفیذ ایلردی . (کذا فی الهدایه والکنایه وفتح
 القدر) .

ایشته بونک ایچوندرکه (اجتهاد ایله اجتهاد نقض اولنماز) قاعده سی مذاهب
 مختلفه یه منسوب عموم فقهای اسلام طرفندن قبول ایدلمش و محاکم عثمانیه ده
 مابہ التطبيق اولق اوزره مجله احکام عدلیه نک (۱۶) نجی ماده سنه درج اولمشدر .
 اما حادنده محل اجتهاد اولمایوبده حقنده نص قطعی وارد و یا اجماع منعقد
 اولان مسائلدن ایسه بو صورتده نصه و یا اجماعه مخالف اولارق وقوعبولان حکم
 امضا و تصدیق ایدلمه یوب نقض اولنور . چونکه یوقاریده بیان اولندیفی
 وجه اوزره مورد نصده - جمهور علمایه کوره - مجمع علیه اولان مسائلده
 اجتهاده مساعغ یوقدر .

قیاسه و قاعده اصلیه یه مخالف حکمه کانجه : اکر اوقیاس و اوقاعده استثنا
 قبول ایتمه جک درجده قطعی ایسه حکم مذکور نقض اولنور . بو درجده
 قطعی اولمایوبده ظنی ایسه نه قدر قوتلی اولورسه اولسون نقض اولنماز . زیرا
 مادامکه ظنیدر ، رأی و تقدیره عائد بر کیفیت دیمکدر . ظن قوتلی اولغله رأی

و تقدیر مایهتندن چیقارق قطعیه منقلب اولمش اولماز . ظن امور اضافیه دن اولدینی جهته بر شخصه کوره . بک قوتلی اولان بر ظن دیگر بر شخصه کوره بک ضعیف اوله بیلور . بونک ایچوندرکه بر رأی و ظنک دیگر بر رأی و ظنه رجحانی یوقدر .

ینه بونک ایچوندرکه رأی و ظنه مستند اولان بر حکمی دیگر بر حاکمک نقض ایده بیللمسی تجویز ایدیلز ؛ ایدیله جک اولورسه اونک حکمنی ده اوچنجه بر حاکمک نقض ایده بیللمسی تجویز اولنق لازم کلور . بو تقدیرده نقضلر توالی و تسلسل ایدر . صرافعات واقعه بر نتیجه قطعیه ایترا اتمز و بالنتیجه نصب حکام قضیه سندن مطلوب اولان قطع نزاع و فصل خصومت فائده سی فوت اولور . امر قضادن مقصود اولان غایه حصوله کلز . (کذا فی المستصفی و شرح التحریر و تنقیح الفصول) بیانه حاجت یوقدرکه اشبو (اجتهاد ایله اجتهاد نقض اولتماز) قاعده سی زمانمزده نصوص قانونیه نیک دائرة شمولی خارجنده قالان مسائل اجتهادیه به مخصوص و منحصر در . زیرا یوقاریده (خلافت) بمخنده [۱] کورولمشدی که امور جائزده خلیفه به اطاعت و وضع ایتدیکی قوانین و نظامات احکامنه رعایت بلااستثنا هرکس اوزرینه واجبدر .

افراده حکام طرفندن صادر اولان اءلامات احکامنه متابعته شرعاً فاضل مجبور ایسه ، حکام دخی دولتجه نصوص قاطعه شرعییه مخالف اولمایه رق وضع اولنان قوانین احکامنی تطبیقه اوصورتله مجبوردر . فضله اولارق حکام ذات حضرت پادشاهینک و کیللری اولوب نام هایونلرینه اضافتله اعطای حکم اتمکده اولدقلرندن قاعده وکالت اقتضاسنجه وظیفه خصوصنده طرف سلطانیدن درمیان اولنان قیود و شروطه رعایتله مکلفدرلر . بناء علیه دعاوی حقوقیه بی رؤیته مآذون اولان بر حاکم دعاوی جزائیه بی رؤیت ایده میه جکی کی بر مسئله ده بر مجتهدک قولیه حکمه ، امور اولان بر حاکم ده دیگر بر مجتهدک قولیه و یا کندی اجتهادیه

[۱] صحیفه (۱۰۶) ده کی بحثه مراجعت اوله .

حکم ایده من . ایدرسه حکم واقع نقض اولنور . [مجله نك ۱۸۰۱ نهمی ماده سنه
باق] .

طریق و اصول اجتهاد

فصل اولده (دور اصحاب) دن بحث ایدلدیکی صروده بیان اولنشدی که
اصحاب کرام بر حاد نك حکم شرعیسی استخراج ایچون اول امرده کتابه
ایکنجی درجهده سننه مراجعت ایدرلردی . حکم مطلوب حقنده کتاب وسننده
صراحت ویا دلات بولندقجه رأی و قیاسه اصلا التفات ایتزلردی . ممکن
اولدینی قدر آیت ویا حدیثک دلات و اشارتندن، ایما واقضاسندن استخراج
احکامه چالیشورلر ، موفق اولامازلرسه اووقت بالضروره قیاس طریقنه سلوک
ایرلردی .

کتاب ایله سنت ، شریعت اسلامیه نك ایکی منبع اصلیسیدر . کتاب قانون
شریعتک متنی ، سنت آنک شرحی ، ثابہ سننده اولدیغندن بر مسئله نك حکم
شرعیسی استخراجنده بر مجتهد ایچون توسل اولنه حق طریق اجتهادده انحق
بودر . یعنی اصحابک اثرینه اقتفادن عبارتدر .

نص ایله عمل ممکن اولدقجه رأی ایله عمل جائز اولماز . رأی و قیاس انحق
نصوص شرعییه نك ساکت اولدینی برلرده جاری اولور . قیاس ایله عمل ضرورته
بناءً تحویز ایدلمش اولدیغندن بر حکم مطلوب نصوصک صراحت ویا دلاتندن
مستفاد اولدقجه مقتضاسیله عمل اولنور . مستفاد اولمازایسه اووقت بالضروره
قیاسه مراجعت ایدرلر .

بوراده نظردقته آنه حق باشقه بر مسئله واردر که اوده (اجماع) مسئله سیدر .
آشاغیده بحث مخصوصنده ادله سیله ایضاح ایدر جکمز اوزره اجماعک حجت
شرعیه اولسنده علمای اسلام اختلاف ایتشلردر . چوق کره اجماع ، ادله
شرعیه دندر . فقط معتزله علماسندن (نظام) ایله شیعه دن (امامیه) فرقه سنه

وبعض علمای خارجیہ کو رہ اجماع ، ادلہ شرعیہ دن معدود دکدر . اهل حدیث دن (ظاہریہ) علمای اساس اعتباریہ اجماعك دلیل شرعی اولسنی قبول ایتمکله برابر بونی اجماع صحابہ به حصر و تخصیص اییدیورلر .
یوجهتله ظاہریہ کو ره یالکز اصحابك اجماعی حجتدر . آنردن سوکوره علمانك اجماعی حجت شرعیہ دن دکدر . روایت مشهوره به نظراً مذهب حنبلی موسی (امام احمد بن حنبل) حضرت تلمی ایله ائمه حدیث دن (ابن حسان) دخی بوفکرده در . [۱] بعض علماده ممالک اسلامیہ نك وسعتی و وسائط نقلیه فقدانی حسیده هر بلده ده و هر کویده مقیم علمانك برر برر رأیلرینی طوبیلامق متعذر اولدیغندن بحث ایله اجماعك نبوته وقوف واطلاعاك مستحیل اولدیغنه ، بعضلری ده فعلاً و ماده وقوعه امکان بولمادیغنه قائل اولمشلردر .

(موصول) - (فصوص) - شارحی (اسفہانی) ، اکثریتك بوفکرده اولدیغنی سو ویلیور . بعضیلری ده اجماعك دلیل ظنی اولدیغنه قائل اولمشدر .
(ارشاد الفحول) ، مؤانی شوکانی ، (امام فخرالدین رازی) ایله اکابر متکلمیندن (سیف الدین آمدی) نك بوفکری - اختیار ایلدکلرینی - بیان اییدیور .

اجماع حقتده موجود اولان شواختلاف افکاری ، بوراده نقل ایتمکدن مقصدم بر حکمی ، کندی اجتهاد و تبغنه استناداً استخراج ایتمک ایستیان ذانك اجماع حقتده نه فکرده بولنیورسه آکا کوره حرکت ایتمی لازم کله جکفی بیاندر . اکر اکثریتك فکری ترویج اییدیورسه او حالده هر شیدن اول حکمنی نحری ایتمیکی مسئله دن اجماعك منعقد اولوب اولمادیغنی تحقیق ایتمی لازم کلور و اقتضا ایدر . اجماع منعقد اولمش ایسه آرتق باشقه دلیل آرامه به

[۱] قد ذهب الی اختصاص حجة الاجماع باجماع الصحابة داود الظاهري وهو ظاهر كلام ابن حباله في صحيحه وهذا هو المشهور عن الامام ابن حنبل وقال ابو حنيفة اذا اجعت الصحابة على شيء سلمناهم واذا اجمع التابون ذاهمتهم .

وقال ابن وهب ذهب داود واصحاب الی الاجماع انما هو اجماع الصحابة فقط فهو قول لا يجوز خلافه لان الاجماع انما يكون عن توقيف والصحابة هم الذي شهر والتوقيف ..
[ارشاد الفحول في بحث الاجماع]

حاجت قالماز . آنکله عمل ايدر . چونکه اکثریتک فکرینه کوره اجماع ايله نص تعارض ایتدکده اجماع تقدیم اولتور .

دییه-ورلرکه نصوص شرعیه نیک بمضیلری منسوخ ، بمضیلری ناسخدر ، اجماعده ایسه نسخ جاری اولماز . بوجهله برنصک مقتضای خلافتنه اجماعک وجودی اونصک منسوخ اولدیغنه ویاخود معنای ظاهرینک مقصود اولمادیغنه دلیلدر . (کذا فی المستصفی)

خلاصه : اصحاب کرامه نظر آنروز اتفاق ایتدکلری مسئلهده اجماعک وجودی تصور اولته میه جفتدن آنلر ، برحادثه نیک حکمنی استخراج خصوصاً سنده اول امرده کتابه ، سوکره سننه ، اوچنجه درجهده رأی وقیاسه مراجعت ایدرلر ایدی . فقط قرون متأخره رجانه نظر آ متقدمینک بر مسئلهده اتفاق ایتیش اولملری ملحوظ بولندیغندن ازمنه متأخرهده ظهور ایدن و اجماعک دلیل قطعی اولدیغنی قبول ایلان بر مجتهد ایچون اک اول اجماعه آندن سوکره صیره سیله کتابه ، سننه ، قیاسه مراجعت ایتک ایجاب ایدر . شو حالده بر حادثه حقیقده اجماع منقده اولدیغنی حالده کتابه ، کتابیله عمل ممکن ایکن سننه ، سنت ايله عمل قابل ایکن رأی و قیاسه مراجعت جائز اولماز .

اجماعک کتاب و سننه تقدم ایتسی ، ماهیه و رتبه آنلرک فوقنده اولمندن طولایی دکلددر . بلکه آنفاً بیان اولندیغنی وجهله کتاب و سننده نسخ جاری اولمندن و بعض نصوص شرعیه نیک تاویل و تخصیصه احتمالی بولمندن ناشیدره یوقسه ماهیت اصلیه سننه نظر آ اجماع اوچنجه درجهده بر دلیل شرعیدر و کتاب و سنندن مؤخردر . ماهیه کتاب و سننک فوقنده اولاق شویله دورسون هیچ بوجهله آنلره معادل بیله اولاماز و بونی هیچ کیمسه ادعا ایدره من .

کتاب ايله سنت ، شارعک نصوصیدر . اصل احکام شریعت آنلره قائمدر . اجماع ایسه بر حکم شرعی بی کلامق خصوصنده علمای اسلامک اتفاقیدر . علمای اسلام هیچ بروقنده نصوص قاطعه خلافتنه عقد اتفاق ایتمز و ایدره من . بوسیله مینیدرکه اجماعک دلیل قطعی اولدیغنی قبول ایتمکله برابر نصوص قاطعه به

تقدیم ایتیان و بالعکس نصوص قاطعه‌ی اجماعه تقدیم ایلان علماده و اودر .
حق محقق شهر (ابن تیمیه) و معارج الاصول ، نده (سلفک مسلیکی بودر)
دیور .

بر مسئله‌ک حکمی ا کلامق ایچون کتاب وسنه مراجعت ایدلده که بعضاً
ایکی آیت و یا ایکی حدیث آره سنده تعارض بولندیکی کوریلور . بوتعارض حقیقی
اولمایوب ظاهریدر . و بزم فهممزه نظر آدر . حقیقنده یا بری نا-سخ ، دیگر
من-و خدر . و یا خود برندن قصد اولنان معناه دیگرندن مقصود اولان معنائک
غیریدر . بویله بر حال قارشوسنده یا بیله حق شیئی ممکن اولدینی قدر بینلری
جمع و تألیف ایدرک هر ایکسیله ده عمل ایتکه چالیشمقدردر . ممکن اولدینی
سورنده تاریخاً مؤخر اولانی ، مقدم اولانی نسخ ایتش دیمک اوله جفندن
مؤخریله عمل اولنور .

شاید تاریخلری معلوم دکسه او وقت دلائل و قرائن سائره یاردیمیه بری
دیگرینه ترجیح ایدیلور بعضاًده متعارض اولان او ایکی آیت و یا ایکی حدیثک
بری عام ، دیگرکی خاص اولور . بو-سورنده نظر اولنور . یا تاریخ نزول
و ورودلری معلوم و یا مجهولدر تاریخلری معلوم ایسه اوچ صورتدن خالی دکلدر .
برنجی صورت : تاریخلری متحد اولمقدردر . بو صورتده خاص عامی تخصیص
ایدر . بناء علیه عام دن خاصک ماعداسی مراد ایدلمش دیمک اولور . بو حالده
هر ایکسیله یلده عمل اولنور . خاصک حکمی کندی افرادی حقنده ، عامک
حکمی ده آنلردن خارج قالان افراد سائره حقنده جاری اولور .

ایکنجی صورت : خاصک تاریخی ، عامک تاریخندن مؤخر اولمقدردر .
بو صورتده عینی حکم جاریدر . شو قدر وارکه اصطلاح حنفیه ده خاصک
بو نوع تخصیصنه (نسخ) اطلاق اولنور . فقهای حنفیه اولکی تخصیص ایله بو
ایکنجی نوع تخصیص آره-سنده بعض فرقلر بولورلر که بحث مخصوصنده ایضاح
اوله جقدر .

اوچنجی صورت : خاصک تاریخی مقدم و عامک تاریخی مؤخر اولمقدردر .

بوصور شده عام خاصی نسخ ایتمش اوله جنندن اراق خاص ایله عمل جائز اولماز. یعنی خاص ایله اصلا عمل اولماز. اگر عام ایله خاصک تاریخی مجبول ایسه بوتقدیرده برینی مقدم دیکرینی مؤخر فرض ایتمک بلاسرجح ترجیح اولاجنی جهتله بالضروره تاریخی اتخاذ مقارنه حمل اولنور. بناءً علیه آنفاذ کر اولنان برنجی صورت وجهله معامله اولنور. بودیدکلریمز نصوص شرعیه نك نبوت ودالات اعتباریه درجه لری مساوی اولدینی تقدیر و صورتدر. اما نبوت ویا دالات جهتیه درجه لری مساوی دکسه بو تقدیرده بوجه آتی حل مشکل ایدیلور. شویله که :

اول امرده نبوت پینه ده نصوصک شارعدن ورودی جهتی ، ایکنجی درجه ده دالات جهتی نظر اعتباره آنور. بناءً علیه نبوت لری متفاوت اولدینی صورتده نبوتی اقوا اولان ترجیح اولنور. دالات جه قطعیه اعتبار اولماز. شو حالده نبوتی قطعی اولان آیات قرآنیه واحادیث متواتره نبوتی ظنی اولان خبر احد اوزریته تقدیم ایدیلور. ولو که نبوتی قطعی اولانک دالاتی ظنی وبالمکس نبوت ظنی اولانک دالاتی قطعی اولسون. زیرا شارعدن منقول اولان بر دلیل سمی نك هرشیدن اول طرف شارعدن صدوری محقق اولمق ایجاب ایدر. بر کره بر دلیل شرعی نك اساسی یعنی نبوتی قطعی و متحقق اولما بجه دالاتی نه قدر قطعی اولورسه اولسون نبوتی قطعی اولانه ترجیح ایدیلور چونکه آنک دالانده کی قطعیت آتی شبهه لی وضعیف بر دلیل اولمقدن چیقارماز بوندن طولاییدر که کتاب ، ظاهری خبر واحده اولان سننک ، نص صریحی اوزرینه تقدیم اولنور. مثلاً (حقی تنکح زوجاً نجراً) آیت جلیله سی قادینک ناکه اولمسندده یعنی ولیسنک اذنه موقوف اولمق سزین قادینک بالذات عقد نکاح ایلمسنک صحتده ظاهر در . (لانکاح الا بولی) حدیث شریفی ایسه ، بر قادینک صحت نکاحنده اذن ولی نك شرط اولمسی خصوصنده نص صریحدر ، فقط خبر واحدر. بو وجهله عندالحقیه کتاب ظاهرینه یعنی آیت مشارالیه تقدیم اولمایه صالح دکلدر. آنک ایچون مذهب حنفی ده مذکور آیت ترجیح ایدیلورک آنکله عمل اولنمشدر ذکر اولنان حدیثله عمل اولنمشدر .

لیکن نصوص متعارضه نك نبوت لری درجه مساوی اولوبده دالات لری

مقاوت اولورسه بو تقدیرده دلالتی قطعی اولان ، دلالتی ظنی اولانه ترجیح اولنور . الحاصل یوقاریده (مجتهد به) بحثنده بیان اولندینی اوزره نصوص شرعیه درت نوعدر .

۱ — قطعی الثبوت ، قطعی الدلاله

۲ — قطعی الثبوت ، ظنی الدلاله

۳ — ظنی الثبوت ، قطعی الدلاله

۴ — ظنی الثبوت ، ظنی الدلاله

بونلر آره سنده تعارض وقوعنده برنجیسی ایکنجیسنه، ایکنجیسی اوچنجیسنه، اوچنجیسی دردنجیسنه ترجیح اولنور. دائماً کربثوت و کربدلالت جهتنده قوت، سبب رجحان طوتیلور. هرایکی جهتنده مساوات حصولنده، دلائل و قرائن سآره به مراجعتله بری دیگرینه تقدیم ایدیلور. هیچ بروجهله برینی دیگرینه تقدیم و ترجیح قابل اولمازسه آرتق هرایکیسی ده حکمدن ساقط اولور و هیچ بریله ده عمل اولماز. (الدلیلان اذا تعارضا ولم یکن العمل بهما او باحد هما نساقت...) چونکه بو صورتده هرایکیسیله عمل متعذر اولدینی کی یا لکنز بریسیله عمل دخی متعذر در. زیرا بریله عمل دیگریه عمل دن اولی اولما دیغندن لاعلی التعین هرا یکی بریله عمل ایتمک، ترجیح بلاسرجح دیمک اولور که تجویز اولنه ماز. بر حادته حفتند، موجود ایکی نص شرعی ، وجه مشروح اوزره حسب- التعارض نساقت ایدنجه آرتق او حادته نك حکمنی استخراجده دیگر بر دلیله مراجعت اولور . شو حالده اکر او ایکی نص متعارض کتاب ایسه سنته ، سنت ایسه عدل و حق، عرف و عادت ، رفع و جرح ، مصاححت طامه، احتیاج ناس کی اساسات شرعییه ، قیاسه و آثار صحابهیه مراجعت اولنور .

ذکر اولنان اساسات شرعییه و قواعد اصلیه فقهیه دن بریله قیاس تعارض ایتدکده او قاعده اساسیه فقهیه قیاسه تقدیم و ترجیح اولنور . اساسات مذکور فقه حنفی ده (استحسان) ، فقه مالکی ده (مصلحت مرسله) عنوانی آئنده مندر جدر.

قیاس ایله آثار صحابه تعارض ایتدکده فقهائک بر قسمی عنندنه قیاس ،

دیگر بر قسمی عندندہ آثار صحابہ ترجیح اولنور آثار صحابہ یہ عرف فقہادہ
(قول صحابی) و (مذهب صحابی) اطلاق اولنور . بونلرک تفصیلاتی مباحث
مخصوصہ سندہ کله جکدر .

تعارض بعضاً باشقه باشقه اصلره نظراً بربرینه مابین ایکی قیاس آره سندہ
واقع اولور . بوسورتده طالب حکم اولان ذات قلبنک شهادتنه یعنی وجداننک
حکمنه مراجعتله بو ایکی قیاسدن برینی دیگرینه ترجیح ایدر . یعنی وجدانی
هانکیسیله عمل ایدلسنی امر ایدرسه آنکله عمل ایلر .

بو اساس یعنی شہادت قلبه وحکم وجدانہ مراجعت کیفیتی اصول حنفیہ
کورہ در . دیگر علمای اصول عندندہ ایسه بررأیہ کورہ مجتہد او ایکی قیاسدن
هیچ بریلہ عمل ایتیموب توقف ایدر . دیگر بررأیہ کورہ علی الاطلاق
مجتہد مخیر اولوب هانکیسیله عملی آرزو ایدرسه آنکله عمل ایلر . (دع
مازینک الی ما یریبک) و (استفت نفسک وان افتاک المفتون) حدیث صحیح لرینک
مضمون عالیبری شہادت قلب اساسنک شرع و شریعتہ اوفق اولدیغنه مشاهد عادلر .
بیانه حاجت یوقدرکه بو حکم قیاسلر آره سندہ قوتیجه مساوات تامه
بولدینتی صورتده جاریدر . اما اشاعیده (ترجیح) بختندہ تفصیل
ایدیلہ جک اسبابدن برینک وجودینه بناءً ایکی قیاس متعارضدن بری
دیگرندن قوتلی اولورسه بو صورتده آنکله عمل اولنور . اکا نسبتله ضعیف
اولان قیاسه التفات اولنماز . مثلاً : علی صراحةً منصوص اولان قیاسی ،
علی غیر منصوص اولوب عقلاً استنباط اولان قیاسه تقدیم و ترجیح اولنور .
کذلک اثری قوی اولان قیاس خفی ، اثری ضعیف اولان قیاس سائرہ یه تقدیم
اولنور . مثاللری بحث مخصوصندہ ایراد و ایضاح اولنہ جقدر . بعض مسائل
واردرکه مسائل غیر قیاسیہ دن اولدقلری جهتله حقلرنده قیاس جاری اولماز .
چونکہ مایتلری اقتضاسینجه حکملری رأی و قیاس ایله ادراک قابل اوله ماز .
عدد رکعات ، اشکال عبادات ، مقدار مجازات ، صور عقوبات ، مدت حیض ،
مدت حمل کبی .

بو مثللو مسـئله صرف تقدیری و صرف فطری اولدقلری جهته بونلرک
 حکملرینی قیاس طریقله استخراج طوغری اولماز . حقلرنده نص ویا اجماع
 موجودسه فهبا ، موجود اولمادینی ویا تعارض سببیه حکمدن ساقط اولدقلری
 صورتده بایله جق معامله آنفاً ذکر اولنان اساسات شرعیه و قواعد اصلیه بی تطبیق
 ایتمکدر . قواعد مذکورده دن برینی تطبیقده قابل اولمازسه او حالده (نفس
 اصلی) قاعده سی تطبیق اولنور . یعنی شرع شرفک و رودندن مقدم موجود
 اولان حال اصلی - که برائت اصلیه و اباحه اصلیه در - ابقا و تقریر اولنور .
 بوکا (استصحاب) دینور که صدرا الشریعه (تقریر اصل) اطلاق ایدیور .
 ایشته طریق و اصول اجتهاد بوندن عبارتدر . کرچه بوبابده سویله نه جک
 دها بعض سوزلر واریسه ده ، بونلر مباحث مخصوصه سننده واز جمله (ترجیح)
 بختنده بر تفصیل ایضاح اولنه جفندن بوراده بو قدرله اکتفا اولندی . ذاتاً علم
 اصول فقیه ، اصول اجتهاده متعلق قواعدی تبینه مخصوص بر عام اولدینی جهته
 بونلرک جمله سی مباحث آتیده آیری آیری بیان و تدقیق اولنه جقدر .

طبقات مجتهدین و فقها

زمانمزده غریبه اولادینی کبی وقتیه شرقده دخی علمای اسلام ، تنویر حقیقت مقصدیه طریق تنقیدی کشاد و تأسیس ایده رک ، کندیلرندن اول کلان فقیه ، محدث ، بالجله علمایی طبقات و درجات مختلفه به تقسیم ایشلردور .

(انزلو الناس منازلهم) حدیث شریفی موجبنجه ، هرطالی حائر اولادینی رتبه اقتدار ایله متناسب بر موقع عامی به ابعاد ایشلردور . بو اصول هر علم و فن اربابی ایچسون وبالخاصه حقائق شرعییه حقیله اکلایمق ایستیانتر ایچون یک نافع بر اصولدر . مسلك تقیه به سالک ، احکام شرعیه و فقهیه بیلیمک ایستیان ، بوذوات هرشیدن اول فقهانک طبقاتی و طامعه ایستدیکي آثار فقهیه مؤلفلرینک موقع فقهیلرینی وهانکی طبقه ده داخل بولندقلرینی بیلیملیدرکه مسلكکنده و طریق تحصیلنده بصیرت اوزره بولنه بیلیمش اولسون .

ایشته بوملاحظه به مینیدرکه بز بوراده (اجتهاد) بمختک تمه سی اولمق اوزره (طبقات فقها) به دائر بعض معلومات اعطا ایتمک ایسته یورز .

اول امرده شو جهتی بیان ایدیم که صدر اسلامده ، یعنی دور اصحاب و تابعینده علمای اسلام (فقها) نامی آلتنده طبقات مختلفه به انقسام ایتمه مشدی . حتی او وقتلر (فقها) تعبیری زبازد بیلله دکلدی . مذاهب اربعه فقهیه دخی هنوز تأسس ایتمه مشدی . او جهته عصر اولده بیوک و کوچوک هر عالم کنندی علمیه عامل اولور و هیچ بری دیکرینی تقلید ایتمزدی . حکم شرعیسنی بیلمدکلری بر حادته تحقق ایدرسه بر برلریله استشاره ایدرلر . و او حادته حقیقنده بر حدیث وارد اولوب اولمادینی یکدیگرندن سؤال ایلرلردی . بر حدیث نقل و روایت ایدلدیکی تقدیرده کنندی اکلایشلرینه کوره او حدیث شریف مقتضاسنجه عامل اولورلر . حدیث روایت ایدلدیکی صورتده کنندی رأی و اجتهادلرینه تابع بولنورلردی . رأیلرینه توافقی ایدرسه اتفاق ، تخالف ایدرسه اختلاف ایدرلردی .

خلقك ذكى و آرزوق تحصيل كورمش منور قسمی ، عامانك قول مجردلریله
 دكل دلیللریله عامل اولورلردی . ذاتاً عامای کرام بلادلیل سوز سویله مزلردی .
 بر مسئله نك حکم شرعیسنی بیان ایتدکاری زمان دلیل شرعیسنی ده اتیان
 ایلرلر ایدی . حدیث ایسه مسندیله و عنعنه سویله نقل وروایت ایلرلر ، رأی
 و قیاس ایسه وجه وعلتی بیان ایدرلردی .

چونکه هرکس بیلوردی که شارعدن باشقه هیچ برکیمسه نك شریعت نام
 و حسابنه رأی مجردیله حکم وضعنه صلاحیتی یوقدر . بونک ایچوندرکه اووقتلر
 عالم، جاهل هیچ بر فرد کندیسنی دیگر بر ذاتک (ولوکه الک بیوک مجتهد اولسون)
 اجتهاداتیله مقید قیلمسازدی . بو کون بر مسئله نك حکمی بر عالمدن استقتنا
 ایدرلرسه ، یارین بر دیگر مسئله نك حکمی باشقه بر عالمدن استقتنا ایدرلردی .
 وویریلان فتوی قناعت بخش اولورسه اونکله عامل اونورلر . اولمازسه قناعت
 حاصل ایدنجه به قدر دیگر لرندن استقتنا ایلرلردی . بوجهته عالم اولسو، جاهل
 اولسون هیچ برکیمسه فقهای اصحاب و تابعیندن بیوک بر مجتهده نسبت اولنمازدی .
 مثلاً برکیمسه نك اعظم اصحابدن حضرت عمر الفاروقه ویا عبدالله ابن مسعوده
 نسبت فقهیه سی بولندیقی افاده مقصدیله (فلان ذات عمریدر ویا مسعودیدر)
 دینلمدیکی کبی اکابر تابعیندن (سعید بن مسیب) . ویا (ابراهیم نخعی) به
 منسوبیتی کوسترمک ایچونده (فلان سعیدیدر ویا ابراهیمی در) دنیلمزدی .
 مذاهب اربعه فقهیه تأسس ایتمه مشدی . کیمسه نك کیمسه به نسبت فقهیه لری
 یوقدی . فقط دور تابعین اوآخرنده یاواش یاواش اصول و مسالك اجتهاد تأسس
 ایتمکه وفقه بر درس مخصوص صورتنده تدریس ایدلمکه باشلانندی و صوکرده
 دور مجتهدین حلول ایدنجه آرتق مسالك اجتهاد تماماً تأسس فقهده بر علم و فن
 شکلنده دیگر علومدن تمیز ایلدی .

اهل عراقک امامی (امام ابوحنیفه) ، اهل حجازک امامی (امام مالک)
 اهل مصرک امامی (امام شافعی) کبی بیوک مجتهدلر ، بتون موجودیتلرینی صرف
 ایدرک آیات واحادیثی، آثار اصحاب و تابعینی استقرا و تدقیق و کندیلرندن اول

جوابلری ویرلمش ، ویرلامش مسائل فقهیه بی ترتیب و تنسیق ایله حکملرینی
و.أخذلرینی تثبیت ایتدیله . وبوصورتله کرك اصول فقهه وکرك فروع فقهه
متعلق اساساتی بالتمهید اصول وفروعیله ، قواعد وضوابطیله ، کلیات وجزئیاتیله
آز چوق بربرندن فرقلی برر مؤسسه فقهیه وجوده کتیردیله .

ایشته بو وجهله تأسس ایدن مؤسسات فقهیه نك هر برینه ، مسلك فقهی
مضاسنه (مذهب) مؤسسنده کندیسنه تابع اولانلرك متبوع وپیشواسی اولدینی
ایچون (امام) تسمیه اولندی .

ایشته اسلامده مذاهب فقهیه بو صورتله صوکره دن یعنی ایکنجی عصر
هجریده ظهور ایتدی . مؤسس عالی قدرلرینك نام فقاہت انساملری ده اطرافه
باییلدی . آرتق هر طرفدن بیکارجه اصحاب تحصیل فوج ، فوج آنلرك بولندقلری
محاملره قدر شد رحل ایده رك کندیلرندن تفیض وتفقه ایتدیله . ملکترلرینه
عودتلرنده آنلردن اخذ ایتدکلری افکار فقهیه بی کرك تألیف وکرك تدریس
صورتیله نشر وتعمیم ایله دیله . بونك نتیجه سی اولق اوزره فقه ایله اشتغال
ایدن علمای اسلام متعدد ومختلف زمهرله آیرلدی . وهر زمهره کندی
امامنه نسبت اولندی . تأسیس ایدیلان مذهبیره مؤسس لرینك نامنه اضافتله
(مذهب حنفی) ، (مذهب شافعی) ، (مذهب مالکی) (مذهب حنبلی) دنیلدیکی کبی
بو مذهبیره سالك اولان زمهره لره ده (حنفی) ، (مالکیه) ، (شافیه) ،
(حنبلیه) ؛ فردلر ایچون ده (حنفی) ، (مالکی) ، (شافعی) ، (حنبلی) دنیلدی .
دور مجتهدین ده بروجه معروض بر مذهب مخصوص فقهی تأسیسنه موفق

اولان بیوک مجتهدلر بالکنز دوت امامدن یعنی (امام ابوحنیفیه) ، (امام مالک) ،
(امام شافعی) ، (امام حنبلی) حضراتندن عبارت دکادر . (ابن ابی لیلی) ،
(ابن شیزمه) ، (سفیان ثوری) ، (حسن بن صالح) (عبدالرحمن ارزاعی) ،
(عمر وبن حارث) ، (لیث بن سعد مصری) ، (عبدالله ابن ابو جعفر) ،
(اسحق ابن راحصویه) ، (ابو عیید قاسم بن سلام) ، (ابو ثور بغدادی) ،
(داود ظاهری) ، (ابن حریر طبری) ، (ابن خزیمه) ، (ابن نصر

مروزی)، (ابن منذر نيسابوری) کي آثاره معارض وغير معارض، معاصر وغير معاصر دها پک چوق مجتهدلر واردرکه هر بری کندبینه مخصوص بر مذهب فقهي صاحبي در .

شو قدرکه بونلرک بهضيلرينك مذهبلى شـخصلرينه منحصر قالمش ، بهضيلرينك ده مذهبلى بر مدت دوام ايدوب بلاخره منقرض اولمشدر . بو جهتله دتيوز سنه هجر به سندن سوكره سالف الذکر درت بيوك امامك مذهبلى تفرد وتعمم ايدرك زمانمزه قدر جارى اوله كمشدر . كچه دها سوكره لرى ، هيچ بر امامه تابع اولمايان مستقل مجتهدلر ظهور ايتمشدر . ليكن بونلر بللى باشلى مضبوط واساسلى بر مذهب فقهي تاسيستنه موفق اوله مامشلردر!

الحاصل مذاهب فقهيه بو صورتله ظهور ايله تاسس ايتدكن سوكره فقها وجه مشروح اوزره قسم قسم آيريله رق هر بر قسم بر مذهب سالك اولمش وبالطبع بونلر اقتدار فقهي جه عيني سويده اولمادقلرندن هر مذهبده مختلف طبقاتدن بر چوق فقها نشأت ايتمشدرکه بو مقدمه دن سوكره شمدي اولرى على وجه الاختصار تعريف وتوضيح ايدلم .

اول امرده شوراسنى عرض ايديم كه (طبقات فقها) حقه فقهانك سوزلرى بر برينى طوتيمور . حنيفلر باشقه درلو ، شافعيملر باشقه درلو تقسيم ايديمورلر . بز هر ايكي طرفك تقسيماى بيان ايدم جكيز .

حنيفلرک تقسيمى

مشاهر علمای عثمانیه دن شيخ الاسلام احمد (ابن كمال) مرحومدن منقول اولوب آندن سوكره كلان علمای حنيفه عندنده مشهور اولان تقسيمه كوره؛ فقها (مجتهد فى الشرع) ، (مجتهد فى المذهب) ، (مجتهد فى المسئله) ، (اصحاب تخریج) ، (اصحاب ترجیح) ، (اصحاب تمیز) ، (مقلد صرف) ناملريله پدى طبقه به منقسمدر .

۱ - مجتهد في الشرع

مجتهد في الشرع ديبه نه فروعهده ونه اصولده باشقه بر مجتهدی اصلا تقلید ایتیمان مجتهده دینور .

انمه اربعه یعنی (امام ابو حنیفه) ، (امام مالک) ، (امام شافعی) ، (امام احمد حنبللی) و بونلرک امثالی کبی که بونلر قواعد اصولی تمهید واحکام فروعی ادله شرعیه دن استنباط ایدرک اصول فقهده یعنی طریق اجتهاده مستقل بر مسلك، فروع فقهده معین بر مذهب تأسیس ایله مشلردر .

۲ - مجتهد في المذهب

مجتهد في المذهب : طوغریدن طوغری به ادله شرعیه به مراجعتله اجتهاده واستنباط احکام اهلیتی حائز اولقله برابر طریق اجتهاده صاحب مذهبک تمهید و تقدیر ایتدیکی اصول وقواعد اوزرینه حرکت ایدن تعبیر دیکرله امر اجتهاده آنک اترینه اقتفا ایدن ، مسلكنه سالک اولان مجتهددر . امام حنیفه حضرت تلرینک خواص تلامیذاندن (امام ابی یوسف) ، (امام محمد بن حسن شیبانی) ، (امام زفر ابن هذیل) ، (امام حسن بن زیاد) و امثالی کبی . بونلر هر نه قدر بعض احکام فروعهده استدلرینه مخالف بونلورلر ایسهده ، قواعد و اصول اجتهاده اکا تبعیت ایدرلر . وايشته بو تبعیتله امام مالک ، امام شافعی کبی مسلك اجتهاده معارض اولانلردن ایریلورلر .

۳ - مجتهد في المسئلة

مجتهد في المسئلة : ديبه احکامی مذهبده موجود اولیان مسائلده اجتهاده مقتدر اولان فقهایه دینور . مشایخ حنیفه دن (خصسان) (طحاوی) ، (ابو-

الحسن الكرخي) ، (شمس الأئمة الحلواني) ، (شمس الأئمة السرخسي) ،
 (فخر الإسلام بزدوی) ، (قاضی خان) (خلاصة الفتاوى - صاحبی طاهر
 احمد افتخارالدين بخاری -) و (ذخیره ، محیط برهانی) صاحبی برهان الدين
 محمود بخاری) ، بونك پدري (صدر سعيد تاج الدين احمد ابن عبدالعزيز بن
 مازہ) و بونك برادري (صدر شهيد حسام الدين عمر بن عبدالعزيز بن مازہ)
 و بونك پدري (صدر كبير برهان الكبير برهان الأئمة) لقبليہ ملقب (شيخ
 عبدالعزيز بن مازہ) كہي .

بونلر نہ اصولده، نہ فروعده صاحب مذهبہ اصلا مخالفته مقتدر دکلردر،
 بالکز حقلرنده صاحب مذهبدين هيچ بر روايت بولميان حادثات جديدده
 آنک بسط و تہيد ايلديكي اصول و قواعد او زره استنباط احکامہ يعنى اجتهاده
 مقتدر لردر .

۴ - اصحاب تخریج

اصحاب تخریج : ملکہ تخریجه مالک اولان فقہادر . بونلر اصلا اجتهاد
 اقتدارینی حائز اولميان مقلدیندندر . شو قدر وارکہ بونلر ، اصول و قواعد
 مذہبیہ ، احکام سائرہ فقہیہ بی بونلرک دلیل و مأخذلرینی محیط اولدقلرندن
 صاحب مذہبدين و یا مذہبده مجتهد اولان ذلک اصحابندن منقول اولویده
 وجوه عديده احتمالی بولنان بر قول محتملی تفصیله ایکی جهتہ محتمل اولان
 بر حکم مبہمی توضیحه و مذہبده موجود اولميان مسائل جدیدہ احکامی
 اصول و قواعد مذہبدين تخریجه مقتدر لردر . (جماص ابوبکر رازی) و بونك
 تليذی (فقيه ابو عبدالله جرجانی) كہي (تخریج) تعبيرينك مدلول فقہیسی
 و) اجتهادایله فرقی و بونك اسباب مولدهسی) حقلنده اسانغی ده آبروجه ایضاحات
 ویریلہ جکدر .

اصحاب ترجیح

اصحاب ترجیح، دلیلترین نظرآ مذهبده موجود اقوال و روایات متخالفه دن برینی دیگرترین تفصیل و ترجمه اقتدارلری بولنان متقیهیندر. بونلرده بالاده کی (اصحاب تخریج) کی دلیلده نظرده و مذهبده مناظره به اهلدرلز. فقط اونلر قدر بلکه تخریجه مالک اولدقلری ایچون اونلرک دوننده درلز. بو طبقه رجالی احکام مذهبه بی حفظ و ایقان، ماخذ و دلیلترین تدقیق و ایقان ایتمش اولدقلری جهته بر مسئله حقیقه صاحب مذهبدن و یا آنک اصحابدن مختلف روایات نقل ایدلمش و یا خود اصحاب تخریجک تخریجانی بر برینه مبنای بولنمش اولورسه دلیلترین نظرآ ایکندن برینی تصحیح، خلقک صرف و عادات و زمانک احتیاجاتنه بناء آنردن برینی دیگرینه ترجیح ایدرلز. بوکا اهلیت و صلاحیتلری واردر. بونلر اشبو ترجیح و تصحیح خصوصلرند (بو اقوال مختلفه ایچنده روایه اصلاح و یا صحیح، اصلاح اولان بودر)، (بو قول روایه اوضخدر)، (قیاسه اوفق اولان بودر) و یا خود (ناسه اوفق اولان بودر) کی بر تعبیر اجتماعالی اصول و عادت اتخاذ ایتملردر. ابن کمال واکا توفیقاً دیگر بعض علما (مختصر قدوری) نامیه معروف اولان (متن و چیز) مؤلفی (ابو الحسن قدوری) ایله مشهور (هدایه) صاحبی شیخ الاسلام (برهان الدین شرغیانی) بی بعضلریده ذکر اولتان هدایه شرحی (فتح القدیر) و اصولدن (تخریر) صاحبی محقق شهر (کمال الدین ابن همام) ی اصحاب ترجیحدن عد ایدیورلورسه ده بعض محقق بو اوج فقیهک رتبه اجتهادی احراز ایدرک «مجتهد فی المسئله» طبقه سنه ارتقا ایتمش اولدقلری سوبله بورلرکه آنار محققانه لری بو ایکنجی تلقینک و اهاد و غیره اولدیغه شهادت ایتمکده در.

۶ - اصحاب تمیز

اصحاب تمیز، دینه بوجه بالا و ترجیح ده اقتدارلری اولیوب بالکنز نظامی مذهب و نظامی روایات ایله روایات نادره بی تخریقه و مذهبده موجود

قول قوی ایله قرل ضعیف بینی تمیظه مقتدر اولان مقلدین متفهیندندر ،
 بونلرک دلائل مذهبی تدقیق و تتبع خصوصنده نقصانلری بولندینی کبی تفصیل
 دلائل و تبیین مسائل خصوصنده اصحاب ترجیح قدر نفوذ نظره مالک اولدقلرندن
 اقوال مختلفه دن برینی دیکرینه ترجیحه، اهلیت و کفایتی حائز دکدرلر. آنجق
 امهات کتب مذهبی پی تتبع و مذهبه موجود روایات و اقوال متخالفه پی حفظ
 و اتقان ایش اولدقلرندن مؤلفات مذهبه ده کیمک رای و فکری اولدینی تصریح
 ایدلمه ین اقوال متباینه دن هانکیلرینک روایات ظاهره و یانادره دن اولدقلرینی
 و هانکیلرینک تخریجات جمله سندن بولندقلرینی فرق و تمیز ایدرلر .
 بوندن آ کلاشیلور که اصحاب تمیزده اصحاب ترجیح کبی احکام مذهبی پی
 حفظ و اتقان ایشلردر. لکن یادلائل مذهبی پی اشتراطده و یا خود اولدلائلک روخنه
 غوامضه اناذ نظرده اصحاب ترجیح درجه سنده دکدرلر. بوجهته بونلر بو خصوصده
 آنلرک دوننده اولوب د دلیلده نظر ده ماخذ اولق ایچون مقتضی شرائطی
 بتمامها جامع دکدرلر . بناء علیه اصحاب تمیز ، اصحاب ترجیحه نسبتله ده اقویو
 مقلددرلر . هم دلیلده همه حکمه مقلددرلر . کرچه اصحاب ترجیحده مقلدین
 صنفیندرلر . لکن بالکمز دلیلده مقلددرلر حکمه مقلد دکدرلر . ابن کمال
 و پیر وانی، متأخرین حقیقه عندنده (فنون اربعه) نامیله معروف اولان (کتز) ،
 (مختار) ، (وقایه) ، (مجمع) مؤلفلری - صیره سیله - (ابو البرکات حافظ
 الدین نسفی) ، (ابو الفضل محمد الدین موصلی) مشهور صدر الشریعه نک بویوک
 پدری (تاج الشریعه محور بخاری محبوبی) و (مظفر الدین ابن الساعاتی) پی
 اشبو اصحاب تمیز طبقه سندن عد ایدیورلر .

حالبوکه بو افاضلک دردی ، خصوصاً حافظ الدین نسفی ایله ابن الساعه
 کرک علم اصولده و کرک علم فروعده فحول محققیندندر . بوجهته بونلری
 دلیل و نظره اهل اولمایان مقلدیندن عدایمک بر آ ز انصاف مزلق اولور، بونلر
 هیج دکسه (اصحاب ترجیح) دن معدوددرلر . بعض علما ایسه مشار ایله
 (حافظ الدین نسفی) پی مجتهد فی المذهب طبقه سی رجاندن عد ایدیور . فقط

بونلرك « مجتهد في المذهب »، ثعبيرندن مقصدلري « اصل تخرج صحاب » يعني اصحاب تخرج ديمكدر . نته كيم بويولده ايضاح اولته جقدر .

واقعا بر علمده مهارت ديكر علمده مهارتي استلزام ايتمز . بوجهتله بر كيمسه علم اصولده اختصاص تام ومهارت كامله صاحبي اولوبده علم فروعهده اودرجه اختصاص ومهارت صاحبي اولمايه بيلير . نته كيم علم اصولده حدكاله واصل اولان بر چوق علمده فروعهده راجل همده بك راجلدرلر . اوت آنا ، بونلر اولردن دكلدرلر .

بونلر هم علم اصولده وهم علم فروعهده وسعت معلومات ونفوذ نظر اصحابنددرلر . اوجهتله بونلري (اصحاب تخرج) دن دكل ، هيچ اولمازسه (اصحاب ترجيح) دن عد ايتك اونلرك حقائق اصول واحوال شانلرينه دهها موافق اولور .

۷ - مقلد محض

« مقلد محض » عنوانندنده آكلاشيله جنفي وجهله فقهده اك قويو اولان مقلددر . بو طبقه آرتق طبقات فقهائك اك دون طبقه سيدر . بو طبقه به داخل اولانلر نه ترجيحه نهده تميزه مقتدر اولمايانلردر . بونلر حقيقتده (فقهاء) عنوان مبجلى آلتنه داخل اولمغه لايق دكلدرلر . اك بيوك مزيتلري ، بيكلرجه احكام مذهبيه بي حفظ ايتك دن وراطب ، يابس بر چوق مسائلي اثرلرينه درج ايلمكن عبارتدر .

بو صورتله بونلر حافظه لرنده ويا اثرلرنده بك چوق مسائلي جمع ايتملردر . لکن اونلري دلائل حقيقيه سيله تدقيق واتقان ايتمه مشلردر بو جهتله بونلر ، (رب حامل فقيه غير فقيه) حديث صحيح شرايفي منظومنه فقيه دكل ، حامل فقه وحافظ مسائلددرلر . آنك ايجون بونلرك وجوده كتير دكلري آثار فقيهه هيچ بر قيمت علميه بي حائز دكلدر . چونكه بو آنارك محتوي اولديني مسائلي دلائلندن مجرد هب قوري نقلدن عبارتدر . مسئلهلرك قائللريني بيله ذكر ايتزلر

(قيل .. قيل) ديوب جگر لر . احتمالاً قائلاريني گنديلريده بيلمز لر . اويله
كورمشلر ويا استادلرندن اويله ايشتمشدر .

ايشته بو كون مرجع حاص و عام اولان (در مختار) ايله آنك خاشيه لري
اولوب مؤلفنك كنيه سي ايله ياد ايديلن يعنى (ابن طابدين) ديمكله معروف
بولتان (ردالمختار) بو قبيل آتاردندر . كچه بونلرده و بونلره مائل آثار
فقهپده آز جوق تعليقات فقهپه به تصادف اولونور . فقط بوتعليلايك اكرتبيسي
دلائل حقيقيه اولمايوب تليل بعدالوقوع قيلندندر . و قريبا ايضاح اولنگيني
اوزره اهل تخريج طرفندن درميان اولتان تعليقات قطعيه دن ، دها دوغريسي
تعليقات جديده دن عبارتدر كه صاحب مذهبك خاطرندن بيله كجه مشدر ديتلسه
يالان سـ و بيله نيلمش اولماز . احكام فقهپه نك دلائل حقيقيه سي نصوص و ادله
شرعيه و آنلردن استخراج اولتان اساسات فقهپه در . بو طبقه رجالي اللربنه
كچن آثار علمپه ده نه كوريرلر سه ، صحيفنى ، غير صحيفندن تميز ايمه يرك آنى
اخذ و قبول ايتدكلى جهته ابن كمال مرحوم بونلري (خاطب الليل) تشبيه
ايديوور . «وجه شبه» يعنى وجه تشبيهه «صاغلامى چوروكدن فرق ايمه مك»
خصوصى در . كچه نك قراكلغنده اودون طولايان بر كيمسه انه كچن او .
دونلك صاغلامنى چوروكدن تفريق و تميز ايدمه چكندن بو مناسبتله اشبو
پدنجى طبقه ده داخل بولتان علما (خاطب الليل) يعنى كچه اودونچيسنه
تشبيه اولمشدر .

ذاتاً ، اسكى اولان غرب ، ينه بو مناسبت تشبيه و بو وجه تشبيه ايله
لساننه راطب يابس نه كلورسه آنى سويله ين ذاته (خاطب الليل) اطلاق ايدر .
لردى . الحاصل بونلر نقل جى درلر . منذهبده مصرح اولمايان برحادثه نك حكمنى
گندي باشلربنه اصول و قواعد مذهپه دن تخريج ايدمه چكلى كچي مختلف
افوال موجوده دن برينى ديكرينه ترجيح و حتى قويسنى ضعيفدن تميز دغى
ايدمزلر .

آنك ايجون بونلر بالاده بيان اولتان اصحاب ترجيح و تميز طرفندن هانكى

قول ترجیح و یا تصحیح اولئش ایسه آنکله حکم و اتفاهه و نقل صحیحی ارانه به مجبوردرلر . بلا نقل کندی رأیله حکم و یا ابقا ایدرلر ، و یا خود ارانه ابتدکاری نقل معتبر و معروف بر کتابدن مأخوذ اولمایوب هتتی و مؤلفک موثوقتی غیر معلوم بر کتابدن اخذ ایدلش اولور ایسه او حکم او فتوی معتبر اولماز . مکرکه ویریلان حکم و یا فتوی ، شرائطی جامع اولارق صحیحاً صرف وعاده و یا مصلحت عامه به منی اوله . اولوقت معتبر اولور . (۸۰۰) تاریخ هجریسندن سوکره مکه علمای حنفیه سنک اکثریسی اشبو (مقلد محض) طبقه سندندر . ننکم سالف الذکر (در مختار) صاحبی (علاءالدین حصنی) کبی بعض اصحاب انصاف بو حقیقتی کندی حقلرنده قبول و اعتراف ایتشاردر . (در مختارک مقدمه سی نهایتنه باق ..) ایشته متأخرین حنفیه نك تقسیمنه کوره (طبقات فقها) بوجه مشروح یدی طبقه دن عبارتدر . کله لم شافعیلرک تقسیمنه :

شافعیلرک تقسیمی

امام نووی ، جلال سیوطی و ابن حجر مکی کبی متأخرین شافعیه ، فقهای (مجتهد مستقل) ، (مجتهد منتسب) ، (مجتهد فی المذهب) و (مجتهد فی الفتوی) نامیله درت طبقه به تقسیم ایدیور . یوقاریده اجتهادک شرائطی بیان صیره سند کورمشدک که اصولیون (مجتهدی) (مجتهد مطلق) و (مجتهد مقید) اولمق اوزره ایکی قسمه آیریورلردی .

ایشته شافعیلر ، مجتهد مطلق (مجتهد مستقل) و (مجتهد منتسب) ناملریله ایکی به ، مجتهد مقیدی (مجتهد فی المذهب) و (مجتهد فی الفتوی) عنوانلریله كذلك ایکی به تفریق ایدرک علی الاطلاق (مجتهدی) درت صنفه تقسیم ایتمش اولیورلر .

زیرده کی ایضاحادن آ کلاشیله جنی اوزره فقهای شافعیه علمای حنفیه نك « مجتهد فی الشرع » تسمیه ابتدکاری مجتهد « مجتهد مستقل » و « مجتهد فی المذهب »

دیدکاری مجتهد (مجتهد منتسب) تسمیه ایدیورلر. (مجتهد فی المذهب) تعبیری ایسه حنفیلرک (مجتهد فی المسئله) و «اصحاب تخریج» بینلرینی تفریق ایتدکاری ایکی صنف فقهانک مجموعنه اطلاق ایدیورلر. و بوسورتله ایکی صنف فقهایان بر صنف عد ایدیورلر.

(مجتهد فی الفتوی) دییهده اصطلاحات حنفیهده بوجه بالا «اصحاب ترجیح» اطلاق اولنان فقهایه دیورلر. یوقاریده «اصحاب تمیز» و «مقلد محض» ناملریله ذکر اولنان صوک ایکی صنف مقلدین فقهایه کلنجه ... بونلری، شافیلر «فقها» نام مبجلی آلتیده ذکره لایق کورمیورلر.

شوقیسه افاده وشو مقایسه ایله علماء نقطه نظرندن (مجتهد مستقل) «مجتهد منتسب»، (مجتهد فی المذهب) و (مجتهد فی الفتوی) تعبیرلریله قصد اولنان فقهانک کیملر اولدقلری آکلاشیلیمش ایسهده اشتباه اولتماغه محل قلامق ایچون بونلر حقیقه بر آزدها معلومات اعطاسی مناسب کورولمشدر.

۱ - مجتهد مستقل

(مجتهد مستقل) جمیع مسائل شرعیده اجتهاد مطلق اقتدارینه مالک اولقله برابر طریق اجتهادده کندینه مخصوص مستقل برمسلك صاحبی اولان الکیوک مجتهددر. فقه حنفی، فقه مالکی، فقه شافعی و فقه حنبلی مؤسسلری، ائمه امامیه کی نه فروعده، ناده اصولده هیچ بر مجتهد تابع اولمایوب هربری فروعده معین بر مذهب و اصولده مستقل بر مسلك صاحبی در.

۲ - مجتهد منتسب

(مجتهد منتسب) جمیع مسائل شرعیده اجتهاد مطلق اقتدارینی حائز اولدینی حالده طریق اجتهادده بر مجتهد مستقلک مسلکینه سالک اولان مجتهددر. شو تعریفدن آکلاشیلورکه (مجتهد منتسب) دنیان مجتهدده مجتهد مستقل کی امر

اجتهادده قدرت کامله به مالک ، عموم مسائل شرعیّه ده هیچ بر مجتهدی منقلد اولمایوب صرف کنندی رأی واجتهادیه عالمدر . بونقطه نظر دن مجتهد مستقل ایله آرا رنده فرق یوقدره؛ بوده اونک کبی مجتهد مطلق در . شوقدر که (مجتهد منتسب) طریق اجتهادده کندندن اولکلان بر مجتهد مستقلک اصول اجتهادینی دیگر مجتهد مستقلارک اصول اجتهادلرینه ترجیح ایده رک آنک سلاک و مسلکینه سلاک اولمشدر . ایشته بویکی نوع مجتهد آره سنده کی فرق آنجق بو نقطه نظر دن ؛ بو مقامده انتسابک معناسی ده بوندن عبارتدر . انتسابک بر درجه سی ، اجتهاد مطلقه منافی دکلدر ، زیرا بونوع صورت انتساب بر مجتهدی اجتهاد مطلق مرتبه عالی سندن تنزیل ایله مجتهد مقید اعدادینه ادخال ایتمش اولماز . بر مجتهد بعض مسائل شرعیّه ده بالذات اجتهاده مقتدر اولماز سه و دیگر بر مجتهدک اجتهاداتنه تابع اولور ایسه اول وقت مجتهد مطلقلقدن چیتمش اولور .

مجتهد منتسب ایسه هیچ بر مسئله شرعیّه ده اجتهاددن عاجز دکلدر . چونکه بوده مجتهد مستقل کبی کنندی تسبیع واستقراسیله دلائل شرعیّه یی سچمک و اونک کبی دلیله تصرف ایتک اقتدارینه مالکدر . بونک ایچوندر که (مجتهد منتسب) مسلک اجتهادده سلاک اولدینی مجتهد مستقله بعضاً موافقت ، بعضاً مخالفه ایلمشدر . موافقت ایتدیکی برلرده ده آنی تقلید ایتمش اولمسندن دکل اجتهادلرینک ده بر برینه توافق ایتسندن و نتیجه رأیلرک برلشمه سندن طولایی موافقت ایلمشدر . نته کیم اسانده فقههای شافعیه دن (شیخ قفال مغیر ابوبکر مروزی) [۱] ، (شیخ ابو اسحاق شیرازی) و (قاضی حسین) دینمکه معروف (شیخ ابو علی مروزی) ، (بز امام شافعی نک مقلدی دکلز ، رأیمز آنک رأینه توافق ایلمشدر) دیمشدر .

[۱] فقههای شافعیّه زماننده (قال) لقبیله ملقب ایکی ثبوت فقیه واردی که حسب التصادف ابکیسنگ کنیه سی «ابوبکر» دره برنجی سالف الذکر (قال مغیر مروزی) در که خراسانک «صرو» بلده سی اهلینسنددر . خراسان فقههای شافعیه سنک شیخی و واستاذی دره . دیگر ی ترکستانلی دره و «کرشاش» قصبه سی اهلینسنددر . قال جلنکبر دیمکدر «ابکیسی ده کچلکارنده چلینکیرلاک صنعتیله اشتغال ایتکار ی ایچون کندیلرینه

قاعده . — بر مجتهد منتسبک صاحب مذهب مخالفی موافقتدن زیاده اولورسه — فقهای شافیهجه اتخاذ اولتان اصوله کوره — او مجتهد منتسبک فرداتی یعنی کندیسه مخصوص اجتهادات و اختیاراتی ، مذهب شافیهده مابده . العمل وجه عد ایدیلوب مذهبدن خارج طوتیلور . بناءً علیه کتب مذهبیده آنردن بحث اولتماز . مثلا اصولدن (جمیع الجوامع) صاحبی (ابن السبلی) نك طبقات کبری ، سنده (درت محمدلر) نامیله ذکر اولتان (امام المفسرین ابن جریر طبری) ، (ابن خریمة نیشابوری) ، (ابن منذر نیشابوری) ، (ابن نصر مروزی) فی الاصل مذهب شافیه منتسبلرندن اولدقلری حالده اجتهادات واقعه لرنده امام شافیه به مخالفتلری ، موافقتلرندن چوق اولدینی ایچون بونلرک اصول و قواعد مذهبییه مخالف اجتهادات و تخریجاتی وجوه مذهبدن معدود اولدینی کی قواعد مذهبییه مخالفت و موافقتی معلوم اولمایان اختیارات و تخریجاتی دخی وجوه و اقوال مذهبییه دن معدود اولماز . آنک ایچون کتب شافیهده بونلرک اقوالندن بحث اولتماز [۲] بو اصول ، مذهب مالکیده دخی جاریدر .

(فقال) دینلمشدره ایکنجیسنه « فقال کبیر کرشاشی » دینلورکه فقهده ، حدیثده ، اصول و لغتده امامدره . اک زیاده شهرتی اصول فقهده دره . اصول کتابلرنده مطلق اولهرق (فقال) دینلنجه اشبو (کبیر کرشاشی) صهاد اولنور . فقال کرشاشی فقهای شافیه نك اک بیوکلرندن اولان وحقی بمضلرینه کوره امام شافیه نك تلمیذ ممتازی (امام سزلی) اوزرینه بیله تقدیم ایدیلان ائمه اصولدن مشهور (ابن سربج) ک تلامیذندندر . امام اهل سنت (ابو حسن الاشعری) نك یارانندندر . صالف الذکر (ابن جریر جرای) دنده حدیث اخذ و روایت ایلشدر .

(فقال صغیر مروزی) نك فقهده شهرتی دهها زیاده دره . آنک ایچون فقه شافیه کتابلرنده (فقال) لقی مطلق ذکر اولنورسه اشبو فقال صغیر صهاد اولنور .

[۲] بالاده اسملری کچن درت محمدک دردیده فی الاصل مذهب شافیه منتسبلرندن اولدقلری حالده بالآخره امام شافیه به اولان نسبتلرینی قطع ایده وک « مجتهد مستقل » طبقهسنه داخل اریلمشدره . دردیده فقه و حدیثده امامدره . (ابن جریر طبری) فضله اولهرق علم تفسیر و تاریخده دخی امامدره . و فقه (جریریه) مذهبنهک مؤسسی در . تفسیری ایله تاریخ کبیری الیوم مطبوع وک مقبردره . (ابن خزیمه) ده فقهده خزیمه

حقى دهلوى نك (الفاف) نامنده كى رساله سنده واقع بيانته كوره مذهب مالكي منتسبلرندن على الاطلاق (اجتهاد مطلق منتسب) رتبه سنى احراز ايدن مرهانكى بر مجتهدك فرداتى واختيارات مطلقه سى مذهب مالكي ده وجه عد اول نماز .
 ائمه حديثدن (كتاب لجز الاستيعاب) صاحبي (ابو عبد الله السمرانديلى) وكذلك
 ائمه حديثدن وعينى زمانده اصوليوندن (احكام القرآن) مؤلفى (قاضى ابن -
 العربى ابو بكر اندلسى) كى بو ايكي ذات فاضل ونادر الامثال فقهائى مالكيه دن
 معدد اولمقله برابر (مجتهد مطلق منتسب) طلبه سندن بولندقلرى ايجون ،
 بونلك وامثالنك فردات واقعه لرى مذهب مالكي ده وجوه مذهبيه دن عد
 اولنما مشدر . ليكن مذهب شافى ومالكي ده جارى اولان بو اصول ، مذهب
 حنفيه جارى دكلدره . ائمه حنفيه دن امام (ابى يوسف) وامام (محمد شيبانى)
 استادلرى امام اعظم ابو حنفيه حضرتلرينه مذهبك نثاننده دخى بعض اصول
 وقواعد فقهيه ده مخالفتده بولمش اولدقلرى حالده ينه اونلرك امام ابو حنفيه به
 مخالف اجتهادائى ، مذهب حنفيه وجوه واقوال مذهبيه دن عد اولمش
 وبناء عليه مذهب حنفيدن خارج طوتيلما مشدر . سببى بو ايكي امام همامك
 حد ذاتنده مذهب حنفيه حق تأسيسى حائز اولمالريدر . آنك ايجوندر كه
 محقق (دهلوى) نك و الفاف ، ده ديديكى كى (مذهب حنفى نفس الامرده
 اوج مذهبدن مركبدر . مذهب ابو حنفيه ، مذهب ابى يوسف ، مذهب محمد)
 اوچنك ده مذهب لرى امام محمدك كتابلرنده توحيد وتدوين اولنمشدر . بوسيله
 مشاراليه امام محمد حضرتلرينه (محرر مذهب حنفى) اطلاق اولنور .

ايشته بو حقيقتنه بناء امام ابو حنفيه (امام اول) ، امام ابو يوسفه
 (امام ثانى) ، امام محمد (امام ثالث) واوچنه بردن (ائمه ثلثه) ، اول ايله

مذهبك صاحبي دره . فقط بو ايكي مذهب پك آرز دوام ايدوب سوكره منقرض اولمشدر .
 (ابن منذرك) بتوى اقوال مجتهدينى جامع ايبى بيوك كتابى واردركه برينك اسمى
 (الاشراف) ديكرينك اسمى (المبسوط) دره ايكيسى ده فتنها عندنده موثوق و پك
 معتبردره .

ثانی به (شیخین)، ثانی ایله ثالثه (امامین) اول ایله ثالثه (طرفین) اطلاق اولنور و کتب حنیفه ده امام اعظمک سوزلری قدر ابو یوسف و محمدک سوز لرنندن ده بحث اولنور. حتی چوق کره بونلرک رأیلری استادلری ابو حنیفه نك رأینه ترجیح بیله اولنور. فضله اوله رق امام ابی یوسف اوزون مدت منصب قضاده بولنه رق تجر به لرله تکمل ایتمش اولدیغندن (احکام قضا) به یعنی (اصول محاکمه) به تعلق ایدن مسائله آنک رأی دیکر لرینک اقواله تقدیم و ترجیح اولنق بعض فقههای حنیفه جه اصول اتخاذ اولمشدر .

۳ - مجتهد فی المذهب

(مجتهد فی المذهب)، مذهب داخلنده اجتهاد ایدن؛ اجتهادات و تخریجاتده اکثریا مذهب خارجنه چیقمايان مخرج دیمکدر . (تخریج) و (مخرج) ک معنای قریباً ایضاح اولنه جقدر . بو طبقه نك رجالی اکثریتله صاحب مذهبه مخالفت ایتزلر اجتهادلری مذهبده احکامی مصرح اولمایان حادثات جدیده به حصر و تخصیص ایدرلر . حتی بو کبی مسائله اکثریا اجتهادی ترک ایله تخریج طریقته سلوک ایدرلر . بعضاً اجتهاد ایتدکری و صاحب مذهبه مخالفت ایلدکری واقع اولورسه ده بک آزره محدود مسائله منحصردر . ایشته بونلرده بوجه معروض مذهبک تقید جهتی غالب اولدیغندن بونلرک صاحب مذهبک اقواله صراحة مخالف و قواعد مذهبه سنه منافی اولمایان اجتهادات و تخریجاتی، مذهب شافعی و مالکیده دخی وجوه مذهبدن معدوددر . بوجهته بونلره (مجتهد فی المذهب) و (مخرج) و یاخود (اهل تخریج) دینلدیکی آبی (اصحاب وجوه) دخی دینلور .

۴ - مجتهد فی الفتوی

(مجتهد فی الفتوی) حنیفلرک (اصحاب ترجیح) دیندکری فقیهدرکه منسوب اولدیغی مذهبده بر مسئله حقیقه یکدیگرینه ضد اقوال مختلفه بولنورسه، دلیلارینه

وقواعد مذهبيه به نظراً آنلردن برينى ديكرينه بالترجيح آنكله قنوى ويرمكه اهلدر. بوكا (متبخر فى المذهب) دى اطلاق اولنور. بو طبقه رجالى طوغرىدن طوغرى به ادله شرعيه به مراجعتله استنباط احكام صورتيه قدرت اجتهاده وياقواعد مذهبيه دن تخرىج احكام ملكه سنه مالك دكلردر. آنك ايجون (مجهد فى المذهب) طبقه سنك دوننده درلر. مع هذا بونلرده منسوب اولدقلى مذهبده متبخر اولوب بالجملة احكام مذهبيه بي ادله بيله برلكده حفظ و اتقان ايتمش (اكتساب نيقن) ايلش اولدقلى جهته اونلر كى دليلده نظره و مذهبده مناظره به اهليت و كفايتى حازدرلر. بوكا بناءً مذهبده موجود اقوال مختلفه دن برينى ترجيحه و اونكله اعطاي قنوايه اهلدرلر.

بوراده دليلدن مقصد على الاطلاق دليل شرعى دكلدر. دليل حاصلدر. يعنى صاحب مذهب و ياديكر اعظم فقهاى مذهب طرفدن بالتبع استخراج واستحصال اولنان دليلدر. ايشته بونلر بو صورته مذهبده حاصل و موجود اولان دلائله نظره و مناظره به مقتدردرلر. چونكه مذهبده موجود بالعموم دلائلى حفظ و اتقان و صاحب مذهبك صور استدلالي ايقان ايتملدر. فقط بونكله برابر كندى باشلرينه استحصال و استخراج دلائله اهل دكلردر. چونكه فقهك روايت جهتنده راجلدرلر؛ طوغرىدن طوغرى به نصوص و ادله شرعيه بي تتبع و استقرا خصوصنده بك ناقصدرلر. آنك چوندركه بونلر، يالكز كندى اماملرينك دليللرينه واقفدرلر. ديكر اصحاب مذاهب و ائمه فقهك دليللرينه واقف دكلردر.

ايشته فقهاى شافعيه جه (طبقات فقها) شو ذكر ايديلان درت طبقه دن عبارتدر. آنلرك دوننده بولنان و متأخرين حنفيه عندنده (اصحاب تميز) و (مقلد محض) دينلان علماي فقه شافعيه كوره (فقها) دن معدود دكلدر. بو مقامده سويلنه جك بعض سوزلر و منافشه ايديله جك بعض جهتلر وارسده بك او قدر لزوم و اهميتى حاز اولمدينندن تطويل مقالدن احترازاً آنلرك ايرادنن صهر قنظر اولمشدر. يالكز بوراده بيلنمسي لازم اولان برجهت واردركه اوده

اجتهاد ایله تخریج آره سنده کی فرقدر . چونکه لسان فقهاده مستعجل اولان
 (تخریج) کلمه سی اجتهاد معناسنه اولمایوب باشقه مضاده مصطلح اولدیغندن
 بونک معنای اصطلاحیسی بیلمک واجتهاد ایلیانلری تفریق ایلمک لازمدیر . بوجهتله
 بز بورامه اولاً تخریجک ماهیت اصطلاحیه سنه سو کرده فقهانک بوکا نهدن
 لزوم کوردیکنندن بحث ایده جکیز .



«مدخل» دن

تخریج

صرف فقهاده (اجتهاد) کله سنک یاننده برده (تخریج) کله سی واردر .
 بونلرده باشقه باشقه معنارده مستعملدر . بوایکی کله اصطلاحده استخراج احکام
 معناسنده برله شور نرسده او احکامی نصوص شارعدن ویا اقوال فقهادن استخراج
 ایلمک معنارنده بربرلندن آریلورلر .

اجتهاد یوقاریده تعریف ایدلمشدی که نصوص شارعدن وادله سائر شرعیه دن
 استخراج احکام ایلمک دیمکدر . اجتهادک معنای حقیقیسی بودر ، عندالاطلاق
 ذهنه تبادر ایدن معناسوده بودر .

لغته علی الاطلاق جیقا رفق معناسنه اولان (تخریج) ایسه اصطلاح
 فقهاده اقوال فقهادن و تخصیص صاحب مذهبک نصوص و قواعد مذهبیه سندن
 استخراج احکام ایلمک دیمکدر . اجتهاد ایدنه (مجتهد) دینلهدیکی کبی، تخریج
 ایدنه ده (میلمک ضمی و رانک کسر و نش-دیده) «مخرج» دینور . شو
 تعریفاندن اکلاییلور که مجتهدک مطامح نظری نصوص شرعیه در . مخرجک
 مطامح نظری نصوص و قواعد مذهبیه در . مجتهد «بیم اکلادیفمه کوره فلان
 مسئلهده حکم شرعی بودر» دیر .

مجتهد ، شارعک نصوصنه و اونصوصک مبتنی اولدینی علل و اسباب شرعیه به
 واقف اولدیفندن شریعتده منصوص اولیان مسائل احکامی آنلردن استنباط
 ایدر . مخرج مذ-وب اولدینی صاحب مذهبک اقوال و قواعد فقهیینه مطلع
 بولندیقندن مذهبهده مصرح اولیان حادثات احکامی آنلردن استخراج ایلر .

قاعده تخریج

قاعده تخریجه کانهجه: اجتهاده اصول وقاعده نه ایسه تخریجهجده اودره. یعنی بر مجتهد نصوص شرعیهدن نه صورتله استنباط احکام ایدرسه بر مخرج نصوص وقواعد مذهبیهدن او صورتله استخراج احکام ایلهر آراده کی فرق نصوص شرعیه یرینه نصوص مذهبی پی یعنی صاحب مذهبک اقوال وقواعد فقهیه سنی اقامه ایلمکدن عبارتدر. شو حالده مخرج بر مسئله نک حکم مذهبی سنی استخراج وتیین خصوصنده طبعی بر مجتهد کبی حرکت ایدرک اولاً حکمی صاحب مذهبک اقوال صریحه سنده تخری ایدر. مصرح بولورسه اونکله فتوا سنی ویرر، بولامازسه بو صورتده تصریحات واقوال موجوده نک دلالت و اشاراته وقواعد مذهبی نک درجه شمول وعمومنه عطف دقت ایدر. حکم مطلوبی بونلردن چیقاراییلورسه فقها، چیقاره مدینی تقدیرده قیاس طریقه نه سلوک ایله مقیس علیک حکمی مقیس ده اتیان و اظهار ایدر. یعنی نظیری نظره و اشباهی اشباهه حمل والحاق ایلر.

بعضاً مذهبه ایکی قول، ایکی اصل و اساس بولنورکه بونلرله بر قیاس منطقی ترتیب ایدیله جک اولسه حکم مطلوبی انتاج ایدر. بو صورتده مخرج او وجه ایله حرکت ایدرک آگاه اولورکه مخرج مطلوب اولان حکمی صاحب مذهبک افعالندن استخراج ایدر.

خلاصه: مخرج صاحب مذهبک بالعموم اصول قواعدینی افکار و احتسابات فقهیه سنی و یا مأخذلرینی محیط اولوب کلی و جزئی؛ اصلی و فرعی بتون احکام مذهبی پی حفظ و اتقان و عادتاً هضم ایتمش و بو صورتله اشبو تخریج خصوصنده بیسوک بر رسوخ و ملکیه مالک بولنش اولدیفندن مذهبه غیر موجود بر مسئله نک - صاحب مذهبه کوره - حکمی کندیسندن سؤال او- لندقمه اصول وقاعده آنفیه توفیقاً حکم مسئولی بیان و بناء علیه صاحب


مذهبه كوره او مسئله نك حكمی ايشته بودر ، جوانی اتیان ایلر . بوندن باشقه صاحب مذهبك اقوالی میاسنده موجود اولوب وجوه و معانی مختلفه به احتمالی بولنان مجمل و مبهم قولی تفصیل ایله تعیین ، مطلق اولان بر قولدن حکم مفید ، بالعکس مفید اولان بر قولدن حکم مطلق متصور اولدینغی تبیین ایلر . احکام مذهبییه دلالتری حنفی اولان هر هانکی دلائلی ده توضیح ایله وجه دلالتری تهریر ایلر .

ایشته اصول و قاعده تخریج بوندن عبارتدر که بر مجتهدك امر اجتهاده تطبیق ایله یکی اصول و قاعده ده بو شکله در . اونك ایچون (تخریج) ایله (اجتهاد) آره سنده شکلاً مشابهت نامه واردر . و تخریجده بر نوع اجتهاددر . بوندن طولاییدر که فقهای شافعیین ایله (تهریر) صاحبی (ابن امیر حاج حلی) و (سلیم الثبوت) صاحبی (ابن عبدالشکور هندی) و (ولی الله دهلوی) کبی محققین حنفیه نك بیانلرینه نظراً (ابن کمال) دن اول کن فقهای حنفیه نك اصطلاحاتنده اهل تخریج (مجتهد فی المذهب) اطلاق اولنور . مشارالیه ابن کلاک (مجتهد فی المنا) ایله اصحاب تخریجی (مجتهد فی المذهب) طبقه سندن آیرمی علمی و تحقیقه مستند اولمقدن زیاده عندی بر شیشه بکزه یور . آندن سوکرا کانلرکده بلا تحقیق آنی تقلید ابتدکاری آ کلاشیلور . بو تحقیقدن شو نتیجه چیقیور که (اجتهاد) کلاسی لسان فقهاده ایکی معناده قوللانیلر . بری معنای اخص دیکری معنای اعمدر . معنای اخص اصولیون عنندنه مصطلح و معتبر اولان معنادر که نصوص شارعدن استنباط احکام ایلك دیمکدر . اجتهادك اصل معناسی ده بودر بو معناجه اجتهاد (اجتهاد فی الشرع) دیمکدر . معنای اعمی؛ کرك نصوص شارعدن اولسون و کرك اقوال فقهادن اولسون علی الاطلاق استخراج ایله احکام ایلك دیمکدر . بو معناجه اجتهاد (اجتهاد فی الشرع) ایله (اجتهاد فی المذهب) . یعنی تخریجده شاملدر .

بیانده حاجت یوقدر که معنای اخصه کوره اجتهاد ایله تخریج آره سنده ه نسب اربعة منطقیه دن (مبايئت) واردر . بنسابرین معنای اصلی اعتباریله

تخریجه اجتهاد دینه می‌جکی کبی مخرجه ده مجتهد دینه من . معنای اعنه کوره ایسه اجتهاد ایله تخریج آره‌سنده نسب مذ کوره دن «عموم و خصوص مطلق» واردور . اجتهاد اعمدر . تخریج اخص در . بنابرین معنای اعمی اعتباریله هر (تخریج) . اجتهاد اطلاق صحیح اوله جنی کبی (مخرج) . دخی مجتهد اطلاق صحیح اولور . چونکه تخریج اجتهادک، مخرجه ده مجتهدک معنای اعنده داخل بولوندیغندن بو اعتبارله (هر تخریج اجتهاددر) (هر مخرج مجتهددر) . قضیه لرنده کی حکم‌لر منطقیاً صحیح اولور . «هر قویون حیواندر» قضیه سی صحیح اولدینی کبی . اما بونلرک کلیت اوزره عکس‌لری صحیح اولماز . یعنی «هر اجتهاد تخریجدر» «و هر مجتهد مخرجدر» «سوزلری طوغرو اولماز» (هر حیوان قویوندر) «سوزینک طوغرو اولما دینی کبی» .

ایشته اجتهادی (بذل المجهود لیل المقصود) یعنی «حکم مقصوده وصول ایچون بذل مجهوددر» دییه تعریف ایدنلر اجتهادک بالاده بیان اولنان معنای اعمی قصد ایتشلردر . بعض کتب حنفیه ده محرر اولدینی اوزره (امام محمدک «مبسوط» نامنده کی کتابی حفظ و اتقان ایدن مجتهد اولور) دییه نلرده (مجتهد) لفظلر مخرج و مجتهد فی المذهب معناسی مراد ایتشلردر . الحاصل تخریج بوجه مشروح بر نوع اجتهاد دیمک اولقله برابر ماهیتته نظراً حقیقتده صاحب مذهبی تقلیددن باشقه بر شی دکادر . بو جهته مخرجلر مجتهد فی المذهب نفس الامرده منسوب اولدقلری مذهب صاحبینک مقلیدرلر .



اسباب تخریج

شرايضاحات ایله (تخریج) ك نه ديمك اولدینی و(اجتهاد) ایله فرقی تماماً آکلاشیلدی. فقط عجیباً بوکا نه لزوم واردی؟ اجتهاد طریق آجیق دورورکن وشریعت اسلامیه ده اصل اولان اجتهاد ایکن فقها نه دن دولایی آنی ترك ایله تخریج طریق التزام ایلمشدر؟ خصوصیه ایضاحات سالفه دن آکلاشیلدیغنه کوره تخریج، صاحب مذهبك اقوالی شارعك نصوص مقامنه اقامه ایلك دیمکدر که بک غریبدر. بو مادنا شریعت ایچنده شریعت دیمك دگمیدر؟ فقهای اسلاف کرامك سلوک ایتمکدری بو طریق نامواره سوق ایدن اسباب ندر؟ بونلرک سببی بر دکل متعدد. مسئلهك اهمیت فوق العاده سنه مبنی اسباب مذکورہ بی بروجہ آتی ایضاح وتفصیل ایتمک ایجاب ایدیور.

۱ - اولاً عجزدر. طوغریدن طوغری به نصوص شرعیه دن استنباط احکام سورتیه اجتهاده عدم اقتداردر. اسلاف کرام وفقهای عظام، جمیع مسائل شرعیه ده اجتهاده مقتدر اولدقلری ایچون آنلر بالجله احکام شرعیه بی کندی اجتهادلریله طوغریدن طوغری به نصوص شرعیه دن استنباط ایدرلردی. فقط سوکره کان فقها زمانك بمد و تأثیریه او وسعتده اجتهاد اقتدارینه مالک اوله مدقلرندن بونلرده، اجتهاده مقتدر اولمادقلری حادثات جدیده ده بالضرور تخریج طریقنه سلوک ایله مشلدر.

ثانیاً: اجتهادك قابل تجزی اولمادینی فکریدر. بو قاریده سویله مشدك که بعض فقها (اجتهاد) ك تجزی قبول ایتمه چکنه ذاهب اولمشلدر. ایشته بو ذهاب اوللری بالعموم مسائله اجتهادی ترك ایله طریق تخریجه سوق ایتمشدر.

یعنی بوفکره ذاهب اولانلر اجتهاده مقتدر اولدقلری مسائله دخی طریق
اجتهادی ترك ايله جميع مسائله تقلید و تخریج طریق التزام ایلملردر. حابوکه
بوفکرک طوغری اولمادینی بحت مخصوصنده ادله سیله بیان اولتمشدی .

نالماً : امام غزالی نك (احياء العلوم) نده واصلوی نك (حجة البائنه) سنده
بیان اولدینی وجهله منصب قضا و افتا کی مناصب علمیه ده فقها آره سنده
حاصل اولان رقابت و مزاحمدر .

اوائل اسلامده علمانك كافه سی زهد و تقوی ايله متصف آخرت آداملری
اولدقلرندن دنیا وارلغنه اصلا التفات ایتمزلردی . فاضلك کی بروظیفه رسمیه
قبول ایدرلرسه مجرد عبادت و بر فریضه دیانت اولدینی ایچون قبول ایدرلردی .
صوکرملری مدنیت اسلامیه ترقی ایدرک هر طرفه ثروت و معموریت تزايد
ایدنجه علمانك فقه ايله اشتغال ایدن قسمنده حسب البشریه حسب جاه و ریاست
ومیل احتشام حسلری اوپاندی و کیده رك احتراض درجه سنه واردی . امام
غزالی نك دیدیکی کی اسکیدن امرا بروظیفه رسمیه بی قبول ایتدیره بیلیمک و یا
مسائل شرعیه بی اوکر نك ایچون علمانك آیاغنه کیده ركن بالآخره علما امرانك
آرقه سندن قوشمغه باشلادیلر . مطلوب ایکن طالب اولدیلر . بونک نتیجه سی
اولق اوزرده آره لرنده شدید برحس حسد و بویوک بر رقابت پیدا اولدی .
آرتق بر برلرینی چکمن اولدیلر . بوسیله بری بر حادثه ده کندی اجتهادی ايله
بر حکم و یا فتوایی جرح و ابطاله قیام ایدر . ویریلان حکم و یا فتوی امام ابو
حنیفه و شافعی کی معروف بر مذهب صاحبی بیوک بر امامک قول صریمنه و یا
قاعده مقررده سنه استناد ایتدیرلمدکجه سوزک آرقه سی کی سلیمز، اعتراضات و اجوبه
متقابلاً تسلسل ایدر کیدردی . ایشته تشویش اذهاندن باشقه فائده سی اولمیان
و حقیقتی نخوردن زیاده افکاری تفلیط ایلیان بوکی مناقشاته محل بر اقامق ایچون
اکثر فقها سوزی کس دیروب آنمق مجبوریتنی حس ایتدکلرندن اجتهادی ترك
ایله تقلید و تخریج طریق التزام ایتدیلر .

رابعاً : حکامک جور و ظلمیدر . اوائله قضات و حکامک کافه سی مجتهد

ایدی. اهلیت اجتهادی حائز اولمایانلره منصب قضا تفویض اولنمزدی. نته کیم مذاهب اربعه به کوره ده قاضیلک ده اصل اولان مجتهد اولمقدر. بونکله برابر او و قتلر حکامک جمله سیده صلابت دینه و منانت اخلاقیه ایله متصف ایدی. دین اسلامک بالجله معالیاتی قلملرنده بر ایتمش و بتون فضائل اسلامیه روحلرینه ایشله مش ایدی. عفت استقامت و احقاق حق و اجرای عدلت اوزمانک قاضیلری ایچون بر امر طیبی و جبلی حکمنده ایدی. حق یولنده لروم لائمدن اصلا حذر ایتمز لردی. احقاق حق و ابطال باطل خصوصنده هیچ بر خاطر و کوکل طانیمازلره حقسنز و مجرم اولان طرف بابالری و اولادلری دخی اولسه علیه اعطای حکمه قطعاً تردد ایله مزملر ایدی. یکانه امللری رضای باری پی تحصیل ایدی. والله قورقوسی قلملرنده او قدر بر طومش ایدی که هیچ بر قوت آنلری اجرای عدالتدن منع ایده مزدی. بو جهته امر اجتهاد، اولنر ایچون بر نوع زاد و سعادت ایدی.

ایشته بو اسبابه مبنی خواص و عوام بتون افرادامت او حاکم لک ویردکاری حکمه پک بیوک حرمت و اعتماد ایدر لردی.

اک بیوک حکمدار لر بیله علیه لرینه صادر اولان بر حکمه مخالفت ایتمز لردی. نته کیم دولت عباسیه نکه اک عظمتلی و سطوتلی بر حکمدار عالی شانلی اولان خلیفه (هارون الرشید) بر دعوا ده کندیسنی حقی بیله لیک و دفع دعوی ضمنتده بیله دخی اقامه ایله لیک حالدیه بیله سی قاضی طرفندن قبول ایله یله یرک علیه اصدار اولنان حکمه مطاوعت ایتمشدی. ایتمشدی اما، قاضی قوجه امام (ابو یوسف) ایدی. فقط سوکره لری اخلاق اسلامیه بوزولمغه بوز طوبدی. اسکی صفوت و علوتی محافظه ایده مدی. ابتدالری اسرا و مأمورین حکومت اوزرنده تأثیرخی کوسترن بو فساد اخلاق، باواش یاواش صنف حکامده سرایت ایتدی. آرتق حکام و قضات وظیفه لرینک قدسیتینی اونوته رق منہاج عدل و حقدن امراض ایله طریق ظلم و اعتسافه صایدیلر. و بناً علیه اخلاقسنز، مرتکب بر حاکم ایچون سوء استعماله پک مساعد اولان امر اجتهادی کنندی منفعت خسیسه

واضراض ردینه لرینه آلت انخاذا ایتدیلر .

بو احوال قارشوسنده آرتق زمانه قاضیلرندن خلقك امنیتی منسلب اولدی
وبوسبیله مذاهب اربعه دن برینه مستند اولمیان حکملره اعتماد قالمادی . نهایت
حکومتلر حکامی منسوب اولدقلری مذهب فقهی به توفیقاً اعطای حکمه مأمور
وبوصورتله اجتهاد شخصیلرینی ترکه مجبور قیلدیلر .

خامساً : (الفاف) ده بیان اولندیفی اوزره اصحاب خیر طرفندن وقف
وتأسیس اولنان مدارس وسائر کبی مدارس علمیه وخیریه ده کی جهتلر مذاهب
اربعه دن برینه منسوب اولان ارباب علم وتحصیله تخصیص ایدلمک باشلاندیغندن
بو کیفیتده اکثریسی اصحاب احتیاجدن اولان علما و طلبه علمی مذاهب
مذکورده دن بریله تقییده مجبور قیلدیلر .

ایشته بواسباب وعواملك تأثیریه درکه طوغریدن طوغری به شریعتیه ایصال
ایدن ویکانه طریق علم ومعرفت اولان (شاهراه اجتهاد واستدلال)، متأخرین
فقهها طرفندن ترك ایدیلرک طولایبسیله شریعتیه ایصال ایدن وفقط بر چوق حقائق
شرعیه نك انکشاف تامنه حائل اولان طریق (تخریج وتقلید) التزام اولندی .
وبوصورتله (دور مجتهدین) ختام بولوب (دور مخرجین ومقلدین) حلول
ایتدی . آرتق مذاهب اربعه یه منسوب اکثر فقها ، اجتهاد ذاتیلرینی ترك ایله
منسوب اولدقلری مذهبه ممارسه وامر تخریجده ملکه اکتسابیه صرف مقدرت
ایتدیلر . اوللری بیوک مجتهدلره (فقیه) دنیلورکن بو (دور مخرجین) ده
تخریج خصوصنده ابراز مهارت ایدنلره ده (فقیه) دنیلدی . حتی (فقیه ابو
جعفر هند وانی) ، (فقیه ابوالایث سمرقندی) و (فقیه ابو عبدالله جرجانی)
کبی بعض بیوک مخرجلره بو (فقیه) وصف جلیلی عادتاً لقب اولدی .

شورایه ده عرض ایدهیم که (تخریج) یا لکنز (مجتهد فی المذهب) طبقه سنده
بولنان فقها به مخصوص بر کیفیت دکدر . فقه های حنفیه دن اسملری یوقاریده
کچن (حصاف) [۱] ، (طحاوی) (ابوالحسن الکرنخی) و فقه های شافعیه دن

[۱] حصاف باپوشی دیکدر . مشارایه حصاف بوسنعتده ماهر وآنکه کچنور

(امام الحرمین ابوالمالی) ، بونک تلیڈ ممتازی مشہور (امام غزالی) کی
 (اجتہاد مطلق منتسب) اقتدارینی حائز اولان بر قسم فحول فقہا دخی بعض
 مسائلده تخریج طریقہ سلوک ایتشلردر . [۲]

اولدینی ایچون کندیسنه جصاف دینلمشدر . دہات فقہاندنر اصول وفروعده استاددر .
 شمس الانمۃ الحلوانی مشارالیہ جقندہ (جصاف بیوک ذاتدر علوم شرعیہ کندیسنه اقتدار
 صحیحدر) دیمشدر . تاریخ وفاتی (۲۶۱) ہجریہدر .

[۲] سالف الذکر (طحاوی) مصرلیدر . امام شافعیہنک تلیڈ مشہوری امام (حنفی) نک
 ہمیشہ زادہ سیدر . ابتداء فقہ شافعی بی مشارالیہ دایسندن اخذ ایتمش ، سوکرہ فقہ
 حنفی بی ترجیح ایدرک حنفی اولمشدر - طحاوی فقہدہ اولدینی کی حدیثدہ امامدر .
 کرک فقہدہ کرک حدیثدہ تألیفات معتبرہ سی وارددر . فقہ وحدیثہ دائرہ تألیف ایلش
 اولدینی (شرح معانی الآثار) ی بویلمدہ تألیف ایدبلان آثارک الکرزیدہ لرننددر . تاریخ
 وفاتی (۳۲۱) ہجریہدر .

(کرخی) کرک اصولدہ کرکہ فروعده پک مشہور برذات جلیل القدردر . فقہ
 حنفیہ پک بیوک خدمتی سیق ایتمشدر . ہراییک علمدہ امامدر . ابن اثیر (تاریخ کامل)
 نام اثرندہ (کرخی اعتقاددہ متزلۃ المذہبدر) دیور . فقط ابن اثیرک بو - وزی محتاج
 تدقیقدر . کرخی (۳۴۰) ہجریہ وفات ایتمشدر .

امام الحرمین ابی امام غزالی اوروپالیلرجه پک معروف اولاراغاطم علمای اسلامبہ دندرلر .
 ہراییکسنک شہرتی واققدارلری دنیایی ، آفاق طرتمشدر . ایکسنکدہ علوم مختلفہدہ پک
 فیاض اثرلری وارددر . امام الحرمین (۴۷۸) ہجریہ وامام غزالیہ (۵۰۵) ہجری تاریخندہ
 ارتحال داربقا ایتشلردر .



لاحقه

طبقات مسائل

فتهای حنفیه ، فقهای بروجه مشروح طبقات مختلفه به تقسیم ابتدکاری
کبی فقه حنفی بی تشکیل ایدن مسائل فرعیہ بی دخی (ظاهر مذهب) ، (نوادری) ،
(واقعات) ماملریله اوج طبقه به تقسیم ایشلردرکه بروجه آتی ایضاحی فائده دن
حالی کورولمامشدر .

۱ - ظاهر مذهب

(ظاهر مذهب) دییه ائمه حنفیه دن امام محمد حضرتلرینک (المبسوط)
(الجامع الصغیر) ، (الجامع الکبیر) ، (الزیادات) ، (السیر الصغیر) ، (السیر الکبیر)
ناملریله معروف آتی کتابنده مندرج بولنان مسائله دینور. اشبو ظاهر مذهب (ظاهر
روایات) و (مسائل اصولیون) دخی اطلاق اولتور. یوقاری ده بالمناسبه سویلشدک
امام محمد حضرتلرتلری بو اثرلرنده یالکنز کندی اقوال فقهیه سنی دکل ایکی
استاد محترمی اولان امام اعظم ابوحنفیه و امام ابی یوسف حضرتانک افکار
فقهیه لرینی دخی، ذکر و تحریر ایشدر. ایشته بو اوج امامک بو آتی کتابنده
محرر اقوال فقهیه لرینه ظاهر مذهب دنیلمشدر .

امام ابو حنفیه نک خواص شاگردانندن امام (زفر) و امام (حسن بن
زیاد) ک افکار فقهیه لری دخی مذهب حنفی به ملحق ایسه ده (ظاهر مذهب)
(وظاهر روایت) تعبیرلرینک مدلوللرنده غالب وشائع اولان مشارالیه ائمه

ثالثاً نك اقوال مذكوره لریدر ذكر اولنان آتی كتابدر مسطور مسائله (ظاهر مذهب) و (ظاهر روایت) تسمیه سنك وجهه كلنجه :

بونك وجه تسمیه سی بو كتابلك معتمد و وثوق الكام بر جماعت فاضله نك روایات موثوقه سیله مؤلف عالیقدری امام محمد حضرت لرندن تواتر درجه سنده منقول اولسی در . بونلره (مسائل اصول) دینمه سنك سببی ده بو آتی كتابك مذهب حنفی نك تملاری ، اصللری بولمسی در . ایشته فقه حنفی ده عمده واصل اولان امهات كتب بو آتی كتاب مستطابدر . فقه حنفی بونلردن اخذ و روایات اولمش و بونلر اوزرینه بنا قیلنمشدر .

سادات حنفیه دن و اصحاب و جوه دن (حاکم شهید مروزی) نك [*] (کافی) نامنده کی اثر کزینی دخی فقه حنفیه اصلدر و بین الفقها نقل مذهب خصو- صنده عمده در . چونکه مشارالیه بو اثرنده امام محمدك سالف الذکر آتی کتابنده مندرج مسائلك کافه سنی جمع و تحریر ایلمش و ایچنه نه کندیسنك نه ده باشقه سنك رأی و فکرینی قاریشدر مامشدر . آنک ایچون (کافی) امام محمدك کتابلری مقامنه قائم اولمش و بناء علیه محتوی اولدینی مسائل فقهیه ، مذهب حنفی ده مسائل اصولدن معدود بولنمشدر . مشارالیه حاکم شهیدك (منتقی) نامنده دیکر بر اثری دها واردر که بوده فقه حنفی ده اصل و عمده در . شو قدر وارکه (منتقی) ظاهر مذهب مسائلی محتوی اولقله برابر بعض (نوادر) مسائلی دخی حاویدر . بو جهته رتبه (کافی) نك دوننده طوتیلنمشدر . امام محمد حضرتلری الك اول (مبسوط) ی تألیف ایلمش اولدیفندن (مبسوط) ه اصل دخی طلاق اولنور .

[*] مشارالیه حاکم شهید مروزی خراسانی در . بخاراده قاضی ایکن خراسان امیری طرفندن وزیر اعظم نصب و تعیین ایدلشدر . هم فقیه هم محدث بیوک بر ذاتدره (کتاب الاناب) صاحبی (سه مانه) مشارالیهك حافظه سنده (آلتمش بیك حدیث) محفوظ بولندیفی سوبله بور . (۳۴۴ - هجری) تاریخنده عصیان ایدن عساکر طرفندن نمازینی قیلنمده ایکن شهید ایدلشدر . سببی ده تاریخ عثمانی ده امثالنه بك جوق تصادف اولنال (علوقه) مسئله سیدر .

مبسوطك نسخهلری بعض فرقلله متعددور . اك مشهور و مشهوری (ابو
سایمان جوزجانی) نك استادی مشارالیه امام محمدن استنساخ و روایت ایندیکی
نسخه در .

مبسوط یوقاریده اسملری کچن (شیخ الاسلام خواهر زاده) ، (شمس-
الائمة الحلوانی) ، (شیخ الاسلام سیدجانی) ، (فخر الاسلام بزدوی) و برادری
(صدر الاسلام بزدوی) کبی بر چوق اسانده حقیقه طرفندن شرح ایدلمشدر .
بو شرحلرک جمله سی سالف العرض (مبسوط) ک عبارتیه سیله مختلط اولدیغندن
بونلر شارحلرک نامرینه اضافتله (مبسوط خواهر زاده) ، (مبسوط حلوانی) ،
(مبسوط - بیجانی) ، (مبسوط بزدوی) دبه ذکر و تمیز اولتورلر .

برده بد رط سرخی واردرکه ائمه اضولدن مشهور (شمس الائمة سر-
خی) نك اثر بر کزیده سیدر . و صوك زمانده مصر القاهرده طبع ایدلمشدر .
فقط بوسالف الذکر (مبسوط) ک شرحی دکدره ، آنفاً ذکر اولمان (کافی) نك
شرحی در . بو جهتله (مبسوط سرخس) بی مذکور شرحلر میانسه اذخال
ایتمه ملی در .

مذاهب سازه فقهای طرفندنه (مبسوط) نامیله کتابلر تألیف اولنمشدر .
مشایخ شافعیه دن (ابو عاصم عبادی) نك و فقهای مالکیه دن تونسلی (ابن
غرفه) نك مبسوطلری بو جمله دندر .

یوقاریده مجتهد مستقلر میاننده ذکر سی سابق ایدن (ابن منذرینشاپوری) ده
بتون بیوک مجتهدلرک اقوال فقهیه سی جامع اولمق اوزره (مبسوط) نامیله فیاض
بر اثر جلیل تألیف ایلمشدر که کندیسندن صوکره کلان علی العموم فقهانک
مأخذ و مرجعی ایلمشدر .

ابن همام (فتح القدر) ، فقه حنفی به دأثر بعض مسائلی منذرک ذکر
اولمان (مبسوطندن) نقل ایدر . و فقهای حنفیه دن زیاده مشارالیه ابن منذره
اعتمادی اولدیغنی صراحة ذکر ایلر .

الحاصل مذهب حنفی ده اصل اولان اشبو (ظاهر مذهب) مسائلی

اولدیغندن مسائل مذکورده نك حکمی ، اول امرده اونلرله عمل واقفناً اولمق
 واونلرله مخالف بولنان اقوال وروایات سائرجه التفات اولنماقده در .
 مع هذا مشایخ حنفیه طرفندن عرف وتمامک وصالح عامه نك ایجاباتندن
 اولمق اوزره امام زوقر ، امام حسن بن زیاد کبی دیگر ائمه حنفیه نك اشبو
 مذهبه مخالف اولان اقوال وروایاتیه دخی فتوی ویرلدیکی وارد در .



۲ - نوادر

(نوادر) دبیہ ذکر اولئان اصول وامہات فتمیہ نك - سالف الذکر لئی کتابك غیر بسندہ ینہ ائمہ ثلاثہ حنفیہ دن یعنی امام ابوحنیفہ، امام ابی یوسف، امام محمدن مروی اولان مسائلہ دینور . بو مسائلہ امام محمدك (کیانیات) (ہازونیات) ، (جرجانیات) ، (رقیات) کبی دیگر کتابلرنده ، یاخود امام حسن بن زیادك (مجرد) اسمیلہ موسوم کتابندہ ویاخود امام ابی یوسفك (امالی) -ندہ مذکور بولان مسائلنددر .

بو کتابلرك مندرجاتہ (نوادر) و(غیر ظاہر الروایہ) دنیللمہ سنك سببی بونلرك امام محمدك سالف الذکر آتی کتابی کبی روایات ظاہرہ و قطعیه ایلہ منقول وثابت اولمسیدر .

اولکیلر تواتراً منقولدر ، بریکیلرك نقل وروایتلری ایسہ حد تواتر وشہرتہ بالغ اولمامشدر .

(امالی) املائك جمعی در . بورادہ (نوطلر) دیکدرکہ اثنای تدریسده امام ابی یوسفك تقریر آتی محتوی اولمق اوزرہ طلبہسی طرفندن طوتیلان نوطلردن عبارتدر . اصول تدریسده اسلافك عادتی بو ایدی .

عصام ، حسام ، هشام ، ابن رستم ، ابن سماعہ ، داود بن رشید ، مسلمی بن منصور کبی امامك یعنی امام ابی یوسف ایلہ امام محمدك طلبہسی طرفندن وقوعبولان روایات منفردہ ومتفرقه دخی غیر ظاہر الروایہ مسائلندن وروایات نادرہ دندر . آنك ایچون بونلرك روایاتہ وظاہر مذهبہ مخالف تقریرات وتحریراتہ (نوادر) اطلاق اولنور . وبنسأ علیہ (نوادر عصام) ، (نوادر هشام) ، (نوادر رستم) الخ دنیلور .

بونلرك ظاہر مذهبہ مخالف اولان نوادریلہ عمل واقفا اولنماز . مکرکہ احتیاج عصرہ ویا صرف وعادت مملکتہ بناءً مشایخ حنفیہ طرفندن بعضیلری ظاہر مذهب مسائلنہ ترجیح ایدلمش اولہ .

۳ - واقعات

(واقعات) دیبہ دہ، حکم لری فی الاصل مذہبہ۔ مصرح اولمایوب بلا آخرہ فقہای حنفیہ طرفندن اجتہاد ویا تخریج طریقہ استخراج واقعات اولان مسالہ دینور . واقعات (فتاوی) و (نوازل) دخی اطلاق اولنور .

بو قسم مسائلک بعضیلری عموم مشایخ حنفیہ عندندہ مقبول و متفق علیہ در ، بعضیلری ده مختلف فیہ در . اصولاً متقی و متفق علیہ اولانلریله فتوی ویر و ویرمکه مجبوردر . مختلف فیہ اولانلری ایسه تدقیق و نظائرله مقایسه ایدر .

هانکیسنی اصوله وقواعد مذہبیہ ویا احتیاج ناسه دهاموافق بولورایسه آنکله افتا ایدر . اشبو (واقعات) ی جامع اولمق اوزره الک اول تألیف ایدیلان کتاب ، فقیه ابواللیث سمرقندی نک (نوازل) نامیله معروف اولان کتایدر .

مشارالیه بو کتایبندہ (فقیه ابو جعفر هندوانی) ، (ابوالقاسم صفار بلخی) ، (محمد بن سلام ابونصی باخی) ، (محمد بن سلمه ابو عبدالله بلخی) ، (نصیر بن یحیی بلخی) ، (محمد بن میقاتل رازی) کبی کندی مشایخی و مشایخک مشایخی طرفندن اجتہاد ویا تخریجاً ویریلان فتوالرله کندی احتیارات و فتاوا سنی جمع و تحریر ایلشدر . مشارالیه دن سوکره بعض فقہای حنفیہ دخی مسائل واقعاتی جامع اثرلر وجوده کتیرمشلدر که (ابو العباس ناظمی) نک (مجموع النوازل) بو جمله دندر .

بونلردن سوکره بعض متأخرین بو اوچ نوع مسائلی یعنی (ظاهر مذہب) ، (نوادر) ، (واقعات) ی اثرلرندہ جمع ایتشاردر . بونلرک بعضلری مسائل مذکورہ بی بربرینه قاریشدیرمش ، هانکیلرینک ظاهر مذہب و هانکیلرینک نوادر ویا واقعات مسائلی اولدینی بیان ایلهمه مشدر . (فتاوی قاضی جان) و (خلاصه

الفتاویٰ) ده اولدیمی کبی. بمضلریده بو اوچ نوع مسائلی تفریق ایدرک آیری آیری تثبیت و تخریر ایلشردر. مشارالیه صدر شهیدک طلبه سندن (رضی الدین سرخسی) نك (محیط) نامنده کی کتابنده اولدینی کبی. ینه او عصرده فقه حنفی به دار (محیط) نامیله ایکی بیوک کتاب تألیف ایلشدرکه ایکسینک مؤلفلری مشارالیه صدر شهیدک تلیذلریدر. بری ذکر اولان (رضی الدین سرخسی) نك محیطی دیگرى صدر شهیدک هم تلیذی همده یکنی اولان (برهان الدین صغیر محمود بجاری) نك (محیطی) در. بو ایکی محیطی بر بردن تفریق و تمیز ایچون اولکینسه (محیط سرخسی) ویا (محیط رضوی)، ایکنجینسه (محیط برهانی) دینور. مشارالیه برهان الدینک (دخیره برهانیه) نامیله مشهور دیگر برتری واردرکه پک معتبردر و (محیط برهانی) نك مختصریدر.

افادات سالفه دن مستبان اولشدرکه کتب حنفیه ده منظور مسائلک جمله سی صاحب مذهب امام ابو حنیفه حضرت لرینک رأی و اجتهادی دکلدر. بر قسمی آنک اجتهاداتی بر قسمی ده امام ابی یوسف ایله امام محمدک اجتهاداتی، دیگر بر قسمی ده امام زفر و امام حسن بن زیاد کبی دیگر ائمه نك اجتهاداتیدر؛ در دنجی بر قسمی ده سوکره دن کلان فقهای حنفیه نك اجتهادات و تخریجاتیدر.

بوجهتله مذهب حنفی به سالك اولان ذاتک خصوصاً مفتی نك بودرت نوع مسائل فقهبانی تفریق و تمیز ایتسی لازمدر. تا که کیمک قولیله عامل اولدیغی و یا فتوی ویردیکنی لایقوله بیلمش اولسون. عکسی تقدیرده کیمه اتباع و کیمک قولیله عمل ایتدیکنی بیلمه مش اولورکه جهالت ایچنده جهالتدر. زیرا اساساً تقلید بر نوع جهالتدر. کیمی تقاید ایتدیکنی بیلمه مک ده باشقه بر جهالتدر.

تقلید

تقلیدك تعریفی - اصول دینده تقلید جائز دکدر - فروع دینده تقلید جائز میدر ،
 دکبلمیدر ؟ - اذنا و قضا - همین بر مذهبی التزام واجبیدر ؟ مذهب ابدی حدیث
 تعارضه ایترا کرده هانکدهی ترجمه ارار نور ؟ - بر مذهبه دیکر بنده انتقال - تلفیق
 مذهب - مذهب اربعه و غیره مذهب ابدی عمل جائز دکبلمیدر ؟

بمحت سابقه فتهاك و كتب حقیقه ده موجود مسائل فقهیه نك درجات
 و طبقانندن بمحت اولونمش ایدی . بوراده ده (تقلید) دن و آ کا متفرع اولوب
 بالاده اشارت اولنان مسائل مهمه دن بمحت ایده جکزر . زمانمزده بو بمحتك محتویاتی
 بینمدیکی ایچون مملکت مزده حقسنز و پك معاسنر بر تعصب مذهبی حسی حکمران
 اولمش و صرف جهل دن تولد ایدن بو حس ، بو گونه کلهجه به قدر دولتجه مذهب
 مختلفه فقهیه دن اقتباس احکام ایله احتیاج عصره موافق بر قانون مدنی تنظیمنه
 مانع بولونمشدر . بونك ایچوندر که زمانمزده بو بمحتك محتوی اولدینی مسائلك
 بیلنسنه پك شدید احتیاج واردر . بو حقایق فقهیه حقیله بیلنه جك اولور ایسه
 او حقسنر تعصبك نه قدر واهی اولدینی تبیین ایدر .

- ۱ -

تقلیدك تعریفی

(تقلید) ، بو کله کردانلق معناسنه اولان (قلاده) دن مأخوذدر . لغتده
 بر کیمسه به کردانلق طابق دیمکدر . « تقلید سیف » و « تقلید قضا » تعبیروزی

بو معادن آلمشدر . اصوليون اصطلاحنده (تقليد) ، « دلياني بيلمكسزین باشقه سنك رأييله عامل اولمق » ديمكدر كه اجتهادك ضد تاميدر بر مجتهدك رأييله عامل اولان ذات ، عملندن تولد ايده جك مسئوليت اخروي يه يي اوجتهدك بويته كچيرمش، ديمك اوله جفتدن آنك بو عملانه (تقليد) و كنديسنه ده (مقلد) اطلاق اولونمشدر .

(رأى) قول ايله ده ، فعل ايله ده تظاير ايده جكندن بر كيمسه نك اقواليله عامل اولانه « مقلد » ديديلديكي كچي ، افعالنه توفيق حركت ايده ده « مقلد » ديسير . تعريفده كي (دلياني بيلمكسزین) قيدي ، قيد احترامزيدر ، دليبي بيلين رأي ايله عملي تعريفدن چيقارمق ايچون كئيرلمشدر . چونكه بر كيمسه ، ديكرينك دلياني بيله رك رأييله عامل اولور ايسه ، او كيمسه نك بو عملنه اصوليون اصطلاحنده تقليد اطلاق اولونماز .

واقعا بوده بر نوع تقليددر ، بر كيمسه تقليد جيلكدن تماماً قورتلمش اولمق ايچون سوزيني قبول ايتديكي ورأييله عامل اولديني ذاتك يالكز دلياني بيلمك كافي دكلدر . او دايلى اطرافيله تدقيق ايتمك ، اودايلى جرح ايده جك باشقه بر دليل معارض بولونوب بولونمايديني ، بولونديني صورتده آندن دها قوتلي اولوب اولمايديني تحقيق ايله مك لازمدر . بوايسه اوابايده وارد و موجود اولان دلائلك كافه نفي تدبوع و مقايسه ايله حاصل اولور . بحث سابقده كي تفصيلاتدن آ كلاشيلديني اوزره كنديلرينه (فقيه) اطلاق اولنان و حتى مذهبده متبجر عد ايديلن نيجه عالمم واردر كه صاحب مذهبك دلائلي تفصيلاً تقريره مقتدر اولدقلى حالده ، ينه آنلره مجتهد ديميوب مقلد اطلاق اولونور . حقيقتده مقلددرلر . چونكه بوكيلر ، ديكر ائمه فقهك دلائلي كئدي اماملرينك دلائيله مقايسه و محاكمه ايمه مشلدر . اكثرينك سائر اصحاب مذاهيك دلائلندن خبرلري بيله يوقدر .

خلاصه ، مراهانكي بر مسئله ده تقليدندن تماماً قورتوله بيلمك ايچون ، او مسئله حقيقتده موجود بوتون دلائلي تدقيق و مقايسه ايدوب نتيجه ده حاصل اولان

قاعته کوره حرکت ایتک ایجاب ایدرکه اجتهاددر. بویله یا بلد قجه دائرة تقلیددن خارج چیقلمش اولماز. بناءً علیه ماهیت حقیقیه سی اعتباریله (تقلید) ایکی نوعدر. بری حکمده تقلیددر، دیگرى دلیله تقلیددر. حکمده تقلید بلا دلیل باشقه سنک رأی و فکرینی قبول ایتمکدر. دلیله تقلید، بلاندیق باشقه سنک دلیلینی قبول ایتمکدر.

لکن بو جهت بویله اولمقله اصولیون، دلیله تقایده (تقلید) نامی ویرمیورلر. (او، دلیله اتباعدر. حکمی رأی مجرددن دکل، دلیلدن اخذ ایتمکدر، تقلید محض دکلدر. آرتق اوکا تقاید دینمز.) دیورلر. و بوسورتله دلیله اتباعی، تقلید ایله اجتهاد آراسنده بر مرتبه و برحد اوسط عدایدیورلر. چونکه اصولیونک مقصدلری، جوازی مختلف فیہ اولان تقایدی بیان و تعریفدر. یوقسه علی الاطلاق « تقلید » ک ماهیت حقیقیه سی تعریف و ایضاح دکلدر. بو جهتله بو بحثده هر زده (تقلید) کله سی مطلق اوله رقی ذکر ایدیلیرسه، اوندن (بلا دلیل باشقه سنک رأیله عامل اولمق) معناسنه اولان تقلید محض مقصود اولدینی در خاطر ابدلیدر. زیرا دلیله تقلیدک جوازند اختلاف یوقدر. اختلاف آنجق تقلید محضک جوازنددر. ابن قییمک (اعلام الموقعین) نده تفصیلاً بیانه و دیگر محققین علمادن نقله کوره علما، دلیله تقلید (اتباع) تسمیه ایدیورلر. « اتباع »، « اجتهاد نامی ویرنلر بیله وارد. مسائل آتیده التباسه محل قلامق ایچون بو نقطه یه دقت ایتک و بونی خاطر دن چیقارماق لازمدر.

- ۲ -

اصول دینده تقلید جائز دکلدر

بیانه حاجت یوقدرکه احکام دینیه ایله مکلف اولان انسانلر، اول امرده او احکامی بیلملیدرلرکه شارعک امر و نهی دازه سنده وظیفه دینیه لرینی حسن افا ایده بیلسینلر. احکام دینیه یی بیلمک ایسه، او احکامی بیلمدیرن نصوص

دینیه و ادله مخصوصه بی بیلمکه حاصل اولور. تقلیده کلهجه: بواساساً اسباب علمدن و طرق معرفتدن دکلدر. هر شیک کندینه مخصوص بر طریق معرفتی واردور. احکام عقلیه و فیه ده طریق معرفت ادله عقلیه، فیه و تجربیه اولدینی کبی، احکام نقلیه و شرعیه ده طریق معرفتده ادله نقلیه و شرعیه در.

مجتهدلر، بویوک عالملر واضع شریعت اولمدقلری ایچون آنلرک اقوالی، نصوص دینیه و حجت شرعیه دکلدر. نه قدر بویوک عالم اولور ایسه اولسون بر مجتهد و بر مفتی، احکام دینیه بی کندی آ کلابشه کوره بیان ایدن ذات دیکلدر. بیانات واقعه بنده استناد ایتدیکی دلائل بیانمدکجه، بعض اعراض فاسده بی مبنی قصداً یالان سویله مسی احتمال داخلنده اولدینی کبی، نه قدر متقی و حسن نیت صاحبی اولور ایسه اولسون، معصوم و خطادن مصون اولدینی جهته خطا ایتسی ده بک محتملدر. آنک قول مجردیله عامل اولان مقلد ایسه، بو جهتلری فرق و تمیز ایدمه چکندن آلدانمش و احکام دینیه اقتضاسندن ظنیله حدذاتنده شرعاً جائز اولمایان افعالی ارتکاب ایتمش اوله بیلیر. نته کیم بو حال مع التأسف اوتهدنبری واقع اوله کلشدر.

از جمله تریه لرده، قبرلرده اولولردن استغاثه و امثالی افعال بو قیلدندر. افعال مذکوره توحید اساسنه و بناء علیه اسلامیتک روحنه منافی اولدیفندن بالجهله بویوک مجتهدلرک اتقاقیله و برچوق نصوص قاطمه دینیه ابله صورت قطییه ده ممنوع و حتی کفر درجه سنده (شرك) دن معدود اولدینی حالده، ینه زمانم زده بک چوق ساده دلان امت طرفندن حسب الجهاله ارتکاب ایدلرکدر. در که یگانه سببی، جهلدن باشقه برشی اولمایان تقلیددر. [۱]

[۱] وقتیه شریعتی مقاصد خفیه و منافع شخصیله یینه آت انخاذایدن ارباب مفیدت طرفندن بر چوق یالان حدیث اولدیرلرلر صروده، برده ایشلریکزد. متحیر و عاجز قالدیفکزد زمان اصحاب قبوردن استغاثه ایدیکزد. « مفهومنده (اذا تحیرتم فی الامور فاستعینوا من اصحاب القبور) حدیث اولدیرلرلر. خلقک جهلندن استفاده مقصدیله اولدیرلرلر اولدیفنده اصلا شک و شبهه بولونمایان بو حدیث، ابن تمییه نک (الفرقان) نده و ابن قیمک (اغاثة اللفهان) نده و محقق بر کوی نک (زیارة القبور) رساله سننده بیان

بوتك ايجوندرکه دين اسلامده عام و عرفان بك زياده ممدوح ، جهل و تقليدده او نسبتده مذموم و مقدوحدر . (هل يستوى الذين يعلمون والذين لا يعلمون) و (انما يخشى الله من عباده العلماء) و (فيشر عبادى الذين يستمعون القول فيتعنون احسنه) كې بر جون آيات قرآنيه ، عام و تحقيقي و اصحاب علم و عرفاني مدح و تحسين ابيديور . (واعرض عن الجاهلين) و (انا وجدنا آباءنا على امة وانا على آثارهم مقتدون) و (قالوا وجدنا آباءنا لها حابدين قال لقد كنتم اتم و آباؤكم فى ضلال مبين) و (قالوا ربنا انا اطعنا سادتنا و كبراءنا فاضلونا السبيلا) كې ديكر بر جوق آيات جليلهده اصحاب جهل و تقليدى ذم و تقييح ايله يور .

فضله اوله رق (فل هاتوا برهانكم ان كنتم صادقين) ، (فاعتبروا يا اولى الابصار) ، (اتبعوا ما انزل اليكم من ربكم ولا تتبعوا منى دونه اولياء) ، (ولا تقف ما ليس لك به علم) كې متعدد آيات منيفه و (طلب العلم فريضة على كل

اولوندينى اوزره اهل حديثك انفاقيله بالاندر ، حضرت پيغمتره افتراى محضدر . دين اسلام كې احكام جليلهسى صرف حقايق اشيا اوزرينه مؤسس اولان بردين عالى ، بو كې خرافات و باطليلدن بك و بك جوق متعاليدر . اسلاميت ، شرك و يا شائبة شرك بولونان و بالنتيجه شركه . و دى اولان بو و بوكى احوال و فعالى كو كندن قوپاروب آتمق ، انسانلى بو مثلى ضلالت اعتقاديله ردى قورتارمق ايجون نازل اولمشدره . بوتك ايجوندرکه ايجوندره كيملر بولونورايسه بولونسون ولو كه اينداى عظام حضراتى بولونسون ، على العموم قبرلردن استعانه ، اولولردن استغاثه كيفتنى دين اسلامده شدتله منع اولونمشدره . حضرت رسالتپناه ائندمرك اك بو بوك دعا لردن برى ده « يارب . بنم قبرى طابيلير بوت بايعه ، مفهومنده اولان (اللهم لا تجعل قبرى وثناً يعبد) دعاسى ايندى .

تأليف اولونورکه علامه لىكى نفسندن باشقه هيج بر كيمسه به ويرمك ايستمين ابن كمال مرحوم بو بك باهر و بك قطبى حقيقت اسلاميه دن غفلت ايدهرك ، يوقاريدنه ذكر اولونان حديث كاذبى حديث صحيح ظنيله فرق بر حديثى جامع اولاق اوزره تأليف ايتمش اولديقى بررسه له سنه درج ايتمش و مضمون باطلنى بنه آنك كې باطلنى بنه آنك كې باطل بر طاقم ماصاليله تأييد و ترويججه قيام ايله مشدر . « سندی باطل اولور باطل اولان دعوانك » . ايشته بوده صرف اثر تقليددر .

مسلم) کبی بک چوق احادیث شریفه، اقامه برهانی و نظر و استدلال و اعتباری، شرع منزله متابعتی و تحصیل علم و معرفتی امر ایدیور. و شرع منزله مخالف اقوال و افعاله و معلوم اولمایان شیرله انبای نهب ایتیهور.

ایشته بو نصوص قاطعه به بناء درکه اصول دینده، یعنی احکام اعتقادیه ده نظر و استدلال ایله، عقلی و یا نقلی دلائل مخصوصه سنه مراجعتله تحصیل علم واجب، تقلید حرامدر. مذاهب مختلفه به منسوب علمانک اکثریت عظیمه سی بونده متفقددر. حتی اهل سندن (رشریه) فرقه سنک رئیس امام ابوالحسن الاشعری ایله بعض پروان ور قسم معتزله علماسی، دها ایلری به کیده رک مقلدک ایمانی صحیح دکدر دیشلردر.

لکن بوفکر دوضری دکدر. زیرا بوفکره کوره بوتون مقلدینی تکفیر ایتمک لازم کلیر. حالبوکه رسالتناه اقدمز، بو کیلرک ایمانلرینی قبول ایدر و دلیللرینی سؤال ایتمزدی. آنک ایچون اکثر علمای اهل سنت عندده مقلدک ایمانی صحیحدر. و بناء علیه مقلد، مؤمندر و صحت ایمانده مقلد ایله مستدل آراسنده بر فرق یوتدر. شو قدر وارکه مقلد، تقلید ایله اکتفا ایدوب نظر و استدلال طریقنی ترک ایتدیکندن دولایی آثم و کناهاکاردر.

خلاصه «اصول دینده مطلوب اولان علمدر». علم ایسه آنجق نظر و استدلال ایله، علمی تولید ایدن اسباب و دلائله، طرق معرفته توسل ایله حاصل اولور. (مایتوقف علیه الواجب فهو واجب) قاعده سنه بناء برشی واجب اولدقده آنک موقوف علیهی اولان شی دخی واجب اوله جفتدن، اصول دینده علم و معرفت مطلوب و واجب اولونجه، آنک یکانه طریق تحصیل بولونان نظر و استدلال دخی بالضروره مطلوب و واجب و بناء علیه تقلید حرام اولور. چونکه آنفاه بیان اولوندینی اوزره تقلید، اسباب علم و طرق معرفتدن معدود دکدر. جمهور علمای اسلام بو بابده متفقددر.

مع هذا رؤسای معتزله دن شهرور (عبری) ایله بعض علمای اهل سنت، اصول دینده تقلیدک جوازینه ذاهب اولمشلردر. بونلر دیورلرکه (اصول

دیده مطلوب اولان علمدن مقصد واقعه مطابق اعتقاد جازمدر . بو برهان ایله حاصل اوله جی کبی بلا برهان دخی حاصل اولور . اعتقاد جازم، ولو تقاید طریقله اولسون ، بر کره حاصل اولونجه مطلوب حاصل اولمش دیمکدر . آرتق نظر واستدلاله و برهان اقامه سنه حاجت قالماز) .

امام غزالی ده (احیاء العلوم) نده بو صورتله بیان مطالعه ایتدکن صکره (کلتین شهادتی معالری بیله رک اعتقاد جازم ایله ایراد ایدن بر کیمسه ، او دقیقه عهده سنه مترتب فریضه ایمانی ادا ایتمش اولور . آنی متعاقب وفات ایدمک اولورسه جناب حقه مطیع و غیر عاصی اوله رق وفات ایتمش اولور . نظر واستدلال ، آنجق اعتقاد جازم ارزربنه عارض اولان احوال سببیه واجب اولور . ایمانی تزلزله اوغر اتان عوارضک هر رضی ایسه هر شخص حقنده ضروری دکلدرد . اعتقاد جازمک اوکبی عوارضدن خالی وسالم بولونمسی هر وقت جائز و متصوردرد .) دیورد .

فقط طرفینک بوبابده کی مطالعاتی تدقیق ایدمک اولور ایسه کورولور که بو اختلاف ، حقیقی اولیوب ظاهری و نزاع لفظی قیلندندر . چونکه جمهورک « نظر واستدلال » تعیرندن متصدلری ، طریق عامه اوزره نظر واستدلالدر ، یعنی هر شخصک کندینه کوره قناعت قلبیه حاصل ایدمک استدلالدر . مثلا محیر عقول اولان شو مکونات بدیمه بی کورونده آنک کور بر تصادفک اثری اولیوب مطلقا برصانع حقیقیسی بولوندیغنه استدلال ایله مک کبی . غبری ایله همذکر لرینک نظر واستدلالدن متصدلری ایسه ، عام کلامده بیان اولونان طریق متکلمین اوزره ایراد دلائلدر که جمهوره کوره بو صورتله استدلال واجب دکلدرد . ابن هاک (تخریر) - دیدیکی کبی عاقل هیچ بر مؤمن تصور اولوناماز که هر کون کوزونک اوکنده تحدث ایدن بیسکرجه حادثاندن ، آنلرک موجود و مؤثر حقیقیسی اولان جناب فیاض مطلقک وجودینه استدلال ایتمش اولماسین . مقلد ظن اولونان امی واک جاهل بر کیمسه به بیله مراجعت اولوندقده کورولور که او، جناب حقک وجودینه و صفات مقدسه سنه

ایمان خصوصاً مقلد دکلدر . بالعکس مستدلدر ، گندینه گوره متعدد دلایله
مانکدر .

استطراد

آشناغیده (حسن و قبح) بختنده ایضاح اولونه جفی اوزره مع التأسف فرق
اسلامیه آراسنه صوقولان و (اسماعیلیه) ، (باطنیه) ، (اعلیمیه) کی مختلف
نامرله یاد اولونان بر فرقه واردر که بونلر اسلام کسوه سنه بورونه رک ، دین
اسلامی تا اساسندن بیقق ایچون هر درلو مفسدنی ایقاعدن چکنمه مشلدر .
بونلر بو مقصد خائنانه لینه وصول ایچون اول امرده (امر دینده تقلیدک
وجوبنی و نظر واستدلالتک ، تفکر و تأملک و حق تحصیل علومک حرمتنی)
اساس اتخاذا ایتشلدر . بونی برنجی اساس اوله رق وضع ایتدکن سوکره ،
ایکنجی اساس اولمو اوزره قرآن کریمک معنای ظاهرندن باشقه معنای باطنی
بولوندیغنی ، ادعا ایتشلر ، بو ایکنجی اساسی ده وضع ایتدکن سوکره آرتق
آیات قرآنییه ایستدکاری وجه ایله ودرلو درلو اراجیف و ترهات ایله تأویل
ایده رک احکام اسلامیه نک بوتون بوتون ضد نامی اولان باطنی تأسیسنه قیام
ایله مشلر ، مثلاً عدالت یرینه ظلمی و ناموسی یرینه فحشی اقامه ایتشلدر .
بونلره کوره دنیاده جائز اولمایان برشی یوقدر . اک شذیع مظالم بیله جائزدر .
حق قتل عباد و تخریب بلادده جائزدر . ولو که اولادیته و یا والده سنه اولسون
زنا و لواطه دنجی جائزدر . خلاصه هرشی ، حلالدر ، مباحدر . فرض ، واجب
یوقدر .

ایشته بوقیز باشلر ، خلقک جهالتندن استفاده مقصدیله جهلی تهمیم و تثبیت
ایتمک جهتنی دوشونمشلر و بونک ایچون (امر دینده عقل ایله ، نظر واستدلال
ایله حق و حقیقته وصول ممکن اولماز . معرفت حقک طراقی ، آنجق دوشربدن
دوغری به و بلا واسطه جناب حقندن اقتباس فیض و اخذ علوم ایدن (امام) ک

کنند بسندن علم ایدن (حجت) واسطه بیه علمیندن و خلقک بو حقی تقلیدندن
 عبارتدر . (دیه رک علی الاطلاق دینده تقلیدک وجوبی واستدلال واجتهادک
 حریتی اساس سقیمنی وضع ایشلردر .

بونلر سیاسی و خفی مقصد تعقیب ایدن غلات روافضدندر . سوزلری ،
 ادعاری جعلی و صمیمیتدن عاریدر . ایچلرنده بروقتلر امت اسلامیته نیک ایشنه
 بلا کسین مشهور (حسن صباح) کبی علوم متنوعده مامر ، جین فکری
 ذاتلر واردر . مقصدلری دین اسلامی ابطال و خالق اصللدر . یوقسه بونلر
 کندی دعوالرینک بطالاتی بیلمز دکلردر . خلقک جهالتندن بالاستفاده قصداً
 و بیه رک او یولده ادعالرده بولونیورلر . آنکچون بونلره قارشنی نه قدر قطعی
 و منطقی دلائلسرد اولونورسه اولونسون ، اصلاتأثیری کورلیه جکی بک طبیعیدر .
 امام غزالی ، بونلره نه قدر اوغراشمشدی قولاً و قلماً مجاهدات دینده
 بولونمشدی . کرچه اونلرک (حجت) ی اولان سائف الذکر (حسن صباح)
 غلبه ایتدیکندن دولایی (حجة الاسلام) عنوان مفخرتیه تلقیب اولونمشدی .
 فقط بینه اونلر کندی دعوالرندن اصلا و از کچمه مشلر و بالعکس دساز یاده کرمی
 و برمشلردی . اکر بونلر سفسطه و مکابره بی ترک ایله طریق انصافه کله جک ،
 حقی تسلیم ایدم جک اولسلر ، اولوقت اونلرله او قدر اوغراشمغه حاجت قالماز .
 بینه کندیلرینک اک بیوک اماملری اولان و حتی الوهیت مرتبه سنه قدر اصعاد
 ایدیلن خلیفه رابع امام (علی) کرم الله وجهه حضرتلرینک برسوزینی در خاطر
 ایتدیرمک کفایت ایدر . اوسوزده د سن رجال ایله حقی بیه مزسک . اولا
 حقی بیسل که اهل حقتک کیم اولدیغنی بیلمش اوله سک ، مفهومنده اولان
 (لاتعرف الحق بالرجال اعرف الحق تعرف اهله) کلام عارفانه لریدر .

اوبله دکلیدریا؟ حقی بیلمه یین برکیمسه اهل حقتک کیم اولدیغنی نه ایله و ناصل
 بیه جک ؟ هرکس کندیسنک اهل حق اولدیغنی ادعا ایدم بیلیر . قول مجرد
 اعتماد ایدینه جک اولورایسه ، بربرینه مابین ادعاده بولونانلرک جمله سنه اهل حق
 دیمک لازم کلیر . ایچلرندن بریسنه اهل حق ، دیکر لرینه اهل باطل دیمک ایسه

ترجیح بلامرجح اولور که هر ایکی صورتک بطلانی بدیهیدر . مدعیلرک ظاهر حالارینی میزان اعتبار انحاء اتمکده هیچ دوعری اولاماز . بو پک تهلکلی صافدرونلق اولور . چونکه قلبنده کیزلی مقصد طاشییان ارباب مفسدت ، دائماً ساسته خصال ایله یوکی ساده دلاکدن استفاده ایدمگشردر . تاریخ اسلامده کندیلرینه « مرشد اعظم » سوسنی ویرن نیجه شیخلرک بالاخره کلاهی تاجه ، بو-تی، تخته تحویل ایتدکاری کورلمشدر . رهبر تصور اولونان برچوقاشخاک مؤخرآ رهن ظهور ایتمش یالکز بزده دکل ، هرملنده وهرزمانده واقع اولان شتون بشریه دندر .

بو حقیقته مبذدر که اهل حق ایله اهل باطل بینف تمیز ایدم بیلیمک ایچون ، اول امرده حق و حقیقتک بیلیمه سی ضروریدر . بر کره حقت نهدن عبارت اولدینی بیلیمبرسه ، آرتق آنکله اهل حقتده کیملر اولدینی کندیلکندن تبیین ایدر . چونکه بوتقدیرده الله غایت قطعی و پک حساس بر میزان وار دیمکدر . آرتق بویه میزان ایله انسانلرک ماهیت حقیقیلری پک قولای و پک صحیح بر صورتده تعیین اولونور .

حقت نه ایله بیلیمه جکی مسئله سنه کلنجه : دیرزکه حقه وصول ، آنجق آکا موصل اولان یولدن کیتمکه قابل حصولدر . اویولده عقل و نقلک متحداً بیان ایتدکاری یولدر که علم و عرفان یولیدر . بوده تجربه ، تدقیق و تتبع ، استقرا ، مشاهده ، عقلی و نقلی دایمه اطلاعدن عبارتدر . خصوصیه احکام اعتقادیه قضایای عقلیه دن ، یعنی عقل ایله بیلیمه جک مسائلدن اولدینی جهته اعتقاد یانده حاکم عقلدر . بوتک ایچوندر که علمای کلام و عقل ایله نقل تعارض ایتدکه عقل اول ، نقل آنکله مؤیدر ، قاعده سی وضع ایتشلردر .

تعلیمیه فرقه سی ، (امر دینده عقل ایله حقه وصول ممکن اولاماز .) دییه رک عقلی بالکلیه اعتباردن اسقاط اتمک ایسته یورلرسده ، بو بر سفسطه و مکابره دن عبارتدر . یوقسه اونلرده قلباً تعدیق ایدر لر که عقلک بو یوک هجت انبیه در . بوده ینه امام (علی) حضرتلرینک رسالتنامه افتد صردن نقل و روایت

ایشدیکی بر حدیث شریف ایله نابتدر . او حدیث ده و حق نروده بولونور ایسه
 سن ده اونکله برابر اوراده بولون ، آندن آبرمه . و سکا شبهه ویرمن ، حق
 اولدینی حالد حقه بکنزه من بر شیدت حقیقتی کنندی عقلکله تمیز ایت . زیر
 جناب حقا سنک اوزرینه اولان حجت بالفه سی - که عقلدر - سنده ودیمه
 التهبه در ، آنک برکات و فیوضاتی ده تز دکده موجوددر ، مانده اولان (کن
 مع الحق حیث کان و میز ماشیتبه عایک بعتلک . فان حجت الله علیک ودیمه فیک
 وبرکانه عندک .. « رواه الدیلمی عن علی مرفوعا . تمیز الطیب ») حدیثدر .
 کرك امور دینویه و کرك امور دینیه ده نیک و بدی ، حق و باطلی تمیز
 خصوصنده عقلک بر حجت بالفه صمدانیه اوندیفنه دأر وارد اولان من شرعی ،
 یالکنز بو حدیثدن عبارت دکدر . دعا بک چوق آیات قرانیه واحادیث نبویه
 شرفوارد اولمشدر . بزم بوراده یالکنز بو حدیثی ذکر ایدیشمز ، مجرد تعلیمبه
 فرقه سی الزام ایچونددر . چونکه بو حدیث اولنلرک ، سوزلرینی نص الاهی کبی
 تلقی ایتدکری حضرت امام (علی) نك روایت ایتدیکی حدیثدر .

تقلیده کلنجه: بو، بر کیمسه نك نه به مستند اولدینی بیانمین قول مجردینه
 اتباعدن عبارت اولدینندن مجهول اوزرینه حرکتدر . چونکه مقلده کوره
 او سوزک صدق و کذب، حق اولوب اولدینی معلوم دکدر . آنکچون تقلید
 طریق علم و معرفت دکدر . بناء علیه مطالب علمیه ده تقلیدک یری یوقدر .
 قرآن کریم [قل هاتوا برهانکم ان کنتم صادقین] آیتله اثبات مدعی ایچون
 برهان اقامه اولنسی لزومی بیسان ایدیور . [ولاتقف ما یس لک به علم]
 آیتله ده حقیقتی مجهول اولان شیئه اقتضای منع ایله یور .

چشم چون بینا شود خضرست هر نقش قدم
 رهبر بینا چه جویی، دیده بینا طلب

فروع دینده تقلید جائز میدر دکلیدر ؟

بو مسئله ده اجتهاده اقتداری اولانلرله اولمایانلری تفریق ایتک اقتضا ایدییور . امر دینده اجتهادک . وجوبی و تقلیدک حرمتی حقیقده وارد اولان و بر قسمی مسئله سابقه ده ذکر اولنان نصوص شرعیه ، مطلق و عام اولوب فروع دینه دخی شامل اولدیندن ، جمهور فقهایه کوره احکام اعتقادی ده اولدینی کبی احکام فرعی ده دخی بر مجتهد ایچون دیکر بر مجتهدی تقلید حرام ، اجتهاد واجیدر . مگر که بر مسئله ک حکمی استنباط تدقیق و تنبیه محتاج اولوبده وقتک عدم مساعدی کبی بر سببه اجتهاد متعذر اوله ، اولوقت حسب الضروره تقلید جائز اولور . « مواضع ضرورت قواعد عمومی دن مستثنادر . »

فقهده مستقل مذهب صاحبی بوبوک مجتهدلردن مشهور امام (سفیان ثوری) و (اسحق بن راهویه) کبی بعض علماء جمهوره مخالفه « بر مجتهد ایچون بعد الاجتهاد دیکر بر مجتهدی تقلید جائز دکلسه ده ، قبل الاجتهاد جائزدر . » دیشلردر . بونلر اثبات مدعی ایچون دیورلر که : [ذکر اولونان نصوص شرعیه و مطالعات سالفه احکام اعتقادیه ایله حقیقده نصوص قاطعه وارد اولان احکام فرعیه قطعیه حقیقده در . فقط بحث آنلرده دکل ، احکام فرعیه ظنیه یعنی مسائل اجتهادیه حقیقده در . ظنیانده ایسه مطلوب اولان ظنلدر . آنکچون شرع شریف ، احکام فرعی ده ظنی علم مقامنه اقامه ایله مشدر . ظن اجتهاد واستدلال ایله حاصل ارله جنی کبی ، بر مجتهدی تقلید ایله ده حاصل اولور . بو جهتله بر حادثه فقهیه ده بر مجتهد ، هنوز اجتهاد ایتزدن اول دیکر بر مجتهدی تقلید ایدر ایسه مطلوب حصوله کلش اولور .]

بو فکر مجروح و بک یا کاشدر . بر کره مبحوث عنه نصوص شرعیه ک احکام اعتقادیه ایله احکام فرعیه قطعیه مخصوص و منحصر اولدینی مسلم

دکدر. بو تخصیصه دلالت ایدہ جک الدہ بر دلیل یوقدر. ثانیاً کرچه مسائل اجتهادیهده مطلوب اولان ظندر، و شرع شریف احکام اجتهادیهده ظنی علم مقامه اقامه ایله مشدر. لکن بواجتهادک ماهیتندن متولد بر کیفیت ضروریهده. چونکه مسائل اجتهادیهده اجتهاد، ادله قطعیه به مستند اولمدینی ایچون بالضروره ظندن بانقه بر شی افاده ایتمز. بونکله برابر مطلوب اولان ظن، مجتهدک کندی اجتهادندن متولد ظندر. یوقسه باشقه سنک اجتهادندن تولد ایدن ظن دکدر. زیرا احکام اجتهادیهده ظنک علم مقامه اقامه اولونمسی. اوکی مسائله عام تحصیلی قابل اوله مامسندندر. شو حالده عام مقامه قائم اولان ظن، ممکن اولدینی قدر علمه قریب اولان ظن اقوادر. ظن ضعیف دکدر. بیسانه حاجت یوقدرکه بر کیسه سنک کندی ظنیه باشقه سنک ظنی آراسنده بوبوک بر فرق وارد. [المرء ویطمئن بظنه] فحواسنجه کشی کندی ظنیه مطمئن اولور. و هرکسک کندی آکلایشی، کندنجه دیکرینک آکلایشنه راجح بولونور. بو جهته بر مجتهدک کندی اجتهادندن متولد ظن، کندی کوره دیکر بر مجتهدک اجتهادندن متولد ظندن البته اقوادر. و برده مسائل اجتهادیهده مطلوب اولان ظن، علی الاطلاق ظندن عبارت اولسهیدی، بر مجتهدک بعدالاجتهاد کندی نتیجه اجتهادینی ترک ایله آکا مخالف اجتهاده بولونمش اولان دیکر بر مجتهدی تقلید ایتمسی دخی جائز اولور ایدی. حال بوکه بو، بالاتفاق جائز دکدر. ایشته بو ملاحظانه بناءً جمهور فقهایه کوره ایستر بعدالاجتهاد اولسون، ایستر قبل الاجتهاد اولسون علی الاطلاق بر مجتهد ایچون دیکر بر مجتهدی تقلید جائز دکدر. هر مجتهدک کندی اجتهادیهده عامل اولمسی واجیدر.

اجتهاده مقتدر اولمایانلره کلنجه: آرتق بونلرا ایچون تقلید ضروریدر. مادام که اجتهاده اقتدارلری یوقدر، او حالده تقلیددن باشقه توسل ایدیه جک بر طریقده یوقدر. واقعا اجتهادک وجوبی و تقلیدک حرمتی حقنده وارد اولان سالف الذکر نصوص شرعیه سنک ظاهر اطلاق وعمومه نظراً احکام اصلیهده اولدینی کی

احکام فرعی‌ده دخی اجتهاده مقتدر و غیر مقتدر علی‌العوم افراد است ایچون تقلیدك جائز اولمیوب حرام اولدینی ظن اولونور . فقط ظاهرده مطلق وعام اولان او نصوص شرعیه - (وما جعل علیکم فی الدین من حرج) کبی اصل دینده حرج و مشقتك مرتفع اولدیغه دال اولان دیگر نصوص شرعیه‌نك دلالتیله - حقیقته احکام فرعی‌ده متعلق اجتهادك وجوبنی افاده خصوصنده مجتهدلرله مقید و آنلره خاصدر . اجتهاده مقتدر اولمایانلر نصوص مذکورده‌نك دائرة شمولدن خارجدرلر .

احکام فرعی‌ده اجتهاد ، احکام اصلیة اعتقادیه‌ده اجتهاده بکزه من . احکام اعتقادیه معدود ، دلالتی‌ده عقلی ومحدوددر . او جهته احکام اعتقادیه‌ده هر عاقل اجتهاد واستقلاله قولایقله مقتدر اولمیلیر . حالبوکه احکام فرعیه بوبله دکلدر . بیکرجه مسائلی محتویدر ، دلالتی‌ده شرعی وغیرمحدوددر . بوجهته فروع دینده اجتهاد هرکسك کاری دکلدر . بوجهت نظر اعتباره آلمیه‌رق اهلیت اجتهادی حائر اولمایان نه قدر افراد مسلمین وارسه جمله‌سی اجتهاده سوق ایدیله چك اولسه ، اوزرلرینه چك بوبوك کلفت و مشقت تحمیل ایدلمش اولور . امر معیشتك ، زراعت وصناعتك وسائر ایشلرک تعطیلی لازم کلیر . بونکله برابرینه هرکس ایچون اجتهاده اهلیت ماده ممکن اولماز . ایشته بوملاحظه‌یه مبنی تقلید ، حدذاتنده مذموم اولقله برابر اجتهاده مقتدر اولمایانلر ایچون ضروری کورولمشدر .

فقط فقهك قواعد اصلیه‌سندن اولدینی اوزره ، ضرورتلر کندی مقدارلریله تقدیر اولونمق لازمه‌دن بولوندیغندن ، عوام ایچون واجب اولان تقلید محض ، اجتهاده مقتدر اولماقله برابر تقلید ایتدیگی مجتهدك دلالتی آ کلایه چق قدر اکتساب معلومات ایدن علمای قاصرین ایچون واجب دکلدر . چونکه عوام ایچون تقلید محض ضروری ایه‌ده علمای قاصرین ایچون اوبله بر ضرورت یوقدر . مادامکه علمای ایچون تابع اولدقلری مجتهدك دلالتی کلامی ممکندر ، او حالد اولر ایچون ضروری اولان شی تقلیدك یوقاریده بیان اولنان برنجی نوعیدر . یعنی دایله تقلیددر ، کوری کورینه حکمده تقلید دکلدر . بناء علیه علمای قاصرین

ایچون منسوب اولدقلری مذهب صاحبنک مستندالیهی اولان دلائله مطلع اولمق واجبدر ، تقلید محض جائز دکلدرد . مکرکه زمانمزده اکثر مسائل فقهیهده اولدیفنی کبی اصحاب مذاهبنک دلائله اطلاع ، متعذر ویا متعسر اوله . اولوقت علما ایچون دخی تقلید محض جائز اولور . « مشقت ییسیری جالب ایدر . » ایشته بومسئلهده فقه بودر ، یعنی قواعد فقهیهک مقتضاسی بودر . بوندن دولاییدرکه اصولیونک بر قسمی (بر مجتهدک صحت اجتهادی ، مستدالیهی اولان دلیلی ایله تبیین ایتدیگجه ، علمای قاصرین ایچون او مجتهدی تقلید جائز اولماز) دیمشدر . ابن قیمک (اعلام الموقعین) ی ، شعرا نینک (میزان) ی ، دهلوی نک (حجة الله البالغة) ی وشوکانی نک (ارشاد الفحول) ی مطالعه ایدیلیرسه کورولورکه متقدمین فقهانک اکثریسی بو فکردهدر . امام مالک حضرتقلری (بن بشرم . بعضاً خطا و بعضاً اصابت ایدرم . بو جهتله بنم رأی واجتهادی تدقیق ایدیکیز . کنایه ویا سننه موافق بولورسه کز قبول ایدیکیز ، بولمازسه کز رد ایدیکیز .) دیمشدر . امام احمد حنبلی حضرتقلریده (نه بنی ، نه مالکی ، نه نحوی واوزاعی بی ، نهده باشقه بر ذاتی تقلید ایتدیگیز . احکام شرعیبی منبضدن اخذ ایدیکیز .) دیمشدر . امام شافعی نک تلید خاصی امام (مزنی) ده ، (مختصر مزنی) نامیله معروف اولان کتابنک مقدمه سنده استاذی امام شافعی حضرتقلرینک ، کندیسنی تقلیددن طلبه نی منع ایتیش اولدیفنی خاصة اعلام و اخطار ایله مشدر .

مع هذا متأخرین علمای اصولک بر قسمی ده ، بو فکرنک خلافه ذاهب اوله رق علی الاطلاق تقلیدک لزومنده علمای قاصرینی عوامه الحاق ایله مشلردر . بونلر (مادام که علمای قاصرین اجتهاددن عاجزدرلر ، عوام حکمنده درلر . بناء علیه مجتهدک دلیلی بیلمکه لزوم بوقدر ، اونلر ایچونده علی الاطلاق تقلید واجبدر .) دیورلر . و بو ادعارینک صحته (فاسألوا اهل الذکر ان کنتم لاتعلمون = بیلمیورسه کز اهل علمه سؤال ایدیکیز .) آیت جلیله بیله احتجاج ایدیورلر . دیورلر که (بیلمینلرک بیلمدکلرینی بیلملردن صوروب

او کرمه لری ، بو آیت جلیله ایله امر اولونیور . امر ایسه وجوب افاده ایدر .
اجتهاده مقتدر اولمایان علماده بیلمینلر زمره سنده داخلدرلر . او حالده اونلر
اوزرینه ده بیلمدکاری احکام فرعیه یی اهل عام اولان مجتهده سه سوال ایتمک
واجب اولور . بو ایسه آتی تقلیددن باشقه برشی دکلدر .

بوکا بوجه آتی ایکی صورتله جواب ویرلمشدر . اولاً - امام خیرالی تک
(مستصفا) ده دیدیکی کبی « بیلمیورسه کز اهل علمه سوال ایدیکز ، دیمک ،
بیلمک ایچون سوال ایدیکز دیمکدر . بیلمک ایچون سوالده ایسه یالکیز حکمی
صورمق کافی دکلدر . او حکمک یعنی ویریلن جوابک دایلمی ، نهیه مستند
اولدیغی ده صوروب او کرمک اقتضا ایدر . بوجهت بیلمزسه سوالدن مقصود
اولان علم حاصل ایدلمس اولماز . زیرا بلا دلیل جواب ، سائل حقنده قول
مجرددن عبارت اولدیغندن عام افاده ایتمز . ایسه ایسه ظن افاده ایدر . حالبوکه
بو آیت جایله ایله مأمور به اولان سوالدن مقصد بیلمه یین بر شینه علم حاصل
ایتمکدر . خصوصیه بونظم کریم ، کندیسنده علم مطلوب اولان اعتقاد یادن
بر مسئله حقنده ، یعنی ایتسای عظام حضراتک رجالدن بولوندقلری حقنده
شرفوارد اولمشدر . خصوص سبب عموم حکمه ، یعنی آیتک سبب تزولده کی
خصوصیت حکمک عمومیتته منافی اولماسه بیله بوراده خصوص سبب ،
سوال مذکوردن تحصیل علم مقصود اولدیغنه باشقه جه برقرینه تشکیل ایتمکده در .
نته کیم بو آیتک آلت طرفنده کی (بالینات والیر) قیدی ده ، بو ملاحظه یی
مؤیددر .

ثانیاً - اوت ، بو آیت منیفه بیلمینلرک جمله سنه ویلمدکاری شیلرک
کافه سنه شامل و علماء قاصرینده بیلمینلر زمره سنده داخلدر . بو جهت
مسلمدر . فقط علمه آنک بیلمدکاری حکمک دایلاری ده بیلمدکاری شیلر
جمله سندندر . شو حالده اونلر اوزرینه یالکیز حکملری دکل ، او حکمک مقتد
الهی اولان دایلاری ده سوال ایتمک واجب اولور .

شو ایکی جوابدن آ کلاشیلرک آیت مشار الیها ایله علمای قاصرین حقنده

تقلید محضك وجوبی شوبله دورسون، جوازی بیله ثابت اولماز. بالعکس کتاب وسنة، بینات شرعیه به اطلاع وانباءك لزومی نابت اولور. بناءً علیه بو آیت کریمه، علمای قاصرین ایچون دخی تقلید محضك وجوبینه ذاهب اولانلرک لهلرینه دکل، علملرینه دلیلدر.. بوجهتله بونلرک بو آیت ایله استدلاللری هیج بروجه ایله صحیح دکلدر.

تحقیقات سالفه دن شو نتیجه حامل اولویورکه (فروع دینده تقلید جائز میدر، دکلیدر؟) مسئله سنده اهل اسلام، اوچ صنفه منقسمدر. وهر صنف حقنده حکم باشقهدر. برنجی صنف مجتهدلر، ایکنجی صنف اجتهاده مقتدر اولمایان عالملر، اوچنجی صنفده جاهلدردر. مجتهدلر ایچون تقلید جائز اولمایوب اجتهاد واجبدر. اهلیت اجتهادی جائز اولمایان عالملر ایچون تقلید محض جائز اولمایوب تابع اولدینی مجتهدك دلیلنه اطلاع واجبدر. مکرکه دلیلله اطلاع متعذر ویا متعسر اوله. اولوقت تقلید محض جائز اولور. جاهلره کلنجه: آرتق آنلر ایچون تقلید محض ضروری و بناءً علیه واجبدر.

— ۴ —

افتا و تضا

(افتا) فی الاصل بر مشکلی حل و ایضاح معناسنده لسان عرفده بر مسئله نك حکم شرعیسی او کرتك ایچون واقع اولان سؤاله جواب ویرمك معناسنده استعمال اولونور که حکم شرعی بی بیان و اخبار دیمك اولور. سؤال ایدنه (مستفتی)، جواب ویرنه (مفتی) و ویریلان جوابده (فتوی) دیر. فانك ضمیله (فتیایا) ده فتوی دیمکدر. (فتوی) نك جمعی و اوک فتح و کسر یله (فتاوی) در.

اصطلاح اصولیونده مفتی، مجتهد دیمکدر. ناصل که (فقیه) لفظی نك ده مجتهد

مراد فی اولدینی یوقاریده ذکر اولونمشدی. دیمک که مفتی، مجتهد و فقیه لفظلری، اصولیون عننده الفاظ مترادفه قییلنددر. زمانمز مفتیلرینه (مفتی) اطلاق، اصولیونه کوره اطلاق مجازیدر. شو حالدیه بر عالم، حقیقی مفتی اوله بیلیمک ایچون شرائط اجتهادی نفسنده جمع ایتمش اولوق شرطدر.

ایشته اصل « فتوی » دیه، بویله شرائط اجتهادی جامع و بناء علیه اجتهاد اقتدارینی حائز بر مفتی طرفندن، عن اجتهاد ویریلن « فتوی » یه دیر. زمانمز مفتیلری مجتهد اولدقلرندن بونلر، حقیقته مفتی اولمیوب (ناقل) درلر. ویردکلری فتوالر، منسوب اولدقلری مذهب صاحبک ویا آندن سوکره کلن فقهای مذهبک اقوال و فتاوانی نقل و حکایه دن عبارتدر. مع هذا بوکیلر حقنده « مفتی » وفتالری حقنده « فتوی » تعییرلری، خبلی زماندنبری تعییرات رسمیه دن اولمش و آرتق حقیقت عرفیه حکمنی اکتساب ایله مشدر.

خلاصه، فتوی اوچ نوعدر. برنجیسی عن اجتهاد ویریلن فتوی، ایکننجیسی تخریج طریقله ویریلن فتوی، اوچنجیسی ده بر مجتهدک کلامنی نقل و حکایه دن عبارت اولان فتوادر. عن اجتهاد فتوی ویره بیلیمک ایچون کفایت اجتهادی حائز اولوق شرلی اولدینی کبی، تخریج طریقله فتوی ویره بیلیمک ایچون ده شبهه سز تخریج اقتدازینه مالک اولوق شرطدر. یوقاریده « طبقات فقها » بختنده تفصیلاً ایضاح اولوندینی اوزره (تخریج) بر مذهبده مصرح اولمایان بر مسئله نک حکمنی، او مذهبک احکام مصرحه و قواعد مقررده سندن استخراج ایله مک دیمکدر.

شو حالدیه بر کیسه « تخریج » مقتدر اوله بیلیمک ایچون بر کره منسوب اولدینی صاحب مذهبک اقوال و قواعد فقهیه نه مأخذلری و دلیللریله برابر واقف اولوق، سوکرده دلیلده نظره و مذهبده مناظره یه اهل بولونمق و بونکله برابر احوال و طادات ناسی، احتیاج و مصلحت عصری بیلیمک لازمدر. ایشته بو شرائطی جامع اولان بر مفتی ایچون، سالک اولدینی مذهبده موجود اولمایان بر مسئله حقنده صاحب مذهب نام و حسابنه « تخریج » طریقله فتوی

ويرمك جائز اولور . فقط مفتى بو شرائطى جامع دكل ايسه جائز اولماز .
 بر مجتهدك كلامى نقل و حكاية طريقه و بربان فتوايه كلنجه : (هدايه)
 شرحى (فتح القدیر) ده بيان اولندينى اوزره [١] بويله بر فتوى معتبر و واجب
 الامثال اوله بيلمك ايجون ، هانكى مجتهدك كلامى نقل ايدلمش ايسه او مجتهدك
 اسمى ذكر اولونمق و معروف و متداول بر كتاب معتبردن مأخوذ بولونمق
 لابدر . چونكه او مجتهدك اسمى ذكر ايدلميه جك اولور ايسه او كلامك قائلى
 كيم اولدينى بيلنه من . او بيلينمينجه ده مستفتى كيمي وهانكى مجتهدى تقايد
 ايتديكى بيله من . فتواي و ير ن ذاته كلاجه : او ، حقيقتده او فتوانك صاحبي
 دكلدر كه اونك . معلوم اولمهسى اصل مفتيك معلوم اولمهسى ديمك اولسون .
 او آراده واسطه نقلدن عبارتدر . اصل مفتى اولان مجتهدك كلامى مستفتى به نقل
 ايدن بر واسطه در . بوجهته او فتوانك مفتى حقيقيسى مستفتيجه بيلنمك ايجون
 آنك اسمى ذكر اولونمق لازمدر . اولوندينى صورتده جهل جهل اوستنه ،
 تقليد تقليد اوستنه اولور . اكن زمانمزه بو اصوله رعایت ايدلديكى يوقدر .
 بوراسى بويله اولدينى كيم فتوانك مأخذى اولان كتاب ده ، معروف
 و بين العلماء متداول اولمايان بر كتاب اولور ايسه ، مندرجاتك صحته اعتماد

[١] فالمحقق ابن الهمام فى (فتح القدیر) فى شرح « كتاب القضا » و ايلم ان بما
 ذكر فى القاضى ذكر فى المفتى فلا يفتى الا المجتهد وقد استمر رأى الاصوليين على ان
 المفتى هو المجتهد و اما غير المجتهد ممن حفظ اقوال المجتهد فليس بفتى . و الواجب عليه
 اذا سئل ان يذكر قول المجتهد كالمى حنيفة على جهة الحكاية . فعرف ان ما يكون فى
 زماننا من فتوى الموجودين ليس بفتوى بن هو نقل كلام المفتى ليأخذ به المستفتى .
 وطريق نقله كذلك عن المجتهد احد امرين اما ان يكون له فيه سند اليه او يأخذه من
 كتاب معروف تداوله الايدى نحو كتب محمد بن الحسن و نحوها من التصانيف المشهورة
 للمجتهدين لانه بمنزلة الخبر المتواتر عنهم او المشهور هكذا ذكر الرازى . فعلى هذا لو
 وجدنا بعض نسخ النوادر فى زماننا لا يحمل عزو ما فيها الى محمد ولا الى ابن يوسف لا
 نهالم تشهر فى عصرنا فى ديارنا ولم تتداول . نعم اذا وجدنا نقل عن النوادر مثلا فى كتاب
 مشهور معروف كالهداية و المبسوط كان ذلك تمويلا على ذلك الكتاب . انتهى ما فى
 (فتح القدیر) .

ایدیله مز. یالان اولوق احتمالی اولدینی کبی محرف، ناطص ویا زائد اولوق احتمالی ده وارد. آنکچون او یله غیر معروف و غیر متداول بر کتابدن مأخوذ اولان فتوایه اعتماد جائز اولماز. مکرکه اوفتوی، بر دایلی صحیحه مستند و اودلیل ده کتاب مذکورده مندرج اوله. ابن همام، (فتح القدر) ده (متقدمین حنفیه دن (هشام) ک ویا (ابن رستم) ک (نوادری) کبی یالکزی ایما معلوم اولوب جسماً عبر معروف و غیر متداول اولان برکنات، اله کچه جک اولسه اونده مندرج بر مسئله یی امام ابو یوسفه ویا امام محمد عزو و اسناد حلال اولماز. (دیور. مع هذا ینه ابن همامک دیدیکی کبی (هدایه) و (مبسوط) مثللی معروف بر کتاب متداولده او یله غیر معروف کتابدن بر نقل بولونور ایسه، اولوقت او نقل معتبر اولور. لکن بیاه حاجت یوقدرکه بوسورتده اعتبار و اعتماد او کتاب معروفه در، یوقسه نقل مذکورده دکلدر.

وقتیله اسلاف کرام، روایت و تدریس ایتدکلی مسائل و کتب فقهیه یی، اادتا حدیث روایت ایدر کبی صاحب مذهب ویا مؤلف کتابه منتهی اولونجه یه قدر، خلفدن سلفه اسناد طریقیه نقل و روایت ایدر لر مش. بوسلسله اسناد (سند) اطلاق اولونور. ایشته بر مجتهدک کلامنی نقل و حکایه طریقیه ویریلن فتوی، بویله بر (سند). مستند اولور ایسه، راولیری تهن دن یعنی عادل و موثوق الکلام ذواتدن اولدق قری صورتده معتبر اولور. عکسی تقدیرده معتبر اولماز. فقط زمانم زده بوطریق مسدوددر. چونکه بیک بوقدر سنه سوکره بوطریقه توسل متعذر ویا متعسر در. آنکچون ایوم ویرلمکده اولان فتوالر، هپ کتب فقهیه دن مأخوذدر.

استفتا اولنان مسئله حقنده مجتهدلرک اقوال مختلفه یی بولوندینی صورتده، اگر مفتی دایله نظره اهل اولوق حسیده ترجیحه مقتدر ایسه، او اقوالدن برینی ترجیح ایدر. ترجیحه مقتدر دکل ایسه بوقدیرده او اقوال مختلفه نیک جمله سنی مستفتی به نقل و حکایه یه مجبور دکلدر. یالکزی بر دانه یی نقل و حکایه ایله سه کفایت ایدر. چونکه مقلد دیدیکی مجتهدی تقلید ایتک حقی حائر در

بنیاء علیه مفتی ، اقوال مختلفه دن برینی ذکر ایدر ، مستفتی ده آنکه عامل اولورسه متصود حصوله کلمش اولور . فقط مفتی اقوال مذکورده نك جمله مفتی نقل ایدر ایسه - که بعض فقها نقل ایتک لازمدر دیمش لر - بو صورتده (استفتت نفسک وان افتناک المفتون) حدیث شریفی مقتضاسنجه مستفتی ایچون اولی اولان وجداننه مراجعت ایتک و بنیاء علیه وجدانی آنلردن هانکیسفی تصویب ایدرسسه آنی اختیار ایله مکدر . مستفتی باشقه باشقه مفتیلره مراجعتله یکدیگرینه مابین باشقه فتوالر آلا دینی صورتده دخی حکم ینه بویله در . مع هذا مستفتی وجداننک میل و تصویب ایتدیکی قوی اختیار ایده جک اولورسه ، ابن همامک (فتح القدر) ده بیانه نظر آ جائز اولور . چونکه مستفتی اوزرینه واجب اولان شیء ، علی الاطلاق بر مجتهدی تقلیددر . بوده او اقوالدن هر هانکی بری اختیار ایلمکله ایفا ایلمش اولور . او مجتهد ایستراصابت ایتسین ، ایستراخطا ایتسین مساویدر ، زیرا مقلد ، مجتهدک اصابت و خطاسفی تدقیق ایله مکلف دکدر ، عاجزدر . مسئولیت تماماً مجتهده راجعدر . حالبوکه اوده مسئول دکدر . چونکه شرائطی جامع و تقصیردن خالی اجتهاد تام ، مسئولیته مانعدر . مجتهد اصابتله مکلف دکدر . مسائل اجتهادیه ، امور ظنیه دندر . ظنیاتده ایسه مجتهدک مکلفیتی حکم شرعی به تحصیل ظن ایچون بونون وسع و قدرتی صرف ایتمکدن عبارتدر که او بونی پامشدر . اصابت آنک وسی خارجنده در . بوجهتله مجتهد بعضاً اصابت ، بعضاًده خطا ایدر . و هر ایکی صورتده وظیفه سفی تماماً ایفا ایتش اولدینی ایچون مأجور اولور . [۱]

[۱] شو سوبله دکلامش ، بر مجتهدک کلامنی نقل و حکایه دن عبارت اولان (افتنا) حقیقده در . و نظریات اصولیه دندر . تطبیقاتده بو اصول جاری دکدر . هر مذهبک کندینه کوره بر اصولی وارددر . مذهب حنفیجه متخذ اصوله کوره مفتی ، اولای امام اعظم حضرتلرینک قولیله فتوی ویردر . چونکه اصل صاحب مذهب اودر . آنک ایچون مذهب حنفیده اصل اولان مشارالیهک قولیدر . بنیاء علیه بر مسئلهده مشارالیهک رأیی موجود اولدنیجه آندن عدول اولونماز . مکررکه مفتی ، دلیلده نظره اهل و بنیاء علیه ترجیحه مقتدر اولسه . اولوقت دایلی . اقوی اولانک قوائی ترجیح ایدر . شاید استفتنا

*
*
*

(افتا) ایله (قضا) آراسنده کی فرقه کلنجه : بونلر آراسنده کی فرق بر دکل ، متعدددر . کرچه هر ایکسی ده بر جنسنددرلر ، نتیجه اعتباریله ایکسی ده بر حادثه نك حکم شرعی بی بیان عبارتدر . لیکن کرک ماهیت نوعیه لری و کرک اوزرلرینه ترتب ایدن احکام اعتباریله بینلرنده متعدد فرقلر واردر . باشلیجه لری شونلردر :

۱ — افتا ، حکم شرعی بی ساده جه بیان و اخباردر . قضا ایسه حکم شرعی بی بیان ایله برابر الزامدر . بوجهتله افتاده الزام یوقدر ، قضاده الزام و اجبار واردر .

۲ — افتا ، ولایت نوعندن دکلدر . مفتینک افراد اوزرنده حق ولایتی یوقدر . حالبوکه قضا ، ولایت نوعنددر . قاضینک افراد اوزرنده حق ولایتی واردر بوجهتله مستفتی فتوایی قبوله جبر اولونمیدی حالده ، محکوم علیه تصدیق اولونان حکم قضایی قبوله جبر اولونور .

۳ — بر مجتهد ایچون کندی رأی و اجتهادی خلافتنه اوله رق ، دیگر بر مجتهددن صادر اولان فتوی ایله عمل ایتمک جائز اولماز . حالبوکه او مجتهد ایچون ولوکه کندی اجتهادی خلافتنه اولسون ، علیه صادر اولان حکم قضایی به اتباع ایتمک واجب اولور . چونکه قاضی ولایت عامه بی حائزدره حکمی بو ولایته مستنددره ، الزامدر . بناء علیه قاضینک امضا و تصدیق اولونان حکمنه اطاعت ، بلا استثنا هر کس اوزرینه واجب اولور .

اولونان مسئله ده امام مشارالیهک رأی معلوم دکل ایسه اولوقت مفتی ، امام ابو یوسفک ، سوکره امام محمدک ، دها سوکره امام زفر و یا حسن بن زیادک قولیله فتوی و برر . فقط بو ترتیب سوکره کلن مشایخ حنفیه جه ائمه مشارالیهمدن برینک قوی دیگر لرینک اقولنه ترجیح ایدلمیکی صورتدهدر .

اما مشایخ حنفیه ، اولجه مشارالیهمدن برینک قوی و مثلاً امام محمدک رأی دیگر لرینک و حتی امام اعظمک قواه ترجیح و آنکله افتا ایله مشرلر ایسه ، او قول مذهبه مختار و مفتی به اولمش دیمکدر . آرتق مفتی او قول مختار ایله فتوی و برر . فائذک کیم اولدیفقی آراشدبرماز .

۴ - حق قضا، اساساً خلیفه به ذات حضرت پادشاهی به عائد اولوب آنک طرفندن تفویض اولونمقدجه هیچ بر کیمسه حق قضایی حائز اولاماز. آنکچون قاضی ذات حضرت پادشاهینک و کیلیدر، آنک نامنه و آکا و کالة اعطای حکم ایدر. بوجهتله خلیفه طرفندن کندیسنه تفویض قضا اولونمایان بر ذات، هرکیم اولور ایسه اولون، ولوکه اک بو یوک مجتهد اولسون کندیلکنندن قاضی اوله رق اعطای حکم ایده من. حالبوکه افتا بویله دکلدر. افتا علم و اقتدارک بخش ایتدیکی بر صلاحیت علمیه در. بو سببله حق افتا، رسمی مفتیلره مخصوص و منحصر دکلدر. کفایت علمیه پی حائز اولان هر عالم مفتی اولابیلیر، یعنی کندیلکنندن فتوی ویره بیلیر. طرف حکومتدن تفویضه وابسته دکلدر.

۵ - قاضی طرف سلطانیدن اجرای محاکمه به و حکم وکیل اولدینی ایچون، قضا زمان و مکان ایله و بعض خصوصاتک استثناسیله تقید و تخصص ایدر. مثلاً معین بر زمان و یا مکانده حکمه مأمور اولان بر حاکم، آنجق اول زمان و مکانده حکم ایده بیلیر. اما اول زمان و یا مکان خارجنده دیگر بر زمان و یا محله حکم ایده من. بونک ایچوندرکه بر قضا حاکمی دیگر بر قضا حاکمک ایده من. کذاک بر مجتهدک رأیله عمل اولونمق اوزره امر سلطان صادر اولسه حاکم او مجتهدک رأینه منافی دیگر بر مجتهدک رأیله حکم ایده من، ایدر سه نافذ اولماز. (مجله احکام عدلیه ننگ (۱۸۰۰) و (۱۸۰۱) نجی ماده لرینه باق)

حالبوکه افتا بویله دکلدر. مفتی ذات حضرت پادشاهینک و کیلی اولدینی ایچون، امر افتا هیچ بر صورتله تقیداته تابع طوتولاماز. اوتامماً حریت علمیه پی جائزدر. بنسأ علیه مفتی هر زمانده، هر مکانده و هر مسئلهده کندی بیلدیکی کی فتوی ویرر. هیچ بر قید آلتنه کبر من و هیچ بر کیمسه ننگ رأینه تابع اولماز. مگرکه مقلد اوله. بو تقدیرده ده یوقاریده بیان ایدلیدیکی وجه ایله حرکت ایدر.

۶ - مفتی دیانتله فتوی ویرر، قضا ایسه ظاهر ایله حکم ایدر. یعنی مفتی ایشک جهت وجدانیه سفی، مستفتی ایله جناب حق آراسنده کی حکم شرعی پی بیان ایلر. حالبوکه قاضی بر جهتی، ایشک ایچ بوزنی نظر اعتباره

آمیوب ظاهراً و زریئه بناءً حکم ایدر. مثلاً بر کیمسه دیگر ندن بر مقدار پاره استقراض و فقط مؤخرأ تأدیة ایتدیکنی اقرار و بیانله ذمتک بری اولوب اولدیغنی استفتنا ایتدکده مفتی ذمتک بر ایتدیة افتا ایدر. حالبوکه اوزات حضور حا کده اویولده اقرار و ادعاده بولونه جق اولسه حا کم آنک بر ایتدیة حکم ایتمز. بالعکس تأدیة دینه اقامه بینه ایدر مزسه ، آتی اقرار یله الزام و اداء دینه اجبار ایلر. ولوکه او کیمسه حقیقتده اداء دین ایتمز اولسون. حا کم بوجهتی دوشونمز. (الحاکم یحکم بالظاهر والله یتولی السرائر) فعواستجبه حا کم حکمنی ظامره بنا ایدر ، سرائری ایسه آنجق جناب حق تولی ایلر. [۱]

۷ - افتاده ارککلرله قادینلرک فرقی یوقدر. بناءً علیه ایستر عباداته ، مناسکات و معاملاتہ دائر اولسون ، ایستر عقوباته متعلق اولسون علی العموم مسائل شرعیده کفایت علمیه بی حائز اولان قادینلر دخی مفتی اولابیلورلر. بوجهتله ققهای حنفیه کوره قادینلر دخی قاضی اولابیلورلر. لکن عقوباته متعلق دعاوی ده قاضی اولامازلر. یعنی قادینلر جزا حا کمی اولامازلر. اوجهتله مفتیلک خصوصنده ارککلرله قادینلر آراسنده هیچ برفرق بولمیدینی حالده ، قاضیلک خصوصنده یوصورتله برفرق واردر.

[*] معین بر سببی بیان اولو عایان ملک مطلق دعوالرنده ، هر نه سورتده اولود ایسه اولسون ولو که شهادت زور دن نشأت ایتمز بولونسون ، حا کمک ظاهره مبتنی و حقیقته منافی اولان حکمی ، قضاء یعنی ظاهراً نافذ اولورسه ده ، دیانته یعنی باطاً و وجداناً نافذ اولماز. مثلاً بر کیمسه دیگرینک مالی ، اشترا و اتهاب کی معین بر سبب بیان ایتکمزین کندینسک اولدیغنی ادعا و بوا دعائنی شهادت زور ایله اثبات ایدرک بر حکم استحصال ایدرک اولسه . اومال او کیمسه به دیانته حلال اولماز . بوتون ائمه مجتهدین بو مسئلهده متفقدر .

فقط عقود و فسوخده شهادت زوره بناءً واقع اولان حکم ، قضاء و ظاهراً نافذ اولورسه ده دیانته و باطناً نافذ اولوری اولمازی؟ بو مسئلهده امام اعظم حضرتلری جمهور فقهایه مخالفت ایتمیدر. جمهوره کوره ملک مطلق دعوالرنده اولدیغنی کی ظاهراً نافذ اولورسه ده باطاً نافذ اولماز. امام ابو یوسف و محمد حضراتی ده بو فکرده در. لکن امام اعظمه کوره هم ظاهراً و هم باطاً نافذ اولور. مشارالیه «عقود و فسوخده قضا ، انشاء عقد حکمنده در» دیور.

معین بر مذهبی الزام واجبمیدر؟

یوقاریده (طبقات فقها) بمخبرك مقدمه سنده تفصیلاً بیان وایضاح ایشدك كه اوائل اسلامده وحتی دور مجتهدینده عالم اولسون ، جاهل اولسون هیچ بر فرد، کندیسی دیگر برذاتك - ولو كه اوزات اك بویوك مجتهد اولسون اجتهاداتیله مقید قیلمازدی . اجتهاده مقتدر اولانلر اجتهاد ایدرلر ، مقتدر اولمایانلرده تصادف ایتدکلری مجتهددن استفتا ایلرلردی . بر مسئلهك حکمنی برذاتدن استفتا ایدرلرسه ، دیگر بر مسئلهك حکمنی ده دیگر برذاتدن استفتا ایدرلردی . وویریلن فتوی قناعت بخش اولورسه آنکله عامل اولورلر ، قناعت بخش اولمازسه قناعت حاصل ایدنجه به قدر دیگر لرندن استفتا ایلرلردی . بو حال شایع وفقها حضورنده جاری اولدینی حالدہ فقها طرفندن رد وانکار اولنمازدی .

بالعکس اسلاف کرام حضراتی ، خالق کوری کورینه تقلید جیلکدن منع ایله تدقیق و تدبیه ، نظر و تأمله - سوق ایدرلردی . امام اعظم ابوحنیفه نعمان بن ثابت حضرتلری ، بر حادثه حقه سده فتوی ویرنجیه (بو نعمان بن ثابتك رأییدر ، واستنباطنه مقتدر اولابیله دیکمز آرانك اك ایسی ده بودر . کیم که بوندن دها کوزل بر فکر در میان ایدرایسه ، صوابه اولی اولان او فکر دور .) بویورمشدر . امام مالک حضرتلری ده (هیچ بر کیمسه یوقدر که آنک هر کلامی واجب الامتثال اولسون . بو ، آنجق معصوم و خطادن مصون اولان جناب رسالت مآب اقتضیه خاص بر خصلت جلیله و کیفیت استثناییه در . آندن بانقه هر کیم اولور ایسه اولسون ، آنک بعض کلامی شایان اخذ و قبول ایسه بعض کلامی ده مردوددر .) دیمشدر . [۱] دیکر ائمه فقهده بو یولده ایراد کلام ایله مشلردر .

[۱] فی (البیواتیت و الجواهر) للشمرانی روی عن ابی حنیفة انه کان اذی افقی یقول : هذا رأی النعمان بن ثابت (یعنی نسبه) وهوا حسن ما قدرنا علیه . فن جاء با

خلاصه ، مذاهب فقهیه تقرر و متمصلبری ظهور ایتمزدن اول ، زمانمزدده اولدینی کبی اهل اسلام معین بر مذهبی التزام ایتمزلردی . فقهاده خاتی بو یوله سوق ایتمه مشلردی . چونکه بو بایده نه عقلی ، نه ده نقلی بر دلیل یوقدر . بناءً علیه اجتهاده مقتدر اولمایانلر ایچون معین بر مذهبی التزام واجب دکلدرد . التزام اولونورسه جائز اولور ، لکن واجب دکلدرد . واجب اولان ، علی الاطلاق بر مجتهدی تقلیددر . بوجهتله بعض مسائلده بر مجتهدی ، دیگر بعض مسائلده دیگر بر مجتهدی تقلید جائز اولور . بو خصوصده بر مانع شرعی یوقدر .

ایشته بو مسئلهده جمهور فقهائک رأی بودر . فقط ولی الله دهلوی نک (عقد الجید فی احکام الاجتهاد و التقلید) رساله نده اکابر فقههای شافیه دن (عمرالدین ابن عبدالسلام) دن نقلاً دیدیکی کبی معلوم اولان مذاهب اربعه فقهیه تقرر و متمصلبری ظهور ایشدکدن ص و کره متأخرین فقهادن بر شریزه قیله ، اصحاب عجز و تقلید ایچون مذاهب فقهیه دن معین بر مذهبی التزامک وجوبنه ذاهب اولمشلردرد . لکن بو ذهاب ، بر دلیل صحیحه مستند اولمدیغندن جمهور فقها طرفندن قبول ایدلیوب رد ایدلمشدر . بو مسئله آناغیده (بر مذهبدن دیگر مذهبه انتقال) مسئله سنک ایضاح حکمی انناسنده بر قات دها توضیح اولونجه قدر .

مسئلهیه نهایت ویرمزدن اول شوراسنی عرض ایدیم که کرک بو مسئلهده و کرک مسائل آتیسه ده موضوع بحث اولان مقلدن مقصد ، احکام فقهیه بی آ کلابه حق قدر تحصیل کورمش اولان اصحاب فکر و اذعاندر ، عوام ناس دکلدرد . چونکه عوام حکمنده اولانلر احکام مذهبی بیلمکدن حاجز وزمانلرنده و کندی ممالک تیرنده موجود علمانک اقوالنه تابه درلر . بونک ایچوندر که فقها عوام ایچون مذهب یوقدر ، عوامک مذهبی مفتی نک فتواسیدر . دیمشلردرد .

حسن منه فهو اولی بالصواب .

قال الامام مالک : ما من احد الا و ماخوذ من کلامه و مرادود منه الا رسول الله صلی الله علیه وسلم .

مذهب ایله حدیث تعارض ایتدکده هانکیسی ترجیح اولونور؟

مسئله ، بوشکلده ومطابق بر صورتده وضع ایدیله جک اولور ایسه ، بوکا بلاتردد ، البته حدیث ترجیح اولونور ، جوانی ویریلیر . عکس تقدیرده ده صاحبی مذهبی ، درجه سنه اصعاد ایتک وحتی صاحب شریعت حضرت رسالتناه اقدمن اوزرینه تقدیم ایله ک لازم کلیر که قطعاً جائز دکادر . بو اک بو یوک ضلالت اعتقادیه اولور . صاحب مذهبده بزم کبی افراد امتدن بر فرددر . اوده بزم کبی ، بزده اونک کبی شریعتیه مربوط و (اتبعوا ما نزل الیکم من ربکم ولا تتبعوا من دونه اولیاء) آیت جلیله - ایله جمله من شرع منزله اتباع ایله مأمورز .

یوقاریده ، فصل اولده بالمناسبه سویله مشدک که دین اسلامده حضرت رسالتناه اقدمن دن باشقه بر پیغمبر و بر شارع یوقدر . کذلک دین اسلامده - قاتولک مذهبنده اولدینی کبی - تشریع احکامده یعنی وضع شریعت خصوصنده نیابت اصولی جاری دکادر . مجتهدلر ، مذهب مؤسسسی اماملر ، شارع اولمدقلری کبی وضع شریعتده حضرت شارع طرفندن وکالت مخصوصه پی ده حائز دکالردر . بنسأ علیه نه قدر بو یوک مجتهد وامام اولور ایسه اولسون ، هیچ بری معصوم ولا یخطی دکادر . هیچ برینک نصه و شریعتیه مخالف رأی شایان قبول اولاماز . بزم صاحب مذهبیه اتباع ایدیشیمز عجز مندن ، دوغریدن دوغری یه کتاب و نته مراجعتله بالذات استنباط احکامه مقتدر اولامدیغمنز دندر . یوقسه اوندی بر قدسیت ، بروایت دینه و نیابت تشریعیه تصور و اعتقاد ایتدیگمنز دن دولانی دکادر .

بواعث ناد ایله بر مجتهدی تقلید ایتک و اونک مذهبی خلافتیه نصوص شرعییه ظاهر اولسه بیله بینه اونک مذهبی خارجیه چیه. اما بی تصمیم ایله مک، بر جوق نصوص قرآنییه ایله و از جمله آنفاً ذکر اولونان آیت کریمه نك فقرة نانیسی اولان (ولا تتبعوا من دونه اولیاء) نظام جلیلی ایله قطبياً ممنوع و حرامدر، صراط مستقیم اسلامدن خروجر.

قاتولکک ایله بر قسم موسویلر، کندی رؤسای روحانیلرینه بویولده اعتقاد ایله اتباع ایده رک، آنلرک تحلیل ایتدکارینی حلال و تحریم ایله دکلیرینی حرام اعتقاد ایتدکاری ایچون، قرآن کریم (اتخذوا اخبارهم و رهبانهم ارباباً من دون الله = یهود و نصاری رؤسای روحانیلرینی (الله) -ن بانقه ارباب و آلهم اتخاذا ایتدیلر) آیت جلیله سیله آنلری، بویولده حرکتلرندن دولایی رؤسای روحانیلرینی کندیلرینه رب و آله اتخاذا ایتش اولدقلرینی بیان ایله ذم و تقییح ایدیور.

اڤک معتبر تفسیرلرده و (سنن ترمذی) ده بیان اولوندینی اوزره حضرت رسول اکرم « صلی الله علیه و سلم »، بو آیت منیفه نك تفسیری ضمنتده (یهود و نصاری رؤسای روحانیلرینه عبادت ایتمه مشلردی فقط رؤسای روحانیلری آنلره بر شئی تحلیل ایتدنج حلال و تحریم ایتدنج حرام اعتقاد ایله مشلردی) بویور مشلر و بو بیانات سذیلرله بو کیفیتک اخبار و رهبانی (رب و آله) اتخاذا ایتک دیمک اولدینی تفهیم ایله مشلردر . [۱]

مسئله بونقطه نظر دن تدقیق ایتدیلدنجه بالاده ایراد اولونان (مذهبه حدیث ته ارض ایتدکده هانکیسی ترجیح اولونور؟) سؤالنک جوابی، کندیلکنندن نظاهر ایدر . یعنی یوقاریده سویله دیکمز کبی « البته حدیث ترجیح اولونور »

[۱] فی (سنن الترمذی) فی باب (تفسیر آیه - سورة التوبة) عن عدی بن حاتم قال آیت انبی صلی الله علیه و سلم فی عنقی صلیب من ذهب فقال انبی یا عدی اطرح عنک هذا الوش . و سمعته یقرأ فی (سورة براءة) (اتخذوا اخبارهم و رهبانهم ارباباً من دون الله) قال صلی الله علیه و سلم (اما انهم لم یکنوا یعبدونهم و لکنهم كانوا اذا احوالهم شیئا استحلوه و اذا حر . و اعلیهم شیئا حر موه) .

دیمك اقتضا ایدر . بونده تردده محل یوقدر . بوتون ائمه فقه بوجوابده . متحد .
الساندر . امام شافعی (اذا صح الحديث فهو مذهبي = بر حدیثك صحفی تحقیق
ایدنجه اوحدیثك مضمونی بنم مذهبمدر) دیمشدر . دیگر بر روایتده (بنم
كلامه مخالف بر حدیث صحیح سزه بالغ اولور ایسه او حدیثه اتباع ایدیکز ،
بنم سوزیمی دیواره چارییکز .) دیمشدر .

باشده استادلری امام اعظم حضرتلری اولدینی حالده ائمه حنفیهده (لایحل
لاحد ان یفتی) (وفی روایة ان یقول) یقولنا ما لم یعلم من این قلنا = بزم زردن
آلوب سوبله دیکمزی یلمدکجه هیچ بر کیمسه ایچون بزم قولمزله فتوی ویرمک
(بر روایتده بزم قولمزله قائل وعامل اولمق) (حلال اولماز) دیمشدر . امام
مالکک (بن بشرم ، بعضاً خطأ وبعضاً اصابت ایدرم . بوجهتله بنم رأیی
تدقیق ایدیکز ، کتابه ویانته موافق بولورسه کز قبول ایدیکز ، بولمازسه کز
رد ایدیکز .) دیدیکی ، امام احمدکده (نه بنی ، نه مالکی ، نهده نخبی واوزاعی بی ،
ونهده باشقه سنی تقلید ایدیکز . احکام شرعی بی اونلرک آلدقلری بردن آلیکز)
دیمش اولدینی یوقاریده ذکر اولونمشدی .

ایشته بو مسئلهده اصل اولان بودر . یعنی مذهب ایله حدیثك تعارضی
حالنده اصل اولان ، حدیث ایله عمل اولونمک لزو میدر . بوا-اس وبولزوم
بروجه معروض نص-وص قاطعه شرعیه واجماع ائمه ایله ثابت بر قضیه محکمه
ایکن ، متأخریندن بعض علمانک بونک عکسفی ادعا ایتمی ، هله « خادمی ،
صرحومک (مجامع الحقائق) نامنده کی اثرنده مطلق اوله رق (اقوال فقهاء
نصوصه مرجحدر) دیمسوی و بونی فقهای حنفیه عندنده بر قول مختارمش کی
کوسترمه-فی اصلا دوغری دکدر ، نقصان تحقیقندن متولد قول س-خیفدر .
دهلوی نک (عقدالجید) رساله سنه و (هدایه) ایله (بدایع) ک کتاب الصومنده
« افطار محتجم اوزرینه کفارت لازم کلوب کلیه جکی ، مسئله سنه مراجعت
ایدیلیرسه مدعا منک صدقی تبیین ایدر . [۱]

[۱] قال فی (الهدایه) قول الرسول لاینزل عن قول المفتی . وقال فی (البدایع)
فی تلك المسئلة یعنی فی مسئله افطار المحتجم : ظاهر الحدیث واجب العمل به فی الاصل ...

اوت ، « اقوال فقہا نصوصہ مرجحدر . » سوزی ، نصوصك معانہنی
 آكلا مقدر تاجز عوام حقندہ در . « دینیلہ جك اولور ایسه ، اولوقت دوغری
 اولور . نته کیم امام ابویوسفدن اقوال فقہانك ظواہر احادیثہ ترجیح اولونمسی
 لزومنه دائر منقول اولان روایتده ، عوام حقندہ در . بوجہت ذکر اولونان
 (ہدایہ) ایلہ (بدایع) نہ . مصر حدر . چونکہ عوام نصوص شرعیہ واحادیث
 نبویہ نك معنارینی ، تاویلارینی ، روایت ایڈیلن حدیثك درجہ صحیحی ، منسوخ
 اولوب اولدیغنی بیله من . احتمال کہ اوحدیث ، حدذاتندہ حدیث صحیح دکلدر .
 کاذب وموضوعدر . یاخود ظاہر معناسنی مقصود دکلدر ، مؤولدر ، بلکہدہ
 منسوخدر . عوام ایلہ عوام حکمندہ اولانلر بورالری بیله میہ جکاری جہتلہ
 اولنراوزرینہ واجب اولان ، سوثوق الکلام وشایان اعتماد برمفتی نك فتواسیلہ عملدر .
 فقط بحث عوام حقندہ دکلدر . اولنر دائرہ بچندن خارجدر لر . بورادہ
 موضوع بحث اولان مقلدن مقصد ، اجتمادہ مقتدر اولماقلہ برابر قواعد
 اصولہ ومعانی نصوصہ ، اسباب وعلل شرعیہ یہ کسب وقوف ایده جك قدر
 تحصیل کورن اصحاب علم واذعاندر . علی العموم مذهب مباحثندہ (مقلد) تعبیر
 مطلقندن مقصود اولان ، دائما بوجہ اصحاب علم وعرفاندر . چونکہ برمذہبہ
 انتساب آنمجب بونلر طرفندن اولورسہ صحیح اولور . زیرا برمذہبہ انتساب
 اولمذہبک احکامنی بیلمکله اولور . عوام انتساب ایتمک ایستدیکی مذہبک احکامنی
 بیله من کہ انتسابی صحیح اولسون . بوملاحظہ میبیدر کہ فقہا « عوامک مذہبی
 یوقدر ، عوامک دلیلیدہ ، مذہبی دہ مفتی نك فتواسیدر . » دیمشردر . مفتی
 مرہانکی مذہبہ منتسب اولور ایسه اولسون ، عوام حقندہ مساویدر . [۱]

الحاصل ، انوار علم ومعرفتہ فکرنی تنویر ایده رک نصوص شرعیہ واحادیث
 نبویہ نك حقیقی ومجازی معنارینی وتاویلات صحیحہ سنی بیلن ، ذکی ومنفکر

[۱] قال فی البحر لان العالی يجب علیه تقليد العالم اذا كان يمتد على فتواه . ثم
 قال وقد علم من هذا ان مذهب العالی فتوى مفتيه من غير تقييد بمذهب ولهذا قال
 في الفتوح الحكم في حق العالی فتوى مفتيه (رد المحتار في مسئلة افطار المحتجم) العالی
 منسوب الى العامة وهم الجهال .

برذاتی، اصحابِ جہل و عمی در کہ سنہ تنزیل ایلہ حضرت شارعک کلامنہ فارشی اقوال فقہا ایلہ مقید قیلمق، شعورسنز، کور برتقایده سوق ایتمک دیمکدر کہ عقلاّده، شرعآده تجویز اولوناماز . بناءً علیہ بوکبی اصحاب علم و عرفان عندندہ ، منسوب اولدینی مذهبک حکم مجردینہ مخالف بر حدیثک صحیحی تحویق ایتدکده، عہدہ لرینہ ترتب ایدن وظیفہ، (اتبعوا ما نزل الیکم من ربکم الخ) امر جلیانہ امتثالاً مذهبنی ترک ایلہ او حدیثہ اتباعدر . بر حدیثک صحیحی، (بخاری) و (مسلم) کی معتبر و متداول کتب احادیثہ موجود اولسی وائتہ حدیثک نصحیح و نحسبینی ایلہ تحقیق ایدہ جکی کی، منسوخ اولدینی ده کذلک ائمہ حدیثک تحقیق و تصریحی و تخصیص بر مجتہد مستفکاک او حدیثہ احتجاجی ایلہ تحقیق ایدر .

اوج بش سطر اول موضوع بحث اولان مسئلہ بی تصویر و تحریر ایدرکن « مذهبک حکم مجردینہ مخالف بر حدیثک صحیحی تحویق ایتدکده، دیدک، مذهبک حکمنی « مجرد، قیدیلہ تقید ایلہ دک . چونکہ مخالف اولان حدیث، مذهبک حکم مجردینہ دکلده (حکم مدلل) نہ مخالف اولورسه، اولوقت مسئلہ ده کیشیر . زیرا برنجی صورتده مقلد، صاحب مذهبک کلامیلہ صاحب شریعتک کلامی آراسنده قالمش اولویور . آنکچون صاحب شریعتک کلامی ترجیح ایلہ آکا اتباع ایتمک لازمدر دیدک . ایکنجی مسئلہ ده ایسه مقلد، بویله بر وضعیتده بولونمیور . بلکہ صاحب شریعتک یکدیگرینہ معارض ایکی کلامی، ایکی دلیل شرعی قارشیدسنده بولونیور دیمکدر کہ بویکی مسئلہ آراسنده فرق عظیم وارددر . موضوع بحث اولان برنجی مسئلہ در، ایکنجی مسئلہ دکلدر .

ایکنجی مسئلہ حقندہ مقلد ایچون نہ یولده حرکت ایدلسی لازم کله جکی بحثنہ کلنجہ : بوندہ مقلدک درجه سنہ باقیلیر . مقلد یا دلیلده نظره اهلدر ویا دکلدر . مقلد اگر دلیلده نظر و محاکمہ یه اهل ایسه دلائلدن برینی دیکرینہ ترجیح اقتدارینی حائز دیمکدر . یوقاریده « طبقات فقہا، » بحثندہ مرور

ایتمشدی که بو اتمدارده بولومان مقلده حنفیلر (اهل ترجیح) ، شافعیلر (مجتهد فی الفتوی) اطلاق ایدی-ورلر . او حالدہ بو کیلرہ لایق اولان ، بالمحا کہ او ایکی دلیدن هانکیسی دها قوتلی بولورسه آنی ترجیح ایله مکدره . یوق اکر مقلد دایلدہ نظره اهل دکلسه ، بو صورتده کندی امانک دلیانی التزام ایدر ، یعنی منسوب اولدینی مذهبک حکمیله عامل اولور . زیرا بو تقدیرده مقلد حتمده منسوب اولدینی مذهبی ترکه بر موجب شرعی یوقدر . فضله اولهرق مقلده کوره ، کندی امانک دلیلی ، آنک التزامیله دها قوتلی دیمکدر . مکرکه ایکنجه دلیل ایله دیکر بر مجتهد مستقل استدلال اتمش اولسون . اولوقت دلیلار آراستده مساوات حاصل اولمش اولور . بوسورتده مقلد مخیر اولور . بو بر مذهبدن دیکرینه انتقال م-مثله سیدرکه بحث آتیده ده بو مسئلهینی ایضاح ایدم جکیز .

ایشته بومسئله لک تحقیقی بوندن عبارتدر . فقط خیلی زماندنبری بومسئله لر ، نظریات ساحه سنده قلمشله ، تطبیقانده ایسه هر مذهب مقلدینی کندی مذهبلیینه مخالف اولان دلیل نه قدر قوتلی اولور ایسه اولسون ، ینه کندی مذهبلیندن آیرلما مشلردر . بو خصوصنده اک زیاده ایلری کیدز مقلدین حنفیه در . بونلر (مذهب حنفی به مخالف اولان آیات واحادیث ، نسخه ویا تأویله ، تخصیصه ویا ترجیحه حمل اولونور . یوقسه فقهای حنفینک اطلاعنه بالغ اولمادیقنه حمل اولونماز .) دیکرک هر هانکی بومسئله ده مذهبدن آیرلمه نی تجویز اتمه مشلر ، وبوکچی جوجقلره یاقیشیر تأویلات ساده دلانه ایله (قول فقها نصوصه مرحددر) دیمشلردر ... (کل حزب بمالدهم فرحون) .

کل بما عنده مستبشر فرح
یژی السعادة فيما قال واعتقدا

بر مذهبیدن دیگر مذهب انتقال

مباحث مقدمه سر دو ایضاح اولونان دلائل و مطالعاتن ده آکلا شبله جنی اوزره ، هنوز هیچ بر مذهبی التزام ایتمش اولان بر مقلد ایچون، مثلاً بو کون اهتدا ایدن بر مهتدی ایچون جمیع مسائل فقهیده مطرداً معین بر مذهبی التزام واجب اولمادینی کی، اولج؛ معین بر مذهبی التزام ایدن بر مقلد ایچون ده اومذهبه ثبات واستمرار واجب دکلدرد. برنجیسی دیلرسه مذاهب موجوده دن برتی بالتعین التزام ایدر؛ دیلرسه هیچ برتی التزام ایتمیوب بعض مسائلده بر مذهبک، دیگر بعض مسائلده دیگر بر مذهبک احکامیه عامل اولور.

بونک کی ایکنجیسی ده ایترسه التزام ایتمش اولدینی مذهبده ثبات ایدوب هیچ بر مسئله ده آنک خارجه چیقماز، ایترسه التزامدن رجوع و بئله علیه بعض مسائلده اومذهبی ترک ایله. دیگر مذهب انتقال و آنک احکامیه عمل ایلر. هر ایکی مقلد ایچون هر ایکی صورت ده جائزدر. هیچ بری واجب دکلدرد. چونکه بو باده (فاسأوا اهل الذکر ان کتم لانعلمون) آیت جلیله سیله و جوبی تحقیق ایدن شی، علی الاطلاق بر مجتهدی تقلیددر. اومجهد ایتر اولج بر مسئله ده تقلید ایدلمش اولان مجتهد اولسون، ایتر باشقه مجتهد اولسون میسار ایدر. زیرا آیت مشارالمهاتک و خصوصیه کی حکمی مطلقدر. شو حالده تقلید ایدیلرک مجتهدک دائماً عین مجتهد اولماسنک و جوسته ذاهب اولماق، آیتک اطلاقنی تقلید دیمک اولور که جائز دکلدرد. چونکه قاعده اصولیه جه بر نص شرعی نک اطلاقنی تقلید، اونصک حکمی قسماً نسخدر. بوا یسه آنجق اونص شرعی درجه سنده دیگر بر نص شرعی ایله اولابیلیر. اولیه بر نص شرعی بولونمقدجه جائز اولماز. بوراده ده اولیه بر نص شرعی وارد اولمامشدر.

یوقاریده دفعات ایله سوپله مشدک که مذاهب فقهیه نک تقریرندن اول اهالی،

معین بر مذهب ابله مقید اولمازلردی . بر مسئله نك حکم شرعیسی او کونک ایسته دکاری زمان ، هانکی مجتهد و فقیهه تصادف ایدر لرسه اوکا سوال ایدر لردی . بو کون بر مجتهددن استفتا ایدر لرسه ، یارینده دیگر بر مجتهددن استفتا ایدر لردی . بو کیفیت بین الناس شایع و متکرر اولدینی حالده نه فقههای اصحاب و تابعین، نده دهاسو کره کان مجتهدین طرفندن ردوانکار اولونماشدی .
(کذا فی التحریر)

فقط مذاهب اربعه نك تقررندن صوکره فقها دن بر زمره قایله ، بونی تجویز ایتیموب اصحاب تقلید ایچون تقرر ایدن مذاهدن بر بی التزام ابله آنده استمرار لازمدر دیمش لردر که امام (غزالی) بونلردندر . لکن بو فکر بر دلیل شرعی به مستند اولمادینی ایچون جمهور فقها عنندنه ، نظر قبول اولماشدر . بونلر اول معین بر مذهبی التزام ایتمش اولان مقلد حقنده (مادام که بر مذهبی التزام ایتمشدر ، آرتق آنده ثبات واستمرار لازم اولمشدر . چونکه بر شیئی التزام اول شیئک لزوم و وجوبی استلزام ایدر . آنک ایچوندر که ه کشی التزامله الزام اولونور ، دینیر .) ثانیا کرک بر مذهبی التزام ایتمش اولسون و کرک اولماسون هر ایکی نوع مقلدله شامل اولوق اوزره (اصحاب تقلید ، معین بر مذهبله تقلید ایدلمه جک اولور لرسه ، حسب البشریه کندی - مقلدنده اهون اولان احکامی تبعه قیام و بو صورتله هر مذهبک نفسه ملام دوشن رخص و تخفیفاتی اختیار و التزام ایدرلر . بو ایسه تشهدیز ، مقتضای شهوته اتباعدر . وبالنتیجه مذاهب فقهیه بی ملعبه اتخاذ ایتک دیمکدر که تجویز اولونماز .) دیورلر .

حالبوکه مطلق دره یان ایدلدیکی صورتده بو ایکی نوع مطالعه نك هر ایکسیده دوغری اولماز . نته کیم بوراده دوغری اولمادینی کی . فی الحقیقه بر شیئی التزام اول شیئک لزومی استلزام ایدر ، بناء علیه بر کیمسه بر شیئی تعهد و التزام ایدنجه اول شیئی ایفا ایتک لازم کلیر . لکن بو ، مطلق و هر یرده دکلدر . بلکه تعهدات متقابلهی متضمن عقود و فسوخده ، حقوق

ومعاملات ناسه متعلق مسائلده در . بوده بر حتی اخلال و آخری اضرار
ایتمه مک ایچوندر . بو کبی مسائل خارجنده و بر حقه مقابل اولمایان برلرده
التزام مجرد لزوم و وجوبی استلزام ایتمز . چونکه بوبله برلرده شارع ، التزام
مجردی ملزم قیلماشدر . بوندن دولاییدرکه (متبرع تبرعه جبر اولونماز)
دینیر ، و عوض مقابله اولمایان هبیدن رجوع صحیح اولور .

خص-وصیله (ابن همام) که (فتح القدر) ده دیدیکی کبی بر مقلدک ایلریده
واقع اولاجق مسائل و حادثانده ، وقوعدن اول معین بر مذهبی التزام ایتمه
حقیقتده التزام دکدر ؛ التزامی وعد و یا تملیقدر . التزام حقیقی آنجق بر
حادثه مینه نک حکمنی طلب حالده ، یعنی بر فعل مخصوصی اجرا ائناسنده
تحقق ایدر . الحاصل شارع التزام مجردی یالکنز برلرده ملزم یعنی موجب
التزام قیلماشدرکه اوده عبادت نوعدن اولان (بذر) در . اوتک خارجنده باشقه
برلرده ملزم قیلماشدر . (کذا فی التقرير شرح التحریر) . ایشته بو حقیقت
شرعییه بناء در که بوراده (کشی التزامیله التزام اولونور) قاعده سنه تمسک
دوغری دکدر .

ایکنجی مطالعهیه ، یعنی هر مذهبک نفسه . لایم اولان احکام مخففه سنی تبع
والتزام ایتمک مسئله سنه کانجه : بو مسئله ده نظر دتمه آیناسی لازم کان ایکی جهت
وار . بری هر مذهبک احکام مخففه سنی نفس تبع و اختیار ، دیکری مذاهب
فقهیه پی ملعبه اتخاذ ایتمک غرضیله استحقاردر . بونلر باشقه باشقه شیلردر ،
بر برینه قارشیدر میوب بیلرینی تفریق ایتمک اقتضا ایدر . چونکه ایکنجی
برنجیسنک لازم غیر مفارقی دکدر . بناء علیه ایکنجیسنک عدم جوازندن
برنجیسنکده عدم جوازی لازم کلز . بو لازم کلمبکی کبی برنجیسنک جائز
اولماسندن ایکنجیسنکده جائز اولماسی اقتضا ایتمز . شو حالده مذاهب فقهیه پی
قصداً ملعبه اتخاذ ایتمک صورتیله استحقار مذموم اولدینی ایچون جائز اولماقله
برابر ، بو مقصدله اولیه رق هر مذهبک احکام مخففه سنی تبع و اختیار جائز
اولایلیر .

چونکہ مذاہب فقہیہ بی استحقاق ایتمکسزین مجرد یسر و سهولتی التزام مقصدیله هر مذهبك احكام مخففه سی اخذ واختیار مذموم دکلدرد. زیرا (بخاری شریف) ك و کتاب الادب، نده محرر اولدینی اوزره رسول الله اقدمن حضرتلری هر نه وقت ایکی شی بیننده مخیر قیلدش اولسه، آنلرك اك قولانی اختیار ایدر و اتمی حتمده یسر و تخفیفی سوردی. اصحاب کرامه، اطرافه کوندر دینی ولان و قضایهده خلقه قولایلق کوسترمه لرینی، تنفیری موجب نصیباندن اجتناب ایتمه لرینی توصیه یو سوردی. بوندن و (یریدالله بکم الیسر ولا یرید بکم العسر) و (یریدالله ان یخفف عنکم) آیت جلیله لرینه (خیر دینکم ایسره) و (یمنت بالحیفة السمحة) حدیث شریفلری کی بو باده وارد اولان بر جوق نصوص شرعیه نك دلالتلرندن آکلا شیلیر که احکام شرعیه بی تزییف و استحقاق فرضیله اولمایوب مجرد یسر و سهولتی التزام مقصدیله، هر مذهبك احکام مخففه سی اخذ واختیار جائزدر، مذموم و ممنوع دکلدرد.

و یرده (اختلاف اتمی رحمة واسمة) حدیث مشهوری منطوقجه اختلاف فقهانك رحمت الهیه اولماسی، هر مذهبك احکام مخففه سیله عمالك جوازینه منوطدر. عکس تقدیرده اختلاف واقع رحمت دکل، نقت اولور. کرچه بو حدیث، معتبرات اجادیشده موجود دکلدرد، و حتی بعض ائمه حدیث بونك صحیحی انکار ایله موضوع اولدیغنه قائل اولمشدر. لکن السنه فقهاده مشهور و کتب فقیهده مبطوردرد. حدیث مذکورك صحیحی تسلیم ایلمیه جك اولسه بیله اختلاف فقهانك مشروعیتیه دیه جك یوقدر یا؟ شو حالده مادام که اختلاف فقها مشروعدر. آنك نتیجه سی اولان اقوال مخفله فقها ایله عمل دخی مشروعدر. مشروع اولماه ایدی شارع آنی بزه بیلدیرردی. حالبوکه بیلدیرمه مش، سکوت ایتمشدر. همده معرض حاجتده سکوت ایتمشدر. بوده (وسکت عن اشیاء رحمة بکم لاعن نسیان فلا تجتوا عنها) حدیث نبوی مفهومیجه اونوتدیغندن دولایی دکل، بلکه محضا لطیف و رحمتدن دولایی سکوت ایتمشدر. دیمك که مشروعدر. (وما كان ربك نسیا)

بویوک محقق (ابن همام) ، اثر بر کزیده سی (فتح القصدیر) ده قاضی
 وفقی تک آداب و شرائطی بیان ابتدیی صروده بعض فقها و بر مذهبیدن دیگر
 مذهبه انتقال ایدن ذات آئندر و مستوجب تعزیر دره دیدکریخی بیان ایتد کندن،
 واسبب انتقال حقیقی آنجق تقلید و عمل اولومان بر مسئله خاصه تک حکمنده
 تحقق ایده بیله جکی وجودنکه بر مقلدک ایلریده واقع اوله جق مسائل حقیقه
 اجمالاً بن بوتون مسائله امام ابو حنیفه یی تقلید و آنک اقوالیله عمل ایتمکی
 التزام ایتم . ده دیسه ، حقیقه تقلید دیمک اولمیوب بلکه تقلیدی تملیق و یا
 وعدون عبارت اولدیغی در میان ایلد کدن سوکرا دیورکه : ده بر مذهبیدن
 دیگر بر مذهبه انتقال ایدن ذات آئندر ، تعزیری مستوجبر ، کبی سوزلر ،
 مجرد تخفیفات مذاهی تبعدن خلقی منع ایچون در میان ایلدش الزامات فقه ادان
 عبارتدر .

حالبوکه بن ، هر مسئله ده هانکی مجتهدک قولی اخف ایسه مقلدک آنی اخذ
 و اختیار ایتمه سی منع ایده جک نقلی و یا عقلی بر دلیل بیلمیورم . بونی بیلمدیکم
 کبی بر انشاءک ، اجتهادی شرعاً تجویز اولونان بر مجتهدک قول اخفنه اتباعی
 شرع شریفک ذم و تفسیح ایتمدیکنی ده بیلمیورم . جناب بیغبر علیه الصلاة والسلام
 اقدس ، امتندن شدت و تضییق رفع ایدن ، آنلر اوزرینه تخفیف اولونان
 احکامی سوردی .) (فتح القصدیر ، ک ادب القاضی بمجتهدک اوائله باق) .

اوت ، هر مذهبک نفسه ولایم واحف اولان احکامی اختیار مقصدیله بر
 مذهبیدن دیگر مذهبه انتقال حق غیری اخلال ایدر ایسه ، اولوقت جائز اولماز . فقط
 بونده ده حقیقتده جائز اولمایان نفس انتقال دکدر ، بلکه حق اخلال و غیری
 اضرار کیفیتدر . چونکه (لاضرر ولاضرار) حدیث شریفی مفاد نجه اسلامیتده
 ضرر و مقابله بالضرر یوقدر یعنی ممنوعدر . لکن بحث بونده دکدر ، بو بحثندن
 خارجدر . بوراده موضوع بحث اولان مسئله ، غیره ایراث ضرر ایتمک
 شرطیله هر مذهبک احکام مخففه سیله عملدرکه بروجه مشروح بوکا بر مابع شرعی
 یوقدر .

یشته شو و تحقیقات و محاکمات مستبان اولادینی اوزره هنوز معین بر مذهبی التزام ایتمین بر مقلد ایچون بعض مسائله بر مذهبک احکامیه ، دیگر بعض مسائله دیگر مذهبک احکامیه عمل جاز اولادینی کی ؛ معین بر مذهبی التزام ایدن مقلد ایچوزده قسماً و یا تماماً او مذهبی ترک ایله دیگر مذهبه انتہال جائزدر . ولو که بو ، رخص مذهبی تتبع مقصدیه اولسون . بونده بر محدود شرعی بوقدر . اکثر فقهاک رأی بودر . مکرکه بو ، غیری اضرار و یا مذاهب فقهیه یی استحقاق مقصدیه یا بلش اولسون . اولوقت جاز اولماز .

بوندن یالکیز بر مسئله مستشار که اوده ، معین بر حادثه بر مجتهدک مذهبیله عمل اولوندقدن سوکره عمل سابقدن رجوع ایله عین حادثه دیگر بر مذهبک حکمی التزام و آنکله عمله قیام اولونماسیدر . ایشته بومسئله جاز دکلدر . همده (مختصر المنہی) و (نحریر) ده بیان اولندیقنه کوره بالاتفاق جاز دکلدر . مثلاً بر کیمسه بر بالغه یی مذهب حنفی اوزره و ایسنک اذتی آلمق سزین نکاح ایتمکدن سوکره ، دونوبده مذهب شافعی اوزره و ایسنک اذتی استحصال ایدهرک بتکرار عقد نکاحه قیام ایتمه سی جاز اولماز . چونکه عقد اول مشروع و صحیح اوله رق منقذ و نافذ اولمشدر . بعضیلری (عین حادثه مذهب اولدن رجوع جاز اولمادینی کی ، او حادثه جنسندن دیگر حادثه لرده دخی آندن رجوع جاز اولماز . مثلاً یوقاریکی مثاله ذکر اولوندینی وجهله بر بالغه حقنده بر کره مذهب حنفی اوزره عقد نکاح اولوندقدن سوکره دونوبده مذهب شافعی اوزره یکیدن عقد نکاح اولونما سی جاز اولمادینی کی ، آنک وفاتی سببیه او کیمسه دیگر بر بالغه ایله ازدواج ایتمک ایسته دکده دخی کنملک مذهب شافعی اوزره نکاح ایلمه سی جاز اولماز) دیمشلسده دوغری دکلدر . چونکه بو عدم جوازی مشعر بر دلیل بوقدر .

مسائل و افادات مسروده نک جمله سی ، ائمه مذاهبک دلالتنه مطلع اولمایان و یانصوص شرعیه نک معالرینی آکلمایان مقلدر حقنده در . ائمه مذاهبک دلالتنه

كسب وقوف ايدن ونصرص شرعيه نك مضالري ووجه دلائلري فهم وتقدير .
 مقتدر اولان علمای قاصرین حقنده دكلدر . علمایه لایق وبلكاده واجب
 اولان ، هانكي امام و مجتهدك دليلنه واقف اولمش وياخود هانكي سنك دليلني
 دها قوتلی بولمش ایسه آنك قولنه اتباع ایتمكدر . چونكه اصحاب علم و معرفت
 ایچون بوصورنله حرکت ، ادراك واذعانه و مقتضای حکم وقرآنه دها موافق اولور .
 قرآن کریم (فبشر عبادی الذین یستمعون القول فیتبعون احسنه اولئک الذین
 هداهم الله واولئک هم اولو الالباب) آیت منیفه سیله ، شهر رسز اوله رقی کور کورینه
 بر کیمسه بی تقلید ایتیوب ایشیتدکری اقوال مختلفه بی تدقیق و محاکمه ایله ،
 آنلرک اک کوزلنه اتباع ایدنلری مدح و تقدیر ، و آنجق اونلرک مظهر هدايت
 وارباب درایت اولدیلرینی تبیین و مکافات الهیه ایله تبشیر ایدیور . بیانه حاجت
 یوقدرکه احکام فقهیه ده اقوال فقهانک اک کوزلی ، دلائل و اساسات شرعییه
 حکمت تشریع و مقاصد شارعیه اک زیاده توافق ایدم نیدر . [١]

رسالت پناه افد مزده ، (کن مع الحق حیث کان و میز ما اشتبه عليك بمقلک
 فان حجة الله عليك و دیمه فیک و برکاته عندک ... اخرجه الدیلمی) حدیث شریفی
 ایله ، عقلک حجت الهیه و و دیمه صمدانیه اولدیغنی و بناء علیه امور مشتبه و حقایق
 ملتبسسه نك عقل ایله فرقی و تمیز ایدمسه سی لازم کله جکفی پک بلیغ بز صورته
 تبلیغ و تبیین بو یوریه . یوقاریده اجتهاده مقتدر اولمایان علمای قاصرین
 ایچون تقلید محض جائز اولمیوب تابع اولدیلرینی مجتهدك دليلنه اطلاع و اتباع
 لازم اولدیغنی تفصیلاً ایضاح و تبات ایدلمش اولدیغندن ، تکراره دوشمه مک ایچون
 بوراده علما حقنده یوقدرله اکتفا اولونمشدر .

تلفیق

تلفیق ، لغته بر قاش پارچه‌سی دیکرینه ضم ایدرک دیکمک معنایه در .
 بطریق الحجاز هر هانکی ایکی شیئی جمع ایتک معانده دخی استعمال اولونور .
 اصطلاح فقیده ایکی ویا زیاده مذهب برینه ضد و مبین حکملرینی معین بر
 ایشده ، بر حادته فقیده جمع ایتک و بووجه ایله او حکملردن مرکب بر صورت
 مسئله وجوده کتیرمکدر . مثلا مذهب حنفیده سن بلوغه واصل اولان برقادین
 ایله عقد نکاحک صحتمده و لیسنگ اذن و رضای بولونمق شرط دکدر ، دیکر
 مذهبلرده شرطدر . مذهب مالکیده حین عقده شاهدلرک علم و حضوری شرط
 دکدر ، دیکر مذهبلرده شرطدر . مذهب شافعیده مهر تستیمیسی شرط
 دکدر ، مذهب مالکیده شرطدر . ایشته ازدواج املنده بولونان برارکک ایله برقادین
 بو اوج مذهبک کندی ایشلرینه کان حکملرینی اخذ و اختیار ایدرک بلاذن ولی ،
 بلاشهود و بلا مهر عقد نکاح ایدرک اولسالر ، بو اوج مذهبک یکدیگرینه
 مبین اولان حکملرینی نکاح فعلنده جمع ایتش اولورلرکه تعریفی صدقنده
 بولوندیغمز (تلفیق) بوندن عبارتدر .

بوقاریده مذاهب اسلامیه بی استخفاف و استحقار ایتمهک شرطیله هر مذهبک
 اهون و نفسه ملائم اولان احکامی اخذ و اختیار جائزدر دیمشک . عجیب ذکر
 اولنان (تلفیق) ده جائزیدر؟ (در مختار) صاحبی علی الاطلاق « حکم مافق بالاجماع
 باطلدر . » دیور . شاری (ابن عابدین) ده بو اطلاقه قارشى اختیار سکوت
 ایدیور . حالبوکه بزم تدقیقائمه کوره مسئله مطلق دکدر ، محتاج تفصیلدر .
 سؤال مذ کوره یعنی « تلفیق جائزیدر ، دکلیدر؟ » - وائله حقیله جواب
 ویرمش اولمق ایچون تلفیق ایکی به تفریق ایتک - و هر برینک حکمی آیری آیری
 بیان ایلمک اقتضا ایدیور .

شویله که: یا تلیقیدن اجماعه مخالف بر صورت حصوله کایر ، یا خود کلز .
اگر تلیقیدن اجماعه مخالف بر صورت حصوله کلش اولور ایسه ، ایشو تلیق
جائز اولمایوب باطل اولور . بالاده ذکر اولونان نکاح صورتنده اولدینی کی .
چونکه بلا اذن ولی ، بلا شهود و بلا مهر نکاح ، بر کوره سالف الفکر اوچ
مذهبک اوچه کورده جائز دکلدردر . زیرا یوقاریده قید و اشارت اولوندینی
اوزره بلا اذن ولی نکاح ، مذهب حنفی به کوره صحیح ایسه ده مذهب مالکی
وشافعی به کوره صحیح دکلدردر . بلا شهود نکاح ده مذهب مالکی به کوره صحیح
ایسه ده ، مذهب حنفی و شافعی به کوره صحیح دکلدردر . بلا مهر نکاح ده مذهب
شافعی و حنفی به کوره صحیح دکلدر ، اما مذهب مالکی به کوره صحیح دکلدردر .
بناءً علی ذلک اولونان صورت نکاح ، باشقه باشقه نقاط نظر دن بو اوچ مذهبک
اوجنده ده صحیح دکلدردر . چونکه برابر بو صورت نکاحک جواز و صحته باشقه
بر مجتهدده ناهب اولما مشدر . دیمک که اجماعه مخالفدر . ایسته بونک ایچون
تلیقک بونوعی جائز دکلدردر ، باطلدر . و بونده اجماع ادطعی صحیحدر ،
اما وقوع بولان تلیق ایله اجماعه مخالف بر صورت حصوله کله مش ایسه ،
بو تقدیرده تلیقک جائز اولوب اولمایه چی مخالف فیهدر . مثلاً مذهب مالکیده
آبدست صحیح و معتبر اولماق ایچون اعضای مقسوله بی دلاک ایتک شرطدر .
مذهب شافعیده ایسه شرط دکلدردر ، مذهب شافعیده ولو بلا شهوة اولسون بر
قادین ال ایله طو تله آبدست بوزولور . مذهب مالکیده ایسه بوزولماز .
شو حالده بر کیمسه ، بویکی مذهبی تقلید ایده رک ، یعنی بویکی مذهبک بر برینه
ضد اولان شوایکی حکمتی تلیق ایله رک ، بلا دلاک آبدست آلدقن و بلا شهوة
بر قادین ال ایله طو تله آبدست سو کره نماز قیلسه ، بو نماز هر ایکی مذهبه کوره
صحیح اولماز . چونکه بو تقدیرده هر ایکی مذهبه کوره آبدست نماز قیامش
دیکدر .

مع هذا بونماز مذهب حنفی به کوره صحیحدر . زیرا مذهب حنفیده اعضای
مقسوله بی دلاک ایتک آبدستک شرائط مهتدن اولمادینی کی ، مجرد بر قادین

ال ايله طومقلده آبدست بوژولماز. ديمك كه بوتلفيقدن حصوله كان سوزك،
 اجماعه مخالف دكلدر. چونكه اونمازه ايكي مذهبه كوره صحیح اولماديني حالده،
 اوچنجه بره مذهبه كوره صحیح اولويور. ايشته بوندن دولايي اصوليون، بونوع
 تلفيقك جوازنده اختلاف ايتمشلردر. (تحریر) شرحی (تحریر) ده بيان
 اولونديني اوزره محققين فقهای مالکيه دن (قرافی) ايله آنك فكرينه اشتراك
 ايدنلر بونوع تلفيقك ده عدم جوازينه، اطام فقهای شافعيه دن (امام بن دقيق
 العبد) ايله (شيخ مراد بن عبدالسلام) كي بعض فحول محققين ده بالعمس
 جوازينه ذاهب اولمشلردر.

سالف الذكر آبدست مسئله سنده اكر اوزات مذهب حنفي تقييد ايتمش
 اولسه دي، شبهه سز اونماز صحیح اولوردی. لکن مذهب حنفي تقييد والتزام
 ايتيوب مذهب مالكي ايله مذهب شافعي تليفياً تقييد ايله مشر، توبو تقدیرده
 هرايكي مذهبه كوره آبدست نماز قيلمش ديمك اولديندن، مسئله به بونقطه
 نظردن بائيلاجبه (قرافی) نك فكري عقله دها ملايم كورونور.
 بوجاهت بويله اولمقله برابر، متأخرين حنفيه آراسنده بك درين برنظمله
 هر مسئله يي اينجه دن اينجه دن انجه به تحليل وتدقيق ايله تمیز و تفرد ايتمش اولان
 مدقق شهر (ابن همام) ك (تحریر) ده قرافی، نك فكريني بيان ايدرايكن،
 بکنمديكنه دال اولان طرز افاده سنه و هر مذهبك احكام مخففه سنه اتباعك
 جوازينی صورت مطلقده بيان ايديشنه نظراً مشارايمك، ابن دقيق العبد
 ايله ابن عبدالسلام، ك فكلرلرينه اشتراك ايتديكي آكلانشيليور. بونلر، بوقاریده
 كجن نصوص شرعيه مقتضاسنجه مادام كه شارع، اصحاب تقييد ايجون بره مذهب دن
 ديكرينه استقاله و هر مذهبك احكام مخففه سنی اخذ واختياره مساعده ايتمش،
 و محضاً سهولتی موجب اولاق ايجون احكام فرعيه نك اكثرينسنده التزام سكوت
 و مسامحه ايله مشدر، بونك نتیجه لازمه سی ارق اوزره اجماعه مخالف دوشمين
 (تلفيق) كده جوازی تبين ايتمشدر. آرتق بوكا منافی ديكر مطالعاتك حكمی
 بوقدر. ديمك ايسنه بورلر.

ایشته (تلفیق) که ماهیت حقیقیه و احکام مترتبه سی بوندن عبارتند. تکرار ایدلم : تلفیق ، بر مسئله ده و بر فمل مخصوصه بر رینه مناقض اولان ایکی ویا زیاده مذہبک احکام متباینه سی جمع ایتدکدر . یوقسه حقایق شرعیه دن بی خبر بعض اصحاب جهل و تعصیک زعم ایتدکاری کی تلفیق ، باشقه باشقه ایکی ویا زیاده مسائلدن برنده بر مذہبی ، دیکرند دیکر مذہبی اختیار و التزام ایتدک دیک دکلدرد . نه اصولی بوندن ، نه ده فقہادن هیچ بر عالم بوکا تلفیق دیمه مشدره یوقاریده دلالتیلله این ایتدشدک که جمهور فقہا بونک جوازنده متفقدر . حالبوکه تلفیقک برنجی نوعی بالانفاق جائز دکلدرد . آنکچون بوکی مائین مذہبیه بی ایجه تدقیق ایددک تفریق ایتدک ، اراده کی التباسی رفع وازاله ایلدک لازمدره بمضیلری ، (تلفیق) ک بالکمز اسمنی ایشیدوب ویا برار بیسطاره شو یله جه کوروب ماهیت حقیقیه سی فرق و تمیز ایتدکاری ایچون ، حکومتجه تنظیمنه لزوم کوروان بر لایحه قانونیه نک باشقه باشقه ماده لرندہ باشقه باشقه مذہبلرک حکملری اختیار ایدلمش اولدیفنی کورونجه ، بونی تلفیق ظن ایددک جائز اولمادیفنی ادعا و بوسورثله حکومتی مشکل بر موقعه الفنا ایدیوردلر که خطای فاحشدر .

سوزمره نهایت ویرمزدن اول شو مهم جهتی ده قید و بیان ایددیم که کرک بو بچنده و کرک بحث سابقه سوبله دکارمنک کافوسی ، دولتجه بر قانون تدوین ایدلمنیک ، هرکمانکی بز مذہبک احکامیلله عمل ایدلمنیه حقیقده امر ولی الامر صدور ایتدیک تقدیرده در . اما بعضی ایشلر حقیقده (مجله) کی بر قانون تدوین ایدلمش اولور ، تدبیر دیکرله (ولایت عامه) بی حائز اولان ولی الامر (خایفه ، پادشاه) طرفدن او یولده بر امر و اراده صدور ایتدش بولونور ایسه ، آرتق او ایشلرده قانون خارجه چیقمق ، او امر و اراده بی طایماتق جائز اولماز ، چونکه بحث مخصوصنده تفصیلاً ایضاح اولونمشدی که امور جائزده اولی الامر اطاعت واجیدر (یوقاریده مرور ایدن « خایفه به اطاعتک وجوبی و وضع قوانین خصوصنده کی درجه صلاحیتی ، بحثلرینه باق)

مذاهب اربعه دن غیرى بر مذهب ایله عمل جا ترمیدر ؟

یوفاریده کرك فصل اولده و کرك (طبقات فقها) بمشده بیان ایتشدک که دور اجماعدن اعتباراً دور مجتهدینک نهایته قدر مرور ایدن اسلاف زمانده عالم اسلامده بک جوق بویوک مجتهدلر ظهور ایتشدی. و اولوقلر نه قدر مجتهد و ارسه فقهیده او قدر مذهب واردی. چونکه بوراده (مذهب) دن مقصد، شرعاً منصوص اولمایان بر مسئله فقهیده بر مجتهدک بالاجتهاد ذاهب اولدینی فکردر. فقط نه فقهای اصحاب و تابعینک، نه ده دها سوکره کن اکثر مجتهدینک افکار فقهیلری نه کندیلری طرفندن، نه باشقهلری طرفندن اولیه مذاهب اربعه کی یعنی مذهب حنفی، مالکی، شافعی و حنبلی کی اصول و فروعیه، کلیات و جزئیاتیه ضبط و تدوین ایدله مشدی.

ضبط و تدوین ایدلمش و حتی بر مدت اتباعی آراهنده دوام ایتمش اولانلری ده، بالآخره اتباعنک انقراضیه کلیاً منقرض اولمش و بر یوزنده کتسابلری بیله قالمشدر. درت یوز تاریخدنبری عالم اسلامده مضبوط و مدون اوله رقی جاری اوله کن مذاهب فقهیه، ذکر اولونان درت مذهبدن عبارتدر. بوگون کرك اصحاب و تابعینک و کرك دیگر مجتهدینک افکار فقهیلرینه، بو درت مذهبدن برینه متعلق اولمق اوزره تألیف ایدلمش اولان مطولات فقهیده، پاخود (تفسیر طبری) کی درایت و روایت جهتلری جامع اولان بویوک تفسیرلرده، و پاخود حدیث کتابلرنده و شرحلرنده تصادف ایدیلور و اقاماقتیه (طحاوی)، (طبری) و (ابن منذر نیسابوری) کی بوتون علوم شرعیده و بالجمله مذاهب فقهیده متبحر اعظم فقها طرفندن بویوک بر همتله مشاهیر مجتهدینک اقوالی جامع بک قیمتی آثار بر کزیده وجوده کتیرلمشدر. حتی مشارالیه (ابن

میزد (ك) (الاشراف) و (المبسوط) نامریله بو یولده تألیف ابتدیی ایکی کزیده اثر کیری، بروقتلر يك زیاده رغبت مظهر اوله رق ایادی فقهاده تداول ایتمش و (ابن همام) کی مدقق برفقیهه ، (فتح القدير) ده نقل اقوال خصوصنده مهم و يك معتمد مأخذ اولمشدر .

فقط نه قدر تأسف ایدلسه ینه آزدر که سوکره لری بوفیاض آثاره بجهلنک همان جلسی ، قدر و قیمت بیامین نااهللر الارنده قاله رق مؤلف محترم لری کی ضایع اولوب کیتمشدر . بو کون المزده مشارایه (ابو جعفر طبری) نک (اقوال فقها) سی ایله فلاسفه اسلامیه دن مشهور (ابن رشد) ک (بدایة المجتهد) ی بولونیورسده برنجیسی يك ناقص ، ایکنجیسی ده يك مختصر اولدیغندن مطلوب اولان خدمتی افايه کافی دکلدر لر . مع هذا ینه تشکر اولونور که بونلر ، ناصلسه اخلافه انتقال ایده بیلمشدر . غریبدر که « طبری » نک (اقوال فقها) سی ، اخیراً بر آلمان مستشرقنک همیله ، مصرده طبع ایدلمشدر . لکن اقسام سائره سی بولونه مدیغندن تک ناقص اوله رق طبع ایدلمشدر . (رحمة الاله) و (میزان شعرانی) کی ایوم موجود و متداول اولان کتابلر ایسه ، بالکتر ذکر اولوتان مذاهب اربعه مسائلی جامع اولوب دیگر مجتهدینک اقوالی جامع دکلدردر .

صدد خارجنده کی کورونن شو مقدمه یی بو صورتله بسط و تمهید ایتدکن سوکره ، اصل بمحذوئك موضوعی تشکیل ایدن (مذاهب اربعه دن باشقه بر مذهب ایله عمل جائیدر ، دکلیدر ؟) مسئله سی تدقیق ایدلم . چونکه حقایق نایبه ، اورتیه بویله بر مسئله جیقمه سنه باعث اولمش و بعض فقهای مذاهب اربعه خارجنده قالان بر مذهبله طامل اوله نک عدم جوازی فکرینه سوق ایتمشدر . اول امرده شوراسی عرض ایدیم که مباحث متقدمه ده اجرا اولوتان تحقیقاتدن يك واضح و يك قطعی بر صورتده مستبان اولدینی اوزره ، اصحاب تقلید ایچون مرهانیکی بر مجتهدی تقلید جائردر . بو خصوصده هیچ بر مجتهدک حق امتیازی یوقدر . بویله بر ادعاده بولوتان بر مجتهدده ظهور ایتمشدر . بوجهت بویله اولمغله برابر يك بدیدر که بر مسئله ده بر مجتهدی تقلید ایده بیلیمک ،

آنک فکر بیه عامل اولیٰ چون مرشدین اول او مجتهدک او مسئله حقیقه کی فکری بیلمک لازمدر. فکری معلوم اولمایان بر مجتهدی تقلید تصور اولونه ماز. بر مجتهدک بر مسئله حقیقه کی فکری بیلمک ایسه آنجق ایکی طریقک بر بیه حاصل اولاییلیز. بونک او چنجی بر طریق بوقدر. بری موثوق و معتمد بر کتابده مشهور اولوق، دیکری روایات متسلسله و متصله ایله او مجتهددن منقول بولونوق در. بیک بوقدر ستم اول کلوب کیتمش اولان بر مجتهدک اقوال فقهیه سی، او بیه آخر در اغزه روایات متسلسله ایله ضبط ایتمک عقلاً ممکن اولسه ده عاده متمتع اولدیغندن، زمانزده افکار مجتهدینه وقوف، آنجق برنجی طریق ایله حاصل اولاییلیز.

بونده نظر دفته آله جق بر نقطه واردر که مک مهمدر. اوده هر کتابده کورولن روایات قایلماقدر. چونکه او بیه کتابلر کورولور که مؤلفلری، هر ایشدکلی شیلری بلاندقیق اولنره درج ایتمش لردر. حتی شایان تأسفدر که متصوفدن شیخ اسماعیل حقی افندی مرحومک (روح البیان) ی کی بعض تفسیرلر، عقل و منطقک اصلا قبول ایتمه چکی خرافات ایله مشحوند. انسان بونلری کورونجه حیرتله ایچنده قالیور و عالم الامک اسباب تدبیردن بری ده بو اولدیغنه بلانرد حکم ایدیور. آنکچون عموماً اسلافه و خصوصاً اصحاب و تابعینه عاند اقوال و افکاره سالف الذکر (تفسیر طبری) و معتبرات فقهیه کی بیوک برفقیه و یک مدقق بر عالم طرفندن تألیف ایلمش، موثوق و هروجه ایله شایان اعتماد بر کتابده کورولمکجه اعتماد ایتمه ملیدر.

ایشته بو اسبابه بناء در که اساس اعتباریله هر هانکی بر مجتهدی تقلیدک جوازینه قائل اولان فقهها، اقوالی نقل صحیح ایله ثابت و یا معتبر و بین العلما مشهور و متداول بر کتابده موجود اولمایان مجتهدی تقلید جائز دکدر دیمش لردر. فقط بمضیلری ده ایلری به کیده رک (مذهبلری اصول و فروعیله، تعقیدات و تخصیصاتیله مذهب اوله رق مضبوط و مدون اولدینی ایچون، اعیان صحابه یی تقلید جائز دکدر.) دیور لر. حتی افام فقههای شافعیه دن (امام الحرمین)،

بومشاهده یعنی اصحابی تقلیدك عدم جوازنده عموم محققین فقهایك اجماع و اتفافی
منعقد اولدینقی نقل و ادعا ایدیور. ائمه حدیثدن و فحول متأخرین شافعیهدن
(ابن صلاح) ده عین سیددن دولایی ائمه اوبمهدن یعنی امام اعظم اروخنیفه ،
امام مالک ، امام شافعی و امام احمد حنبلیدن ماعدنا بر مجتهدی تقلید ایتمینی ،
و اتباعنك انقراضی و کتابلرینك فعدانی حسبله متروك و غیرمنتشر اولان مذاهب
فقیه ایله عمل ایله ایلی تجویز ایتمهش ، بر قسم فقهایه آنك بو فکرینه اشتراك
ایله مشدر . (ابن همامك) (تخریر) نده و (منهاج بیضاوی) شرحی (استوی) ده
بوصورتله محرردر .

فقط بو فکر ، بر قسم محققین طرفندن قبول ایله مشدر که دوغریبنقی ده
بودر . چونکه مباحث مقدمهدن ده آ کلاشلدینقی اوزره بعض مسائلده بر مجتهدی
تقلیدك جوازی ایچون ، بوتون مسائل حقنده او مجتهدك مذهب مدونی بولونمای
شرط دکادر . مع هذا بونلرک بوراده کی (عدم جواز) دن مقصدلری حرمت
و ممنوعیت شرعیه دکل ، ممنوعیت غلبه در . یعنی تقلید ایچون ماده عدم امکاندر .
دیك ایسته بورلر و حتی صراحة سویله بورلر که « مطابق تقلید ، عمومی تخصیص ،
جمعی تفصیلی ، شروطی تعیین ایلمین و بوصورتله مذهبی مضبوط و مدون اولمایان
بر مجتهدك حقیقت مذهبی نقل و اثبات متمذر و بناه علیه آ کا کسب و قوف ایتمک
غیر ممکن اولدینندن ، او مجتهدی تقلید امتناع عقلی ایله متمذر .

بوندن آ کلاشیلر که بو مجتهده فقهای آراسنده حد ذنده اختلاف بو قدر .
بوتون فقهای ، اساس اعتباریله هر هانکی بر مجتهدی تقلیدك جوازنده متفقدر .
حتی (ابن همام) ک تقلید خاصی محقق شهر (ابن امیر الحاج) استاذینك اثر
کزینی اولان (تخریر) شرحنده ، اصولیون مالکیهدن (قرافی) دن نقلاً
بالاهتدا اسلامیتله مشرف اولان بر ذات ایچون دیله دیکی مجتهدی تقلید ایتمک
جوازنده عموم فقهایك اجماعی منعقد اولدینقی بیان ، وبر کیسه نك بر مسئلهده
اصحابدن بر ذاتك ، مثلاً ابوبکر و یا عمرک قولیله عمل ایتمکدن سوکره دیگر
بر مسئلهده پنه اصحابدن دیگر بر ذاتك ، مثلاً ابو هریره و یا معاذ بن جبلک

فتوایله عمل ایتمه سنک جوازنده بالجمله اصحاب کرامک اتفاق واجاع ابتدکاری
درمیان ، و بو ایکی اجماعک خلافتی ادعا ایدن ذاتک ادعا فی مدالاً بیان
وانبات ایتمه سی لازم کله جگنی اتیان ایدیور .

خلاصه ، سادات شافعیه دن اسمی یوقاریده یکن امام (عزالدین بن
عبدالسلام) ک دیدیکی کبی ، مذاهب اربعه دن غیری بر مذهبه عملک جوازنده
فقها آراسنده ظامراً اختلاف وار کبی کورونورسده ، حقیقته یوقدر .
اختلاف آنجق مذهبی مضبوط ومدون اولمایان ویا اولوبده صوکره دن منقرض
اولان بر مجتهدی تقلید ، ممکن اولوب اولمادیقنده در . بعضیلری ماده ممکن
دکدر دیمشار . خالوکه بر مسئله بر مجتهدک قولیه عمل ایدیه بیلیمک ایچون
عقلاً وماده لازم وشرط اولان شی ، یالکیز او مجتهدک او مسئله حقیقده کی
فکرنی بیلیمکدر . یوقسه بوتون مسائل حقیقده کی اقوال وافکارنی بیلیمک
لازم دکدر . زیرا اونک بر مسئله حقیقده کی فکرنی بیلیمک ، دیگر مسائل
حقیقده کی افکارنی بیلیمک متوقف دکدر .

آنک ایچون بر مجتهدک بر مسئله حقیقده کی فکرنی بیلیمک ممکندر ،
ولوکه او مجتهدک مذهبی مذهب ومدون اولما-ون . بوده نقل صحیح ایله
منقول اولیق ویا شایان اعتماد بر کتابده محرر بولونمق صورته لرندن بریله حاصل
اولور . و بو صورته آنی تقلید ممکن ویا جز اولور . اصحاب حقیقدهده بویله در .
آنلرکده اقواله بو صورته لرندن بریله کسب وقوف ایتمک ممکندر . خصوصیه
آنلرک اقوالی معتبرات اجادیشده منقول ومذکوردر . بناء علیه داعیان صحابه پی ده
تقلید ممکن ویا جزدر . حتی مشار الیه (عزالدین بن عبدالسلام) دها ایلری به
کیدرک ، (اگر احکام فقهیه دن بر حکم حقیقده بعض صحابه نک رأی وقولی
صحیحاً ثابت اولور ایسه ، آنکله عمل لازم اولور . آکا یالکیز دلیلندن دها
واضح بر دلیل ایله مخالفت اولونه بیلیر . باشقه صورته مخالفت جائز اولماز .]
دیور . بونکده سببی ، اصحابدن بولونمق حسیله او فکری جناب رسالتآب
افندمزدن ایشتمش ویا افعال وحرکاتندن استدلال ایله مش اولما-ی احتمال
قویسیدر [(تحریر) شرحی (تقریر) . باق] .

تقلیده متعلق مباحث متقدمه بی تلخیص

(تفہیم) حقیقت کی مباحث متقدمہ بی، اہمیتہ بناءً بک زیادہ تفصیل و تطویل
ایتدی کمزور سہولت ضبطی تأمین ایچون، مباحث مذکورہ تک محتوی اولدینی
مسائل، بروجہ آتی برر برر و خلاصہ ترقیم و تجزیر صورتیہ تلخیصہ
لزوم کورولم شد:

۱ مسئلہ . — اصول دیندہ، یعنی احکام اعتقادیدہ تقلید جائز دکلدہ.
زیرا اعتقادیاتدہ مطلوب اولان عامدر تقلیدایسہ طریق علم و معرفت دکلدہ.
برجوق نصوص قاطعہ قرآنیہ، اصول دیندہ نظر واستدلالی مدح و تحسین،
تقلیدی ذم و تہییح ایلم شدہ. آنک ایچون علمای اسلامک اکثریت عظیمہ سی
اعتقادیاتدہ تقلیدک حرام اولدیندہ اتفاق ایتمشلہ، وحق (اہل سنت) دن
« اشعریہ » فرقہ سنک امام ورثیسی (ابوالحسن الاشعری) ایلم بعض اتبای و بر
قسم (مقتزلہ) علمای « مقلدک ایمانی صحیح دکلدہ » دیمشلردہ.

۲ مسئلہ . — فروع دیندہ، احکام عملیدہ بر مجتہدک دیگر مجتہدی
تقلید ایتہ سی جائز دکلدہ. چونکہ اصول دیندہ اولدینی کبی فروع دیندہ
دخی اصل اولان، استدلال و اجتہاددر. تقلید ایسہ آندن بدلدر و عجزدن
متولد بر کیفیتدر. اصل ممکن ایکن بدلہ کیدیلہ میہ جکشدن مجتہددر ایچون،
اجتہادی ترک ایلم تقلیدی التزام ایتک جائز اولاماز.

اجتہادہ مقتدر اولمایانلرہ کلنجہ: بونلر ایکی قسمدر. بری نصوص

شرعیہ نك مغالینى آ کلایان عالمی ، دیکری جاہلردر . تقلید ، مجزودن یعنی اجتہادہ عدم اقتداردن متولد بر ضرورت اولدیفندن ، ہر ایکی قسم ایچوندہ تقلید ضروریدر . شو قدر وارکہ عالمی ایچون ضروری اولان تقلید ، تقلید محض اولمایوب دایلدہ تقلیددر . بناءً علیہ عالمی ایچون تقلید محض ، یعنی قول مجزودہ اتباع جائز اولمایوب تابع اولدقلمی مجتہدك دلیلک اطلاع واجبدر . مکرکہ دلیلک اطلاع متعذر ویا متعسر اولہ . اولوقت تقلید محض کسب ضرورت ایدر . نتہ یکم جاہلردر ایچون تقلید محض ضروری و بناءً علیہ واجبدر .

۳. مسئلہ . — (افتا) ، واقع اولان سؤال واستفتایہ جواباً حکم شرعی بی بیانیدر . سؤال واستفتا ایدنہ (مستفتی ، جواب ویرنہ . یعنی حکم شرعی بی بیان ایدنہ (مفتی) ، ویریلن جوابدہ (فتوی) دینیر . فتوی اوچ نوعدر . برنجیسی عن اجتہاد ویریلن فتوی ، ایکنجیسی تخریج طریقہ ویریلن فتوی ، اوچنجیسی دہ بر مجتہد ویا مخرجك کلامی نقل و حکایہ دن عبارت اولان فتوادر . زمانزدہ ویریلن فتوالر ، ہپ اوچنجی نوعنددر . آنک ایچون زمانز مفتیلری حقیقتدہ مفتی دکلمردر ، کندیلرندن اول ویرلمش اولان فتوالرک ناقل و حکایہ جیسیدرلر . عن اجتہاد فتوی ویرہ بیلمک ایچون اجتہاد اقتدارینہ مالک اولمق شرط اولدینی کی تخریج طریقہ فتوی ویرہ بیلمک ایچوندہ شہسز تخریجہ مقتدر بولونمق شرطدر . بونک ایچوندہ اولاً — منسوب اولدینی صاحب مذہبک اصول و فروعنہ مأخذلری ودلیللری ایلہ برابر وانف اولمق ، ثانیاً . — دایلدہ نظرہ ومدہبہ مناظرہ یہ مقتدر بولونمق ، ثالثاً — احوال و عادات ناسی ، احتیاج ومصلحت عصری بیلمک لازمدر . ایشته برمفتی ، بوشرائطی جامع اولورسہ تابع اولدینی مذہبہ حکمی مصرح اولیان برمسئلہ حقندہ ، صاحب مذہب نام وحسابنہ (تخریج) طریقہ فتوی ویرہ بیلور . فقط بوشرائطی جامع اولماز ایسہ ویرہ من . ویرسہ مقبول ومعتبر اولماز . نقل و حکایہ طریقہ ویریلن فتوایہ کلنجہ : بویلہ بر فتوی معتبر اولمق ایچوندہ ، او فتوی ہانکی مجتہدك کلام وفتوایہ ایسہ او مجتہدك اسمی ذکر اولونمق ومعروف ومتداول بر کتاب معتبردن ماخوذ بولونمق مقتضیدر .

مسئله ۴ — اجتهاده مقتدر اولماین مقلد ایچون معین بر مذهبی ، یقین
 هر مسئلهده عین مذهبی التزام واجب دکدر ، جائزدر . بو جائز اولدینی کی
 بعض مسائلده بر مذهبله ، دیگر بعض مسائلده دیگر مذهبله عمل ایتمک دخی
 جائزدر . بونده بر محذور شرعی یوقدر . مقلد اوزرینه واجب اولان شی ،
 لاعلی التعمین بر مجتهدی تقلیددر . هر هانکی مجتهدی تقلید ایدرسه مطلوب حاصل
 اولور . ایستراو مجتهدده اول تقلید ایدلمش اولان مجتهد اولسون ، ایستراباشقه
 بر مجتهد اولسون مساویدر . جهور فقها بومسئلهده متفقدر .
 فقط بو حکم ، اولجه معین بر مذهبی التزام ایتمش اولانلر حقندهدر .
 لکن عجبا ، بر کیمسه مقدا مذهب حنفی و مذهب شافعی کی معین بر مذهبه
 انتساب و هر مسئلهده آنک احکامیله عمل ایتمه نیت و التزام ایتمش اولورسه ،
 آرتق بو التزامنده نیت و دوام ایتمک و بناء علیه هر مسئلهده او مذهب احکامیله
 حامل اولمق لازم و واجب اولورمی ؟ یوقسه بعض مسائلده آنی ترکله دیگر بر
 مذهبه انتقال و بونک احکامیله عمل ایتمک جائز اولورمی ؟ بو مسئله مخصوصه
 اولهرق آشاغیده آیریجه بیان اولونه جقدر .

مسئله ۵ — بر مسئلهده التزام اولونان مذهبله بر حدیث صحیح تعارض ایدنجه
 مقلد ایچون یایله جق شی نهدر ؟ حدیثی هیج نظراعتباره آلمیهرق ، مذهبله
 عمل ایتمک ، یوقسه مذهبی ترکله او حدیثک مضمونیه من عمل ایتمک لازمدر ؟
 شمعی یوقاریده بیان اولونان مسئلهده آ کلاشکدینی اوزره مسلمانلر معین
 بر مذهبله مکلف دکدرلر . اولر اوللرک مکلف اولدقلری شی ، آنجق شریعت
 اتباعدره شریعت ایسه آیات قرآنییه و احادیث صحیحته ناطق اولدینی احکامدن
 عبارتدر . بر مسلمانک بر مذهبله عامل اولماسی ، دوضریدن دوضری به آیات
 و احادیثک معارضی آ کلابه مادیغندن دولاییدر ، عجزندن متولد بر امر ضروریدر ،
 شوخالده بر مقلد ، اکر احادیث شریفه نک معارضی آ کلابه میه جق درجهده
 جاهل ایسه ، شهسز او مقلد ایچون مذهبله عمل ایتمک ، دها دوضریقی شایان

و توقي و اعتماد بر مفتي نك فتواسيله عامل اولوق لازمدره . چونكه مادام كه حديثك مناسنى آ كلا ميور ، او حالده اونك نظر نده او حديث يوق ديمكدر . بو كيلىر ايچون مذهب دخى يوقدر . بونلك مذهبي مفتي نك فتواسندن عبارتدر . فقط بر مقلد ، حديثلك معناليقنى و تضمن ايتدكارى حكملرك علل و اسبابى آ كلايه جق درجه ده تحصيل كورمش ايسه ، آرتق بو نوع مقلدلىر ايچون شارعك كلامى اولان او حديثى اصلا نظر اعتباره آلامق جائز اولماز . بناء عليه بو كيلىر حقتده مذهبي براقدرق حديثله عامل اولوق لازم كلير .

ايشته بعض فقهاء حنفيه نك قول فقهاء نصوصه مرجحدر ، سوزى ، برنجى نوع مقلدلىر حقتده در . ايكنجى نوع مقلدلىر حقتده دكلدر . بعضيلرى ، ايكنجى نوع مقلدلىر ده حديثلك ناسخلىريله منسوخلىرىنى تفريق و تميز ايدميه . جكلرندن بحث ايله ، اونلر اوزرينده حديث ايله عمل ايتيوب مذهبله عمل ايتك لازم كله جكفى بيان و بوابده امام ابو يوسف دن بروايت بولونديغنى درميان ايدىورلر . فقط امام ابو يوسف زماننده دوغرى اولان بوسوز ، زمانمزده دوغرى دكلدر . چونكه مشاراليه حضرتلى او سوزى سويلدكارى زمان ، هنوز علم حديث تدوين اولونماشدى . حالبوكه اوندن سوكره علم حديث ، اصول و فروعيله تدوين ايدلمش و ائمه حديث طرفندن بك چوق حديث كتابلىرى تأليف اولونمش ، اوزرلىبنده متعدد شرحلر يازلمشدر .

واقما بك چوق حديث كتابلىرى يازلمش اولمقله برابر ، ينه حديثلك ناسخلىرىنى منسوخلرندن فرق و تميز ايتك مشكلدر ، فقط مسئله بونده دكلدر . مسئله ، برايش و بر مسئله حقتده مذهبله تعارض ايدن بريا براقچ حديثك منسوخ اولوب اولمديغنى بيلمكدر كه بوزمانمزده بك او قدر كوچ برشى دكلدر . باخصوص او حديث ايله باشقه بر مجتهد احتجاج ايتمش اولور ايسه ... آرتق بو صورتده او حديثك منسوخ اولماديغنده شبهه قالماز . چونكه شرائطى جامع بر مجتهد كامل ، منسوخ بر حديثله استدلال ايتمز . حقيقتده ايتمش اولسه بيله ايتمز فرض اولونور . چونكه بو حديثك قارشيسنده آ كا . عارض باشقه بر آيت ويا

حدیث یوقدر . بو تقدیرده بو حدیثه اتباعاً بو مجتهدك قوليله عمل ایتك لازم اولور . مکرکه التزام ایدلمش اولان مذهب صاحبی ده باشقه بر حدیثه استدلال ایله مش اولسون . بو صورتده ایکی حدیث تمارض ایتمش دیمك اولاجقندن لایق اولان ، هانکی حدیث ده قوتلی ایسه آنکله عمل ایتمکدر .

مسئله ۶ — بر مذهبدن دیگر مذهبه انتقال جائز میدره، دکلیدر؟ دردنچی

مسئله ده ذکر اولوندینی اوزره مقدما هیچ بر مذهبی التزام ایتمش اولان بر مقلد ایچون بوتون مسائله معین بر مذهبی التزام واجب اولمایوب بعض مسائله بر مذهبك، دیگر بعض مسائله دیگر مذهبك احکاميله عامل اولوق جائز اولدینی کبی ، اولجه معین بر مذهبی التزام ایتمش اولان بر مقلد ایچون ده ، کرك جمیع مسائله وکرك بعض مسائله او مذهبی ترك ایله دیگر بر مذهبه انتقال جائز اولور . خصوصيله آنفاً بیان اولوندینی وجه ایله ایکنجی مذهب دهها واضح ودها قوتلی دلائل شرعیه ایله مؤید بولونور ایسه . . بوندن بر مسئله مستثادره که اوده ، بر مسئله خاصده و بر فعل معینده بر مذهبك حکمیه عامل اولدقدن سوکره ، آندن رجوع و آنی نقض ایله عین فعلی دیگر مذهبك حکمنه توفیقاً ایضایه قیام ایتمکدر .

بو ، بر مجتهدك بر حادثه معینهده عن اجتهاد بر حکم و بر مهینه بکزره اترق او مجتهد اجتهادینك تبدیلی حسیله او حکمی نقض ایده میه چکی کبی ، او مقلده او عملی نقض ایده من . فقط ناصل که او مجتهد ایچون او حادثه جنسندن ایکنجی بر حادثه اولکی اجتهادینه مناقض اولان ایکنجی اجتهادیه حکم ایتك جائز اولور ایسه، مقلد ایچون ده او فعل جنسندن دیگر بر فعلده باشقه بر مذهبك حکمیه عامل اولوق جائز اولور . مثلاً بر حنفی ، مذهب حنفی به توفیقاً آبدست آلهرق بو کونکی اوکله نمازینی قبلدقدن سوکره ، آندن رجوع ایله مذهب شافعی به توفیقاً یکیدن آبدست آلهرق تکرار اونمازی ادا و یا نضایه محل یوقدر . اونماز مشروع و صحیح اولهرق ادا ایدلمشدر ، تکراری زاندر . لکن او حنفی

پارینکی اوکله نمازینی قیله جنی زمان ، مذهب شافعی به توفیقاً آبدست آلهرق
قیله جق اولسه جائز اولور .

بروجه بالا بعض مسائلده بر مذهبک ، بعض مسائلده دیگر بر مذهبک ،
دیگر بعض مسائلده اوچنجی و دردیجی بر مذهبک احکامیله عمل ایتک جائز
اولونجه ؛ بونک نتیجه سی اولهرق « رخص مذاهب » ایله یعنی هر مذهبک اهون
ونفسه ملایم اولان احکام مخففه سیله عمل ایتک دخی جائز اولور . بر قسم فقها
بونک عدم جوازینه ذاهب اولمشلر ایسه ده ، (ابن هام) ک دیدیکی کی وبر
دلیل شرعی به مستند اولمایوب ، مجرد انضباط وانتظامی تأمین مقصدیله فتهانک
بو قیل مسائلده در میان ایتدکلی الزامات سیاسیهدن عبارتدر . بونک ایچوندرکه
دیگر بر قسم محققین فقها ، اشبو رخص مذاهی تیبیع واختیارک شرعاً جائز
اوله جفتی و چونکه (بعثت بالحنيفية السمحة) حدیث شریفی منظوقجه جناب
شارعک احکام عملیهده مسامحی الزام ایدر واتی اوزرینه تخفیف اولونان
احکامی سور اولدیغنی بیان ایتمشلردر .

بعضیلریده ، مذاهب مختلفه نك رخص و تخفیفاتی النقاط واختیاری اساس
اعتباریله تجویز ایتمکه برابر ، بو جوازی (تلفیق) مؤدی اولمامقله تقید
ایتمشلردر . بو قید و شرطی الاول در میان ایدن ، متأخرین مالکیهدن (محصول)
شارحی (قرانی) در . آندن سوکره کلن بر قسم متفقهبینده اونک بو فکرینه
اشترک ایله مشلردر . لکن لدی التدقیق بو مسئلهده تلفیقی ایکی قسمه تفریق ایتک
اقتضا ایدیورکه بروجه آتی تالخیص اولونور .

مسئله ۷ - تلفیق که اصطلاحده بر مسئلهده و بر ماده معینهده ایکی ویا زیاده
مذهبک بکدیگرینه مباین اولان احکامی جمع ایتمکدر ، بوندن اکر اجماعه
مخالف بر صورت حصوله کلیر ایسه جائز اولماز . مثلاً نکاحده مذهب حنفی ،
مالکی و شافعی بی جمع ایله بلاولی ، بلامهر و بلاشهود عقد نکاح اولونسه ، اشبو
نکاح ذکر اولونان اوچ مذهبک هر برینه کورد جائز اولمادیفی کی ، دیگر
عجهدلردن ده بو صورت نکاحی تجویز ایدن بر مجتهد بولونمادیغندن بو صورتله عقد

شکاح ، اجماعه مخالف و بناءً عليه غير جائزدر .

اما تلفيقدن حصوله کان صورت اجماعه مخالف اولمايويده مجتهدلر آراسنده او صورتی تجویز ایدن بر مجتهد بولونور ایسه ، بونده اختلاف اولمشدر . مشار الیه (قرافی) و پیر وانی کبی بر قسم متأخرین فقها بو نوع تلفیقده عدم جوازینه ذاهب اولمشلر ایسهده ، اکابر محققین شافعیهدن (ابن دقیق العین) و (عزالدین بن عبدالسلام) کبی بعض بویوک فقیهلرده بونک جوازینه قائل اولمشلردر . محققین حنفیهدن (ابن همام) ک (تحریر) ده کی طرز تحریرینه نظراً آنکده ، مشار الیهما « ابن دقیق » ایله « ابن عبدالسلام » ک فکرلرینه اشتراك ایندیکی آ کلاشیلور .

مسئله ۸ - بیانه حاجت یوقدرکه بر مسئلهده بر مجتهدک فکريله عامل اولایلمک ایچون ، هرشیدن اول او مجتهدک اومسئله حقنده کی فکریخی بیامک لازمدر . فکری معلوم اولمایان بر مجتهدی تقلید متصور دکلدر . بعضیلری ، بر مجتهدی تقلید صحیح اولمق ایچون او مجتهدک اصول و فروعیه مضبوط ومدون بر مذهبی موجود وزمانزده منتشر اولمق لازمدر . عکس تقدیرده او مجتهدک افکار فقهیهسنه صورت صحیحده کسب وقوف ایديله منر . زمانزده مذهبیلری اوجه ایله مدون و منتشر اولان مجتهدلر ایسه امام ابو حنیفه ، مالک ، شافعی و احمد حنبلی حضرتلرندن عبارتدر . بناءً عليه زمانزده اشبو ائمه اربعهدن غیری مجتهدلری تقلید و مذاهب متروکه ایله عمل جائز اولماز . « دیورلر » .

لکن بر مسئلهده بر مجتهدک رأینی بیلمک و آنکله عمل ایتمک ایچون ، او مجتهدک بوتون مسائل حقنده اوصورتله مدون بر مذهبی بولونمق شرط اولدیغندن بوفکر دوغری دکلدر . بترکه او مجتهدک فکری معروف و هروجه ایله وثوق و اعتماد شایان بر کتابده ذکر و تثبیت ایدلمش اولسون . بر مجتهدک بویله معروف و معتبر بر کتابده اسميله برابر مذکور اولان قولی ایله عمل ، مرحالده (ابن طابدين) و امثالی کتب فقیهده قائلی مذکور و معلوم اولمایان (قبل) قولی ایله عملدن اولادر .

بعض ملاحظات

(تقلید) بختك بدايتدن نه ايتنه قدر ذكر و تحقيق اولونان شو حقايق شرعيه نك همان جمله سی ، نظريات ساحه بنده قلوب عصر لردن بری تطبیقاتده اصلا نظر اعتباره آلتامشدر . تطبیقاتده فقها کویا اطراد و انتقام فقهی بی محافظه مقصدیله اك كوچوك والفرعی بر مسئلهده بیله منسوب اولدق قری مذهبدن آیرلامشدر . حتی سالف الذکر امام (عزالدین بن عبدالسلام) ك دیدیکی کبی ، شایان تعجیبرکه بونلر بعض مسائلده مخالفلرک دها قوتلی و پک جلی دلیلرینه مطلع اولدق قری حالده ، ینسه کندی مذهب لردن آیرلیه رق کندی امام لرینک بالنسبه ضعف اولان دلیلنی بر طاقم تأویلات بعیده ایله تأویله و امام لرینک خاطر ندن بیله کچمه بن بعض مطالعات جدیدیه ایله تقویه به چالشمیش لردر . بو غریب حالت روحیه بو قدرله قلامش ، یاواش یاواش پک چیرکین و جاهل لره بیله یا قشیه جق بر تمصب مذهبی حسنی او یاندیره رق ارباب مذاهب آراسنده قتال عمومی به بیله باعث اولمشدر . وقتیه بغدادده مختلف مذاهب منسوبینی آراسنده دقمانله تحدث ایدن مقاتلاتک سائقی ، هب بو تمصب مذهب لردر . زوالی امام (ابو جعفر طبری) ، مذهب خنیلئ موسی امام (احمد بن حنبلئ) حقیقه احتیاط سزلق ایدره رك ناصلسه آخرن دن برسوز قاچیرمش ، (او محددر ، فقیه دکلدرد .) دیمش اولدینی ایچون خنیلئر طرفندن انواع حقارته معروض قلوب خانه سندن دیشاری به چیقماز اولمشدی . حتی وقاننده جتازه سی خنیلئرک تعرضه دوچار ایدلهمك ایچون خانه سی دروننه دقن ایدلمشدی . [۱]

[۱] قال المحقق الكبير عمدة الفقهاء الشافعية الشيخ (عزالدین بن عبدالسلام) : « ومن العجب العجيب ان الفقهاء المقلدين يقف احدهم على ضعف ماخذ امامه لضيقه مدفعا وهو مع ذلك يقلده فيه ويترك من شهد الكتاب والسنة والافيسة الصحيحة لمذهبهم جمداً على تقليد امامه بل يخيل لدفع ظاهر الكتاب والسنة ويتأولها بالأوبلات البعيدة الباطلة تضالاً عن مقلده . » وقال ايضاً رحمه الله : « لم يزل الناس يسألون من اتفق من العلماء من غير تقييد المذهب ولا انكار على احد من السائلين الى ان ظهرت هذه المذاهب وتمتصبوها من المقلدين فان احدهم يتبع امامه مع بعد مذهبه عن الدلة مقلدا له فيما قال كأنه نبي ارسل وهذا نأى عن الحق وبعد عن الصواب لا يرضى به احد من اولي الابواب . »

ایشته بوذهنیت، بوتون عالم اسلامی استیلا ایتمش وزمانمزه قدر حکمران اولاکلشدرد. دوات عایه نك قانون مدنیسی دیمک اولان (مجله احکام، دلیه نك بوکونکی نقصانی ده، بوندن نشأت ایتمشدر. اکر (۱۲۸۴) بیک ایکی یوز سکسان دوت تاریخننده تشکل ایتمش اولان (مجله جمعیتی)، تعصب مذهبی بی ترک ایله مختلف مذاهب فقهیه دن زمانک احتیاجانه اوفو اولان احکامی اقتباس طریقنی تعقیب ایتمش اولسهیدی، بوکونکی مجله دن من کل الوجوه دها مکمل برقانون وجوده کنیرمش اولوردی. حالبوکه مع الاسف جمعیت مذکور، بویولی تعقیب ایتمش و صرف سوق تعصبه مره مسئله ده فقه حنفینک فروغندن آیرلامش اولدیفندن زمانمزه شویله دورسون، کندی زمانک بیله احتیاجنی تطمین ایده جک برقانون وجوده کتیره مه مشدر. بونک ایچوندرکه بوکون (مجله) نك برچوق جهندن تعدیلنه احتیاج شدید حس ایدلمکده در. نه کیم بعض جهتمری یوقاریده بالمناسبه ذکر اولومشدی.

مع هذا تشکر اولونورکه مملکتتمزده بوکونه قدر مردولو انکشاف علمی و تکامل فقهی به مانع اولان بو ذهنیت، صـوک زمانلرده قهـماً زائل اولمغه باشلامش و بناء علیه علمای حاضر نك بر قسم منوری طرفندن قوانین دواتک امر تنظیمنده مختلف مذاهب فقهیه دن اقتباس احکامه لزوم قطعی بولوندینی تقدیر ایدلمکده بولومشدر.

یوقاریده (خلیفه نك وضع قوانین خصوصنده درجه صلاحیتی) بحثنده شو سوزلری سـوبله مشدک : (دولتی عوام ناس منزله سـنه تنزیل ایتمه ملیدر . افرادک بر مذهب معینی التزام ایتمه سـنده بر وجوب شرعی و بالزوم سیاسی تصور اولونه بیلیر . فقط حکمت تشریحه و مقاصد شارع نظرأ دولت حقنده اوله بر وجوب و بویله بر لزوم تصور اولوناماز. حالبوکه بحث آئیده اضاح اولونه جنی اوزره افرادک بیله معین بر مذهب فقهی بی التزام ایتمه سی شرعاً واجب دکلدرد.

وقال الامام (ابو شامة) یبني لمن اشتغل بانفعه ان لا يقصر على مذهب امام ويعتقد في كل مسألة صحة ما كان اقرب الى دلالة الكتاب والسنة المحكمة وذلك سهل عليه اذا كان اشق معظم العلوم ويحتمل التعصب .. [كذا في (عقد الجيد) لاندلوی]

نته کیم مذهب موجوده نك ضررندن اول ، افراد زمانمزده اولدینی کبی معین بر مذهبه سالک دکلمردی .

افراد حقنده ثابت اولمایان شو وجوب ، حکومت حقنده ناصل تصور اولونه بیلیر؟ حکومت ایشی افراد ایشی دکلمرد. افراد کندی خصوصی ایشلرینده معین بر مذهبی کندیلرینه دستور العمل اتخاذ ایده بیلیرلر و شخصلرینه منحصر قالیر . ذات حضرت پادشاهی ده شخص هایونلرینه عائد اولان خصوصانده بوصورتله حرکتده مختاردر. لیکن امور دولتی تدویرده حال وزمانک ایجاباتی ، ملنک و هر صنف خلقک احتیاجاتی ، خلاصه دولت و ملنک ترقی و تعالیسی نه کبی شیرله متوقف ایسه ، آنلری کمال دقت و بصیرتله نظر اعتباره آلازق آکا کوره اتخاذ تدابیره شرعاً ووظیفهً مجبوردر . (شیمدی بو تقلید بختنده ذکر اولمان مسائل و تحقیقاتی دقتله وانصاف ایله مطالبه ایدنلر ، بو سوزلرک نه قدر بحق اولدینی تصدیق ایدرلر سانیرم .

اوت ، بیلیرم : مملکتتمزده عالم کچینن بر طاقم جاهل و حقایق شرعیهدن کلیاً غافل اصحاب تعصب واردر که تعصب اونلرک ایلیکلرینه ایشله مش و قلبلرینک اک درین گوشه لرینه قدر کونک سالمش اولدینندن ، اونلر بزم بو سوزلر مزنی تسلیم ایتمزلر . ذاتاً بزمده سوزلریمز اونلره دکل ، حسن انصاف ایله متصف و نور عرفان ایله منور اولان اصحاب اذعاندرن . او کیلر حقایق ثابتینی دلائل ایله دکل ، وقایع و زمان ایله تصدیق ایدرلر . لیکن قورقارم که اونلر تقدیر و تصدیق ایدنجه به قدر حکومت الجهای ضرورتله آوروپا قانونلرینی بالترجمه تطبیقه مجبور اوله جقدر . نته کیم (تجارت) ، (جزا) و (اصول محاکمه) قانونلرینی اوتصورتله پامشدر . ایشته اوزمان کوزلر آجیلاجق و بک آجی نامتلر حسن ایدیلرک اما ، ایش ایشدن کچمش بولونه جقدر .

ایشینک عاقبتی حاتله درپیش کرک

کار اولده کئی حاقبت اندیش کرک [۱]

فہرست سجز اول -

۴ علم اصول فقہ تاریخ و صورت ظہور و تکیس حقنہ مدر - دور رسالت

۱۲- دور اصحاب ۵ اصول فقہ

۱۷- استطراد - ۲۰ کتاب سیاست القضا - ۲۴- جمع قران بترتیب مصاحف

۲۱- دور تابعیندہ اصول فقہ

۳۴- دور مجتہدیندہ اصول فقہ - ۵۰- مؤلفات اصولیہ -

۶۱- فصل ثانی - اصول فقہ تعریفی موضوعی غایہ سی قواعدی

۷۲- علم اصول فقہ موضوعی

۷۵- ادلہ شرعیہ - ۷۶- احکام شرعیہ احکام تکلیفیہ احکام وضعیہ

۷۶- اباحہ شرعیہ و اباحہ اصلیہ

۸۱- حرام لعینہ و حرام لغيرہ

۸۵- اصول فقہ غایہ سی

۸۷- اصول فقہ قواعدی

۹۴- فصل ثالث - بعضی مباحث معنہ و اساسات متقدمہ - دین و شریعت -